

The background image is a photograph of a person's hands and arms digging in the soil with a shovel. A large, gnarled tree root is prominent in the foreground, extending from the left towards the center. The entire image has a teal or blue color overlay.

# THUTO LE HO PHELA BOPHELO BO HALALELANG

# **THUTO LE HO PHELA BOPHELO BO HALALELANG**

Shepherds Global Classroom e teng ho hlomella 'mele oa Krete ka ho fana ka lenaneo-thuto bakeng sa baetapele ba ntseng ba hola ba Bakreste lefatšeng ka bophara. Re ikemiselitse ho atisa mananeo a koetliso ea matsoalloa a moo ka ho beha thupelo ea lituto tse 20 matsohong a bakoetlisi ba moea naheng e 'ngoe le e 'ngoe ea lefatše.

Thupelo ena e fumaneha ho nkoa mahala marang-rang ho <https://www.shepherdsglobal.org/courses>

Mongoli ea etelletseng pele: Dr. Randall McElwain

Copyright © 2023 Shepherds Global Classroom

E fetoletsoe puong ea Sesotho ho tsoa ho Khatiso ea Boraro ea Senyesemane. Litokelo tsohle li sirelelitsoe.

Lisebelisuo tsa mekhatlo ea boraro ke litokelo tsa molao tsa beng ba tsona 'me li arolelanoa tlas'a lilaesense tse fapaneng.

Ka lebaka la lithibelo tsa litokelo tsa molao, litemana tsa Bible ha li ea kenyeletsoa bukeng ena. Litšupiso tsa Bible li fanoe ka mabitso a libuka tse sebelisoang ho Contemporary Southern Sotho Bible (City Bible Foundation). Ka kōpo, sebelisa phetolelo efe kapa efe ea Bible e fumanehang ho bala litemana tsa Bible thutong ena.

#### **Tsebisoe ea Litumello:**

Thupelo ena e ka hatisoa le ho ajoa ka bolokolohi ka mokhoa oa khatiso le oa 'digital' tlas'a tataiso e latelang: (1) Litaba tsa thupelo li kanna tsa se ke tsa fetoloa ka tsela leha e le efe; (2) Likopi li ke ke tsa rekisoa bakeng sa phaello; (3) Litsi tsa thuto li lokolohile ho sebelisa / ho kopitsa thupelo ena, leha li lefisa litefiso tsa thuto; le (4) Thupelo e ke ke ea fetoletsoa ntle le tumello le tlhokomelo ea sehlopha sa Shepherds Global Classroom.

# Lethathamo la Tse Kahare

Thuto ka Kakaretso .....	5
(1) Botle ba Khalalelo .....	7
(2) Khalalelo Ke Likamano.....	23
(3) Khalalelo ke Setšoantšo sa Molimo ho Motho .....	31
(4) Khalalelo ke ho Khetheha.....	43
(5) Khalalelo ke Pelo e sa Arohanang .....	61
(6) Khalalelo ke Ho Loka .....	73
(7) Khalalelo Ke Ho Rata Molimo .....	85
(8) Khalalelo ke Ho Rata Oa Heno .....	101
(9) Bophelo bo Halalelang Bo Pheloa ka Ho Tlala ka Moea.....	121
(10) Khalalelo ke Ho Tšoana le Krete .....	135
(11) Khalalelo ke Khalalelo e sa Senyehang le Molimo.....	157
(12) Na Bophelo ba Khalalelo Boa Khoneha?.....	169
Mosebetsi oa Qetellong .....	183
Lisebelisoa tse Khothaletsoang .....	185
Tlaleho ea Mosebetsi oa Moithuti oa Hae .....	187





# Thuto ka Kakaretso

## Tlhaloso ea Thuto

Thuto ena e fana ka tlhaloso ka Bibe le ea bophelo ba khalalelo boo Molimo a bo lebelletseng a bile a bo matlafatsa bakeng sa Mokreste.

## Tlhaloso le Tataiso ho Baetapele ba Sehlopha

Thuto ena e hlahloba thuto le ho kenya tšebetsong bophelo ba khalalelo. U lokela ho beha nako ea metsotso e 90-120 bakeng sa kopano ka 'ngoe ea sehlopha, hammoho le nako e eketsehileng bakeng sa ho etsa mesebetsi kante ho sehlopha.

Letšoao lena ► le bontša hore ke **mosebetsi oa ka sehlopheng**. Nako eohle ha u kopana letšoao lena, botsa potso/lipotso tse le latelang, ebe o lumella baithuti ho ba le puisano ho fana ka Karabo. Leka ho etsa bonnete ba hore baithuti bohle ba nka karolo lipuisanong. Ha ho hlokahala, u ka ba oa bitsa baithuti ka mabitso.

Kahare ho thuto tsena ho kotsitsoe litemana tse 'maloa ho tsoa Bebeleng. Baithuti ba lebelletsoe ho libatla le ho libala ka nako ea sehlopha. Bangoli ba thuto ena ba ikoahlaela hore, ka lebaka la litokelo tsa bangoli, re sitiloe ho hatisa litemana tse qotsitsoeng ka kotloloho lithutong tsa Sesotho. Sebakeng sa litemana tse qotsitsoeng ka kotloloho, ho fanoe ka litaello bakeng sa baithuti hore ba bale litemana tseo ka holim'a lentsoe ho tsoa Bibeleng ea bona.

Thuto ka 'ngoe e kenyeletse **mesebetsi** ea hae e 'meli.

1. **Moqoqo o mokhutšoanyane** ka sehloho se fanoeng. Ka tataiso ea moetapele oa sehlopha, moqoqo ona o kaba ka mokhoa oa ho ngoloa kapa oa puo ka sehlopheng kapela baithuti ba bang.
2. Mosebetsi oa hae oa baithuti oa **ho ithuta litemana ka hlooho**. Litemana tsena li lokela ho ikhopotsoa sehlopheng se seng le se seng. Qetellong ea thuto ena, baithuti ba lokela hore ba be ba ka tseba ho qotsa litemana tsohle tseo ba ithutileng tsona nakong ea thuto.

Sepheo se seng sa thuto ena ke ho lokisetsa baithuti ho ba litichere. Moetapele oa sehlopha o lokela ho fa baithuti **menyetla ea ho matlafatsa bokhoni ba bona ba ho ruta**. Mohlala, moetapele oa sehlopha ka linako tse ling a ka nea baithuti monyetla oa ho ruta karolo e khutšoanyane ea thuto ka sehlopheng.

Moithuti ka mong o tla hlophisa **mosebetsi oa qetellong**. Mosebetsi oa qetellong o tla etsoa ka melaetsa e meraro kapa lithuto tse ipapisitseng le sehlooho sa bophelo ba khalalelo. Melaetsa ena kapa lithuto tsena li tla ipapisa le likarolo tsa bibe le kapa mokhoa oa ho phela oa bophelo ba khalalelo. Ha ho khoneha, moithuti ka mong o tšoanela a rute

molaetsa ka mong kapa thuto a be a etse khatiso ea eona eo a tla e nea moetapele oa sehlopha.

Haeba moithuti a batla **ho fumana lengolo la setifikeiti le tsoang ho Shepherds Global Classroom**, o tlameha ho kena lihlopha a be a phethele mesebetsi ea baithuti ea hae. Hona le foromo e fanoeng qetellong ea thuto ena bakeng sa ho tlaleha mesebetsi ea baithuti ea hae e phethetsoeng.

# Thuto ea 1

## Botle ba Khalalelo

### Sepheo sa Thuto

Qetellong ea thuto ena, baithuti lokela ba be ba ka:

- (1) Ananela botle ba khalalelo ea Molimo le morero oa hae oa ho re halaletsa.
- (2) Hana mehopolo e fosahetseng ka khalalelo le ho lemoha mehopolo e tsoang ka Bibeleng mabapi le khalalelo.
- (3) Ba hlomelletsoe hore ba ka hlalose tsa molumeli e mocha na ho bolela eng ho halalela.
- (4) Tseba 1 Petrose 1:14-16 ka hlooho.

### Selelekela sa Thuto

Khalalelo ke e 'ngoe ea lintlha kholo tsa Bibe. Mangolong, Molimo o re bontšitse hore ke mang: ke Molimo o halalelang, (bala Levitike 19:2). Hape, Molimo ore bontšitse hore rona re ka ba bo mang ka mohau oa hae: re ka ba sechaba se halalelang, (bala 1 Petrose 1:15-16).

Ho molumeli e mong le e mong oa 'nete ho na le ho lapela khalalelo. Joalo ka bana ba Molimo, re laba-labela ho tšoana le eena. Ka masoabi, bohlo ba kereke ea morao-rao e amohetse mohopolo o fosahetseng oa hore khalalelo ha e khonahale. Ho e-na le hore ba batle ho tšoana le Krete, bohlo ba batho ba ipitsang Bakreste ba amohetse ho phela bophelo ba ho hloleha le ba boetsalibe. Ho e-na le ho phela bophelo ba tlhlo ba Bokreste, Bakreste ba bangata ba iphelela ka boemo ba "ho beha sebe taolong".

Lilemong tse ka holimo ho lekhlo tse fetileng, John Hyde, moromuoa e moholo naheng ea India, o ile a re, "Seo re se hlokanang tšing ena ke tsoseletso ea khalalelo." Haeba e ne e le 'nete ka nako eo, hona ho bolela hore le haajoale e sa ntse e le 'nete lefatšeng lena le tletseng sebe la mongoaha-kholo ona.

Haeba khalalelo e bohlokoa hakaalo ho Molimo, re lokela ho botsa hore, "Ho bolela eng ka khalalelo?" Haeba khalalelo e laetsoe Mangolong, re lokela ho botsa hore, "Na khalalelo e khona ho pheleha?"

Thutong ena re tla ithuta hore na Molimo o bolela eng ka seo a se laetseng ho 1 Petrose 1:16. Joalo ka ha re utloisisa molaetsa oa khalalelo o ka Bibeleng, re tla bona hore bophelo ba khalalelo bo ka khoneha ho Mokreste e mong le e mong. Thuto e 'ngoe le e 'ngoe e tla kenyeletsa lintlha tse tharo:



1. Re tla ithuta tlhaloso ea mantsoe a hlahang Bibeleng joalo ka *khalalelo*, *ho halaletsoa* le *ho phetheha*. Karolo ena ke ea thuto ea khalalelo ho latela Bibele.
2. Re tla ithuta ka likarolo tse ka sebetsehang hore ho pheloe khalalelo. Re tla ithuta seo Bibele e se rutang ka bophelo ba khalalelo, ho hloeka ha pelo, le ka moea o tšoanang le o bileng ho Krete.
3. Re tla talima bophelo ba Mokreste ea bontšang hore na ho bolelang ho halalela. Re tla bona hore na motho ea halalelang o etsa lintho joang bophelong ba hae ba letsatsi le letsatsi.

### **Litemana tsa ho Baloa le ho Buisana ka Tsona**

Pele le tsoela pele ka thuto ena, balang ka hloko e 'ngoe le e ngoe ea litemana tse latelang ebe le buisana ka lipotso. Li tla hlahisa tse ling tsa litaba tsa sehlooho tseo re tla bua ka tsona lithutong tsena.<sup>1</sup>

- Bala Levitike 19:2. Ho ea ka temana ee, ke hobaneng Iseraele a ne a tšoanela ho halalela?
- Bala 1 Petrose 1:15-16. Balumeli ba lokela ho ba le boitšoarō bo joang?
- Bala BaHebheru 12:14. Ho latela temana ee, ke limelo life tse peli tseo Bakreste ba lokelang ho li phehella haeba ba batla ho bona Molimo?
- Bala 1 BaThesalonika 4:3-8. Molimo o biletsa molumeli e mong le e mong ho qoba libe life? Molimo o bilelitse sechaba sa hae ho eng?
- Bala Tshenolo 20:6. Ke semelo sefe sa semoea seo e leng sa batho ba tlang ho ba karolo ea tsoho ea pele?

### **Botle Ba Khalalelo**

- Ha u utloa ho hlaloso motho ka ho re "oa halalela," ke setšoantšo sefe se tlang mohopolong oa hao? Na ke setšoantšo se setle kapa ke se sebe? Hobaneng?

Moromuoa e mong o ile a etela Morena e mong ea holileng oa Afrika. Morena a mo botsa a re, "Mokreste ke eng?" Moromuoa a araba a re, "Mokreste ha a utsoe likhomo tsa sera sa hae. Mokreste ha a ikhapele mosali oa sera sa hae. Mokreste ha a bolae sera sa hae."

Morena eo a re, "Kea utloisisa. Ho ba Mokreste ho tšoana le ho tsofala! Ha ke sa le mocha, ke ne ke hlasele sera saka, ka se utsoetsa basali le likhomo tsa sona. Hona joale kaha ke se ke tsofetse 'me nka sitoa ho hlasela lira tsa ka; hona ho bolela hore ke Mokreste!"

Ka masoabi, sena ke seo batho ba bangata ba se nahanang ka molaetsa oa bophelo ba khalalelo. Ba nahana hore khalalelo ha se letho le fetisang feela lethathamō la libe tse

---

<sup>1</sup> Lipotso tsena li bokelletsoe ke Rev. Timothy Keep.

lokelang ho qojoa. Ba haelloa ke ho bona botle ba khalalelo ka moo e rutoang kateng Lentsoeng la Molimo.

### **Mehopolo e fosahetseng ka khalalelo**

Molimo ke Molimo o halalelang. Sechaba sa Molimo se tlameha ho halalela. Molaetsa ona ke oona oa sehlooho oa Bibehe. Leha ho le joalo, hona le litumelo tse ngata tse fosahetseng ka khalalelo.

- 1. Batho ba bang ba lumela hore ke batho ba 'maloa feela ba ka khonang ho halalela.** Ba arola Bakreste ka lihlopha tse peli. Sehlopha sa pele ke Bakreste ba ntseng ba le litumelong tsa bona, ba amohetse Krete joalo ka Mopholosi oa bona, empa ba sa tšepahalle ho utloa Molimo ka ho mo mamela Diketsong tsa bona le limelong tsa bona. Sehlopha sa bobeli se bopuoe ka Bakreste ba seng ba fihletse mokhahlelo o holimo – joalo ka baprista, baruti kapa bahalaleli. Ho ea ka mohopolo ona, ke Bakreste ba 'maloa feela ba halalelang.
- 2. Batho ba bang ba lumela hore re ka halalela feela ha re phela thoko le batho ba bang.** Lilemo tse ngata tse fetileng, ba bang ba "batho ba halalelang" ba ile ba ea lefelleng ho phela teng. Monna e mong o ile a qeta lilemo tse mashome a mararo a metso e supileng a phela sethaleng se holimo se phahametseng lefatše. Tumelo ea hae e ne e le hore re halaletsoa ke ha re qoba batho ba bang.
- 3. Batho ba bang ba lumela hore re tla halalela feela ha re se re hlokaletse.** Ba lumela hore re ka se phethahatse morero oa Molimo re ntse re le bophelong bona, empa re tla halaletsoa feela ha re se re hlokaletse. Ho ea ka tumelo ena, lefu ha se sera sa rona empa ke motsoalle oa rona. Ka lefu re qetella re fihletse morero oa Molimo ka sechaba sa hae.
- 4. Batho ba bang ba lumela hore re ka halalela ka ho latela melao e itseng.** Ba lumela hore re halaletsoa ke ho apara ka tsela e itseng kapa re latela lethathamo la lintho "tseo re lokelang ho li etsa le tseo re sa lokelang ho li etsa." Ba lumela hore khalalelo ke tsela eo re shebahalang ka eona kante, eseng pelo e fetohileng.
- 5. Batho ba bang ba lumela hore bopaki ba hore motho oa halalela ke ha ana le neo e khethehileng joalo ka ho bua ka lipuo kapa ho etsa mehlolo.** Ba lekanya khalalelo ka lipontšo le mehlolo, eseng ka bophelo bo halalelang.
- 6. Ea ho qetela, batho ba bangata ba lumela hore khalalelo ha e khonahale.** Ba lumela hore khalalelo ke ntho e ka lakatsoang eo Molimo a re neileng eona ele qholotso hore re leke ho etsa hantle ka ho fetisisa, empa ha se ntho e ka fihlelehang lefatšeng lena. Ho ea ka tumelo ena, ha hona motho ea ka fihlelang taelo ea Molimo ea hore re "halalele."

Le ha ho le joalo, taelo ea Molimo ea hore re halalele ke taelo eo a lebelletseng hore re e mamele. Molimo ke ntate ea lokileng; a ke ke a re laela ho etsa ntho e sa khoneheng ka

mohau oa hae. Ho halalela ke ho ba seo Molimo a re bopetseng hore re be sona. Ka matla a rona, re ke ke ra khona ho ba le pelo e halalelang, empa ka matla a Molimo, pelo e halalelang e ea fihleloa ke Mokreste e mong le e mong. Khalalelo e tsoa mohaung oa Molimo, eseng boitekong ba rona.

► Ke afe a maikutlo aa a fosahetseng ka khalalelo a fumanehang ka bongata sebakeng seo o sebeletsang ho sona? Na khalalelo e bonoa ele ntho e ntle mahareng a Bakreste ba tikoloho ea heno?

### **Setšoantšo seo Bibe e re Neang Sona ka Khalalelo**

Ho fapana le maikutlo a fosahetseng a boletsoeng kaholimo ka khalalelo, Bibe e bontša khalalelo e le ntho e ntle e bileng e ka fihleloang bakeng sa bana ba Molimo. Nahana ka lintho tse bitsoang tse halalelang ka Bibeleng. Ha ho le e 'ngoe ea tsona e mpe kapa e nyatsehang; li ntle ebile li ea khahleha.

- Semelo sa Molimo sa khalalelo se setle ebile se tletse khanya (Isaia 6:1, 3; Dipesaleme 105:3).
- Tempele ea Molimo le lintho tse halalelang tse neng li le ka tempeleng e ne e le lintho tse ntle (Luka 21:5, Isaia 64:11, Eksoda 28:2).
- Iseraele e ne e bilelitsoe ho ba sechaba se halalelang se tla hulela lichaba tse ling ho Molimo (Isaia 49:3). Khalalelo ea bona e ile ea hohela batho (1 Marena 8:41-43); ha ea ka ea ba lelekela thoko.<sup>2</sup>
- Kereke e biletsoa ho ba sechaba se halalelang (1 Bakorinthe 1:2, 1 Petrose 2:9). E lokela ho ba monyaluoa ea motle ea itlhophiselitseng monyali oa hae (Baefese 5:27, Tshenolo 19:7, Tshenolo 21:2).

Se seng le se seng sa litšoantšo tsena sea khahleha. Bibe e bontša hore khalalelo ea 'nete ha e hlekefetse hape ha e tšabehe. Ho e-na le hoo, ke mpho ea lerato e tsoang ho Ntate oa rona ea maholimong. Haeba re ka talima khalalelo ka tsela eo e hlileng e leng ka eona, re tla tlameha ho lapela ho ba le pelo e halalelang esita le bophelo ba khalalelo. Haeba re ka ruta khalalelo ka tsela eo Bibe e e rutang ka eona, sechaba sa habo rona se tla tlameha ho lapela pelo e halalelang le bophelo ba khalalelo. Khalalelo ke mpho e ntle e tsoang ho Ntate ea lerato.

---

<sup>2</sup> U ka re, “Re ka reng ka bafarisi? Ba ne ba nkiloe e le batho ba halalelang, feela khalalelo ea bona e leleka batho ho Molimo.” Boithutong bona re tla bona hore khalalelo ea Bafarisi ene e se eona. Ho loka ha bona ene e le hoa kantle feela e se hoa 'nete.

## **Botle Ba Khalalelo Bo Bonahala Tiholehong ea Molimo ea Mathomo**

### **Molimo o Entse Lefatše le Phethehile**

Ho qala ka Edene, serapa se setle. Ak'u nahane ka litholoana tse monate ka ho fetisisa tseo u kileng oa li ja; litholoana tsa Edene li ne li fetisa tseo ka monate. Nahana ka palesa e ntle ka ho fetisisa eo u kileng oa e bona; lipalesa tsa Edene li ne li le ntle ho fetisa tseo. Molimo o entse lefatše le phethehile, lefatše le neng le sa angoa ke sebe. O le entse le se na bohloko, meokho, kapa lona lefu.

Taba e bohlokoa ka ho fetisisa ke hore, Molimo o entse lefatše le nang le setsoalle se tebileng lipakeng tsa Molimo le motho. Ho ne ho se letho le arohantseng motho le 'Mopi oa hae. Letsatsi le letsatsi, Molimo o ne a etela Adama le Eva. Ha ho na sebopuo se seng se neng se e-na le monyetla o joalo. Molimo o bopetse motho ho ba le likamano tse khethehileng le eena. Serapeng sa Edene ho ne ho e-na le Khotso e phethehileng e lipakeng tsa Molimo le motho.

### **Satane o Sentse Lefatše le Phethehileng la Molimo**

Satane o ne a batla ho senya lefatše lena le phethehileng. Satane o ne a hloile lintho tsohle tseo Molimo a li hlolileng. Kaholimo ho tsohle, Satane o ne a hloile setsoalle se tebileng se neng se le lipakeng tsa Molimo le motho. O ne a ikemiselitse ho senya likamano tseo tsa lerato le ho tšepana.

Satane o ne a sitoa ho senya motho ka kotloloho, kahoo a ikemisetse ho senya likamano tsa Molimo le motho. Satane o ne a tseba hore Molimo oa halalela hape o entse motho ka setšoantšo sa hae. Satane o ile a batla ho senya setšoantšo sa Molimo se halalelang se ho motho. Molimo ea halalelang le motho ea halalelang ba ne ba tla ba le likamano tse ke keng tsa khaola ke letho, empa Satane o ne a ka khona ho senya likamano tsena ka ho leka motho hore a etse sebe.

Satane o ile a etela Eva ka sebopeho sa noha. Noha e ile ea tliša pelaelo mabapi le taelo ea Molimo. Bala potso ea noha ka taelo ea Molimo ho Genese 3:1. O ne a batla ho susumelletsa hore Eva a belaele ho loka hoa Molimo. Bala karabo ea Eva ho Genese 3:2–3.

Noha e ile ea beha Molimo molato ka ho re ha a batle Adama le Eva ha ba natefeloa. Bala karabo ea noha le moleko oa boikakaso ho Eva ho Genese 3:4–5.

Eva o ile a ja tholoana, eaba o fa le Adama, 'me le eena a ja. Adama le Eva ba ne ba tseba hore ba tlotse molao oa Molimo. Ha Molimo a e-tla serapeng, ba ne ba soabile 'me ba ipatela eena. Setsoalle sane se tebileng se neng se le lipakeng tsa Molimo le motho se ile sa senyeha.

### **Molimo ha a ka a Tela 'Popo oa Hae**

Ka lebaka la sebe sa bona, Molimo o ile a lelekela Adama le Eva kante ho serapa sa Edene. Sebe se ile sa khaola likamano lipakeng tsa Molimo le motho. Sebe se ile sa senya

setšoantšo sa Molimo se neng se le ho motho. Empa ka lebaka la lerato la hae, Molimo ha a ka a tlohela motho maamong ao a hlobaetsang. Molimo o ne a ka be a ntse a itse, "Adama, ke uena ea bakileng mathata ana. Ke taba ea hao! 'Na kea itsamaela." Ho e-na le ho etsa joalo, Molimo ea lerato o ile a fetoha karolo ea lefatše la rona 'me a fana ka pheko ea libe tsa rona.

Pheko eo e ne e kenyelelitse tsela ea tšoarelo. Molimo o hlahisitse tsela ea ho khutlisetsa likamano tsa Molimo ea halalelang le motho ea oeleng boemong ba pele. Esale thuto ea kereke e le e re'ng, "Baetsalibe ba ka lokisa litaba le Molimo." Ka sefapano, libe tsa rona li ka tšoareloa.

Tsena ke litaba tse monate! Empa ka nako tse ling kereke e lebala karolo e 'ngoe ea pheko ena ea Molimo. Pheko ea Molimo bakeng sa sebe e kenyelelitse eseng feela tsela e isang tšoarelong, empa hape le tsela ea puseletso. Molimo o fane ka tsela ea ho busetsa setšoantšo sa hae ka hare ho motho.

Molimo o ne a sa khotsofala ke hore a ka re, "Le ka lokoloha kotlong ea sebe, empa le ke ke la lokoloha matleng a sebe." Che! Molimo o fane ka tsela eo motho a ka halaletsoang ka eona. Molimo o ne a tsamaile serapeng le batho ba halalelang; a ke ke a tsamaea le baetsalibe. Molimo o batla likamano le sechaba sa hae, ke kahoo a entseng tsela ea ho re etsa hore re halalele.

Mangolong ka kakaretso, re bona Molimo a sebeletsa ho etsa sechaba se halalelang, seo a ka bang le likamano le sona. Molimo ha a re, "Kea tseba hore le baetsalibe, empa ke tla koala mahlo a ka khahlanong le libe tsa lona, ke nke eka le lokile." Ho e-na le hoo, Molimo o tšepisa ho halaletsa sechaba sa hae.

► Bala Deuteronomya 28:9.

Molimo o batla ho halaletsa sechaba sa hae. Ona ke oona morero oa Molimo ka sechaba sa hae. Bala seo Molimo a se tšepisang hore sechaba sa hae se tla bitsoa sona ho Isaia 62:12.

### **Botle ba Khalalelo Bo Bonahala Semelong sa Molimo**

Ka lebaka la ho oela, motho o ne a se a sa halalele. Re ile ra phakisa ra lebala semelo sa Molimo sa khalalelo. Molimo o ne a re bopile ka setšoantšo sa hae. Empa joale, rona re iketselitse melingoana ka setšoantšo sa rona – mohono, lehloeo, esita le boikhohomoso.

Sechaba sa Babilona se ne se bolela pale ea Merodake eo e bileng molingoana o ka sehloohong ka ho bolaea 'ma'e. Bagerike ba ne ba bolela pale ea Jupiter e neng a e-na le linyatsi tse ngata. Baroma ba ne ba bolela pale ea Bacchus, molingoana oa botaoa le bofebe.

Melingoana ena e ne e sa halalele. Batho ba neng ba khumamela melingoana ena ba ne ba tšoana le eona melingoana eo ea bona. Ba ne ba bua mashano, ba utsoa, ba bile ba qhekella joalo ka hamelingoana ea bona e ne e le leshano, e utsoa ebile e qhekella. Batho ba baetsalibe ba ile ba iketsetsa melingoana ea baetsalibe. Kahoo, melingoana ena le eona e

lumella batho hore re ka tsoela pele ka libe tsa rona. Re ile ra fetohela sebopehong sa melingoana eo re neng re e khumamela.

Jehova ha a joalo ka melingoana ena ea bohata. Molimo oa halalela. Ka makhetlo-khetlo, mangolo a paka khalalelo ea Molimo. Ka mora ho tšela Leoatle le Lefubelu, sechaba sa Iseraele se ile sa rorisa Molimo oa sona ea halalelang, (bala Eksoda 15:11).

► Bala pina ea mongoli oa Dipesaleme ho Dipesaleme 22:3, le seo a ileng a bitsa Molimo ka sona ho Dipesaleme 71:22; Dipesaleme 78:41; Dipesaleme 89:18. Iseraele e ne e rorisa Molimo ka lebaka la khalalelo ea hae.

Baprofeta ba pakile hore Molimo oa halalela Baporofeta le bona ba ile ba bitsa Molimo ka lebitso leo le tšoanang le leo bapesaleme ba neng ba mo bitsa ka lona (Isaia 5:19; Isaia 10:20; Jeremia 50:29; Jeremia 51:5; Ezekiele 39:7). Bonyane bala kamoo Isaia a neng a hlomphe Molimo kateng ho Isaia 57:15. Khalalelo ke semelo sa Molimo hoo Molimo a ikanang ka eena (Amose 4:2; Amose 6:8). Habakuke o pakile hore Molimo o na le mahlo a hloekileng ho bona bobe (Habakuke 1:13). Baporofeta ba ne ba tseba hoba Molimo oa halalela.

► Bala seo seraferimi ba se binelang ho Isaia 6:3, le seo Johanne Mosenolehi a ileng a se bona hore libopuo tse 'nè li se bina ha li ntse li rorisa Molimo ho Tshenolo 4:8. Molimo ke Molimo o halalelang. Leholimong, ho khumamela Molimo ke ho keteka khalalelo ea hae.

### **Botle ba Khalalelo Bo Bonoa Morerong oa Molimo Bakeng sa Sechaba sa Hae**

Molimo oa halalelang o bopile motho sebakeng sa ho ba le likamano le eena, empa sebe sa rona se re arohantse le Molimo. Leha hole joalo, Molimo o ne a ikemiselitse ho busetsa likamano tsa hae le sechaba sa hae. Kaha ke feela batho ba halalelang ba ka lulang boteng ba Molimo o halalelang, o hlahisitse tsela ea ho re halaletsa. Molimo o rutile seo khalalelo e se bolelang ho batho ba neng ba sa halalele. Ho na le likarolo tse peli tšebetsong ena:

1. Molimo o rutile motho semelo sa Molimo o halalelang. Merodake, Jupitere, le Bacchus ba ne ba le matla empa joale ba se na boitšoarō. Molimo o iponahalitse e le Molimo ea matla a bile a halalela.
2. Molimo o rutile motho libopeho tsa sechaba se halalelang (Levitike 19:2). Ka lebaka la hobane Molimo oa halalela, le sechaba sa hae se lokela ho halalela.

Isaia o rutile sechabeng sa baetsalibe. Sebe se ne se sentse botle ba sechaba sa Molimo. Ho tloha ho sechaba sa Molimo se khethiloeng, Iseraele o ne a oele ho fihlela boemong bo soabisang ba ho ba sechaba se hapiloeng se isitsoeng kholehong. O ne a se a se na bokhabane; e ne e se ele lekhoba le hlabisang lihlong. Empa Isaia o ile a bona e sa le pele letsatsi leo ho loka ha Iseraele ho hlahellang joalo ka khanya. Ka letsatsi leo, Iseraele e tla ba moqhaka o khanyang letsohong la Jehova (Isaia 62:1-3).

Batho ba sitoang ho utloisisa molaetsa oa khalalelo o ka Bibeleng ba atisa ho hlalosa khalalelo ka tsela ea molao, litalo tse thata, kapa litšobotsi tse tiileng. Ena ha se tsela eo

Bibele e talimang khalalelo ka eona. Ho e-na le moo, ho halalela ke ho bontša botle ba khalalelo ea Molimo. Ho halalela ho fana ka tokoloho e tletseng khotso ea ho phela ka likamano tse tebileng le Molimo ea halalelang. Ka hara Bibele, khalalelo ha e hlahelle e le lentsoe le tšosang; empa ke lentsoe le bontšang thabo le botle!

Ka hare ho Bibele, Molimo o senola semelo sa hae sa khalalelo. Kamorao ho moo, Molimo o ruta sechaba sa hae tsela ea ho phela bophelo ba khalalelo. E bohlokoa ka ho fetisisa, Molimo o bontša hore o tla nea sechaba sa hae matla a ho ba seo a re bilelitseng ho ba sona. Ka mohau oa hae, Molimo a ka etsa sechaba se halalelang. Molimo ha iphapanyetse sebe ka hara bana ba hae; ho e-na le hoo, oa re halaletsa. Molimo ea halalelang o laba-labela likamano le sechaba se halalelang.

### **Ho Bolela Eng Ho Halalela?**

Ka Lentsoe la hae, Molimo o ratile sechaba sa hae hore na ho halalela ho bolela eng. Ha Molimo a ne a qala ho ruta sechaba sa hae, ba ne ba sa tsebe letho ka khalalelo. Ba ne ba e-so bone Molimo ea halalelang kapa sona sechaba se halalelang. Molimo o ile a ruta seo khalalelo e se bolelang joalo feela ka ha re ruta ngoana puo.

Ha re ruta ngoana e monyane, re supa setulo ebe re re, "Setulo." Re supa koloi ebe re re, "Koloi." Hanyane ka hanyane, ngoana o qala ho ithuta seo mantsoe a se bolelang. Ngoana o ithuta seo lentsoe lena "lerato" le se bolelang ka ho le utloa ho tsoa leratong la 'ma'e. Ngoana o ithuta seo lentsoe lena "toka" le se bolelang ha motsoali a fana ka kotlo e lokelang ho se mamele.

Molimo o ile a ruta seo khalalelo e se bolelang ka tsela e tšoanang. Joalo ka sechaba se oeleng, re ne re sa tsebe seo khalalelo e se bolelang. Butle-butle eaba Molimo o koahollela sechaba sa hae seo khalalelo e se bolelang ka litšoantšo tsa lentsoe tse hlahosang hore na ho bolela eng ho halalela. Ha re batlisisa tlhaloso ea lentsoe khalalelo ka Bibeleng, re tla bona:

- 1. Ho halalela ke ho boloka likamano tse tebileng le Molimo (1 Bakorinthe 6:16-18).** Banna ba halalelang bukeng ea Genese (batho ba kang bo-Henoke le Abrahamana) e ne ele banna ba neng ba na le likamano tse tebileng le Molimo. Ba ne ba tsamaea le Molimo. Ka ho bontša bophelo ba banna ba halalelang, Molimo o ile a senola hore motho ea halalelang ke motho ea nang le likamano tse tebileng le Molimo.
- 2. Ho halalela ke ho bonahatsa setšoantšo sa Molimo (BaKolose 3:10, 2 Bakorinthe 3:18).** Khalalelo ha se semelo se bopelletsoeng le motho. Khalalelo ke semelo sa Molimo a 'notši. Iseraele o ne a bilelitsoe ho ba ea "Halalelang, hobane kea halalela, 'na Jehova, Molimo oa lona" (Levitike 19:2). Ho halalela ho bolela ho bontša setšoantšo sa Molimo maphelong a rona. Ho halalela ho bolela ho tšoana le Molimo



3. **Ho halalela ho bolela ho behelloa kathoko u khetheloa Molimo (Eksoda 29:44, Levitike 20:26).** Lekhetlo la pele leo lentsoe lena *khalalelo* le sebelisitsoeng ka hara Bibe, le hlalosa letsatsi le beheletsoeng kathoko bakeng sa mesebetsi e khethehileng ea Molimo (Genese 2:3). Letsatsi la Sabatha le ne le halalela; le ne le khethiloe kapa hona ho behelloa kathoko ho matsatsi a mang a tšeletseng. Joalo ka ngoana ea ithutang se boleloang ke lentsoe "setulo," Molimo o ile a supa letsatsi la bosupa eaba o re, "Le ea halalela."
4. **Ho halalela ho bolela ho se be le pelo e arohaneng (1 Marena 8:61).** Kahar'a Libuka tsa Nalane, Molimo o sebelisitse lentsoe lena *phethehileng* ho hlalosa batho ba neng ba se na pelo e arohaneng. Ho halalela ho bolela ho ba le mohopolo o le mong feela boitlamong ba rona ho Molimo. Pelo e halalelang e rata Molimo e se na likarohano tse itseng ho eona.
5. **Ho halalela ke ho phela bophelo bo lokileng (BaKolose 1:22, Tite 2:12, 14).** Baporofeta ba ratile batho ba neng ba nahana hore, "Re khumamela ka tempeleng hape re etsa mahlabele. Rea halalela." Baprofeta ba ile ba bontša hore ha hoa lekana ho latela meetlo. Ho halalela ho bolela ho phela ka ho loka ho Molimo le ho batho. Batho ba halalelang ba etsa toka, ba rata mohau, hape ba tsamaea le Molimo ka boikokobetso (Mikea 6:8).
6. **Ho halalela ke ho ba le lerato le phethehileng ho Molimo le oa heno (Mattheu 22:36-40).** Li-Evangeli li bonahatsa tšenolelo ea Molimo ka botlalo ka khalalelo e bileng bophelong ba Jesu Krete. Jesu o bile le pelo e halalelang e neng e ikokobelitse ka botlalo thatong ea Ntate. Jesu o ne a na le matsoho a halalelang a neng a sebetsa ka lerato le phethehileng ho batho ba bang. Jesu o bontšitse hore ho halalela ho bolela ho rata Molimo le oa heso joalo ka ha ke ithata.
7. **Ho halalela ke ho phela ka ho botlalo ba Moea o Halalelang (Ezekiele 36:27, Baefese 5:18).** Bukeng ea Diketso re bona mohlala oa Bakreste ba neng ba tlatsitsoe ka Moea oa Molimo. Ka matla a Moea o Halalelang, ba phetse bophelo ba khalalelo. Re halalela ha feela re phela ka ho botlalo ba Moea o Halalelang.
8. **Ho halalela ke ho ba joalo ka Krete (Baroma 8:29).** Jesu e ne e le mohlala o motle oa pelo e halalelang le matsoho a halalelang. Li-Epistole li bontša hore ho ka khoneha le ho Mokreste e mong le e mong ho latela mohlala oa Jesu Krete. Li-Epistole li fana ka litataiso tse phelehang bakeng sa ho phela bophelo bo

"Re tlameha ho halalela, hobane ona ke 'ona morero o le mong o moholo oo Krete a tšileng lefatšeng ka oona. Ho bua ka batho ba pholosoang molatong oa sebe ntle le ho pholosoang pusong ea sona lipelong tsa bona ke ho hanana le bopaki ba mangolo ohle.

Jesu ke Mopholosi ka ho feletseng. Ha a tlose molato oa sebe feela; o roba le matla a sona."

- E hlalositsoe ho tsoa ho  
Bishop J.C. Ryle

halalelang letsatsi le letsatsi. Mangolo ana a re ruta hore re ka phela joang hore re be sechaba se tšoanang le Krete.

- 9. Khalalelo e re lokisetsa ho bona Molimo (1 Johanne 3:2-3, BaHebheru 12:14).** Serapeng sa Edene, Molimo o ne a lokisitse serapa seo batho ba halalelang ba neng ba tla phela ka likamano tse phethehileng le Ntate oa rona. Ka lebaka la sebe, re ile ra lelekela kante ho serapa. Empa Molimo ha a ka a lahla morero oa hae. Bukeng ea Tshenolo, re bona hore sechaba sa Molimo se tla bona sefahleho sa hae ka letsatsi le leng. Ha ho na motho oa moetsalibe le ea mong ea tlang ho mo talima, empa Molimo o ntse a lokisa sechaba se halalelang se tlang ho phela ka ho sa feleng pela boteng ba hae. Ona ke oona morero oa Molimo ka sechaba sa hae.

### **Ha re Phethela: Molimo ea Halalelang o Biletsa Sechaba sa Hae ho halalela**

Dr. John Stott e bile e mong oa baetapele ba baholo ba Bokreste ba lekholo la mashome a mabeli la lilemo. Ho e meng ea melaetsa ea hae ea ho qetela, Dr. Stott o ile a bua ka morero oa Molimo bakeng sa sechaba sa hae.<sup>3</sup> Re bolokuo e ka mohau ka tumelo; re ntšuo e lefung ho ea bophelong. Hobaneng? Morero oa Molimo oa ho re pholosa ke ho re etsa ba tšoanang le Krete. Dr. Stott o ile a re, "Ho tšoana le Krete ke thato ea Molimo bakeng sa sechaba sa Molimo."

Mangolo a mararo a hlahang Testamenteng e Ncha a bontša kamoo kholo ea rona ho ea setšoanong sa Jesu lefatšeng e re lokisetsang ho ea phela le Molimo. Mangolo ana a bontša bohlokoa ba khalalelo bophelong ba molumeli.

### **Baroma 8:29 e sheba morao 'me e bontša morero oa Molimo oa ka ho sa feleng mabapi le bana ba hae:**

► Bala Baroma 8:29.

Morero oa ka bosafeleng oa Molimo ke hore re fetohela setšoantšong sa Mora oa hae. Ho tloha tšimolohong, morero oa Molimo e ne e le hore re etsa ba joalo ka Krete. Baroma 8:28 e tšepisa hore lintho tsohle li sebelisana hammoho molemo ho ba ratang Molimo. Tšepiso ena ke bakeng sa ba bitsitsoeng ka morero oa oona. Morero oa hae ke ofe? Morero oa Molimo o reriloeng esale pele ke ho etsa bana ba hae ka setšoantšo sa mora oa hae. Molimo o re pholoselitse ho re halaletsa.

"Molimo o na le qetello e le 'ngoe e reretsoeng moloko oa batho – khalalelo. Sepheo sa hae se le seng ke ho hlahisa bahalaleli. O tlile ho pholosa batho hobane O ba bopetse hore ba halalele."  
- Oswald Chambers

Paulosi o hopolitse Bakreste ba Kolose ka phetoho e hlollang eo Molimo a e entseng maphelong a bona, (bala BaKolose 1:21-22). Ka lefu la Krete, batho bana bao e neng e le

---

<sup>3</sup> John Stott Address at Keswick. (June 20, 2014). E nkuoe ho tsa <https://www.leightonfordministries.org/2014/06/20/john-stott-address-at-keswick/> December 20, 2019.

lira ho Molimo haajoale ba boelantsoe le Eena. Paulosi o tsoetse pele ho hopotsa balumeli bana morero oa Molimo oa ho ba boelanya le Eena: hore a tle a le hlahise pel'a oona le halalela, le se na letheba le molato (BaKolose 1:21-22).

Paulosi ha a re feela, "Le boelantsoe le Molimo hore le tle le eo qeta bosafeleng ba lona leholimong." Tsena ke litaba tse monate! Empa ha se litaba tse monate tse feletseng. Paulosi o re, "Le boelantsoe le Molimo hore le tle le halalele." Morero oa Molimo ke ho etsa hore bana ba hae ba halalele le hore ba hloke sekoli.

## **2 Bakorinthe 3:18 e sheba bojoale 'me e bontša tsela eo ka eona morero ona o fihleloang bophelong ba molumeli kajeno:**

► Bala 2 Ba-Korinthe 3:18

Ka matla a Moea o Halalelang, re fetoloa ho tloha khanyeng ho ea khanyeng. Morero oa Molimo o fihleloa ka ho fetoha hoa bana ba hae ka matla a Moea o Halalelang. Letsatsi ka letsatsi, re etsoa ba tšoanang le Krete ka ho fetisa.

## **1 Johanne 3:2 e talima bokamoso 'me e bontsa phethahatso ea morero oa Molimo qetellong:**

► Bala 1 Johanne 3:2.


Buka ea Tshenolo e talima letsatsi leo re tla talimana le Molimo sefahleho le sefahleho. Ka letsatsi leo, re tla tšoana le eena. Morero oa Molimo o tla phethahala ka ho feletseng le ka ho sa feleng. John Stott o phethetse ka ho re, "Re tla ba le Krete, re be joalo ka Krete, ka ho sa feleng."

Joalo ka Bakreste, ho phehella bophelo ba khalalelo ke ho itokisetsa letsatsi leo ka lona re tla bona Molimo 'me le morero oa hae maphelong a rona o phethahetse. Sena se lokela ho re etsa hore re laba-labele ka tieo ho hola khalalelong. Letsatsi le letsatsi re lula re fetoleloa setšoantšong sa hae ka ho fetisa pele.

Khalalelo ha se mohopolo a motho; khalalelo ke semelo sa Molimo. Kutloisiso ea rona ka khalalelo e ipapisitse le semelo sa Molimo se senotsoeng ka hara Bibe. Ha re batla ho eketsa hape le hape ho tšoana le eena, re sebelisana hammoho le morero oa Molimo oa ka ho sa feleng. Khalalelo ke morero oa Molimo oa ka ho sa feleng bakeng molumeli e mong le e mong. Joalo ka bana ba Molimo, re lokela ho ba le cheseho ea ho bona morero ona oa hae o fihletsoe lipelong esita le maphelong a rona.

## O Fumane Sephiri - Samuel Kaboo Morris

Ka selemo sa 1873, Samuel Morris<sup>4</sup> o ile a tsoalloa naheng ea Liberia, Bophirima ho Afrika e le Khosana Kaboo, mora oa Morena oa moloko oa moo. Eitse ha ntat'ae a hloloa ntoeng, Kaboo o ile a tšoaroa ke ba lireng, 'me ba batla tefo e itseng ho ba habo bakeng sa tokoloho ea hae. Ka letsatsi le leng, Kaboo o ile a bona khanya e bohale a ba a utloa lentsoe le e-tsoa leholimong le mo bolella ho baleha. Marapo a neng e mo fasitse a ile a oela faatše, 'me Kaboo a balehela ka har'a moru.



O ile a tsamaea ka har'a moru matsatsi a mangata ho fihlela a fihla toropong ea Monrovia. Toropong eo, mohlankana e mong o ile a memela Kaboo kerekeng. Ha Kaboo a etetse kereke eo, moromuoa sebakeng seo o ne a bolela pale ea tšokoloho ea Paulosi. Nakong eo a neng a bua ka khanya e kholo le lentsoe tse ileng tsa hlaha leholimong, Kaboo a elelloa hore lentsoe leo ke lona leo a le utloileng ha a le ka morung! Eaba hang o amohela Krete joalo ka Mopholosi oa hae, eaba oa kolobetsoa a ba a reoa lebitso la Samuel Morris.

Lilemong tse peli tse hlahlamang moo, Samuel Morris o ne a penta matlo ho iphelisa ha a ntse a tsoela pele ho ithuta Bible. O ne a e-na le thahasello haholo ea ho ithuta ka Moea o Halalelang le bophelo bo fumanoang ka matla a Moea. Kamor'a hore moromuoa a mo bolelle hore o se a mo ratile tsohle tseo a li tsebang, Morris o ile a mo botsa a re, "Uena tichere ea hau e ne ele mang?" O ile a mo bolella ka moruti oa Amerika ea rutang khalalelo ea bitsoang Stephen Merritt. A se na chelete esita le tefello ea leeto, Morris o ile a tsamaea ho ea bopalamelong ba likepe ho batla sekepe se eang Amerika. O ne a ikemiselitse haholo ho ithuta ka ho phela ka Moea.

O ile a robala lebopong la leoatle moo, a emetse sekepe. Ha sekepe se fihla, Morris o ile a kopa mokhanni oa sekepe ho mo palamisa ho ea Amerika. Mokhanni eo o ile a hana, empa hamorao, ba babeli ba basebetsi ba hae ba sekepeng ba ile ba baleha. Eaba mokhanni oa sekepe o bolella Morris hore a ka sebetsa sekepeng e le hore eena a tle a mo palamise ho mo isa New York. Ha leeto le ntse le tsoela pele, o ile a tšoaroa hampe ke basebetsi ba bang ba sekepe, 'me ba bile ba mo nea ho etsa mesebetsi e kotsi ka ho fetisisa. Leha ho le joalo, Samuel o ile a bontša lerato la Krete ho basebetsi-'moho sekepeng moo ho fihlela hore, ha sekepe se fihla New York, mokhanni le ba bang ba basebetsi ba sekepeng seo ba ne ba se ba sokolohile.

Ha Morris a fihla New York, o ile a fumana kereke ea Stephen Merritt, 'me a mo bolella ka tabatabelo ea hae ea ho ithuta haholo ka Moea o Halalelang. Monghali Merritt o ne a lokela ho ea kopanong, empa o ile a siea Morris kerekeng ka hore ba tla kopana mantsiboea a

---

<sup>4</sup> Setšoantšo: "Samuel Morris", *Samuel Morris: A Spirit Filled Life* (1921), e nkilo ho <https://commons.wikimedia.org/w/index.php?curid=39596012>, sechaba sa setjhaba.

letsatsi leo. Ha a khutla o ile a fumana Samuel a etelletse-pele kopano ea thapelo. Bosiung ba hae ba pele a le Amerika, Samuel Morris o ile a tisa batho ba ka bang mashome a mabeli ho Krete.

Stephen Merritt o ile a thusa Samuel Morris ho kena University ea Taylor e le hore a itokisetse ho ruta evangeli Liberia. Morris o fihlile university e Indiana a se na chelete, empa o ne a e-na le tšepo e feletseng ea hore Molimo o tla mo hlokomela. O ile a re ho Mookameli, "Ke kopa o mphe phaposi eo ho seng motho ea e batlang." Hamorao bosiu, baithuti 'moho le eena ba ne ba tla mo utloa a ntse a bua le Ntate oa ka. Tšepo ea hae e feletseng e ho Molimo e ile ea susumetsa baithuti bohle ba sekolo seo esita le likereke tse haufi.

Leha Morris a ne a rerile ho khutlela Liberia, Molimo o ne a e-na le morero o fapaneng. Ka lilemo tse peli tseo a fihlileng sekolong seo sa Taylor University, Samuel Morris o ile a shoa a bolaoa ke serame sa matšoafo. O ne a le lilemo tse mashome a mabeli feela, empa o ne a e-na le khotso ka morero oa Molimo. Samuel o ile a bolella mookameli oa university, "Ha se mosebetsi oa ka, empa ke oa hae. Ke phethile mosebetsi oa ka. O tla romella ba bang ba nphetisang ho ea etsa mosebetsi oa Afrika."

Bophelo ba Morris bo amme batho ba bangata hoo makholo a batho a neng a eme mebileng ho etsa litšebeletso tsa lepato la hae. Baithuti-'moho le eena ba 'maloa ba ile ba ea Afrika ho ba baromuoa, ba sebeletsa e le "ho hopola Khosana Kaboo." Mookameli oa University ea Taylor o ile a re, "Samuel Morris e ne e le moromuoa oa Molimo University ea Taylor. O ne a nahana hore o tlile mona ho itokisetse mosebetsi oa hae. Athe Molimo o ne a mo rometse ho tla lokisa University ea Tylor bakeng sa mosebetsi oa eona ho ea lefatšeng lohle. Bohle ba ileng ba kopana le eena ba ne ba makalitsoe ke tumelo ea hae e bobebe empa e hlolang ho Molimo."

Kajeno, sefika sa sehopotso sa lebitla la Samuel Morris se leng Fort Wayne, Indiana le baleha tjena:

Samuel Morris  
1873-1893  
Khosana Kaboo  
Letsoalloa la Afrika e Bophirima  
Ea Ileng a Tuma ka ho ba Mohlolo o Makatsang oa Bokreste  
Moapostola oa Tumelo  
Ea Kholisitseng ka Bophelo bo Tlatsitsoeng ka Moea

Bophelo bo bokhutšoanyane ba Samuel Morris bo bontša hore molumeli e mong le e mong a ka phela ka matla a Moea o Halalelang. Pelo e halalelang le bophelo bo halalelang ke morero oa Molimo bakeng sa molumeli e mong le e mong.

## Boikhopotso ba Thuto ea 1

(1) Botle ba khalalelo bo bonahala tlholehong ea Molimo ea mathomo. Molimo o hlolile lefatše le phethehileng le bile le se na sebe.

(2) Botle ba khalalelo bo bonahala semelong sa Molimo. Molimo ke Molimo o halalelang.

(3) Botle ba khalalelo bo bonoa morerong oa Molimo bakeng sa sechaba sa Hae. Leha sebe se sentse semelo sa motho, Molimo ha a ka a lahla morero oa hae bakeng sa sechaba se halalelang. Hore a tle a busetse likamano lipakeng tsa Molimo o halalelang le motho ea oeleng, Molimo o rutila:

- Hore Molimo ea halalelang o joang
- Hore na motho ea halalelang ke ea joang

(4) Ho na le maikutlo a mangata a fosahetseng mabapi le khalalelo. Oona a kenyeletsa ho re:

- Ke batho ba 'maloa feela ba ka khonang ho halalela.
- Re ka halalela feela ha re phela thoko le batho ba bang.
- Re tla halalela feela ha re se re hlokahele.
- Re ka halalela ka ho latela melao e itseng.
- Bopaki ba hore motho oa halalela ke ha ana le neo e khethehileng joalo ka ho bua ka lipuo kapa ho etsa mehlolo.
- Khalalelo ha e khonahale.

(5) 'Nete ka khalalelo e bobebe. Sena ke se boleloang ka ho halalela:

- Ho halalela ke ho boloka likamano tse tebileng le Molimo.
- Ho halalela ke ho bonahatsa setšoantšo sa Molimo.
- Ho halalela ho bolela ho behelloa kathoko u khetheloa Molimo.
- Ho halalela ho bolela ho se be le pelo e arohaneng.
- Ho halalela ke ho phela bophelo bo lokileng.
- Ho halalela ke ho ba le lerato le phethehileng ho Molimo le oa heno.
- Ho halalela ke ho phela ka ho botlalo ba Moea o Halalelang.
- Ho halalela ke ho ba joalo ka Krete.
- Khalalelo e re lokisetse ho bona Molimo.

(6) Mangolo a mararo a Testamente e Ncha a bontša bohlokoa ba khalalelo bophelong ba molumeli.

- Baroma 8:29 e bontša morero oa Molimo oa ka ho sa feleng oa ho re bopa ka setšoantšo sa mora oa hae.

- 2 Bakorinthe 3:18 e bontša hore morero oa Molimo o phetheha ha re fetoha letsatsi le letsatsi ho ea setšoantšong sa Krete.
- 1 Johanne 3:2 e bontša ho phethahala hoa morero oa Molimo; ha re bona Molimo, re tla ba joalo ka eena.

### **Kabelo ea Thuto ea 1**

(1) Ak'u nahane ka ha Mokreste e mocha a na ka re ho uena, "Ke balile ka Bibeleng hore Molimo o re biletsa ho halalela joalo ka ha a halalela. Taba eo e bonahala e sa khonehe! Ho bolela'ng ho halalela?" Ngola karabo ea leqephe le le leng bakeng sa molumeli enoa. Kopanong e hlhlamang ea sehlopha, moithuti ka mong o lokela ho bala karabo ea hae. Fana ka nako ho sehlopha ho buisana ka likarabo tseo.

(2) Qala thuto e latelang ka ho pheta 1 Petrose 1:14-16.

(3) Thuto ena e kenyelelitse mosebetsi oa ho qetela o lokelang ho finyeletsoa ka letsatsi la ho qetela la sehlopha. U tla lokela ho qala mosebetsi ona hona joale. Talima qetellong ea buka ena ho fumana lintlha tsohle ka mosebetsi ona.





## Thuto ea 2

### Khalalelo Ke Likamano

#### Sepheo sa Thuto

Qetellong ea thuto ena, baithuti lokela ba be ba ka:

- (1) Ananela hore Molimo o hlokomela likamano tsa letsatsi le letsatsi lipakeng tsa hae le sechaba sa hae.
- (2) Lemoha hore re halalela ka ho ba le likamano le Molimo, eseng ka boiteko ba botho.
- (3) Ba tšepahalle ho nka nako ea bona ba haha likamano tsa bona le Molimo.
- (4) Ba be ba hlomelletsoe hore ba ka thusa balumeli ba bang ho hola likamanong tsa bona le Molimo.
- (5) Tseba 1 Johanne 1:6-7 ka hlooho.

#### Abrahama: Monna ea Ileng a Tsamaea le Molimo

Iketsetse setšoantšo sa haeba u le lilemo li 75 'me u phela sechabeng se khumamelang melingoana, ebe hang-hang u utloa Molimo a buoa! U ne u ka arabela joang?

► Bala seo Molimo a ileng a se bua ho Abrahama ho Genese 12:1. "Tlohela tsohle 'me u ntatele!" Molimo ha a ka a bolella Abrahama hore o ne a tla mo isa hokae. O ile a re feela, "Ntatele."

Abrahama o ne a lumela Molimo 'me o ile a mo latela ho tloha Ure ho ea Kharane, le ho tloha Kharane ho ea Kanana. Abrahama o ile a tsamaea li-'maele tse kaholimo ho tse 1000 ka lebaka la ho mamela taelo ea Molimo.

Abrahama o ile a tšepa litšepiso tse neng li bonahala eka ha li khonahale. O ile a lumela hore Molimo o tla mo nea mora, leha ebile Sara a se a fetile lilemo tsa ho tsoala bana. O ile a lumela hore Molimo o tla mo nea lefatše la pallo, leha a ne a se na lefatše naheng ea Kanana. O ile a lumela hore Molimo o tla mo etsa sechaba se seholo, leha a ne a se na bana.

#### Thapelo Bakeng sa Khalalelo

"Morena, ke lahla meralo le merero ea ka,  
Litakatso tsohle tsa ka esita le litebello

'Me ke amohela thato ea Hao  
bakeng sa bophelo ba ka.

Ke nehelana ka bo-'na, ka bophelo  
ba ka, le ka tsohle tsa ka,

Ka ho feletseng ho Uena ka ho sa feleng.

Ntlatse u be u nkoahele ka

Moea oa Hau o Halalelang,

Ntšebelise kamoo u ratang kateng,

Nthome moo u batlang,

Sebetsa thato ea hau eohle bophelong  
ba ka Kahohle kamoo ho ka hlokoang kateng

Kajeno le ka ho sa feleng."

- Betty Stam

(Mo-shoela-tumelo naheng ea China)

Abrahama, monna ea neng a hlaha sechabeng se sa lumeleng ho Molimo, o ile a neoa lebitso la motsoalle oa Molimo (Jakobo 2:23). O ile a tsamaea le Molimo.

► Kopa ba bararo ba baithuti ba hau ho fana ka bopaki ba bona ba leeto la bona la ho tsamaea le Molimo ho fihlela mona. Leeto leo le qalile joang? Ke lintho life tseo ba ithutileng tsona leetong leo?

### **Libukeng tse Hlano tsa Pele ka Bibeleng: Ho tsamaea le Molimo**

Batho ba halalelang ba tsamaea le Molimo; ba nka nako le Molimo. Ha ba ntse ba tsamaea le Molimo, ba ntse ba eketsa ho tšoana le eena. **Ho halalela ho bolela ho tsamaea le Molimo, ho haha likamano tse tebileng le Molimo.**

Molimo o ne a tsamaea le Adama le Eva serapeng sa Edene. Kamor'a hore sebe se senye likamano tseo tsa ntlehali, Adama le Eva ba ile ba ipatela Molimo. Sebe se ile sa arohanya motho le Molimo.

Sebe se senya likamano le Molimo; sebe se senya likamano pakeng tsa batho; Adama one a beha molato ho Eva. Adama le Eva ba ne ba e-na le kabelo 'moho sebeng seo, empa sebe se ile sa senya likamano lipakeng tsa bona. Morero oa Molimo ke hore bana ba hae ba tsamae ka khotso le eena esita le batho ba bang. Morero oa Satane ke ho senya likamano tsa rona le Molimo esita le lipakeng tsa rona le batho ba bang.

Sebe se ile sa senya likamano lipakeng tsa Molimo le motho, empa Molimo o hlahisitse tsela ea ho busetsa likamano tseo. Lihlabelo li ne li hlahisa tsela ea ho boloka likamano le Molimo o halalelang. Ha re na ho khona ho halalela ka boiteko ba botho; re halaletsoa ke ho ba le likamano le Molimo o halalelang.

Testamente Ea Khale ho tloha qalong ho ea qetellong, re fumana mehlala ea batho ba halalelang, ba ileng ba tsamaea le Molimo. Ba ne ba se ba sa tsamae le Molimo serapeng se setle. Ka lebaka la sebe, batho ba ne ba se ba tsamaea le Molimo lefatšeng le fifetseng la sebe. Empa le kahare ho lefatše le silafetseng, ho oa khoneha hore motho a ka tsamaea le Molimo. Hona ke eona Khalalelo.

### **Ho Tsamaea le Molimo ho Hloka Boitšoarō**

Ho tsamaea haufi haholo le Molimo ho hloka boitšoarō ba hore o khone hore "che" ho litakatso tsa lefatše, (Tite 2:12). Josefa e ne e le molaoli oa ntlo naheng ea balichaba. Ke nakong eo a ileng a kopana le teko ea bohloka. Likamano tsa Josefa le Molimo li ile tsa laola Diketso tsa hae khahlanong le teko eno. Batho ba bang ba ka be ba itse, "Takatso ena ekare e monate, ke tlo natefelo." Ho fapana le hoo, bala seo Josefa eena a ileng a se bua ho Genese 39:9. Josefa o ne a sa ikemisetsa ho senya likamano tsa hae Molimo ka baka la litakatso tsa nama.

Ha re fumane khalalelo e le moputso oa ho ba le boitšoarō. Ke mohau oa Molimo feela o re etsang hore re halalele. Re pholositsoe ka mohau; re halaletsoa ka mohau. Leha ho le joalo, mohau ha o bolele hore boitšoarō ha bo hloka hle.

Dallas Willard o ngotse, “Mohau ha o hanane le boiteko; empa mohau o hanana le ho fumana moputso.”<sup>5</sup> Ho tsamaea ho hloka boiteko, empa le bona boiteko boo bo hlahisoa ke mohau oa Molimo. Boiteko ba rona ha bo re fe moputso oa ho hauheloa ke Molimo; boiteko ba rona ke tsela e thabiseng eo re bontšang ho ananela mohau oa hae. Joalo ka bana ba Molimo, ha re fumane lereko la Molimo ka lebaka la boiteko ba rona, empa re ela hloko tlhokahalo ea boitšoaro (1 Bakorinthe 9:25-27).

### **Ho Tsamaea le Molimo ho Hloka ho Mamela**

Molimo o ile a biletsa Abrahamama ho ea sebakeng seo a neng a e-so ka a se bona, (bala Genese 12:4). Abrahamama o ile a tsamaea le Molimo ka bophelo ba ho mamela. Pelo e halalelang ke pelo e mamelang:

► Bala BaHebheru 11:8.

Molimo ha a ka a nea Abrahamama ‘mapa o mo isang Kanana. Ha a ka a mo nea le lintlha tse hlalosang leeto. O ile a biletsa Abrahamama ho mo latela feela – ‘me Abrahamama o ile a mamela. Ho tsamaea le Molimo ho hloka ho mamela. Bophelo ba khalalelo bo hloka ho mamela (1 Petrose 1:2; Baroma 6:16, 22).

“Molao oa ho utloisisa litabeng tsa moea ha se ka bohlale, empa ke ka ho mamela.”  
- Oswald Chambers

### **Ho Tsamaea le Molimo ho Kenyetsetsa le ho Hloa hoa Tumelo**

Ha Abrahamama a siea lehae la hae, ho ne ho se na bopaki bo tšoarehang bakeng sa litšepiso tsa Molimo. Abrahamama o ile a tsamaea le Molimo ka bophelo ba tumelo. Ha re tsamaea le Molimo, re ithuta ho mo tšepa ka ho feletseng. Tumelo ea rona ea teba ha re ba le nako le eena. Hona ho ne ho le bohlokoa ho Abrahamama hobane o ne a tla tobana le teko e ‘ngoe e kholo le ho feta ho siea lefatše la habo.

Lefatšeng la Kanana, Molimo o ile a laela Abrahamama ho etsa sehlabelo ka mora oa hae, Isaaka. Molimo o ne a ile a tšepisa Abrahamama hore e ne e tla ba ntat’a sechaba se seholo. Kamor’a lilemo tse ngata, Abrahamama le Sara ba ile ba e-ba le mora. Joale, Molimo o mo laela ho fana ka mora oa hae Isaaka e le sehlabelo. Bala seo mongoli oa BaHebheru a se buang ho BaHebheru 11:17.

Kahobane Abrahamama a ne a tsamaea le Molimo, o ne a tšepa Molimo. Abrahamama o ne a ile a tsamaea le Molimo, ke kahoo a neng a ka tšepa Molimo esita leha a ne a sitoa ho utloisisa litaello tsa Molimo ka ho feletseng. Abrahamama o ne a tsamaea le Molimo likamanong tsa tumelo e holang.

Ho tsamaea le Molimo ho hloka hore re mo tšepe. Ha re tsamaea le Molimo, re mo tšepa esita le maemong a boima. Re lumella Molimo ho etsa seo a bonang se le molemo ka ho fetisisa maphelong a rona.

---

<sup>5</sup> Dallas Willard, *Hearing God* (Westmont: InterVarsity Press, 2012), 254

Molaoana ona o bonahala mangolong ka bophara. Litekong tse boima bo hlollang, Jobo o ile a ithuta hore a ka tšepa Molimo. Ba le kholehong, Jeremia o ile a tliša tšepiso ea Molimo ea ho hlalisa molemo ho tsoa tlokotsing (Jeremia 29:10-14). Ha a ne a utloisoa bohloko ke phatsa e hlabang ka nameng, Paulosi o ile a ithuta hore mohau oa Molimo oa u lekana, hobane matla a ka a iphetha mefokolong (2 Bakorinthe 12:9).

Pale ena ea Abrahama esita le lipale tsa sechaba sa Molimo ho tsoela pele nalaneng, li re ruta hore ho tsamaea le Molimo ho hloka ho mamela litaello tsa hae ka ho feletseng le ho lumela ka ho feletseng litšepisong tsa hae. Ha re ntse re tsamaea le eena, tšepo ea rona ho eena e tebisa metso ka ho fetisang.

### **Ho tsamaea le Molimo ke Likamano tse Khethehileng**

Setšoantšo sa ho tsamaea se hlaha hangata Mangolong. Ka masoabi, Israele o ne a atisa ho tsamaea le sebe ho e-na le ho tsamaea le Molimo. Marena a mangata a Iseraele a tsamaile sebeng. Ba ne ba ahile likamano le sebe. Abijame a tsamaea libeng tsohle tse entsoeng ke ntat'ae pele (1 Marena 15:3). Marena a mang a ile a tsamaea ka mekhoha ea bo ntat'a bona ho e-na le Molimo. Ba ile ba aha likamano le sebe; ha ba ka ba tsamaea le Molimo.

Ho tsamaea le Molimo ke likamano tse khethehileng. Molimo ke Molimo o boulelang (Eksoda 34:14; Deuteronomi 4:24; Joshua 24:19). U ke ke oa tsamaea le Molimo 'moho le sebe ka nako e le 'ngoe. Mongoli oa Dipesaleme o ile a botsa ka litlhoko tsa ho phela ka pel'a Molimo (Dipesaleme 15:1). Ho hloka hlahla eng bakeng sa ho lokeloa ke ho lula boteng ba Molimo?

“Haeba ke tsamaea le lefatše,  
Nka sitoa ho tsamaea le Molimo.”

- Dwight L. Moody

► Bala Dipesaleme 15:2-3.

► Bala Malakia 2:17. Iseraele o ne a batla ho ba motsoalle oa Molimo leha e ntse itsoella pele ho etsa sebe ka morero. Empa Malakia o ile a ba hlokomelisa hore letsatsi la kahlolo le tla le chesa joalo ka mollo oa sebopi. 'Me ka letsatsi leo, baikhohomosi kaofela le bohle ba etsang bolotsana ba tla ba joalo ka matlakala (Malakia 4:1). Molimo o halalelang a ke ke a iphanyetsa sebe.

Molimo o ile a otlala Iseraele ka lebaka la ho etsa libe tsa lichaba tse ling ho e-na le hore ba phele ka ho mamela molao oa Molimo, (bala Ezekiele 11:12). Iseraele o ne a ke ke a tsamaea le Molimo a bile a ntse ba tsamaea le sebe. Iseraele o ne a ke ke a tsamaea ka tsela ea Molimo a bile a ntse a tsamaea ka tsela ea sebe ka nako e le 'ngoe. Leha e ne ele sechaba sa Molimo se khethiloeng, Molimo o ile a ba otlala ka lebaka la sebe sa bona. Ba ne ba sitoa ho tsamaea le Molimo ba ntse ba tsamaea sebeng.

## **Khalalelo e Kenngoang Tšebetsong: Ho Tsamaea le Molimo ke Likamano tse Tsoelang Pele**

Ha re ntse re tsamaea le Molimo, rea hola likamanong tsa rona le eena. Ho Deuteronomya 6, Moshe o fana ka setšoantšo sa se boleloang ka ho tsamaea le Molimo. O re sechaba sa Iseraele se tšoanela ho ruta bana ba sona molao oa Molimo neng? Ka linako tsohle:

► Bala Deuteronomya 6:7.

Motho ea tsamaeang le Molimo o boloka likamano tse tsitsitseng le eena. Ha ho na phapang pakeng tsa “bophelo bo tloaelehileng” le “bophelo ba kerekeng.” Batho ba halalelang ha se “Bakreste ba ka Sontaha” ba sebeletsang Molimo kerekeng feela. Batho ba halalelang ba lakatsa likamano tse tsitsitseng, tse bileng li holang pakeng tsa bona le Molimo.

Ha Iseraele e hloleha ho hlokomela likamano tsa letsatsi le letsatsi tse bileng li holang lipakeng tsa bona le Molimo, ba ne ba phakisa ho hoheloa ke melimo esele. Eitse ha Salomone a ba bohlasoa mabapi le likamano tsa hae le Molimo, kapele-pele o ile a hoheloa ke melimo ea bohata ea basali ba hae.

Esita le kereke ea pele e ile ea tobana le kotsi e tšoanang. Kereke ea Efese e ile ea qaloa ke Paulosi ka tsoseletso e hlollang. Moapostola Johanne o ile a sebeletsa e le molisa oa eona ha nakoana. Maria, ‘m’a Jesu o ne a phela Efese. Ba ne ba e-na le tsebo e makatsang ea hore ba ikutloetse ‘nete ea evangeli ho tsoa mohloling oa eona. Empa kahar’a moloko o le mong feela, Johanne o ile a lokela ho ba fa tlhokomeliso ena:

► Bala Tshenolo 2:4-5.

Ho ne ho etsahetse’ng? Kahobane ba ne ba sitiloe ho boloka cheseho ea lerato la bona la pele, hape kahobane ba ne ba sitiloe ho tsoela-pele ho holisa likamano tsa bona le Molimo, lerato la bona le ne le se le bata.

Re bona taba ena likamanong tsa batho. Na u ka nahana ka monna ea nyalang mosali e motle, a fanyehe lengolo la lenyalo leboteng, empa e be ha a be le nako le eena le ka mohla? Na lenyalo la bona le na le bophelo? Che! Ho hlokahala ho fetisang lengolo la lenyalo ho aha lenyalo le nang le bophelo. Lenyalo le nang le bophelo le nka lilemo le ntse le hola, ha batho ba babeli ba ntse ba tsoela pele ho hola leratong e mong ho e mong.

Ka tsela e tšoanang, re bilelitsoe ho tsoela pele ho hola leratong la rona ho Molimo. Ho tsamaea le Molimo ho bolela ho tsoela pele ho ba le nako le eena. Ho tsamaea le Molimo ho bolela ho tsoela pele ho hola likamanong tsa rona le eena. Ke sona sena seo ho halalela ho se bolelang.

Ho tsamaea ke ketso e tsoelang pele. E bolela likamano tse tsoelang-pele. Motho ea halalelang o tsoela pele ho hola likamanong tsa hae le Molimo. Nako ea ho inehela ho Molimo ha se qetello ea tšebetso ena. Bophelo ba khalalelo bo kenyelletsa ho tsoela-pele ho tsamaea le Molimo. Leeto la rona le Molimo le qala tsoalong ea bobeli ‘me le tsoela pele ho

fihlela mohla re tla bonana le Molimo lifahleho li talimane. Bophelo ba khalalelo ke likamano tse tsoelang pele.

Jesu o ile a ruta barutuo ba hae hore bophelo ba semoea bo itšetlehile *ka ho felletseng* ka ho boloka likamano le eena.

► Bala Johanne 15:4-5.

Bakreste ba bang ba nahana hore likamano tsa bona le Molimo li joalo ka “Thapelo ea Moetsalibe” e lateloang ke bophelo bo fetohang hanyenyane feela. Setšoantšo seo Bibe e re neang sona ka likamano le Molimo se fapane haholo le sena. Bophelo ba Mokreste bo hokahane le Sefate sa Morara (Johanne 15:1-17). Bophelo ba rona ba semoea bo bolokoa ke likamano tsa letsatsi le letsatsi le Sefate sa Morara. Lekala le lahlang khokahano le sefate le phakisa le e-shoa; le Mokreste ea lahlang khokahano le Sefate sa Morara o phakisa a e-shoa.

Ho tsamaea le Molimo ho hloka hore re be le nako le eena. U ka sitoa ho tsamaea le motho kantle le hore o be le nako le eena! Batho ba halalelang ba ba le nako le Molimo. Ka nako tse ling ba etsa sehlabelo ka menyetla ea khoebo le boithabiso, molemong oa hore ba be le nako le Molimo. Ba utloisisa hore ha ho na letho le leng bohlokoa ho feta likamano tsa bona le Molimo. Joalo ka Maria ha a ne a lutse maotong a Jesu, batho ba halalelang ba tseba hore ntho e hlokoang e 'ngoe feela ke ho ba le nako le Molimo (Luka 10:41-42).

Batho ba halalelang ba etsa ho ba le nako le Molimo ntho e tlang pele. Ba tseba hore thapelo le Mangolo ke tsona tse bohlokoa ho feta lintho tse ling- esita le mesebetsi eo e leng ea tšebeletso. Ba hopola hore Morena Jesu o ne a atisa ho tsoha ka meso ho rapela Ntate oa hae, kahoo ba etsa taba ena ea ho nka nako thapelong tloaelo ea bona.

Batho ba halalelang ba utloisisa hore ho tsamaea le Molimo ho bolela ho latela tataiso ea hae. Ba ela hloko boetapele ba hae. Ha ba botse feela hore, “Na ho etsa ketso ee ke sebe?” Empa ba botsa hore, “Na ketso ee e tla nkatametsa ho Molimo?” Ba batla ho khahlisa Molimo liqetong tsohle tseo ba li nkang. Ka lebaka la hobane batho ba halalelang ba na le lipelo tse halalelang, ba hlokolosi ho se kenye matsoho a bona sebeng. Ba utloisisa hore ho ba le likamano le Molimo ho hloka hore re arohane le ntho efe kapa efe e sa mo khahliseng.


► Ke life lintho tse ka etsoang ho aha likamano tse tebileng ka ho fetisang le Sefate sa Morara?

► Ke liqholotso life tse tharo tse sitisang likamano tsa rona le Molimo?



## O Fumane Sephiri - Frances Ridley Havergal

Ntate oa Frances Havergal<sup>6</sup> e ne e le moruti kerekeng ea England. Ha a le lilemo li 14, Frances o ile a fana ka bopaki ba hore o lumela ho Krete.<sup>7</sup> Bophelo ba hae bohle kamor'a moo, Havergal (1836-1879) o ne a na le takatso ea ho tsamaea a le haufi le Molimo. O ile a ngola, "A tle a nketse se sebelisoa se halalelitsoeng hape se (loketseng) ho sebelisoa ke Morena! Ho na le linako tseo ka tsona ke utloang lerato sebakeng sa Hae hona hoo ke haelloang ke mantsoe ao nka le hlalosang ka oona... leha ho le joalo ke ntse ke phehella ho mo atamela ka ho fetisang. Ha se feela ho tseba thuto, empa ho ba le eena, ho tla fana ka sena." Ha a ntse a tsamaea le Molimo, o ile a 'na a eketsa ho ba haufi le Eena.



Ka 1873, Havergal o ile a fana ka bopaki ba hore o "hloekisitsoe libe tsohle esita le ho tsoela pele ho lula a halaletsoa ke matla a Moea oa Molimo." Ho ne ho se letho le mo sitisang leetong la hae la ho tsamaea le Molimo. Thapelo ea hae ea boinehelo ho Molimo e ile ea fetoha sefela se tsebahalang, "Inkele bophelo ba ka 'me bo khetheloe oena, Morena."

Havergal o ne a nehelane ka tsohle ho Molimo. Sena ke sona seo ho tsamaea le Molimo ho se bolelang. Ke ho ba haufi haholo le eena hoo lintho tsohle e leng tsa hae. Kamor'a ho tsamaea le Molimo bophelo bohle ba hae, mantsoe a Havergal a ho qetela e ile ea e-ba ho re, "Ho hotle, hoa hlolla ho ba haufi le menyako ea leholimo, Phomolo e hlohonolofetseng!" Khaitseli ea hae e ile ea ngola hore sefahleho sa hae "se ne se thabile, joalo ka haeka o se a ntse a bua le Eena."

Mofumahatsana Havergal o tsamaile le Molimo; e ne e le mosali ea halalelang. Ho tsamaea le Molimo ha se taba ea batho ba hlahang Bibeleng feela. U ka tsamaea le Molimo le kajeno; u ka halalela.

---

<sup>6</sup> Setšoantšo: "Frances Ridley Havergal", *Christmas Sunshine with Love and Light for the New Year* (1886), e nkiloe ho [https://commons.wikimedia.org/wiki/File:Frances\\_Ridley\\_Havergal.jpg](https://commons.wikimedia.org/wiki/File:Frances_Ridley_Havergal.jpg), sechaba sa setjhaba.

<sup>7</sup> Pale ena ea Frances Havergal e fetoletsoe ho tsa ho Wesley L. Duewel, *Heroes of the Holy Life* (Grand Rapids: Zondervan, 2002), 80-89.

## **Boikhopotso ba Thuto ea 2**

- (1) Ho halalela ho bolela ho boloka likamano le Molimo. Khalalelo ke ho tsamaea le Molimo.
- (2) Ho tsamaea le Molimo ho hloka ho ba le boitšoarō ho tseba ho re “che” ho litakatso tse fosahetseng.
- (3) Ho ba le boitšoarō ha se ho latola matla a mohau. Re pholositsoe ka mohau; re halaletsoa ka mohau.
- (4) Ho tsamaea le Molimo ho hloka ho mamela melao ea Molimo ka ho feletseng. Re sitoa ho tsamaea le Molimo re ntse re tsamaea le sebe ka nako e le ’ngoe.
- (5) Ho tsamaea le Molimo ho hloka ho lumela ka ho feletseng litšepisong tsa Molimo.
- (6) Ho tsamaea le Molimo ho bolela ho aha likamano tse tsitsitseng, tse bileng li tsoelang pele letsatsi ka leng le Molimo.
- (7) Bophelo bo halalelang bo hloka likamano tsa letsatsi ka leng le Sefate sa Morara. Bophelo ba rona ba semoea bo itšetlehile ka ho feletseng ka likamano tsa rona le Molimo.

## **Kabelo ea Thuto ea 2**

- (1) Nahana ka ha Mokreste e mocha a ne a ka re ho oena, “Ke batla ho ba le likamano tse tebileng le Molimo. Ke rata Molimo empa ho thata ho tseba tsela eo nka holisang likamano tsa ka le eena. Ha ke bone Molimo, kahoo o bonahala eka o hole. Nka etsa joang?” Ngola lengolo la bolele ba leqephe, leo ka lona o thusang molumeli enoa ka tsela eo a ka holisang likamano tsa hae le Molimo. Kopanong e hlahlamang ea sehlopha, moithuti ka mong o lokela ho bala karabo ea hae ’me ba be le nako ea ho buisana ka likarabo tsa bona.
- (2) Qala thuto e latelang ka ho pheta 1 Johanne 1:6-7.

# Thuto ea 3

## Khalalelo ke Setšoantšo sa Molimo ho Motho

### Sepheo sa Thuto

Qetellong ea thuto ena, baithuti lokela ba be ba ka:

- (1) Ananela morero oa Molimo oa ho busetsa setšoantšo sa hae ho motho.
- (2) Elelloa tsela eo ka eona Molimo a etsang tšebetso ea ho busetsa setšoantšo sa hae ho rona.
- (3) Lumella Molimo ho sebetisa morero oa hae oa ho u fetolela setšoantšong sa hae letsatsi le letsatsi.
- (4) Tseba 2 Bakorinthe 3:17-18 ka hlooho.

### Moshe: Monna ea Sefahleho se Khanyang

E ne e le letsatsi le leholo ka ho fetisisa bophelong ba Moshe (Eksoda 33:17-23). O ne a holetse tlung ea Faro ea borena. O ne a ile a kopana le ba bang ba batho ba matla ka ho fetisisa lefatšeng. Empa kajeno, Moshe o ne a tla kopana le ea moholo ho fetisa Faro. O ne a tla kopana le Jehova, Molimo oa Abrahama, Isaaka le Jakobo.

Moshe o ne a ile a bua le Molimo sehlahleng se tukang. O ne a ile a lebella ha Molimo a felisa mabotho a Faro Leoatleng le Lefubelu. Empa kajeno, Moshe o ne a tla bonela Molimo haufi ho feta ha a ne a 'mona sehlahleng se tukang kapa Leoatleng le Lefubelu.

Letsatsing lena, Moshe o ne a le boteng ba Jehova. Moshe o ne a e-na le kopo e le 'ngoe feela, (bala Eksoda 33:18). Molimo o ile a bolella Moshe hore taba eo e ne e se e ka khonehang, (bala Eksoda 33:20). Empa Molimo o ile a etsetsa Moshe ka lereko le hlolang, (bala Eksoda 33:21-23).

Moshe o ile a bona karoloana e nyane feela ea khanya ea Molimo, empa e itse ha a khutlela lihaelong, sefahleho sa hae se ne se khanya. Nako e 'ngoe le e 'ngoe ha Moshe a ne a le boteng ba Molimo, sefahleho sa hae se ne se bonahatsa khanya ea Molimo. Moshe e ne e le monna ea neng a e-na le sefahleho se khanyang, (bala Eksoda 34:35).

Re bopuo e ka setšoantšo sa Molimo; re bopetsoe ho bontša khanya ea Molimo. Leha sebe se sentse setšoantšo sa Molimo ho motho, Molimo o batla ho busetsa setšoantšo sa hae ho molumeli e mong le e mong. Ho halalela ke ho ba joalo ka Ntate oa rona ea maholimong. Morero oa Molimo ke ho busetsa setšoantšo sa hae ho sechaba sa hae.

## Khalalelo ke Setšoantšo sa Molimo ho Motho

► Ak'ū nahane ka Mokreste ea bonahatsang khalalelo. Ke limelo life tsa Ntate oa rona ea maholimong tseo u li bonang bophelong ba motho eo?

Libuka tse hlano tse qalang Bibe le bontša hore Molimo ke Molimo o halalelang. Hobane Molimo oa halalela, o biletsa sechaba sa hae ho halalela. Re etselitsoe hore re shebahale joalo ka Ntate oa rona ea maholimong; re bopetsoe ho halalela. Sepheo sa Molimo ke ho etsa bana ba hae ka setšoantšo sa hae.

Ho ba le setšoantšo sa motho ho bolela ho shebahala joalo ka motho eo. Re bopuoe ka setšoantšo sa Molimo. Hona ha ho bolele hore Molimo o na le sefahleho se tšoanang le tsa rona; ho bolela hore meea ea rona e entsoe ka tsela eo e ka bontšang semelo sa Molimo. Re etselitsoe ho ba seipone sa setšoantšo sa Molimo. Joalo ka ha seipone se bontša sefahleho sa motho, le rona re etselitsoe ho bonahatsa setšoantšo sa Molimo.

### Thapelo Bakeng sa Khalalelo

"Morena, etsa moea oa ka ho ba  
seipone se bontšang Uena,  
Oena u 'notši u khanye ka ho 'na,  
E le hore batho ba tle ba bone  
lerato la Hau,  
Le mohau oa Hau...."  
- Blanche Mary Kelly

Re bopetsoe ho hloeka le ho halalela joalo ka ha Molimo a hloekile a bile a halalela. **Ho halalela ho bolela ho bonahatsa setšoantšo sa Molimo.** Molimo o laela bana ba hae: Bala Levitike 11:45). Hobane'ng? Hobane Molimo o halalela. Re lokela ho tšoana le eena (1 Petrose 1:16). Re bopetsoe ho ba sechaba se halalelang; re bopetsoe ho tšoana le Ntate oa rona ea Maholimong.

## Re Bopuoe ka Setšoantšo sa Molimo

Sehlohlolo sa pale ea tlholeho ke ho boptjoa hoa motho ka ho tšoana le Molimo (Genese 1:27). Lintho tsohle tseo Molimo a li hlolileng li ne li le ntle, empa ke motho feela ea entsoeng ka setšoantšo sa Molimo. Molimo o entse motho hore a tšoane le eena, (bala Dipesaleme 8:5).

Motho o na le boleng bo sa feleng hobane re entsoe ka setšoantšo sa Molimo. Paulosi o ngotse hore motho ke setšoantšo le khanya ea Molimo (1 Bakorinthe 11:7). Re bopetsoe ho bonahatsa khanya ea Molimo.

## Setšoantšo sa Molimo se ho Motho se Ile sa Senyeha ha Motho a Oa

Sebe se ile sa silafatsa setšoantšo sa Molimo se ho motho. Ho Genese 1, motho o ile a bōptjoa ka setšoantšo sa Molimo; empa bala ho Genese 6:12 ka boemo ba motho ka nako eo. Motho o ne a ile hore haholo le morero oa Molimo hoo, mopo oa mehopolo eohle ea lipelo tsa bona o neng o le mobe feela ka matsatsi oohle (Genese 6:5).

Khanya ea motho a neng a e neuoe ha a boptjoa e ile ea fetoha masoabi. Paulosi o bontša ka setšoantšo hore na motho o lahlehetsoe ke eng ha a ne a furalla Molimo a rapela melimo ea bohata. Ka lebaka la ho oela, batho ba nkile khanya ea Molimo o sa boleng ba e fetotse

litšoantšo. Bala 'me u thathamise mona lintho tse tharo tseo Baroma 1:23–28 e reng Molimo o ile a li etsa e le phello:

- \_\_\_\_\_
- \_\_\_\_\_
- \_\_\_\_\_

Tsena tsohle ke litholoana tsa ho oela. Ka lebaka la sebe, khanya ea motho e ile ea fetoha lihlolong. Setšoantšo sa Molimo se ile sa senyeha; motho o ne a se a sa tšoane le 'Mopi oa hae.

### **Setšoantšo sa Molimo se Ntse se Khutlisetsoa ho Batho ba Hae**

Leha ho le joalo, Molimo ha a ka a tlohela motho a 'notši. Lihlabelo e ne e le mokhoa oa ho lefella kotlo ka baka la sebe esita le ho khutlisa likamano tsa Molimo le motho. Empa morero oa Molimo o tebile ho feta ho lefa kotlo bakeng sa sebe sa rona. Molimo o batla ho halaletsa motho joalo ka ha a halalela.

Morero oa Molimo ke ho re bopa hore re ka bapa le setšoantšo sa hae (Baroma 8:29). Ha setšoantšo sa hae se khutlisetsoa ho rona, lihlolong tse tlišoang ke sebe lia hlakoloa 'me re boela re bonahatsa khanya ea Molimo. Ena ke e 'ngoe ea lithuto tsa sehlooho tsa Bible:

- Re entsoe ka setšoantšo sa Molimo (Genese 1-2).
- Ka lebaka la sebe, setšoantšo sa Molimo ho motho se ile sa senyeha (Genese 3).
- Ho qala ka tšepiso ea Messia e ho Genese 3:15 le ho isa sehlohlolong sa leholimo, Molimo o ntse a khutlisetsa setšoantšo sa hae ho motho.

Johanne o tšepisitse hore ha re lula ho Krete, re tla ba le tšepo e tiileng, 'me re se ke ra soaba pela hae ho hlaheng ha hae (1 Johanne 2:28). Ha re fetoleloa setšoantšong sa hae, re boelloa ke khanya e neng e lahlehile ha motho a oela. Lihlong tsa rona lia hlakoloa, 'me re lebella ho khutla hoa hae ka tšepo. Ha re ntse re hola ho tšoaneng le Molimo, rea halaletsoa. Joalo ka ha Molimo a halalela, le sechaba sa hae sea halaletsoa.

### **Iseraele e ne e Bilelitsoe ho Bontša Setšoantšo sa Molimo**

Molimo o ne a bitsitse Iseraele hore e be sechaba se halalelang. Morero oa hae e ne e le ho busetsa setšoantšo sa hae ho Iseraele. Molimo o ne a khethile Iseraele e le baemeli ba hae, ba khethehileng ho lichaba tse ling. O ile a behella Iseraele kathoko e le sechaba sa hae se khethiloeng se neng se tla bonahatsa semelo sa hae sa khalalelo ho lichaba tse ling.

Molimo o ne a bilelitse Iseraele ho ba Muso oa Baprista, (bala Eksoda 19:6). Mosebetsi oa moprista e ne e le ho emela Molimo ho sechaba. Mosebetsi oa Iseraele e ne e le ho hlahisa Molimo ho lichaba tsohle. Molimo o ne a bilelitse Iseraele ho bonahatsa semelo sa hae sa khalalelo ho lichaba tse ling. Ho fihlella mosebetsi ona, Iseraele e ne e lokela ho halalela.

Nakong eo Iseraele e neng e tšepahala ho Molimo, e ne e bontša semelo se halalelang sa Molimo; e ne e le seipone sa khalalelo ea Molimo. Ha Iseraele e se e fetohela ho melimo ea

bohata, e ile a bonahatsa semelo sa sebe sa melimo ea bohata; e ile ea fetoha seipone sa boetsalibe ba melimo ea bohata. Ha Iseraele e se e hloleha ho shebahala joalo ka Molimo, e ne e le ha e hloleha le thomong ea eona lefatšeng.

### **Kereke e Bilelitsoe ho Bontša Setšoantšo sa Molimo**

Testamenteng e Ncha, kereke e bilelitsoe ho ba sechaba sa Molimo se halalelang. Kereke e bilelitsoe ho ba boprista boo e leng boemeli ba Molimo lefatšeng.

► Bala 1 Petrose 2:9.

Joalo ka ha Molimo a khethile Iseraele ho bontša setšoantšo sa hae ho lichaba, O khethile kereke ho bolella ba bang kamoo Molimo a re bitsitseng ho tsoa lefifing ho kena khanyeng ea hae e hlollang. Molimo o khethile kereke ho ba boemeli ba semelo sa hae ho batho ba sa mo tsebeng. Ho etsa hona, kereke e lokela ho bonahatsa setšoantšo sa Molimo. Ho fihlella thomo ea eona, kereke e lokela ho halalela.

Ha kereke e tšepahalla Molimo, e shebahala joalo ka Molimo; e bonahatsa semelo se halalelang sa Molimo. Ha kereke e khelohela ho melimo ea bohata ea ho batla botumo, maruo, le matla, e shebahala joalo ka melimo eo ea eona oa bohata; e bonahatsa semelo sa sebe sa melimo ea eona ea bohata. Ha kereke e hloleha ho tšoana le Molimo, e hloleha le ho phetha morero oa eona lefatšeng.

### **Setšoantšo sa Molimo se Khutlisetsoa ho Molumeli e Mong le e Mong**


Re bopetsoe ho tšoana le Ntate oa rona ea maholimong. Re entsoe ka setšoantšo sa Molimo, empa setšoantšo sena se ile sa senyeha ha motho a oa. Setšoantšo sa Molimo se sa le teng (Genese 9:6), empa se patiloe ke sebe.

Ak’u iketsetse setšoantšo sa motho ea chekang a le naheng ea China, ’me a fumana pitsa ea khale ea boleng e bileng e leng ntle haholo. Qalong, e ke ke ea bonahala botle; e tla be e koahetsoe ke mobu le seretse. Motho ea bohileng ketsahalo ena a ka ’na a re, “E lahle. Ha e na molemo!” Empa setsebi sona sea tseba hore katlaase ho lerole leo ho na le letlotlo le letle.

Setšoantšo sa Molimo se ho motho se ile sa senyeha ha motho a oa. Setšoantšo sa Molimo se ile sa koaheloa ke lerole le seretse sa sebe, empa Molimo o busetsa setšoantšo sa hae ho rona.

► Bala Baroma 8:29. Joalo feela ka ha Jesu a tšoana le Ntate oa hae, le rona re lokela ho tšoana le Ntate oa rona. Khalalelo ke “ho tšoana le Molimo”; khalalelo ke pusetso ea setšoantšo sa Molimo ho motho.

Michelangelo's *Pieta*<sup>8</sup> ke se seng sa litšoantšo tse tummeng haholo naheng ea Italy. Ka 1972, monna ea nang le lefu la kelello o ile a nka hamore a pshatla setšoantšo sena. Baetsi ba litšoantšo ba ile ba sebetsa likhoeli-khoeli ho lokisa tšenyō eo. Ka hobane setšoantšo seo se bohlokoa haholo, ba ile ba sebetsa ka hloko ho se butsetsa boemong ba sona ba pele. Kajeno, u ke ke oa lemoha moo setšoantšo seo se neng se senyehile. Baetsi ba litšoantšo ba ile ba busetsa *Pieta* bokhabaneng ba eona ba pele.



Ha motho a oa, sebe se ile sa senya tlholeho ea Molimo e molemo ka ho fetisisa. Sebe se ile sa senya setšoantšo sa Molimo se ho motho. Ka lebaka la hore motho o bohlokoa ho Molimo, o ile a qalella ho busetsa setšoantšo sa hae ho rona. Ho tloha ho oeng ho fihlela haajoale, esale Molimo a ntse a sebetsa ka mohau ho busetsa motho bokhabaneng ba rona ba tlholehong. Sepheo sa Molimo ke ho busetsa ka ho rona setšoantšo sa hae se setle.

Batho ba bangata ha ba na kutloisiso e phethahetseng ka evangeli. Kutloisiso ea bona ka evangeli ke hore:

1. Ke ne ke le moetsalibe.
2. Molimo o ile a mpholosa.
3. Joale nka ea leholimong.

Tsena ke litaba tse monate – empa ha se evangeli e felletseng! Litaba tse molemo tsa evangeli li elelloa morero oa Molimo oa ka ho sa feleng:

1. Ke ne ke le moetsalibe.
2. Molimo o ile a mpholosa.
3. Joale Molimo o ntse a khutlisetsa setšoantšo sa hae ka ho 'na.
4. Leholimong, ke tla tšoana le eena hobane ke tla mo bona kamoo a leng kateng (1 Johanne 3:2). Morero oa Molimo ka batho ba hae o tla be o phethahetse.

Na ha se taba e makatsang ee? Molimo o u pholositse *hore a o etse ea tšoanang le eena*. Bona ke botle ba bophelo ba khalalelo. Joalo ka batho ba halalelang, re ntse re busetsoa setšoantšong sa Molimo.

Molimo o ile a lokolla Baisraele Egepetā e le hore a tle a phele hara bona ka likamano tsa lerato. Molimo ha a ka a lokolla Baisraele hore ba tle ba phele joalo ka Ba-Kanana. O ba lokollotse hore ba tle ba etsoe ba tšoanang le eena.

"Bopaki bo hlakileng ba Moea o Halalelang bophelong ba motho ke ho tšoana ka ho se nang phoso le Jesu Krete ka tšoano ea lelapa, le ho lokoloha nthong e 'ngoe le e 'ngoe e sa tšoaneng le Eena."  
- Oswald Chambers

<sup>8</sup> Setšoantšo: "Michelangelo's Pieta 5450 cut out black" taken by Stanislav Traykov on December 4, 2005, edited by Niabot, e nkiloe ho [https://commons.wikimedia.org/wiki/File:Michelangelo%27s\\_Pieta\\_5450\\_cut\\_out\\_black.jpg](https://commons.wikimedia.org/wiki/File:Michelangelo%27s_Pieta_5450_cut_out_black.jpg), licensed under CC BY 2.5, desaturated from the original.



Ka tsela e tšoanang, re pholositsoe hore re phele ka likamano tse tebileng le Molimo le hore re fetoleloe setšoantšong sa hae. Molimo o re pholositse libeng tsa rona hore re tle re halaletsoe joalo ka ha a halalela. Re etselitsoe ho bonahatsa khanya ea hae.

### **Khalalelo e Kenngoang Tšebetsong: Khalalelo le Semelo**

Batho ba bang ba lumela hore motho ea halalelang o tla ba le semelo sa mofuta o itseng. Nahana ka karabo ea hao potsong e tlileng qalong ea thuto ena: "Nahana ka Mokreste ea bontšang khalalelo. Ke limelo life tsa Ntate oa rona ea maholimong tseo u li bonang bophelong ba motho eo?" Na u ile oa mo hlalosa ho latela semelo haholo-holo? Hangata re etsa joalo.

Leha ho le joalo, ha re bala Testament e Ncha, re bona limelo ka mefuta eohle li ne li emetsoe ka letsatsi la Pentakonta. Mefuta eohle ea batho e ile ea tlatsoa ka Moea. Kamora Pentakonta, barutuo ha ba ka ba fetoha batho ba fapaneng hang-hang. Ho e-na le hoo, Molimo o ile a sebetsa ka limelo tsa bona tsa tlhaho ho fihlella morero oa hae ka tsela e ncha.

Thomase ha a ka a fetoha kapele-pele ea bohlale, hape ea nang le tšepo. Ho isa lefung la hae, Thomase e ne ele motho ea khutsitseng ebile a e-na le temohisiso. Simone Petrose ha a ka a fetoha hang-hang ho ba ea khutsitseng ea lutseng kathoko a sa eloe hloko. Esita le kamor'a Pentekonta, Petrose e ne e le eo ka boitšepo a hanang taelo e makatsang ea Morena (Diketso 11:8).

Molimo o bopile e mong le e mong oa rona ka limelo tse ikhethang. Ho halaletsoa ha ho senye limelo tsena. Ho e-na le hoo, ha re inehela ho Molimo, setšoantšo sa hae se khanya ka limelo tsa rona.

### **Na ho ka Khonahala Hore Setšoantšo sa Molimo se Khanye ka Limelo tsa Rona?**

Taba e tla shebahala joang bophelong ba letsatsi le letsatsi? Motho ea nang le moea oa tlholisano, ea ratang ho tsoa kapa menate, empa a se a inehetse ho Molimo ka ho feletseng, o tla tsoela pele ka semelo seo sa hae. Motho ea lihlong ea qobang ho ba hara batho ba bangata, o tla tsoela pele e ntse a le motho ea lihlong. Leha ho le joalo, limelong tseo ka bobeli, motho ea halalelitsoeng o lumella Molimo ho fefa le ho batalatsa likarolo tse sa otloloheng tsa semelo sa hae ha a hlokomela karolo e sa bontšeng setšoantšo sa Molimo.

Ha re etse mohlala. Moruti Mohapi le Moruti Kutloisiso e ne e le batho ba nang le limelo tse matla. Bobeli ba ne ba e-na le likholiseho tse matla. Bobeli e ne e le "libui" tsa boiphihlelo hape ba tseba ho emela litaba tsa bona ka ho li buella hantle. Bobeli ba ne ba le litulong tsa boetapele. Ka lebaka la likholiseho tsa bona tse matla, bobeli ba bona ka linako tse ling ba ne ba utloisa batho ba bang bohloko ka mantsoe a bona.

Ke tsebile Moruti Mohapi matsatsing a ho qetela a bophelo ba hae. O ile a mpoella a re, "Ha nkebe ke kope tšoarelo le ka mohla. Ha ho tsotellehe hore na batho ba nahana eng ka seo ke se buang. Ke phoso ea bona haeba ba sa nkutloisise. Kea tseba hore pelo ea ka e

lokile.” Leha pelo ea Mohapi e ne e tletse ka ’nete, batho ba likereke tseo a ileng ea e-ba moruti ho tsona ba ne ba atisa ho utloisoa bohloko ke mantsoe a hae. O ne a e-so ithute ka ho feletseng ho lumella setšoantšo sa Molimo hore se khanye ka semelo sa hae.

Moruti Kutloisiso le eena e ne e le moetapele ea matla. Leha hole joalo, Moruti Kutloisiso o ne a ithutile hore na ho bolela eng ho bonahatsa setšoantšo sa Molimo. O ne a ithutile ho re, “Ke kopa tsoarelo. Ke buile taba eo ha boima haholo.” O ne a ithutile ho bontša mohau ’moho le toka. Maphutheho a Moruti Kutloisiso a ne a ile a re,” Moruti oa rona o ne a re tšoere ka tsela e tšoanang le ea Jesu.”

Khalalelo ha e fetole mofuta oa hau oa semelo; empa khalalelo e etsa hore o ele hloko lentsoe la Moea o Halalelang ha o re, “U hloka ho kopa tsoarelo. U buile ka thata.”

Haeba u na le semelo se ratang ho qoba mahlo a batho, khalalelo ha e u fetole hore u be motho ea ratang ho tsoa kapa hona ho rata ho hlahella. Leha hole joalo, khalalelo e u etsa hore u tlohele ho qeaqea ha Molimo a re, “Ke batla hore u tsoe u etelle pele boemong bona.”

Everett Cattell o fana ka mehlala e meraro e bontšang tsela eo ka eona Satane a ratang ho fetola litloaelo tsa rona tsa tlhaho ho li etsa lintho tse senyang setšoantšo sa Molimo maphelong a rona.<sup>9</sup>

### ***Mohlala oa 1: Ho ja***

Ho lapa ke ho batla lijo ka tsela ea tlholeho. Hoa khoneha ho ja tlotlisong ea Molimo (1 Bakorinthe 10:31). Ha ho motho ea lokelang ho batla boiphihlelo ba tsela ea semoea ea ho felisa tlala.

Leha ho le joalo, ho batho ba bangata Satane o sentse takatso ena ea lijo ea tlhaho ho e fetolela ho bonyollo. Ho e-na le ho jella ho khotsofatsa tlhoko e tloaelehileng ea tlholeho, ho ja ho fetohile tsela ea ho khotsofatsa litakatso tsa boikhabo.

Tharollo ea bonyollo ha se ho felisa monyaka oa ho ja. Tharollo ke boitšoaro, ’me ke bona bo tla thibela hore takatso ea lijo ea tlhaho e fetoloe ntho e kotsi e bileng e leng sebe.

### ***Mohlala oa 2: Ho ba Hlokolosi***

Kamor’a moo Everett Cattell o etsa mohlala o thata. Motho ofe kapa ofe ea nang le maikutlo a tloaelehileng o na le tekanyo e itseng ea kutlo ho bohloko le mahlomola. Hona ke ntho e tloaelehileng, ’me ha se sebe. Leha hole joalo, ha re lumella kamoo re utloang bohloko kateng ho fihlela ho ka fetoha ho ikhauhela, ho re fetohela maikutlo a boikhabo a tla re sitisa ho sebeletsa Molimo hantle esita le ho bontša setšoantšo sa hae ho ba bang.

Le hona moo, tharollo ha se ho felisa kutlo eohle ea maikutlo le ho hloka kutloelo-bohloko mabapi le mantsoe le Diketso tsa batho ba bang. Ho e-na le hoo, re tlameha ho ithuta ho

---

<sup>9</sup> Everett L. Cattell, *The Spirit of Holiness* (Newberg: Barclay Press, 2015), 30-35

nehelana ka tsela ena eo re ikutloang ka eona ho Molimo le ho mo lumella ho re tataisa le ho laola tsela eo re itšoarang ka eona ha re utloa bohloko.

### **Mohlala oa 3: Leleme**

Mohlomong mohlala ona ke o thata ka ho fetisisa. Kaofela re lokela ho sebelisa leleme. Re ka sitoa ho rapela ra re, "Molimo ke kopa hore u tlose leleme la ka." Leha ho le joalo, leleme ha lea lokela ho lumelloa ho tsoa taolong.

Cattell o etsa mohlala oa moromuoa e mong ea neng a atisa ho ba le maikutlo a hae a nepahetseng, empa a lula a utloisa batho ba bang bohloko ka mantsoe a hae boima. Tšebeletsong e 'ngoe ea bophelo ba moea, o ile a bua ntho e ileng ea utloisa batho ba bangata ba neng ba le teng moo bohloko. Bosiung boo, Molimo a kholisa moromuoa eo hore leleme la hae le utloisitse batho ba bang bohloko.

Moromuoa enoa o ile a rapela eaba o ea kopanong ea hoseng. O ile a re ho batho ba neng ba le kopanong eo, "Hoja bothata ba ka e ne ele joala, ho ne ho tla ba bobebe. Ke ne ke tla lahla joala boo ebe ke qetile. Empa joale bothata ba ka ke leleme la ka. Nke ke ka le khaola ho isa khanya ho Molimo. Empa ke nehelane la leleme la ka ho Molimo, 'me ke tšepa hore Moea o Halalelang o tla nthusa ho le sebelisa ho isa khanya ho eena."

Moruti Cattell o supa liphoso tse peli tse nang le bothata bo tšoanang le ba leleme:

1. Ho re, "Ke moetsalibe hape ha ke khone ho laola leleme la ka. Ke lokela ho tsoela pele ho etsa sebe ka leleme la ka hobane mohau oa Molimo ha o matla ho lekana ho phekola bothata ba ka."
2. Ho re, "Ke rapetse hore Molimo a nkhalaleletse. Kahoo, o tla laola leleme la ka. Ha ke hloke ho etsa letho ho ipea taolong. Ke tla tšepa Molimo feela."

Maikutlo a nepahetseng ke ho re, "Ke nehelane ka pelo ea ka, le ka leleme la ka, ho Molimo. Pelo ea ka e hloekile, empa kea tseba ke sa ntse ke hloka ho laola tšebeliso ea leleme la ka. Ke lokela ho nka nako ho inahana pele ke bua. Ke lokela ho nka nako ho rapela pele ke bua. 'Me haeba nka bua kapele haholo, ke lokela ho ikokobetsa le ho baka." Motho ea halalelang o tla potlaka ho ea ho ngoan'abo ea utloileng bohloko ka boikokobetso bo nang le pako (Mattheu 5:23-24).

► Sebaka se kotsi ho oena ke sefe? Nahana ka litakatso tsa tlhaho tse ka o khannelang maikutlong le boitšoarong ba sebe. Fana ka mohlala oa kamoo takatso ena ka linako tse ling e u baketseng mathata. Hape u fane ka mohlala oa kamoo Molimo a u thusitseng kateng ho bea taolong litakatso tseo.

### **Molimo o bopa semelo sa motho ea Halalelang joang?**

Ha re ntse re batla ho bonahatsa setšoantšo sa Molimo maphelong a rona, Molimo o sebetsa ka litsela tse ngata ho re bopa hore re be batho bao a batlang re be bona. Joalo ka motho ea ithutileng nalane ea fumaneng pitsana ea bohlokoa naheng ea China ebe o e hloekisa ka

hloko ho fihlela le benya, Molimo o hloekisa bana ba hae ka hloko ho fihlela re benya re bile re ba seipone se bontšang setšoantšo sa hae.

Ke life tse ling tsa litsela tseo Molimo a bopang bana ba hae hore ba tšoane le eena? Qalong ea thuto ena, re bone hore na ke ka tsela e joang Moshe a bonahalitseng setšoantšo sa Molimo. Ha re talima bophelo ba Moshe re fumana setšoantšo se hlakileng sa kamoo Molimo a re bopang ka ho tšoana le eena.

Qalong ea bophelo ba hae, ha se kamehla Moshe a neng a bontša setšoantšo sa Molimo. Bohale ba hae bo ile ba etsa hore a bolae motho hape bo ile ba beha kotsing taba ea hore e ka ba sesebelisoa sa bohlokoa bakeng sa 'muso oa Molimo (Eksoda 2:11-15). Leha ho le joalo, Molimo o ile a bopa Moshe a mo etsa monna ea mosa ho fetisa motho ofe le ofe ea lefatšeng (Numere 12:3). Moshe o ne a potlaka ho nyahama (Eksoda 5:22-23), empa Molimo o ile a mo bopa a mo etsa monna ea tšepahalang ho etella-pele sechaba sa hae ka lilemo tse mashome a mane lehoatateng. Ke ka tsela efe Molimo a ileng a fetola semelo sa Moshe?

### ***(1) Molimo o sebelisa lentsoe la hae ho bopela bana ba hae setšoantšong sa hae.***

E 'ngoe ea lisebelisoa tse tšepahalang tseo Molimo a li sebelisang ke Lentsoe la hae. Ha re boloka lentsoe la Molimo lipelong tsa rona, o le sebelisa ho re tataisa (Dipesaleme 119:9-11). Joalo ka haMoshe a fumane molao oa Molimo ho tsoa letsohong la hae ka kotloloho, molao oo o ile oa bopa tsela eo a utloisang ka eona esita le semelo sa hae.

Batho ba halalelang ke batho ba Lentsoe. Ba tseba hore ka Lentsoe la Molimo ba tla bona semelo sa Molimo. Ba tseba hore ka Lentsoe la Molimo ba tla ithuta tsela eo ka eona semelo sa bona se lokelang ho bontša semelo sa Molimo. Ha ho na Mokreste oa sebele eo ke mo tsebang ea sa kang ea e-ba moithuti oa Lentsoe.

### ***(2) Molimo o sebelisa maemo a thata ho bopela bana ba hae setšoantšong sa hae.***

Ka lebaka la hore o ile a bolaea Mo-Egepeta, Moshe o ile a qeta lilemo tse mashome a mane lefeelleng. Hangata, mohlomong o ne a ee a nahane a re, "Ke sentse monyetla oa ka. Ha ho sa tla ba le letho leo nka le etsang kantle le ho hlokomela linku." Empa Molimo o ile a sebelisa lilemo tseo tse mashome a mane ho bopa Moshe ho ba moetapele.

E 'ngoe ea litemana tse khothatsang ho hlaha bophelong ba Petrose ke ha Jesu a porofeta tsa ho hloleha hoa hae nakong ea qoso ea hae, (bala Luka 22:31-32). Eaba hape, o tšepisa hore ka ho hloleha hoo hoa Petrose hoa nakoana, Molimo o ne a tla hlahisa molemo, (bala hape Luka 22:32). Molimo o ile a sebelisa esita le boemo bo sithabetsang ba ho hloleha hoa Petrose ho etsa hore Petrose a atlehe ka ho fetisang.

Batho ba halalelang ba tšepa morero oa Molimo le maemong a boima. Ba lumela Baroma 8:28 hobane ba batla ho phela Baroma 8:29, (bala Baroma 8:29). E be joale u re bolella "morero" oo o Molimo a o tlisang ka bophelo ba ngoana oa hae. (Joale bala Baroma 8:29).

Ha se lintho tsohle tse etsahalang bophelong ba motho ea halalelang tse leng monate. Empa tsohle tse etsahalang li sebelisana hammoho ho phethahatsa morero oa Molimo o molemo – oa ho re bopela setšoantšong sa Mora oa hae.

### ***(3) Molimo o sebelisa batho ho bopa bana ba hae ka setšoantšo sa hae.***

Taba ena e ka ba eona e thata ka ho fetisisa ho tsena tse tharo. Molimo o sebelisa batho – hangata batho ba re fang mathata – ho re bopa ho ba ba tšoanang le eena. Moshe ha a ne a khathala ke boikarabello bo boima ba boetapele, Molimo o ile a sebelisa mohoe oa hae Jethro (eo e neng e se Mo-Iseraele) ho fana ka keletso ho Moshe e ileng ea mo etsa hore a atlehe ka ho fetisang (Eksoda 18:1-27).

Re ka boela ra talima Simone Petrose. Ka ho kopana hoa hae le Johanne hape hamorao ho moo le ka ho tobana le Paulosi, Petrose o ile a eketsa ho boptjoa hape le hape hore a ka tšoana le Molimo. Paulosi o ile a mo hanyetsa mahlong ha Petrose a ne a hloleha ho phela ho ea ka thuto eo Moea o mo rutileng eona mabapi le ho ja le balichaba (Bagalata 2:11). Joalo ka moapostola ea ka sehloohong, mohlomong taba eena e ile ea e-ba e soabisang ho Petrose. Eena o ne a se ntse a latetse Krete nakong eo Paulosi a sa ntseng a bolaea Bakreste! Empa Petrose o ile a lumella Molimo ho sebelisa Paulosi ho mo atametsa haufi le seo a neng a batla ha Petrose a ka ba sona.

Bahalaleli ba lumella Molimo ho sebelisa batho ba bang ho bopa semelo sa bona ho ba setšoantšo sa hae, (bala Diproverbia 27:17). Bohale ba selepe bo leotsoa ka tšepe. Ka tsela e tšoanang, ha batho ba kopana le ba bang, litsebo tsa bona lia leotsoa.

Bophelo ba khalalelo bo fetisa motsotsoana oa hang feela oa nako ea tlokotsi. Ke ho fetoha letsatsi le letsatsi ho ea setšoantšong sa Molimo. Ha re ikokobeletsa tšebetso ea Molimo maphelong a rona, o re bopa ka ho tsoelang pele ho ea setšoantšong sa hae. Bona ke bophelo bo sebetsang ba khalalelo.

## **O Fumane Sephiri - Frank Crossley**

Pelo e halalelang ha se feela bakeng sa Baruti le Baromuo. Molimo o batla ho fetola Mokreste e mong le e mong ho mo etsa setšoantšo sa hae. Frank Crossley o ile a bonahatsa setšoantšo sa Molimo bophelong bo tloaelehileng feela. Frank Crossley e ne e se moruti; e ne e le mong'a khoebo e bitsoang Crossley Engines. O ne a sa phele mahaheng moo a ipatetseng liteko; o ne a phela toropong ea Manchester, setsi se seholo sa tlhahiso le khoebo.

Frank Crossley e ne e le rakhoebo ea ruileng haholo naheng ea England lilemong tsa 1800. Hang kamor'a tšokoloho ea hae, Crossley o ile a utloa moroetsana e mong oa Salvation Army a fana ka bopaki ba matla a fetolang a Moea o Halalelang. Crossley o ile a re ho mofumahali oa hae, "Ke batla ho tseba Molimo ka tsela eo moroetsana eo a mo tsebang kateng." A khutla bosiu bo hlahlamang 'me a qala ho batla pelo e hloekileng.

Kamor'a hore Molimo a hloekise pelo ea hae ka tumelo, Crossley o ile a batla ho etsa ho fetang chelete feela. O ile a etsa qeto ea ho ba moruti. O ile a buisana le General William Booth oa Salvation Army, empa Booth o ile a mo eletsa ka pelo e hlalefileng hore a tsoele pele ka mosebetsi oa hae oa khoebo. General Booth o ne a lumela hore Frank Crossley o tla sebetse ka ho atlehileng ha a ka sebeletsa Molimo ka khoebo ea hae.

Monghali Crossley o ile a botsa, "Nka bontša setšoantšo sa Molimo joang bophelong ba ka ba letsatsi ka leng? Jesu o ne a ka tšoara basebetsi ba ka joang?" O ile a fallisetsa feme ea hae sebakeng sa toropo e futsanehileng ka ho fetisisa e le hore a tle a thuse bahloki. O ile a tšoara basebetsi ba hae joalo ka baena ba hae ba Bakreste.

Frank Crossley o ile a bonahatsa pelo e halalelang ka sebopeho se tšoanang le sa Krete. Letsatsi le letsatsi, Monghali Crossley o ile a bontša setšoantšo sa Molimo ka tsela eo a neng a tšoara batho ba bang ka eona. Rakhoebo e mong ea hlolisanang le eena o ile a kopana le Monghali Crossley mabapi le tumellano e thata. Hamorao o ile a re "Monghali Crossley o ntšoare ka tsela eo Jesu Krete a neng a ka ntšoara ka eona." Mosebetsi 'moho enoa oa khoebo o ile a bona setšoantšo sa Molimo ho Frank Crossley.

Ho Frank Crossley, potso ea bohlokoa ka ho fetisisa e ne e se, "Nka etsa chelete e ngata joang?" Potso ea bohlokoa ka ho fetisisa e ne e le, "Na ke tšoana le Ntate oa ka ea maholimong?" Ka lebaka lena, Monghali Crossley o ile a bontša setšoantšo sa Molimo ho ba mo potileng. Hona ke khalalelo.

### **Boikhopotso ba Thuto ea 3**

- (1) Ho halalela ho bolela ho bonahatsa setšoantšo sa Molimo.
- (2) Setšoantšo sa Molimo se ho motho se ile sa senyeha ha motho a e-oa.
- (3) E 'ngoe ea lithuto tsa sehlooho tsa Bible ke pusetso ea setšoantšo sa Molimo ho motho.
- (4) Morero oa Molimo oa ka ho sa feleng ke ho re busetsa setšoantšong sa Hae.
- (5) Ha Iseraele e ne e tšepahalla Molimo, e ne e bonahatsa setšoantšo sa Molimo ho lichaba tse ling.
- (6) Ha kereke e tšepahalla Molimo, re bonahatsa setšoantšo sa hae ho lefatše le re potileng.
- (7) Setšoantšo sa Molimo ho rona se ile sa senngoa ke sebe. Leha ho le joalo, Molimo o sebetsa bophelong ba molumeli e mong le e mong ho re etsa hape le hape ba tšoanang le eena.
- (8) Litaba tse molemo tsa evangeli ke hore:
  - Ke ne ke le moetsalibe.
  - Molimo o ile a mpholosa.
  - Joale Molimo o ntse a khutlisetsa setšoantšo sa hae ka ho 'na.
  - Leholimong, ke tla tšoana le eena hobane ke tla mo bona kamoo a leng kateng.
- (9) Molimo o ntse a sebetsa ho bopa bana ba hae ho ba setšoantšo sa hae. Ho sa tsotellehe limelo tsa rona, o batla ho iponahatsa ka rona. Molimo o sebelisa Lentsoe la hae, maemo a bophelo, le batho ba bang ho re bopa ho ba setšoantšo sa hae.

### **Kabelo ea Thuto ea 3**

- (1) Ngola maqephe a 2-3 u bua ka sehlooho sena: "Setšoantšo sa Molimo ka ho 'Na." U arabe lipotso tse 'ne tsena:
  - Haeba ba lelapa la ka ba ka ntalima, na ba tla bona setšoantšo sa Molimo ho nna?
  - Setho sa lelapa la ka se ka bona'ng ho 'na e sa tšoaneng le setšoantšo sa Molimo?
  - Ke likhato li feng tse tharo tse sebetsang tseo nka li nkang ho bonahatsa setšoantšo sa Molimo bophelong ba ka?
  - Ke maemo afe kapa batho bafe bao Molimo a ba sebelisang ho bopa hore ke be setšoantšo sa hae nakong ee?
- (2) Qala thuto e latelang ka ho pheta 2 Bakorinthe 3:17-18.

# Thuto ea 4

## Khalalelo ke ho Khetheha

### Sepheo sa Thuto

Qetellong ea thuto ena, baithuti lokela ba be ba ka:

- (1) Elelloa bohlokoa ba ho arohana le sebe ho Mokreste ka mong.
- (2) Ananela monyetla oa ho khetheha bakeng sa Molimo.
- (3) Aha melaoana e sebetsang molemong oa kutloisiso ea Bibe le mabapi le ho khetheha.
- (4) Tseba 2 Bakorinthe 6:16-18 ka hlooho.

### Moshe: Monna ea Kileng a Ema Mobung e Halalelang

Ha a ntse a alositse linku lefelleng, Moshe o ile a bona sehlahla se tukang empa se sa che. Ha Moshe a atamela ho bona pono ena ea mohlolo, o ile a utloa Molimo a mo bitsa, (bala Eksoda 3:4-5).

Mehleng ea khale, ho tsamaea ka maoto a sa roalang letho ho ne ho bontša boikokobetso le hlomphe. Ho ne ho se motho ea ka roalang meqathatso kapel'a Faro. Moshe o ne a le pela ea moholo ho feta Faro. O ne a le boteng ba Molimo ea matla oohle. Moshe one a eme mobung o halalelang.

Ke eng e neng e khethehile ka sebaka seo Moshe a neng a eme ho sona? Ke eng e neng e etsa hore sebaka seo se halalele? Na ho ne ho na le lekhoakhoa le sirelitseng le nang le letšoao le reng "Sebaka se Halalelang"? Che. Na ho na le motho ea ileng a tšoara mokete oa bolumeli sebakeng seo oa ho tšoea e le sebaka se halalelang? Che!

Sebaka sena se ne se halalela ka lebaka **feela** la hore e ne e le sa Molimo. Molimo o ne a khethile karoloana ena ea lefatše ho tsoa lehoatateng lohle 'me a e phatlalatsa e halalelang; Molimo o ile a "halaletsa" sebaka seo. Sena se fana ka tšoantša thuto ea bohlokoa ka khalalelo. Sebaka sena se ne se halalela hobane Molimo o ne a se behelletse kathoko. Ntho e halalelang e behelletsoe kathoko, e khethetsoe ke Molimo.

#### Thapelo Bakeng sa Khalalelo

"Molimo ea matla 'ohle, u re entse ho ba ba hau, 'me lipelo tsa rona ha li phomole ho fihlela li fumana phomolo ho oena.

Re nehe ho hloeka hoa pelo esita le matla a sepheo, hore re se be le takatso ea boithati e ka re sitisang ho tseba thato ea hao, 'me ho se be bofokoli bo re sitisang ho e etsa."

- Augustine of Hippo

Lilemo tse ngata kamor'a moo, Molimo o ile a kopana le Moshe Thabeng ea Sinai. Le hona moo, Molimo a khetha sebaka ka thoko hoba mobu o halalelang. Moshe a bolella sechaba ho se atamele thabeng eo. Ba ne ba sa lokela ho hloella thabeng eo kapa hona ho ama mosiko oa eona hobane e ne e halalela. Boteng ba Molimo thabeng eo bo ne bo le matla



haholo hoo Moshe a ileng a hlokomelisa sechaba hore mang kapa mang ea tla ama thaba eo o tla bolaeloa ruri (Eksoda 19:12). Thaba eo e ne e le ea Molimo. Moshe o ne a eme mobung o halalelang.

### **Khalalelo ke Ho Khetheha**

Khalalelo ke semelo sa Molimo. Mangolong, lentsoe *khalalelo* le hlalosa Molimo kapa se seng seo e leng sa Molimo. Paleng ea Moshe le sehlahla se tukang, mobu o halalela ka lebaka feela la hore e ne e le sa Molimo. **Ho halalela ho bolela ho khetheloa Molimo.** Mehlala e mengata e hlahang Libukeng tsa Molao e bontša hore lintho “tse halalelang” ke tse khethiloeng tsa behelloa kathoko ho tse tloaelehileng.

### **Letsatsi le Halalelang**

Lekhetlo la pele leo lentsoe “khalalelo” le hlahang ka Bibeleng, le ne le sa bue ka motho, empa le ne le bua ka letsatsi. Qetellong ea matsatsi a tšeletseng a popo ea lintho tsohle, Molimo o ile a khetha letsatsi la bosupa a le behella kathoko ho ana tšeletseng.

► Bala Genese 2:3.

Letsatsi la bosupa le ne le halalela hobane le khethetsoe kathoko bakeng sa Molimo; e ne e se e se letsatsi le tšoanang le a mang. Isaia o itse letsatsi la Sabatha le ne le khethiloe le behelletsoe kathoko ho matsatsi a mang. Letsatsi lena e ne e se la ho etsa lintho tsa hau kapa menate ea hau; e ne ele la Molimo (Isaia 58:13). Letsatsi la Sabatha le ne le khethuoe ke Molimo hore ebe la ho mo khumamela.

Ho tšepahala hoa Iseraele bakeng sa letsatsi la Sabatha ho ne ho bontša botšepahi ba hae ho Molimo. Molimo ea neng a khethile letsatsi la Sabatha e ne e le eena ea khethileng Iseraele.

► Bala Eksoda 31:12-13.

Ho halalela ke ho khethoa **ke** Molimo **bakeng sa** Molimo. Molimo o ile a halaletsa letsatsi la Sabatha; Molimo o halaletsa sechaba sa hae.

### **Lintho tse Halalelang**

Sebaka se neng e behelletsoe kathoko, se khethiloe libakeng tse ling e ne e le mobu o halalela; e ne e le la Molimo. Letsatsi le neng le behelletsoe kathoko ho matsatsi a mang le ne le halalela; e le la Molimo. Ntho efe le efe e neng e behelloa kathoko bakeng sa Molimo e ne e halalela.

**Liaparo** tseo Baprista ba neng ba li apara li ne li halalela (Eksoda 28:2). Li ne li entsoe ka litaello tse khethehileng tse tsoang ho Molimo 'me e ne ele tsa Molimo. **Menehelo** eo batho ba neng ba e tlisa tabernakeleng e ne e halalela; e ne e khethetsoe Molimo (Eksoda 28:38). Baprista ba ne ba sebelisa ole e khethehileng ha ba khumamela. Molimo o ne a laetse hore ho se ke ha sebelisoa ole ena ke motho e mong, hobane e ne e khethetsoe ho sebelisoa sebakeng sa Molimo, (bala Eksoda 30:32).

Molemong oa ho hlokomela tabernakele, Molimo o ne a hloka Moiserale e mong le e mong ho lefa lekhetho le bitsoang “**shekele ea sebaka se halalelang**” (Eksoda 30:13 CSOB24, 24; Eksoda 38:24-26; Levitike 5:15; Levitike 27:3, 25; Numere 3:47, 50; Numere 7:13). Chelete ena e ne e sa sebelisetsoe mabaka a tloaelehileng. Baithuti ba bangata ba lumela hore ena e ne e le chelete e fapaneng le shekele e tloaelehileng. E ne e halalela; e ne ele ea Molimo.

**Thepa** e neng e le ka tabernakeleng e ne e halalela. Molimo o ne a laetse Moshe hore a khethe thepa eo ho lithepa tse ling, (bala Eksoda 30:29).

Iseraele e ne e utloisisa hore ho na le menyetla e meraro ka ntho efe kapa efe (Levitike 10:10):

1. **E sa hloekang** – ho ne ho se motho ea ka e sebelisang. E ne e le kathoko ho meeli bakeng sa sechaba sa Molimo.
2. **E hloekileng**<sup>10</sup> – e ne e ka sebelisoa hohle mesebetsing e tloaelehileng.
3. **E halalelang** – e ne e khethetsoe ho sebelisetsoa Molimo. E ne e sebelisoa tšebeletsong ea Molimo *feela*.

Pele Iseraele e kena Kanana, Molimo o ile a ba nea litaello bakeng sa ho lema lifate (Levitike 19:23-25):

1. Lilemong tse tharo tsa pele, litholoana li ne li le **E sa hloekang** — li ne li thibetsoe ho jeoa, 'me li ne li le kantle ho tšebeliso ea sechaba sa Molimo.
2. Ka selemo sa bone, litholoana li ne li le **E halalelang** — li ne li khethetsoe ho sebelisoa e le nyehelo ea thoriso ho Morena, 'me batho ba ne ba sitoa ho li sebelisa bakeng sa bona.
3. Ho qala ka selemo sa bohloko, sefate se ne se le **E hloekileng** — litholoana tsa sona li ne li ka jeoa 'me tsa sebelisoa ka tsela e tloaelehileng.

## Libaka tse Halalelang

Tabernakele e ne e halalela hobane e ne e khethetsoe Molimo. Ntho efe le efe e kahare ho tabernakele e ne e khethetsoe ho sebelisetsoa Molimo. Sebaka seo Molimo a neng a kopana le moprista e moholo ho sona se ne se bitsoa Ka Sehalalelisong.

Hamorao, tempele e Jerusalema e ne e halalela hobane e ne e khethetsoe tšebeletso ea Molimo. Tempele e ne e halalela hobane *feela* e ne e le ea Molimo. Ka lebaka la sebe sa Iseraele, Ezekiele o ile a bona pono ea khanya ea Molimo e tloha tempeleng (Ezekiele 10).

---

<sup>10</sup> Liphetoletso tse ngata li bua ka “e sa hloekang” bakeng sa ntho “e tloaelehileng”. Phetoletso ea KJV cona e bua ka “e sa halalelang.” Lipoleloana tsena kaofela ha li bolele hore “e litšila”; li mpa li bolela hore ntho “e ne e sa behelloa kathoko” bakeng sa tšebeliso e halalelang.

Kamora hore khanya ea Molimo e tlohe, tempele eo e ne e se e sa halalele. Ka selemo sa 63 BC, molaoli oa mabotho a Roma ea bitsoang Pompey o ile a kena Ka Sehalalelisong, 'me a bona hore e feela ha hona letho teng. Kahobane Molimo o ne a se a sa phele teng, tempele eo e ne e se e sa halalele.

## **Leloko le Halalelang**

Leloko la Levi le ne le khethetsoe Molimo. Bosiu ba pele Iseraele e tsoa Egepeta, matsibolo a bashanyana a Baegepeta bohle a ile a bolaoa. Matsibolo a bashanyana a Baiseraele a ile a bolokeha hobane ba ile ba mamela taelo ea Molimo ea hore ba tlotse mali a konyana kaholimo ho likosene tsa matlo a bona.

Baiseraele ba ne ba hopola tokoloho ea bona ho tsoa Egepeta ka litsela tse peli. Ea pele, malapa oohle a BaYuda ba ne ba etsa Mokete oa Paseka selemo le selemo. Ho ja moketeng ona e ne e le ho keteka tokollo ea Israele ho tsoa Egepeta.

Tsela ea bobeli eo Iseraele e neng e hopola tokoloho ho tsoa Egepeta e ne e le e hlollang. Ele ho hopotsa Baiseraele hore o ne a boloke matsibolo a bona a bashanyana, Molimo o ile a ba laela hore:

► Bala Eksoda 13:2.

Lentsoe lena *nkhethela* le nkuoe ho tsoa lentsoeng la Seheberu leo ha le fetoloa e leng "ho halaletsa" kapa "ho behella kathoko." Letsibolo le leng le le leng la moshanyana malapeng oohle e ne e le la Molimo. Molimo o ile a khetha leloko la Levi ho emela matsibolo a bashanyana a Iseraele kaofela. Leloko lena le ile la sebeletsa sebakeng sa sechaba kaofela.

► Bala Numere 3:12-13.

Ho Eksoda 29, Molimo o ile a etsa taelo ea keteko ho khetha baprista. Lentsoe *halalela* le sebelisitsoe makhetlo a robong khaolong ena. Balevi ba ile ba khethoa bakeng sa matsibolo; leloko leo e ne e le la Molimo ka ho felletseng.

► Ke hobaneng ho ne ho le bohlokoa hore Molimo a tiise molaetsa oa ho khetheha bakeng sa Baiseraele? Ke hobaneng Paulosi a ile a hatella molaetsa oo bakeng sa likereke tse Korinthe (2 Bakorinthe 6:14-7:1) le Thesalonika (1 BaThesalonika 4-5)? Hobaneng molaetsa oo o sa ntse o le bohlokoa le kajeno?

Mehlala ena (letsatsi le halalelang, libaka tse halalelang j.j) e bontša hore ho halalela ke ho khetheloa Molimo. Sena se re thusa ho utloisisa seo bophelo ba khalalelo bo se bolelang le kajeno. Motho ea halalelang ke oa Molimo ka ho felletseng. O khethetsoe merero ea Molimo. Ho halalela ke ho behelloa kathoko **ho sebe** le **ho** khetheloa **Molimo**.

## **Ho Halalela ke ho Behelloa Kathoko ho Sebe**

Ka lebaka la hobane Molimo oa halalela, sechaba sa hae se lokela ho halalela. Motho oa moetsalibe a ke ke a ba le likamano le Molimo o halalelang. Batho ba halalelang ba ikarola le ntho tsohle tse sa khahliseng Molimo.

### **Molimo o Halalelang o Hloile Sebe**

#### ***(1) Molimo o bontša khalalelo ea hae ka moroallo oa metsi.***

Ha Molimo a bopa lefatše le ne le le molemo haholo, empa sebe se ile sa senya tlholeho ena. Eitse ha Molimo a talima motho, o ne a bona bobbe bo pelong ea motho.

► Bala Genese 6:5-6.

Noe le lelapa la hae ba ile ba pholoso hobane Noe o ne a phela bophelo ba khalalelo, (bala Genese 6:9). O ile a lula a arohane le sebe.

#### ***(2) Molimo ile a bontša khalalelo ea hae ka ho ahlola Nadabe le Abihu.***

Bara ba baholo ba Aarone ba ne ba khethetsoe tšebeletso ea Molimo. Ha ba tlola melao ea khalalelo ea tabernakele, mollo o ile oa tsoa ka pel'a Morena 'me oa ba chesa, 'me ba shoa ka pel'a Morena (Levitike 10:2). Levitike ha ea fana ka lintlha tsa sebe sa Nadabe le Abihu, empa bala seo Molimo a se buile ho Levitike 10:3. Baprista ba Molimo ba lokela ho boloka tabernakele ea hae e halalela. Nadabe le Abihu ba ne ba nahana ba ka tšoara se halalelang joalo ka ntho feela e tloaelehileng.

#### ***(3) Molimo o ile a bontša khalalelo ea hae ha a ahlola Moshe le Aarone.***

Moshe le Aarone ba ile ba sitoa ho kena Lefatšeng la Tšepiso hobane ba sa ka ba lumela ho 'na [Molimo], le ho nkhalaletsa mahlong a bana ba Iseraele (Numere 20:12). Kamora hore Molimo a laele Moshe ho bua le lefika hore le ntše metsi, Moshe eena o ile a otlala lefika. Molimo o ile a ahlola Moshe hobane ha a ka a mo halaletsa mahlong a sechaba.

Ka lebaka la hobane Molimo oa halalela, o sitoa ho iphapanyetsa sebe. Ka makhetlo a leshome libukeng tsa molao, sebe se bitsoa "manyala ho Molimo," ntho eo Molimo a e hloile. Molimo o halalelang o hloile sebe.

### **Batho ba Halalelang ba Hloile Sebe**

Molimo ke Molimo oa khalalelo hape ke Molimo ea lerato. Sebe sa motho se ile sa baka bothata. Molimo ea halalelang o ne a ka tsoela pele joang ho hahla likamano le motho oa moetsalibe? Molimo o ne a ka bontša lerato la hae joang ho motho a bile a ntse a tšepahalla khalalelo ea hae ka nako e 'ngoe?

Molimo o fane ka Molao oa hae ho thusa bana ba hae ho phela ka khalalelo. Molao o ne o sa fanoa ho re thatafaletsa bophelo; o fanoa ho re thusa hore re phele ka likamano tse

lokileng le Molimo. Molao o file bana ba Molimo mokhoa oa ho arohana le sebe. Batho ba halalelang ba tla hloea sebe joalo ka ha Molimo ea halalelang a hloile sebe.

Lingoli tsa Testamente e Ncha li ratile hore ho khetheloa Molimo ho hloka ho arohana le sebe, (bala Jakobo 4:4). U ka sitoa ho ba motsoalle oa Molimo 'moho le oa sebe ka nako e le 'ngoe. U ka sitoa ho tsamaea le Molimo 'moho le sebe ka nako e le 'ngoe. Bophelo ba khalalelo bo hloka karohano le sebe.

"Jesu o shoele, eseng ho boelanya batho le sebe, empa ho ba lopolla sebeng."

- R.E. Howard

Paulosi o ile a ngolla batho ba neng ba nahana hore mohau oa Molimo o ba lumelletse ho tsoela pele ho iketsetsa sebe kamoo ba ratang. Karabo ea Paulosi e bile e tiisang

► Bala Baroma 6:15-16. Ho na le khetho pakeng tsa ntho tse peli feela.

1. Haeba u inehela sebeng, qetello ke lefu.
2. Haeba o fana ka booena ho Molimo, qetello ke ho loka.

U sitoa ho inehela ho tsona li le peli, Molimo le sebe. Bakreste ha ba se ba holotsoe sebeng, ba fetohile bahlanka ba ho loka (Baroma 6:18). Joalo ka bana ba Molimo, re lokela ho arohana le sebe.

Paulosi o behile taba ena ka tsela e sebetsang ho bontša boikarabello ba rona ho qoba sebe sa ka boomo.

► Bala Baroma 6:19.

Ha ho khonehe hore u ka boloka setsoalle le sebe u ntso phelela Molimo. Ho khetheloa **Molimo** ho hloka ho arohana **le sebe**. Re sitoa ho boloka likamano tsa rona le Molimo hammoho le sebe. Kamora hore Adama le Eva ba etse sebe, ba ile ba ipata har'a lifate tsa tšimo, ba tšaba sefahleho sa Jehova Molimo (Genese 3:8). Kopano ea bona le sebe e ile ea baka karohano le Molimo.

Pholoho ha e re lokolle ho phela sebeng. Pholoho e re lokolla sebeng hore re tle re halalele. Morero oa pholoho ke ho tlisa sechaba sa Molimo khalalelong. Morero oa Molimo ke ho re lopolla sebeng le ho re khethela ho ba le likamano le eena.<sup>11</sup>

Chih-ming o ne a tsamaea thabeng Taiwan. Haufi le tsela ho ne ho e-na le selomo se oelang tlaase nokeng. Na u nahana hore Chih-ming o ile a kopa mokhanni oa bese ho mo bontša hore a ka khona ho khanna haufi le selomo hakae? Che! Chih-ming o ne a batla ho tsamaella hole le selomo kamoo ho ka khonehang. Ka tsela e tšoanang, motho ea halalelang o tsamaella hole le sebe. Likarolong tsohle tsa bophelo, motho ea halalelang o qoba bophelo ba sebe. Motho ea halalelang o tsamaella hole le sebe kahohle kamoo a ka khonang hape o ea haufi le Molimo kahohle kamoo a ka khonang.

---

<sup>11</sup> John N. Oswalt, *Called to Be Holy: A Biblical Perspective* (Nappanee: Evangel Publishing House, 1999), 33

Moapostola Petrose o e beha tjena, (bala 1 Petrose 2:9). Re tla etsa sena joang? Ka ho phela bophelo ba khalalelo, (bala 1 Petrose 2:10-12). Bophelo bo halalelang ba sechaba sa Molimo ke letšoao le bontšang ho ruuo. Batho ba halalelang ba tsamaella hole le sebe hobane ke sechaba se ruiloeng ke eena, sechaba se ikarabellang ho Molimo. Motho ea halalelang o batla ho ba oa Molimo ka ho felletseng.

Paulosi o hopolitse Bakorinthe hore, ba khopo ha ba ka ke ba rua lefa la 'muso oa Molimo. O thathamisa ba bang ba bao ba tla siuoa kante, (bala 1 Bakorinthe 6:10). O boela a ba hopotsa hore, (bala 1 Bakorinthe 6:11). Bakreste ba Korinthe ba ne ba holetse tikolohong e khopo 'me ba ne ba entse libe tsena.

Empa Paulosi o hana ho tlohela Bakreste ba le boemong boo. Ha a re, "Joale le se le le Bakreste – ba ntseng ba boka, ba rapelang litšoantšo, ba bafebi, basotoma, lea utsoa, le meharo, le matahoa, j.j." Ho fapana le hoo, bala seo a se buile ho 1 Bakorinthe 6:9–11.

Paulosi oa keteka, "Empa ha le sa le kamoo le neng le le kateng! Ha le sa tlamiloe ke libe tseo. Le arohantsoe le sebe 'me joale le ba Molimo." Ho halalela ke ho arohana le sebe e le hore re tle re be ba khethetsoeng Molimo.

### Ho Halalela ke ho Khetheloa Molimo

Osiase e ne e le morena ea lokileng ea etsang ho lokileng mahlong a Jehova.... A 'na a batla Jehova.... Molimo oa mo thusa khahlanong le Bafilesta (2 Dikronike 26:4-7). Osiase o ile a atleha haholo pusong ea hae. O ile a atolosa 'muso oa Yuda a ba a khutlisa le lefatše le neng le hapuo nakong ea puso tsa marena a fokolang, (bala 2 Dikronike 26:8).

Osiase e ne ele morena ea matla, empa pale ea hae ena le qetello e bohloko, (bala 2 Dikronike 26:16).

Ke eng e ileng ea tlisa kahlolo ea Molimo ho Osiase? Morena o ile a kena tempeleng ea Jehova a tle a chese libano aletareng ea libano. O ile a fosa karohano e beiloeng pakeng tsa lintho tse tloaelehileng le tse halalelang. Ka lebaka leo, Osiase ea e-ba mo-lepera, (bala 2 Dikronike 26:21).

Morena Osiase o ne a sa bolaea, a sa utsoa, kapa a sa feba. O ne a sa rapele melimo ea litšoantšo kapa hona ho botsa linohe. Osiase o ile a etsa sebe ka ho tlola molao oa Molimo o mabapi le ho khetheha. Ka boikakaso, Osiase o ile a ama aletare e halalelang. O ile a ikhohomosa. O ile a hlokelana Jehova Molimo oa hae botšepahi.

Boikhohomosong ba hae, Morena Osiase o ile a tlola molao oa khalalelo ea tempele. Molao o ne o ratile sechaba sa Molimo hore ba ne ba lokela ho arohana le sebe, e le hore ba tle ba phele ka likamano tse phethehileng le Molimo. Bophelo ba khalalelo bo **khethetsoe Molimo**.

Libuka tsa Nalane li fana ka mehlala e mengata ea batho le lintho tse neng li khethetsoe Molimo. Joalo ka ha a entse a le sehlahleng se tukang, Molimo o ile a khetha karolo e 'ngoe ea **lefatše** e le e halalelang, (bala Joshua 5:15).

Ha Iseraele e ne e futuhela Jeriko, Molimo o ile a ba laela ho senya lintho tsohle tse neng li entsoe anathema ho Morena, (bala Joshua 6:17, 19). Motseng oa Jeriko, lipitsa tsena li ne li sa halalele; li ile tsa halalela feela kamor'a hore Molimo a li khethe e le tsa hae.

Davida o ile a laela **Balevi** hore pele ba ka nka Areka ho e khutlisetsa Jerusalema, ba ikhethela merero ea Molimo, (bala 1 Dikronike 15:12).

Ho arohana le sebe ha se sona sepheo sa ho qetela ho bahalaleli. Iseraele e ne e arohane le lichaba tsa baetsalibe tse e potileng, e le hore e be **ea** khethetsoeng **Molimo** joalo ka letlotlo la bohlokoa (Levitike 20:26; Eksoda 19:5). Ha ho khakoloa tempele, Salomone o ile a rapela a re, (bala 1 Marena 8:53). Molimo o ne a khethile Iseraele har'a lichaba tse ling tsohle e le hore e tle e be oa hae. Iseraele e ne e fumane tlotla ho ba lefa la Molimo.


Ha a hlokomelisa Bakorinthe ho se be le lilekane le ba sa lumelang, Paulosi o ile a qotsa ho tsoa ho Isaia, (bala 2 Bakorinthe 6:17).

Molaetsa ona oa ho arohana hangata o ne o sa thabise. Leha ho le joalo, temana eo e tsoela pele ka tšepiso e monate! Re arohane le sebe e le hore re be ba khethetsoeng Molimo. Paulosi o tsoela pele ka tšepiso, (bala 2 Bakorinthe 6:17-18).

Ho arohana le lintho tsohle tse sa hloekang ha ho re thibele ho thaba. Ho e-na le moo, re arohana le sebe **hore re tle re be le monyaka oa ho tsamaea le Molimo**. Bakreste ba lokela ho arohana le sebe e le hore re tle re be ba Molimo ka ho felletseng. Bahalaleli ba tsamaella thoko le sebe ka thabo hobane ba tseba hoba karohano le sebe e ba lumella ho tsamaea ka likamano tse tebileng le Ntata bona ea Maholimong.

Molaoana ona o ka bonahala melaong e amanang le lijo esita le liaparo. Ke hobane'ng ha Molimo a itse, "Le se ke la ja lijo tse itseng" kapa "Le se ke la apara liaparo tsa masela a itseng"? Melao ena e ne e le thuto lintho tse bonoang, 'me e ne e ruta Iseraele hore o lokela ho ba ea khethetsoeng Molimo. Melao ena e ne e tšoea Iseraele e le sechaba sa Molimo, (bala Isaia 43:4). Ke setšoantšo se setle hakaakang! Iseraele o ne a sa khetheloa Molimo e le kotlo; o ne a khethiloe e le hlomphe le lerato. E ne e le letlotlo la bohlokoa la Molimo har'a lichaba tsohle (Eksoda 19:5).

Mohopolo ona o bontšitsoe ka tabernakeleng. Ba neng ba sa hloekisoa ba ne ba sala lebaleng le kante. Ba neng ba hloekisitsoe ba ne ba kena lebaleng le kahare. Kahare ho tabernakele, baprista ba ne ba etsa lihlabelo. E ne e le moprista e moholo feela ea neng a kena ka Sehalalelisong. Tsela ena eo lintho li neng li hlophisitsoe kateng e ne e nea sechaba khopotso e bonoang ea hore ho arohana **le sebe** ho re lumella ho khetheloa **Molimo**. Sena se ne se bontša batho hore na ho boleloa'ng ka ho ba haufi le boteng ba Molimo bo halalelang.



- 1 = Lebala le kantle (Ba sa Hloekang)
- 2 = Lebala le kahare (Ba Hloekileng)
- 3 = Tabernakele (Baprista)
- 4 = Sehalalelisiso (Moprista e Moholo)

"Ha ho na letho maphelong  
a rona leo e leng ntho e sa  
reng letho ho Molimo."

- Oswald Chambers

Ha batho ba ntse ba latela melao ea ho  
khetheha, ba ile ba ithuta hore re lokela ho halalela likarolong tsohle  
tsa bophelo. Molimo o na le matla holim'a bophelo bohle.

Levitike 17-26 e bitsoa "Molao oa Khalalelo." Molao oa Khalalelo o ne o ruta Iseraele mokhoa  
oa ho phela e le sechaba se halalelang. Ho tloha ho lintlha tse nyenyane ka ho fetisisa ho  
isa ho molaoana o moholo ka ho fetisisa, melao ena e ne e susumelitsoe ke khalalelo ea  
Molimo. E ne e bontša Iseraele hore a ka halalela joang lefatšeng lena le silafetseng. E ne  
e ruta Iseraele tsela eo ba ka arohanang le sebe ka eona. Ea bohlokoa ka o fetisisa ke hore,  
e ne e ruta hore Iseraele o lokela hore a khethehe ho "Jehova Molimo oa bona, ea ba  
ntšitseng lefatšeng la Egepeta" (Levitike 19:36).

► Bala Levitike 20:26. Hona e ne e le ho khethehela **Molimo**.

Lentsoe le le leng la Seheberu le sebelisitsoeng ho Levitike 20:26 le sebelisitsoe hape ho  
Genese 1:4 ha Molimo a arola kapa a *arohanya* leseli le lefifi. U ka sitoa ho kopanya leseli  
le lefifi; ke lintho tse peli tse fapaneng. Molimo o ne a batla karohano e tletseng hape e  
felletseng ho Iseraele le lichaba tse silafetseng tse neng li e potile.

Molimo o ne a bilelitse sechaba sa hae ho arohana ka ho feletseng le sebe. Hobane'ng? **E  
le hore e be ba hae ka ho phethahala**. Melao ena e bontša hore bophelo kaofela ke ba  
Molimo. Ho bahalaleli, bophelo bohle bo tlasa taolo ea Molimo. Ho halalela ho bolela ho  
khetheha ho Molimo likarolong tsohle tsa bophelo. Re arohana le sebe e le hore re tle re be  
ba Molimo.

► Ke efe e bonahalang e le thata haholo – ho **arohana le sebe** kapa ho **khetheloa  
Molimo**? Hobane'ng?

### **Khalalelo e Kenngoang Tšebetsong: "Ba Lefatšeng, Empa Ha se Ba Lefatše"**

#### **Ho khetheha ka Tsela ea Bibe le ho Fana ka Bopaki ho Lefatše**

Jesu o ile a rapela hore barutuo ba hae ba be lefatšeng, empa e se be ba lefatše. Daniele  
o ile a hana ho itšilafatsa ka lijo tsa morena, leha e le ka veine e nooang ke eena (Daniele  
1:8). Boleleleng ba nalane, sechaba sa Molimo se ipelokile se arohane le libe tsa batho bao  
se phelang har'a bona. Sena se lumelletse sechaba sa Molimo ho fetoha bopaki lefatšeng  
leo ba leng ho lona.

Iseraele e ne e bitetsoe ho ba 'muso oa baprista, sechaba se halalelang se neng se etella  
lichaba tse ling pele ho ea ho Molimo, (bala Eksoda 19:6). Ha Iseraele e ne e tšepahalla  
Molimo, ba ne ba fihlella morero ona. Bala seo Rahaba a ileng a se bua ho Joshua 2:9.



Hobane'ng? Na ke hobane Iseraele e ne e le sechaba se matla se nang le mabotho a maholo? Che! Bala lebaka la hae ho Joshua 2:10–11. Ha Iseraele e ne e khethehetse Molimo, e ne e fetoha bopaki ho lichaba tsohle.

Re bona taba ena bophelong ba Josefa. Kahobane Josefa o ne a ikarohantse le libe tsa Egepete, o ile a fetoha bopaki ho Faro, (bala Genese 41:38). Hoja Josefa a ne a phetse joalo ka Baagepete, a ka be a sa ka a neoa monyetla oa hore e be bopaki kapel'a Faro.

Jesu o ile a rapella hore balateli ba hae ba be lefatšeng, empa e se be ba lefatše lena. Polelo ena e na le hore e se ke ea utloisisoa ke Bakreste ba batlang ho phela bophelo bo hlokolosi ba bomolimo. Ka phoso ba nahana hore ho ba lefatšeng lena ke bokhopo bo hlokalang boo sechaba sa Molimo se lokelang ho bo mamella tseleng ea bona ea ho ea leholimong.

Leha ho le joalo, kamor'a ho ho thabela hore balateli ba hae "ha se ba lefatše lena," Jesu o ile a rapela a re, (bala Johanne 17:16-18). Jesu o rapelletse hore balateli ba hae ba sebeletse ka katleho **lefatšeng**. Jesu o rapelletse hore re se ke ra ba ba lefatše leha re romiloe lefatšeng. Ka ho lula re arohane le sebe, re ka phethahatsa pitso ea rona ea ho fetola lefatše. Joalo ka bana ba Molimo, re ka ba letsoai le leseli la lefatše le silafetseng.

Baapostola ba ne ba tseba hore bophelo ba khalalelo ke bopaki ho lefatše. Petrose o ile a biletsa balumeli ho phela bophelo ba khalalelo boo e leng bopaki ho ba sa lumelang:

► Bala 1 Petrose 2:12.

Paulosi o ile a ngolla Tite, moetapele oa kereke e neng e le sehlekehlekeng sa Kreta. Balumeli bana ba ne pa pota-potiloe ke bahetene. Bala ho Tite 2:10 seo Paulose a ileng a se bolella Tite ka tsela eo Bakreste ba lokelang ho phela ka eona. Ha Bakreste ba phela bophelo ba khalalelo, boitšoaro ba bona bo ne bo hlophisa evangeli. Boitšoaro ba bahalaleli bo tla etsa hore evangeli e khahlehe lefatšeng la rona.

Paulosi o ile a biletsa Bakreste ba Filipi hore ba phele bophelo ba bomolimo. Ba ne ba lokela ho lula ba ikarohantse le sebe, (bala BaFilipi 2:15).

Ha sechaba sa Molimo se phela bophelo ba khalalelo, re khanya joalo ka ka maseli lefatšeng. Maphelo a bana ba Molimo a lokela ho fana ka bopaki bo khanyang lefatšeng lena le fifetseng. Ho arohana le sebe ha se tsela ea molao ea ho fumana pholoho ka mesebetsi. Ho arohana le sebe ho re nea bokhoni ba ho phethahatsa pitso ea Jesu ea ho ba leseli la lefatše le letsoai la lefatše (Mattheu 5:13-14). Matsoho a halalelang ke bopaki bo matla lefatšeng la rona.

## **Melaoana ea Ho Khetheha ho ea ka Bibe**

Ho batho ba bangata ho arohana lefatše ke lethathamo la lintho tseo u lokelang ho li etsa le tseo u sa lokelang ho li etsa. Hangata ho arohana ho hlalosa ka lethathamo la melao. Batho ba bangata ba hlalosa ho arohana ka lethathamo la liphahlo tseo ba ke keng ba li apara, libaka tseo ba ke keng ba ea ho tsona, esita le mefuta ea boithabiso eo ba ke keng ba nka karolo ho eona.

Ke taba ea 'nete hore batho ba halalelang ha ba na ho apara lintho tse ling tse itseng kapa ho ea libakeng tse itseng. Motho ea halalelang o batla ho khahlisa Molimo likarolong tsohle tsa bophelo. Leha ho le joalo, ho arohana le sebe le ho khethehela Molimo ho fetisa lethathamo la melao.

Bothata bo bong ba ho hlalosa ho arohana ka lethathamo la melao feela ke hore melao ea fetoha kamor'a nako, hangata ho bile ho se na le tlhaloso. Kerekeng e 'ngoe ba ipapisa le melao e itseng ha ba hlalosa ho arohana; athe kereke e 'ngoe esele eona e ipapisa le melao e fapaneng le ea pele ha ba hlalosa ho arohana. Katamelo e ntle e ka ba ho hlalosa melaoana ea Bibe e le leng ea 'nete **ka linako tsohle le mehlobong eohle**.

Joalo ka Bakreste, mokhoa oa rona oa ho phela o tlameha ho bontša boikokobetso ba rona tlas'a Lentsoe la Molimo le tataiso ea Moea o Halalelang. Haeba re batla ho ba batho ba khethetsoeng Molimo joalo ka sechaba se ruiloeng ke eena (1 Petrose 2:9), re tla mamela lithuto tsa Lentsoe la hae ka ho rata hoa rona.

Leha Bibe e sa bue ka kotloloho ka lintlha tse ngata tse amang bophelo ba matsatsi a kajeno, e fana ka melaoana e tla re tataisa. Ke melaoana efe e lokelang ho tataisa bophelo ba motho ea halalelang?

### **(1) Molaoana oa Boithompho**

Molaoana oa boithompho o tiisa hore mekhoa ea rona ea moaparo le ea boitšoaro e lokela ho tlotlisa Molimo hape re qobe lintho tse soabisang mahlong a hae. Moaparo oa rona le boitšoaro ba rona li tsamaisoa ke takatso ea rona ea ho isa khanya ho Molimo.

Bibeleng ka bophara, **bofeela** e ne e le ntho e lihlolong. Kamor'a hore Adama le Eva ba etse sebe, ba ne ba soabile hobane ba tseba hobane ba feela (Genese 3:7). Ba ile ba rokahanya mahlaku a sefate sa feie, ba iketsetsa meitlamo ka oona. Ha Molimo a kopana le bona ka serapeng, o ile a ba etsetsa liaparo tse phethahetseng, likobo tsa matlalo, 'me a ba apesa tsona (Genese 3:21).

Mangolong ka kakaretso, bofeela e ne e le letšoao la lihlolong. Baprofeta ba ne ba sebelisa bofeela e le letšoao la kahlolo ea Molimo (Isaia 20:1-4; Hosea 2:3; Ezekiele 23:29). Joalo ka sechaba sa Molimo, moaparo oa rona o lokela ho bontša hore re hlompha kamoo Molimo a talimang boithompho kateng. Re lokela ho hlabisoa lihlolong ke bofeela kamoo e neng e le letšoao la lihlolong ho baprofeta ba Molimo. Moaparo oa rona o lokela ho ba o bonahatsang sechaba se halalelang hape se hloekileng sa Molimo.

Boithompho ka Bibeleng bo ne bo kenyeletsa **tlhalohanyo ea boleng ba botho**. Leha Bibe e sa hlalose liphahlo tse neng li aparoa ke Baiseraele ka ho li qolla, Molimo o ne a laetse sechaba sa hae ho boloka tlhalohanyo ea boleng ba botho mokhoeng oo ba neng ba apara ka oona (Deuteronoma 22:5).

Testamente e Ncha e ruta hore **boikhabiso** ba rona bo lokela ho bontša hore re sechaba sa Molimo. Paulosi o bontšitse phapang pakeng tsa mefuta e 'meli ea boikhabiso:

► Bala 1 Timothea 2:9-10.

Paulosi o hanela ho ikhabisa ka mokhoa o fetelletse oa batla ho phahamela ba bang ka tokiso ea moriri, mabenyanane, le liaparo. Hona moo, Paulosi o babatsa mokhabo oa liaparo tse hlomphehang tse lokelang basali ba ipolelang hoba ba sebeletsa Molimo. Boikhabiso bona ke ba mesebetsi e molemo 'me ke bona boo Bakreste ba lokelang ho bo batla.

Thuto ea Paulosi e bontša kamano pakeng tsa boikhabiso ba kante le moea o kahare. Karolong ena ea lengolo la Paulosi ho Timothea, o ne bua mabapi le thapelo ka kerekeng. O ne a bolella Timothea hore Bakreste ba lokela ho rapela joang. O araba litaba tse ka tšoenyang ba batona esita le ba batšehali.

Paulosi o ngolla banna hore ba rapele ho se bohale le khang (1 Timothea 2:8). Ha rea lokela ho kena boteng ba Molimo ka moea o bohale. Paulosi o ngola hore basali ba lokela ho rapela ka moea oa boithompho le ka boinehelo; sena se bonahatsoa le moaparong le boikhabisong. Ha rea lokela ho tla pel'a Molimo ka boikakaso le boithoriso. Bahalaleli ba na le boithompho bo bonahatsoang likarolong tsohle tsa bophelo.

► Bala 1 Petrose 3:3-5. Petrose o bontšitse kamano e tšoanang e lipakeng chebahalo ea kante le moea o kahare.

Joalo ka Paulosi, Petrose o bua ka mekhoe e 'meli ea boikhabiso. O hanela boikhabiso ba **kante** ba moriri o foriloeng, mabenyanane, le ba liaparo tsa ho khaba. Joale, o laela hore ho etsoe boikhabiso ba kahare, e leng ba moea o mosa, o bonolo, eleng hlopheho e ratehang ho Molimo. Bahalaleli ba tsotella haholo ho rateha ho Molimo ho feta ho batla ho amoheloa ke lefatše lena. Ke ka mokhoa o joalo basali ba halalelang, ba tšepile Molimo, ba neng ba ikhabisa.

Re le Bakreste, **boithabiso** ba rona bo lokela ho bontša hore re khethetsoe Molimo. Paulosi o re bolella hore Bakreste re lokela ho tlatsa likelello tsa rona ka lintho tse tla etsa hore haholo re tšoane le Krete.

► Bala BaFilipi 4:8.

Re le sechaba se halalelang, karolo e 'ngoe le e 'ngoe ea bophelo ba rona e laoloa ke Molimo. Ha u bala Levitike, u tla hlokomela hore ha ho na ntho e nyenyane hoo Molimo a sa e tsotelleng. Ntho e 'ngoe le e 'ngoe e bohlokoa ho eena! Hona **ha se** ho bolela hore Molimo ke mohatelli ea batlang ho laola likarolo tsohle tsa bophelo ka bokhopo. Empa ke hobane Molimo e le ntate ea lerato ea tsotellang likarolo tsohle tsa bophelo ba bana ba hae. Ntate oa rona ea maholimong ha a batle ha bana ba hae ba apara liphahlo tse hlomphehang 'mele oo a o bopile ka lerato. Ntate oa rona ea maholimong ha a rate ha bana ba hae ba tlatsa likelello tsa bona ka boithabiso bo tla susumetsa mehopolo e soabisang ea boetsalibe. Re sechaba se ruile ke eena, 'me o tsotella karolo e 'ngoe le e 'ngoe ea bophelo ba rona.

► Kenya tšebetsong molaoana ona oa boithompho morabeng oa heno. Ke likarolo life (tsa moaparo esita mokhoa oa ho phela) tseo e leng liqholotso bakeng sa ho boloka boithompho lefatšeng la heno?

## **(2) Molaoana oa Bohlokomeli**

Molaoana oa bohlokomeli o tiisa hore lintho tsohle tseo re nang le tsona ke tsa Molimo. Joalo ka bana ba Molimo, re tla sebelisa lichelete tsa rona le lithepa tsa rona ka tsela e mo tlotlisang.

Lilemong tsa mongoaha-kholo oa 18, Bakreste ba bang ba ne ba latetse mekhoha ea ho apara e thata haholo. Ba ne ba hanela mekhabiso ea mofuta ofe kapa ofe liaparong. Ba ne ba sa apare liphahlo tse nang le makonopo a khanyang; banna ba ne ba sa apare likhama tsa molaleng; ba ne ba apara liphahlo tse entsoeng feela ka lesela le lethokoa le bohlooho. Ba ne ba shebahala ba apara ka boithompho haholo.

Leha hole joalo, John Wesley o ile a ruta ka molaetsa o buang ka moaparo moo hanyetsang hore chebahalo ena ea boithompho e ne e le ea kantle feela. Leha liaparo tseo li ne li shebahala e le tsa boithompho, Bakreste ba bang ba ne ba iphapanyetsa molaoana oa bohlokomeli. Ba ne ba ka nka maeto a malelele ho tloha London ho ea Paris ba tsamaela ho ea reka masela a theko e holimo ka ho fetisisa bakeng sa ho tla etsa liphahlo tseo tsa bona. E, ba ne ba reka lesela le lethokoa le bohlooho feela, empa ba ne ba reka lesela le theko e holimo haholo e le ho bontša borui ba bona. Ba ne ba hlomphehile, empa e ne e se bahlokomeli ba batle ba chelete ea Molimo.<sup>12</sup>

Wesley o tiisitse taba ea hore ho arohana le lefatše ho ne ho bolela ho ba bahlokomeli ba khabane ba chelete eo Molimo a re fang eona. O ile a ruta hore motho ea halalelang ha lokele ho senya chelete ka liphahlo tse theko e phahameng. Hoa khonahala hore u ka apara liaparo tsa boithompho empa re ntse re le batho ba senyang ka khetho eo re e etsang. Paulosi o itse ho ikhabisa hoa rona e se ke ea e-ba hoa liaparo tse theko e holimo (1 Timothea 2:9).

Molaoana oa bohlokomeli ha o bolele hore re lule re reka lintho tse theko e tlaase ka ho fetisisa kamehla. Makhetlo a mang liphahlo tsa boleng tse theko e holimo li ka nka nako e telele u ntse u li sebelisa. Likereke tse ling li ka boloka M1000 ka ho kenya lisebelisoa tse theko e tlaase – empa ebe ba tla senyeheloa ke likete-kete ba ntse ba lokisa moo ho senyehang hangata! Hoo ke bohlokomeli bo seng botle.

Molaoana oa bohlokomeli o bolela hore, “Re bahlokomeli ba chelete eo Molimo a e beileng tlhokomelong ea rona. Re lokela ho e sebelisa ka bohlale. Re bahlokomeli ba litalenta tseo Molimo are fileng tsona. Re lokela ho li sebelisa molemong oa ho isa khanya ho eena. Lintho tsohle tseo re li etsang li lokela ho tlotlisa eena.”

---

<sup>12</sup> John Wesley, “On Dress” ho tsoa ho *The Works of John Wesley*, (Grand Rapids: Baker Books, 1996)

► Kenya tšebetsong molaoana ona oa bohlokomeli morabeng oa heno. Ke ka litsela life likereke tsa lona li ka fetohang bahlokomeli ba khabane ba matlotlo a Molimo?

### (3) Molaoana oa Boitšoaro

Molaoana oa boitšoaro o tiisa hore re se ke ra lumella "lintho" (esita le lintho tse molemo) ho laola maphelo a rona. E 'ngoe ea liqholotso tsa ho phela "lefatšeng" empa re se "ba lefatše" ke hore teng re lefatšeng! Ho na le lintho tse ngata lefatšeng lena la rona tseo re ka khonang ebile re lokelang ho natefelo a ke tsona. Bophelo ba khalalelo bo hloka boitšoaro kapa ho ipea taolong esita le linthong tse ntle.

Re tla etsa mohlala ka lijo. Tlala ke ho batla lijo ka tlholeho: ha se sebe. Paulosi o re ngoletse hore re lokela ho ja e le ho tlotlisa Molimo (1 Bakorinthe 10:31). Ho ja ha se sebe. Leha ho le joalo, haeba ke le monyollo o hlokang boitšoaro, ho ja hoa ka ha ho ise tlotla ho Molimo. Lefatše le jella ho ikhotsofatsa; haeba ke se na boitšoaro litloaelong tsa ka tsa ho ja, ke oa lefatše. Ke lokela ho ja ho tlotlisa Molimo. Hona ho bolela hore ke lokela ho ba le boitšoaro le ha ke ntse ke natefelo a ke lijo tse monate tseo Molimo a re 'neang tsona.

Bakorinthe ba ne ba tsitlallela hore ba ka etsa sebe sa bohlola hobane ba ne ba re ke bana ba Molimo semoeeng 'me joale 'mele ea bona ha e sa na taba (1 Bakorinthe 6:13). Ba ne ba e-na le maikutlo ana ka lebaka la litloaelo tsa bona tsa hore 'mele o lumelletsoe ho fumana sohle seo o se batlang.

Paulosi o ile a arabela ka ho qotsa lithuto tseo tsa Bakorinthe 'me eaba o hanyetsa maikutlo ao a fosahetseng ao lithuto tseo tsa bona li itšetlehileng ka oona.

► Bala 1 Bakorinthe 6:12-20.

Molaoana o tsamaisang Paulosi ke ona – esita le lintho tse lumelletsoeng molaong ha lia lokela ho re laola. Molimo o na le matla a ho laola likarolo tsohle tsa bophelo ba Mokreste, esita le 'mele ea rona. **Lintho tsohle** tseo re li etsang li lokela ho isa tlotla ho Molimo. Taba ena e re qosa ho phela ka boitšoaro le ka ho ipea tlasa taolo.

See se shebahala joang bophelong ba letsatsi le letsatsi? Ho bolela hore re be le boitšoaro mabapi le seo re se jang le seo re se noang. Ho bolela boitšoaro mabapi le boithabiso ba rona. Joalo ka mohalaleli, Nke ke ka lumela ho busoa ke e 'ngoe ea tsona. Esita le boithabiso feela bo bonahalang bo se na taba, bo fosahetse (ho 'na) haeba ho ka ba le matla holim'a ka. Molaoana oa boitšoaro o ruta ho ipea taolong likarolong tsohle.

Mohlankana ea bitsoa Motsumi o ile a reka komporo e ncha e neng e kentsoe papali e bitsoang "Tetris." Ha ho na letho le phoso ka papali ena. E ne e se ea nto a kapa e tsosang litakatso. Ke papali feela ea ho fana ka tharollo. Leha ho le joalo, o ile a phakisa ho lemoha hore papali ena e ne e se e na le matla holim'a ka! O ne nka lula fatše ho etsa mosebetsi – empa o ne a tla iphumana a se a qala ho bapala papali ena. o ne a ka re, "Ke tla nka khfutso mosebetsing nke ke bapale Tetris." Ebe kamor'a metsotso e mashome a mararo o tla re, "Ke batla ho qetela papali e 'ngoe hape." Ebe le ha ho se ho fetile hora o tla be a

ntse a bapala. Qetellong, Molimo o ile oa mohopotsa molaoana ona oa boitšoaro, (bala 1 Bakorinthe 6:12).

Ka lebaka lena, o ile a lemoha hore o lokela ho hlakola Tetris komporong ea hae. Na taba ee ke molao o tsoang Bibeleng? Che! Bibe e na lentsoe lena Tetris ka hare ho eona! Empa ho eena, molaoana ona oa boitšoaro o bolela ho qoba papali e ka khonang ho ntaola.

Melaoana e pharalletse ho feta litaelo. Ha ho na thuto ea Bibe e khahlanong le Tetris. Haeba Tetris ke papali eo u e ratang, ha u hloke ho e tlohela ka lebaka la ka. Empa ho Motsumi, ka lebaka la bofokoli ba hae, Tetris ke leraba. Haeba re batla ho phela bophelo bo halalelang, re tla botsa Molimo hore, "Ke lokela ho phela joang ka tsela e ka u khahlisang?"

► Kenya tšebetsong molaoana ona oa boitšoaro morabeng oa heno. Ke likarolo life tseo eleng qholotso khahlanong ho boloka teka-tekano ea Bibe bophelong ba hau?

#### **(4) Molaoana oa Ho Loka**

Ha Timothea, eo e ntat'ae e neng e le Mogerike ha 'ma'e e ne e le MoYuda, a qala ho sebetsa le bo Paulosi le Silase leetong la bona la boromuoa, Paulosi o ile a bolella Timothea hore a bolle molemong oa hore a tle a etse besebeletsi ka katleho (Diketso 16:3). Pejana ho moo, Paulosi o ne a ile a hana ho bolotsa Tite, Mogerike ea sokolohileng (Bagalata 2:3). Likarabelo tsena tsa Paulosi tse fapaneng li ruta molaoana oa bohlokoa tšebeletsong.

Ka lehlakoreng la Tite, Paulosi o ile a emela 'nete ea hore re bolokoa ka mohau ka tumelo. Ho lebella hore molichaba ea sokolohang a latele molao oa BaYuda ho ne ho tla nyenyefatsa molaetsa oa tokoloho ea Bokreste. Paulosi o ile a ema ka matla khahlanong le ba neng ba batla hore Tite a bolotsoe (Bagalata 2:1-6). Ho Diketso 15, kereke ea Jerusalema e ile ea fihlela qeto ea hore lebollo ha le hlokehe ho balichaba ba sokolohileng.

Ho Diketso 16, Paulosi o ile a bolella Timothea hore a bolle. Hobane'ng? Eseng molemong oa pholoho, empa e ne e le molemong oa ho atlehisa tšebeletso ea hae masinagogeng.

► Bala 1 Bakorinthe 9:19-23.

Paulosi o ile a bontša molaoana o tšoanang ho Bakorinthe. Molemong oa evangeli, Paulosi o ne a ikemiselitse ho itela likarolong tse neng li sa akarelletsoe ke molaoana oa Bibe. Ha a ka a sekisetsa likholiseho tsa Bibe, empa o ile a tela bolokolohi ba hae molemong oa besebeletsi.

Sena se hlahisa molaoana oa bohlokoa ho Bakreste. Lintho tse ling lia tšoaneleha maemong a mang empa ebe ha li tšoanelehe maemong a mang asele. Molemong oa katleho besebeletsing, moetapele a ka tela bolokolohi ba hae bo itseng likarolong tse seng khahlanong le seo a se lumelang. Mona ha se likarolong tsa thuto ea Bibe, empa ke likarolong tsa motho ka mong kamoo a lumelang kateng esita le litloaelong tsa merabe.

Gary ke moromuoa linaheng tsa Afrika. Gary o holisa litelu hore li be ngata li tlale sefahleho. Naheng ea habo, litelu ke letšoao la ho hola le la matla. Morena oa leloko o lula a holisitse

litelu li le telele. Litelu tsena tsa Gary li mo hlompheisa ka sechaba seo a lekang ho se fihlela ka evangeli. O ne holisa litelu ka lebaka la molaoana oa ho loka.

Rick ke moromuoa linaheng tsa Asia. Naheng ea habo Rick, litelu li amahangoa le ho se itlhokomele le ho se tsotelle chebahalo. Hang kamor'a hore a felle naheng ena, Rick o ile a hlokomela hore litelu tsa hae li tla sitisa katleho ea hae. O ile a kuta litelu tsa hae ka lebaka la molaoana oa ho loka.

Na litelu li nepahetse kapa li fosahetse? Ha ho na ho nepahala kapa ho fosahala tabeng ena! Banna bao ka bobeli ba ile ba ithuta ho latela molaoana ona oa ho loka – ho nepahetseng ka ho fetisisa ke eng bakeng sa maemo ao Molimo a mpeileng ho oona?

► Na u se u fumane likarolo tseo ho tsona molaoana oa ho loka o u hlokang u intše sehlabelo ka ho tlohela bo bong ba bolokolohi ba hau e le hore u tle u fihlele batho ba o potileng ka Krete?

### **(5) Molaoana oa Boikarabello: ke ikarabella ho mang?**

Tichere e ile ea botsa baithuti, "Le khetha efe pakeng tsa melao le melaoana bakeng sa tsamaiso ea sebaka seo le robalang ho sona?" Ba tloetse ho araba ka ho re, "Re khetha ho tsamaisoa ka melaoana!"

Tichere ea botsa, "Ke efe eo ho bang bobebe ho e latela: molao o reng, 'Mabone oohle a lokela a be a tingoe ka nako ea bosiu bo boholo' kapa molaoana o reng, 'Le itokisetsa ho ea mosebetsing oa Molimo. Le robale ka nako e le hore le phomole hantle le tle le tsebe ho tsepamisa maikutlo a lona lithutong tse qalang letsatsi ka leng'?" Baithuti ba phakisa ho elleloa hore molaoana o re hloka hore re nahane haholo ho feta molao feela!

Ka linako tse ling melaoana e ka ba thata. Se seng sa linotlolo tse tla re thusa ke ho hlokomela hore re ikarabella ho Molimo tabeng ea hore re khethehile. Re ke keng ra bea molao o reng, "Lijo tse kana ka letsatsi li lekane; tse fetang tseo ke bonyollo." Sena ha se khonahale! Ho e-na le moo, re lokela ho hopola hore re ikarabella ho Molimo bakeng sa ho ba le boitšoarō.

Motho e mong a ka sebetsa ofising e hlokang hore a apare sutu e ntle; e mong eena e ka ba ke mohlokomeli ea seng hloahloa ha a ka reka sutu e ntle ho e apara ha a ea masimong!

Molimo a ka fana ka likholiseho tse fapaneng ho batho ka ho fapana ho latela mofuta oa tšebeliso ea bona, litloaelo le likutloisiso tsa moo ba holetseng teng, esita le mofuta oa sebe oo ba ka oelang ho oona. Batho ha re tšoane; ha re na ho shebahala ka tsela e tšoanang. Baena ba rona esita le likhatseli tsa rona ba ka fapana le rona ka kholiseho ea mofuta oa bophelo. Ha feela ho fapana hoo ho sa loantšane le thuto ea Mangolo, ho fapana hona e ka ba sesupo sa tokoloho ea Bible.

Ka lebaka lena, ke lokela ho lula ke hopola lintho tsena tse peli:

1. Ha kea lokela ho ahlola pelo ea motho e mong. Ba ikarabella ho Molimo bakeng sa ho arohana le lefatše (Baroma 14:4).
2. Ke lokela ho ahlola pelo ea ka ka kelo-hloko haholo. Ke ikarabella ho Molimo bakeng sa ho arohana le lefatše (2 Bakorinthe 5:9-10).

### **Ba Fumane Sephiri - Count Zinzendorf le Ba-Moravia**

Lilemong tsa 1700, sehlopha sa Bakreste se ile sa balehela naheng ea Germany ho baleha lithoriso tse naheng ea Moravia. Ba ile ba ahella sebakeng se ikarabellang ho Count Nikolaus von Zinzendorf,<sup>13</sup> eo e ileng ea e-ba moetapele oa bona. Ka lilemo tse 'maloa feela, e ne e le batho ba fetang makholo a mararo ba Moravia ba ne ba se ba phela sebakeng sena se neng se le Herrnhut.



Ba-Moravia ba ne ba inehetse khalalelong ea 'nete. Ba ne ba phela bophelo bo bobebe bo tataisoang ke melaoana ea Mangolo. Ba ne ba tsejoa ka boithuto ba bona bo hlokolosi ba Bibe le esita boinehelo ba bona thapelong. Ka selemo sa 1727, Ba-Moravia ba ile ba qala kopano ea thapelo e neng e tsoela-pele nakong ea lihora tse mashome a mabeli a metso e mene ka letsatsi 'me e ile ea etsoa ka lilemo tse fetang tse lekholo.

Ba-Moravia ba ne ba batla ho ba ba Molimo ka ho feletseng. Litholoana tsa boinehelo ba bona bophelong ba ho khetheha e bile life? Molimo o ile a ba sebelisa ka tsela e matla.

Ba-Moravia ba ile ba e-ba le tšusumetso e matla ho Bakreste ba bang. Moromuoa oa Moravia ea bitsoang Peter Bohler, e bile motho oa bohlokoa bakeng sa tšokoloho ea John le Charles Wesley. Libeke tse 'maloa kamor'a hore John Wesley a fumane kholiseho ea pholoho kerekeng ea Moravia e neng e le 'Mileng oa Aldersgate, o ile a nka leeto ho ea Herrnhut ho ithuta haholo ka boiphihlelo ba semoeeng ho balumeli bana ba tiileng. Ho qala ka bara bana ba Wesley ho ea ho William Carey, Bakreste ba inehetseng ho Molimo ba ile 'ne ba susumetsoa ke phehello ena ea Ba-Moravia ea khalalelo.

Ba-Moravia ba ne ba tšoare bopaki bo matla ba evangeli lefatšeng ka bophara. Pele likhoeli tse tšeletseng li feta kamor'a ho qala thapelo ea selemo sa 1727, bacha ba mashome a mabeli a metso e tšeletseng ba Moravia ba ile ba ithaopela tšebeletso ea boromuoa – nakong eo baromuoa ba eang linaheng tse ling e ne e le ntho e esong ho tsejoe likerekeng tsa Maprostanta. Lilemong tsona tseo tsa 1700, ke baromuoa ba fetang 300 ba tsoang sehlotšoaneng sona sena sa Bakreste ba ikhethileng ba ileng ba rongoa. Ba bang ba baromuoa ba Maprostanta ba pele e bile ba ronngoeng ke Ba-Moravia. Bakreste ba

---

<sup>13</sup> Setšoantšo: "Portrait of Count Zinzendorf" by J. Archer, *The Life of Nicholas Lewis Count Zinzendorf* (1838), e nkiloe ho [https://commons.wikimedia.org/wiki/File:Portrait\\_of\\_Count\\_Zinzendorf.jpg](https://commons.wikimedia.org/wiki/File:Portrait_of_Count_Zinzendorf.jpg), sechaba sa setjhaba.



khethetsoeng Molimo ba ka sebelisoa ke eena Molimo ho fetola lefatše leo ba phelang ho lona.

Sefela sa “Ke Batla Molaoana Kahare ho ‘Na” se akaretsa melaoana ea ho khetheha e rutiloeng ke Ba-Moravia. Motho ea halalelang o lula a e-na le letsoalo le elang hloko litemoso tsa Molimo.

#### **Boikhopotso ba Thuto ea 4**

(1) Ho halalela ho bolela ho khetheloa kapa ho ba oa Molimo. Mehlala e kenyeletsa:

- Letsatsi le halalelang
- Lintho tse halalelang
- Libaka tse halalelang
- Leloko le halalelang

(2) Ho halalela ho bolela ho **arohana le sebe**. Kahobane Molimo o hloile sebe, sechaba sa Molimo se hloile sebe.

(3) Ho halalela ho bolela ho **khetheloa Molimo**. Sepheo sa ho arohana le sebe ke hore re khetheloe Molimo.

(4) Batho ba halalelang ba tsamaella hole le sebe. Ho phela haufi le Molimo ho bolela hore re tla phela hole le sebe.

(5) Bophelo ba khalalelo bo ile ba thusa Iseraele ho ba bopaki lefatšeng. Bophelo ba khalalelo bo thusa Bakreste ho ba bopaki lefatšeng.

(6) Ho khetheha ka mokhoa oa Bibe le ho qala ka pelong.

(7) Melaoana ea ho arohana le lefatše ho kenyeletsa:

- Molaoana oa Boitlhompho
- Molaoana oa Bohlokomeli
- Molaoana oa Boitšoaro
- Molaoana oa ho loka
- Molaoana oa Boikarabello

#### **Kabelo ea Thuto ea 4**

(1) Khetha taba e le 'ngoe eo ka eona ho khetheha e bang taba e thata ho Bakreste tikelohong ea heno. Ka ho sebelisa melaoana e hlahang thutong ena, ngola moqoko oa leqephe ho isa ho a mabeli (1-2) u bontša hore na Bakreste ba ka arohana le sebe joang 'me ba khetheloa Molimo, ho taba eo u e khethileng.

(2) Qala thuto e latelang ka ho pheta 2 Bakorinthe 6:16-18.

# Thuto ea 5

## Khalalelo ke Pelo e sa Arohanang

### Sepheo sa Thuto

Qetellong ea thuto ena, baithuti lokela ba be ba ka:

- (1) Utloisisa hore lentsoe *phetheho* Testamenteng ea Khale le bolela ho ba le pelo e sa arohanang.
- (2) Elelloa kotsi ea semoea ea pelo e arohanang.
- (3) Inehela ka ho re "E" ho Molimo kante ho lipotso tsa letho.
- (4) Tseba Dipesaleme 86:11-12 ka hlooho.

### Kalebe: Monna ea Pelo e sa Arohanang

Sechaba sa Iseraele se ne se le mathuleng a ho kena Kanana. Molimo o ne a ba fetisitse lefeelleng, 'me joale ba ne ba se ba le haufi le Lefatše la Tšepiso. Moshe o ile a roma lihloela tse leshome le metso e 'meli ho ea ithuta lefatše leo. Kamor'a matsatsi a mashome a mane, lihloela tseo li ile tsa khutla li nkile morara o motle le litlaleho tse hlollang ka lefatše la Kanana. Empa ba ile ba re, Bakanana ba matla hape ba ahile metse e meholo. Re ne re ka mehloanyane pela bona!

Ke lihloela tse peli feela, Joshua le Kalebe, ba neng ba lumela tšepiso ea Molimo ea tlhola, (bala Numere 13:30). Joshua le Kalebe ba ne ba bone lefatše le le leng ka ho tšoana le lihloela tse ling. Ba ne ba bone metse e meholo e sirelelitsoeng ka marako a maholo. Ba ne ba bone le bahlabani ba hloahloa.

Empa Joshua le Kalebe ba ne ba bone ho hong ho lihloela tse ling li ne li sa ho bona – ba ne ba bone hore Molimo ea ntšitseng Iseraele Egepeto o tla fihlisa Iseraele Kanana. Ba ne ba bone hore Molimo ea ileng a felisa mabotho a Faro o tla senya le marako a Jeriko. Ba ne ba bone hore Molimo oa Abrahama ke Molimo oa Moshe. Bala seo Molimo a se buile ka Kalebe ho Numere 14:24.

Kahobane ba ne ba sa mo lumela, Molimo o ile a otlala moloko ohle o holile ka ho re ba tla shoella lefeelleng. Lilemo tse mashome a mane kamor'a moo, Baiseraele ba ile ba kena Kanana, 'me joale e ne e le nako ea ho arola lefatše. Kalebe o ne a se a e-na le lilemo tse kaholimo ho mashome a robeli, (bala Joshua 14:11). E, ho ne ho e-na le metse ea metonana e marako esita le bahlabani ba matla. Empa Kalebe o ne a lumela litšepiso tsa Molimo, (bala Joshua 14:12).

Ke eng e neng e fa Kalebe tšepo e kaalo? Ke pelo e sa arohanang, (bala Joshua 14:8). Kalebe o ne a tšepa Molimo ka pelo ea hae eohle. Kalebe e ne e le monna ea nang le pelo e sa arohanang.

### **Pelo e Phethehileng ke Pelo e sa Arohanang**

Libuka tsa Nalane tsa Bibe<sup>14</sup> li bontša kamoo Iseraele e hlolehileng ka sehloho ho ba seo Molimo a e bilelitseng bana ba hae ho ba sona. Libuka tsa Nalane li bontša kamoo Iseraele e ileng ea tloha morerong oa Molimo kateng. Iseraele e ne e bilelitsoe ho emela Molimo har'a lichaba tse ling. Ho e-na le moo, eona e ile ea fetohela ho melimo ea bohata. Ka lebaka la ho hloleha hoa hae, Iseraele o ile a hloloa ke lichaba tse ling 'me ea isoa kholehong. Khanya ea hae e ile ea fetoha masoabi.

Papisong le litšoantšo tsena tse sehloho tsa ho hloka botšephe, Libuka tsa Nalane li boetse li bontša batho ba halalelang ba ileng ba sebeletsa Molimo ka botšephe. Ha batho ba bangata ba Iseraeleng ba ne ba sa tšepahalle Molimo (Baahlodi), mohlolohali ea monyane oa Moabe (Ruthe) o ne a tšepahala. Esita le kholehong (2 Marena), moroetsana oa MoYuda o ile a mamela pitso ea Molimo 'me a pholosa sechaba sa habo (Esthere). Batho bana ba ne ba mamela Molimo ka lipelo tsohle tsa bona. Ba ne ba halalela.

Libuka tsa Nalane li ruta hore ho halalela ho bolela ho sebeletsa Molimo ka botšephe bo felletseng. Khalalelo ha e bolele hore mosebetsi e tla ba o phethehileng. Khalalelo e bolela ho sebeletsa Molimo ka pelo e sa arohanang.

Liphetolelo tsa khale tsa Testamente ea Khale li sebelisitse lentsoe *e phethehileng* ha ho fetoleloa lentsoe la Seheberu *shalem*. Shalem e fana ka maikutlo a reng "e felletseng." Ho phetheha ke ho fella. Ho halalela ho bolela ho ba oa Molimo ka ho felletseng.

*Shalem* e na le kamano le lentsoe la Seheberu le bolelang khotso, *shalom*. Ho phethahala kapel'a Molimo ho bolela ho ba khotso le eena (1 Marena 8:61). Ho ba le pelo e phethehileng ke ho ba le pelo e felletseng kapa e sa arohanang, pelo e nang le ho inehela ho le hong. Ha re ke re talime mehlala e meng ea lentsoe ho phetheha kapa e sa arohanang Libukeng tsa Nalane.

### **Lebotho le nang le Morero o sa Arohanang**

Kamora lefu la Saule, maloko a ka Leboea a ile a khetha Ishi-Boshethe e le morena ha Yuda eona e ile ea latela Davida. Ho ile hoa ba le ntoea ea lehae ea lilemo tse peli eo ho eona Davida a neng a etelletse-pele Yuda khahlanong le maloko a ka Leboea. Kamor'a lilemo tse peli, Ishi-Boshethe o ile a bolaoa ke balaoli ba hae. Lebotho le ile la kopana ho bea Davida e le Morena holim'a Iseraele eohle. Sechaba sohle joale se ne se kopane tlasa morena ale mong.

---

<sup>14</sup> Libuka tsa Joshua, Baahlodi, Ruthe, 1 Samuele, II Samuele, 1 Marena, 2 Marena, 1 Dikronike, 2 Dikronike, Esdrase, Nehemia, le Esthere ke libuka tse leshome le metso e 'meli tsa Nalane tsa Bibe.

► Bala 1 Dikronike 12:38.

Lebotho la tla Hebrone **ka pelo tse phethehileng** (*shalem*) ho bea Davida morena. "Ho phetheha" ha ho bolele hore ho ne ho se le ea mong oa mabotho ea entseng sebe. Ho bolela hore sechaba sohle se ne se inehetse ho tšepahala ka ho felletseng ho Davida. Ba ne ba kopane hammoho tlas'a morena a le mong. Temaneng ena, *shalem* ha se lentsoe la bolumeli; ke lentsoe la puso la lipolotiki. *Shalem* e bolela boinehelo bo felletseng ho tšepahalla Morena.

### **Aletare e Majoe a sa thuuhoang**

Ha ba Iseraele ba fihla Lefatšeng la Tšepiso, Joshua o ile a aha aletare thabeng ea Ebale. Joshua o ile a haha aletare ka majoe a sa betloang (*shalem*), (bala Joshua 8:31). Ho re "a sa thuuhoang" ho tšoana le ho re *a felletseng* kapa *a phethehileng*. Ho ba shalem ke ho se arohane.

### **Pelo e sa Arohanang**

Ha ho khakolola tempele, Salomone o ile a biletsa Baiseraele ho sebeletsa Molimo ka pelo tse sa arohanang (*Shalem*).

► Bala 1 Marena 8:61.

Lentsoe lena ke le sebelisitsoeng ho hlalosa lebotho le kopaneng ka tlas'a Davida. Ke lentsoe le sebelisitsoeng ho hlalosa majoe a sa thuuhoang. Salomone o ne a biletsa Baiseraele ho ba le botšephehi bo felletseng ho Molimo. Ha Baiseraele ba ne ba ka ba le pelo ena e sa arohanang, ba ne ba tla tsamaea ka melao ea hae ba boloke taelo tsa hae. Motho ea nang le pelo e sa arohanang o mamela Molimo ka ho rata hoa hae.

### **Lipelo tse Arohanang le Lipelo tse sa Arohanang**

Nalane ea marena a Iseraele e bontša hore Molimo o biletsa sechaba sa hae ho mo sebeletsa ka pelo e sa arohanang. Molimo o batla sechaba se halalelang. Molimo o batla lipelo tse sa arohanang.

### **Morena Salomone: Pelo e Arohanang**

Tšebeletsong ea ho khakolola tempele, Salomone o ile a biletsa Iseraele ho sebeletsa Molimo ka lipelo tse sa arohanang. Ka masoabi, Salomone eena ha a ka a latela keletso eo ea hae, (bala 1 Marena 11:4).

Pelo ea Salomone e ne e arohane. O ne a batla ho khumamela Molimo oa Iseraele a bile a ntse a khumamela le melimo e meng. U ka sitoa ho tšepahalla Jehova 'moho le melimo e meng. Mongoli oa 1 Marena ha a re Salomone o ile a tlohela ho khumamela Jehova. Salomone o ile a tsoela pele ho etsa mahlabelo tempeleng, empa pelo ea hae e ne e se e arohane. O ile a leka ho sebeletsa Molimo ka pelo e arohanang.

## Morena Davida: Pelo e sa Arohanang

Bukeng ea 1 Marena 11:4, re bala ka tsela eo Molimo a neng a talima lipelo, pelo ea Davida esita le pelo ea Salomone. Pelo ea Davida e ne e sa arohana; pelo ea Salomone e ne e arohane. Ka leihlo la botho, re ka nka ho feba esita le ho bolaea ho entsoeng ke Davida e le ntho tse mpe ho feta ho oela hona hoa Salomone. Ebe ke hobane'ng ha mongoli oa libuka tsa Marena a re pelo ea Davida e ne e le ea Jehova kaofela ha eona?

Phapang ke tsela eo Davida a ileng a itšoara ka eona ha entse sebe. Ha moprofeta a toba Davida ka taba ena, Davida o ile a baka hang-hang. Davida ha a ka a leka ho ikemela. Ho e-na le hoo, o ile a ipolela ho Molimo, (bala Dipesaleme 51:4). Davida o ne a sebeletsa Molimo ka pelo e sa arohanang. Pelo ea hae e ne e le *shalem*. Pelo ea hae e ne e phethehile.

Dipesaleme ea 86 e hlalosa ho lapa hoa Davida a lapela pelo e sa arohanang. Dipesalemeng ea 86, Davida o rapella ho lokolloa lireng tsa hae tse lekang ho mo bolaea. Bohareng ba thapelo ena ea hae, Davida oa lla o re, (bala Dipesaleme 86:11). Davida o rapella pelo e sa arohanang. O ne a batla ho sebeletsa Molimo ka pelo e phethehileng.

## Morena Asa: Pelo e Arohanang

Asa o ile lula teroneng ea Yuda ka selemo sa 910 B.C. O ne a inehetse ho Jehova; o ile a senya lialetare tsa melimo ea bohata; a pshatla libaka tse phahameng tseo ho tsona ho neng ho khumameloa litšoantšo. Ha molaoli oa mabotho a Ethiopia ea bitsoang Serake a futuhela Yuda ka lebotho le lehlo, Asa o ile a lla ho Molimo a kopa pholoso ea hae:

► Bala 2 Dikronike 14:11.

Molimo o ile a araba thapelo ea Asa (2 Dikronike 14:12). Asa o ile a beha tšepo ea hae e felletseng ho Molimo; eaba Molimo o mo nea tlholo e kholo.

Ho ile ha feta lilemo tse mashome a mabeli, eaba Asa o tobana le teko e ncha. Khetlong lena, Baesha, Morena oa meloko e ka Leboea, o ile a tšosa Yuda. Letsoalong la hae, Asa a etsa qeto ea ho aha tumellano ea ho thusana ka mabotho le sechaba se seng. O ile a hlaba selekane le Ben-Hadade, 'musi oa Siria. Ho e-na le hore a tšepe Molimo a 'notši, Asa o ile a itšepisa ka marena a bahetene.

E le karabelo ea taba ena, moprofeta Hanani o ile a hopotsa Asa ka tlholo ea hae ea nako e fetileng moo a ileng a hlola lebotho le leholohali Ethiopia. A hopotsa Asa, (bala 2 Dikronike 16:8). Hobane'ng Molimo a ne a ile a etsa see?, (bala 2 Dikronike 16:9).

Nakong eo Asa a neng a tšepa Molimo ka ho felletseng, Molimo o ile a mo nea tlholo e kholo. Empa khetlong lena Asa o ne a se a itšetlehile ka 'musi oa Siria. Kahobane Asa o ne a se a

### Thapelo Bakeng sa Khalalelo

"Nke ke shoe ho 'na  
hore ke tle ke phele ka ho uena;  
Nke ke felise bo-'na ka ho tlala  
e le hore ke tle ke ateloe ke uena;  
Nke ke be hoo e seng letho ho 'na  
ke tle ke be tsohle ho uena."

- Erasmus

sa tšepe Molimo a 'notši, Molimo ha a ka hlola a mo lokolla kotsing. Hanani o ile a mo hlokomelisa hore Asa o se a tla ba le lintoa pusong eohle ea hae.

Lilemo tsa ho qetela tsa puso ea Asa e ile ea e-ba seriti feela sa tšepiso e khanyang ea lilemong tsa hae tse qalang. Hamorao bophelong, Asa o ile a kula, empa le bohlokong boo, ha a ka a batla Jehova (2 Dikronike 16:12).

Puso ea Asa e bile ntle ho feta ea marena a mang a mangata. Asa ha a ka a tlohela ho khumamela Morena, empa pelo ea hae e ne e arohane ha e ea e lebile Molimo. O ile a hloleha ho tšepa Molimo ka ho felletseng. Ka lebaka lena, Asa ha a ka a fihlella se molemo ka ho fetisisa bakeng ho Molimo.

Bophelo ba Asa ke pontšo e matla ea kotsi ea ho ba le pelo e arohaneng. Paleng ea pele, Asa o ile a tšepa Molimo ka ho felletseng. Paleng ea bobeli, o ile a tsoela pele ho sebeletsa e ntse e le moetapele oa sechaba sa Molimo, empa pelo ea hae e ne e se e sa phetheha. Ho e-na le hore a tšepe Molimo ka ho felletseng, o ile a hlaba selekane le sera sa Molimo. Asa o bile le pelo e arohaneng.

### **Morena Amatsia: Pelo e Arohaneng**

Amatsia o ile a bontša kotsi ea ho ba le pelo e arohaneng. Puso ea Amatsia e ile ea qala ka mokhoa o tšepisang haholo: O ile a etsa se nepahetseng mahlong a Morena. (2 Marena 14:3; 2 Dikronike 25:2). Joalo ka Asa, Amatsia o ile a qala hantle.

Leha ho le joalo, bobeli libuka tsa Marena le tsa Likronike li hlokomelisa ka kotsi. Sengoli sa libuka tsa Marena se re Amatsia o ile a etsa ho lokileng, empa e seng joalo ka Davida ntat'ae. Sengoli sa libuka tsa Likronike se re Amatsia o ile a etsa ho lokileng, empa e seng ka pelo e phethehileng. Ha a ka a tlosa libaka tse phahameng. Ka lebaka lena, sechaba se ile sa tsoela pele ho hlabela melimo ea bohata lihlabelo. Moetapele ea pelo e arohaneng o ile a khanela sechaba bothateng.

Joalo ka Asa, Amatsia o ile a fumana hore ho sebeletsa Molimo ka pelo e arohaneng ho tliša bothata. Leha puso ea Amatsia e ne e qalile hantle, o ile a qetella a se a khumamela melimo ea Edomo. E le kahlolo bakeng sa taba ena, Molimo o ile a lumella 'muso oa ka Leboea ho hlola Amatsia. Ho tšepisa hoa lilemo tsa qalong tsa ho busa hoa Amatsia ha hoa ka hoa phethahatsoa hobane o ne a se a e-na le pelo e arohaneng. Pelo ea Amatsia e ne e sa phetheha.

### **Khalalelo e Kenngoang Tšebetsong: Khalalelo e Qala ka Pelong**

Jesu o ile a bua le baruti ba molao ba neng ba tsotella chebahalo e kantle haholo, empa ba sa tsotelle pelo.

► Bala Mattheu 23:23-24.

Baetapele bana ba molao ba ne ba latela melao ka hloko, empa ba ne ba sa latele molao oo e leng oa bohlokoa ho feta oo eleng molao oa kahare. Jesu o ile a nyatsa bolumeli bona

ba bona bo fosahetseng. "Le okola ntsintsinyana (le ela hloko lintho tse nyenyane), athe le metsa kamele (le iphapanyetsa mathata a maholo)." Khalalelo e qala ka pelong.

Haeba re nahana chebahalo ea kantle feela, re ka re:

- "Kea halalela *hobane* ha ke apare \_\_\_\_\_."
- "Kea halalela *hobane* ha ke ee \_\_\_\_\_."
- "Kea halalela *hobane* ha ke shebelle \_\_\_\_\_."

Ha re bolela hore re halalela ka lebaka la lintho tseo re li etsang kapa tseo re sa li etseng, re tla tsoana le Bafarisi. Jesu o kile a etsa pale ka Mofarisi ea neng a rapela a re, (bala Luka 18:11-12). Mofarisi enoa o ne a hlalosa khalalelo ka lintho tseo a li etsang: "Ha ke qhekelle; ha ke khopo; ke itima lijo; ke ntša boshome." O ne a ipolela hore oa halalela, empa pelo ea hae e ne e sa halalele.

Bafarisi ba ne ba ikhohomosa ka lebaka la ho arohana le lefatše, empa lipelo tsa bona tsona li ne li sa halalele. Bala seo Jesu a se buileng ho Mattheu 23:27. Kantle Bafarisi ba ne ba bonahala ba khethetse; kahare, e ne e le baetsalibe.

► Ke hofe ho bonahalang ho ka ahloleha ha bobebe – e ka ba ponahalo ea kantle kapa khalalelo ea kahare? Ke efe eo ho leng bobebe hore motho a ka ikaketsa ho eona – chebahalo ea kantle kapa khalalelo e kahare? Ke efe eo re atisang ho hatella haholo hore e ka etsoa – chebahalo ea kantle kapa khalalelo e kahare?

## **Mohlala oa Esekiase**

Melao ea ho khetheha e ne e le bohlokoa bakeng sa ho ruta hore Molimo o hloka sechaba se halalelang. Empa kamehla o ne a khathatseha haholo ka lipelo tsa sechaba sa hae ho feta meetlo le litloaelo.

Pale ea tsosetso ea Esekiase e bontša molaoana ona. Kamor'a hore tempele e hloekisoa, Esekiase o ile a boela a khutlisa mokete oa Paseka, (bala 2 Dikronike 30:1). Lenvuso tse tsoang ho Esekiase li ile tsa etela Iseraele ho memela sechaba moketeng ona, (bala 2 Dikronike 30:10-11).

Ha ba qala ho hlaba likonyana tsa Paseka, ho ne ho na le ba bangata phuthehong, ba neng ba sa ka ba ikhalaletsa (2 Dikronike 30:17). Kahobane sechaba se ne se qetile nako e telele se sa khumamele Molimo tempeleng, batho ba ne ba sa itlhloekisa kahoo ba sa lokela ho ja Paseka. Baprista ba ne ba lokela ho etsa'ng? Molimo o ile a lumella sechaba ho ja Paseka hobane lipelo tsa bona li ne li batla Molimo, *le ha ba ne ba so ka ba hloekisoa ho ea ka hloekiso ea sehalalelo.*

► Bala 2 Dikronike 30:18-20.

Molimo o ne a batla lipelo tse sa arohanang. Esita leha sechaba se ne se sitoa ho latela melao ea lihlabelo bakeng sa ho khetheha, Molimo o ile a sheba lipelo tse neng li khethetsoe ho batla Molimo.

## Batho ba Halalelang ba Nehela Lipelo tsa Bona ho Molimo

Khalalelo **kamehla** e qala ka Molimo. Ntho efe kapa efe e halalelang ke ea hae. Molimo o halalelitse letsatsi la Sabatha, o halalelitse sebaka seo ho sona sehlahla se neng se tuka, a halaletsa matsibolo a ba-Iseraele, a halaletsa tabernakele, le aletare, le ba-Levi. Molimo o ne a ikhethetse lintho tsena hore e be tsa hae. Li ne li halalelitsoe ke boteng ba Molimo.

Khalalelo e qala ka Molimo, empa Molimo o re biletsa ho ikhethela eena. Haeba re ka bala feela litemana tseo ho tsona Molimo a reng "Ke tla u halaletsa," re ka iketsetsa qeto ea hore khalaleliso ke ketso e etsoang ke Molimo **feela**. Leha ho le joalo, Bibe e bontša hore khalalelo e hloka hore motho le eena a nke khato. Eksoda 19:10-22 e fana ka mohlala.

► Bala Eksoda 19:10. Molimo o ile a laela mang? Molimo o ile a laela Moshe.

► Bala Eksoda 19:14. Ke mang ea ileng a nka khato? Moshe o ile a khethela sechaba morero oa Molimo.

► Bala Eksoda 19:22. Molimo o ile a fa taelo ee ho mang? Baprista ba ne ba laetsoe ho ikhetha ba ikhethela merero ea Molimo. Ba ne ba lokela ho halalela; ba ne ba lokela ho ikhethela Molimo.

Pelo e sa arohanang e kenyelelitse lintlha tse peli:

1. Molimo o tšepisa sechaba sa hae ho se khetha, (bala Eksoda 31:13). Molimo o halaletsa sechaba sa hae.
2. Molimo o laela sechaba sa hae ho ikhetha, (bala Levitike 11:44 le Levitike 20:7).

Re itlhoekisa **e le karabelo ea mohau oa Molimo**. Batho ba halalelang ba itlhoekisa bakeng sa Molimo ka ho rata hoa bona. Ba inehela **ho Molimo ba sa itšiele letho**.

Ho Levitike 20, taelo ena e lateloa ke tšepiso. Ke lentsoe le le leng la Seheberu le sebelisitsoeng litemaneng tsena bakeng sa taelo le bakeng sa tšepiso, (bala Levitike 20:7-8).

Ho halaletsoa ho kenyeletsa **ka bobeli** mosebetsi oa Molimo 'moho le khato eo re e nkang. Ha re halaletsoe ke mesebetsi ea rona, hape ha re na ho re, "Haeba Molimo o batla hore ke halalele, o tla nkhalaleletsa kante le hore ke nke khato." Re arabela mohau oa Molimo ka boinehelo bo felletseng ho eena. Pelo e sa arohanang e hloka boinehelo ka ho phethahetseng.

Mohloli oa khalalelo ke Molimo. Leha ho le joalo, Molimo o re biletsa ho inehela ho eena. Re halaletsoa ha re inehela pitsong ea Molimo.

"Re ka sebelisoa ke Molimo ka morao hore feela re mo lumelle ho re bontša libaka tse tebileng, tse patehileng tsa semelo sa rona. Ha re lemohe feela le mohono, botsoa, kapa boikakaso ka hare ho rona le ha re bo bona. Empa Jesu o tla re senolela tsohle tseo re neng re li tšoere kahare ho rona pele mohau oa hae o qala ho sebetsa."

- Oswald Chambers



► Bala Baroma 12:1. Paulosi o re biletša ho inehela ka ho felletseng mererong ea Molimo. Hobane Molimo o tšepisa hore o tla re halaletsa, re lokela ho inehela. Khalalelo ke tsena tse peli: ke taelo ("Le ikhalaletse"); le tšepiso ("Ke tla le halaletsa").

### **Batho ba Halalelang ba re "E" e Felletseng ho Molimo**

Maphelo a Salomone, Asa, le Amatsia, a bontša kotsi ea pelo e arohaneng. Pelo e arohaneng ha se morero oa Molimo bakeng sa bana ba hae. Pelo e halalelang ke pelo e sa arohanang. Joale, ekaba ho boleloa'ng ka ho ba le pelo e sa arohanang? Ho bolela'ng ho ba le pelo e *shalem* kapa e phethehileng?

Bakreste ba biletsoa ho ba bahlanka ba Molimo. Mosebetsi oa mohlanka ke ho etsa sohle seo mong'a hae a mo laelang ho se etsa. Mohlanka ea khabane ha botse hore, "Na see ke seo ke se khethang?" mohlanka ea khabane o etsa seo mong'a hae a mo laelang sona ka ho rata. Mosebetsi oa mohlanka ke hore "E" e phethahetseng a sa itšiele letho.

Ka tsela e tšoanang, motho ea sebeletsang Molimo ka pelo e sa arohanang o arabela ka "E" ka ho rata hoa hae ha Molimo a mo bitsa. Hona ke pelo e sa arohanang. Moshe o ile a biletša Ba-Iseraele ho sebeletsa Molimo ka pelo e sa arohanang:

► Bala Deuteronomo 10:12-13.

Ha e le moithuti sekoloho sa thuto e phahameng, Elisabeth Elliot o ile a ngola bukeng ea hae ea lintlha tsa bohlokoa a re, **"Morena, ke itse 'E' ea ka ho sa feleng. U se ke oa ntumella le ka mohla hore, ha ke se ke beile letsoho la ka holim'a mohoma, ebe nka hetla morao.** Batalatsa tsela ea sefapano ka pele ho 'na. Mphe lerato, hore ho se be le sebaka sa mohopolo kapa mohato o khelohileng."<sup>15</sup> Elliot o ne a e-na le pelo e sa arohanang; o ne a phethehile mahlong a Molimo.

"Ke itse 'E' ea a ho sa feleng.  
Nke ke se ke ka hetla  
morao."  
- Elisabeth Elliot

Lilemo tse hlahlamang thapelo ena, Elizabeth Elliot o ile a tobana le liqholotso tse ngata. Molekane oa hae, Jim Elliot, o ile a bolaoa ka 1956 ha a ntse a leka ho bolela evangeli morabeng oa Ma-Huaorani a naheng ea Ecuador. Hamorao Elisabeth o ile ea e-ba moromuo sechabeng sona seo se bolaileng molekane oa hae. Ke feela motho ea itseng "E, ea ka ho sa feleng" ho Molimo ea neng a ka ea ho babolai ba molekane oa hae e le moromuo.

Motho ea halalelang o sebeletsa Molimo ka pelo e sa arohanang. Motho ea halalelang o re "E, ea ka ho sa feleng" ho Molimo. Hona ho bolela boinehelo bo felletseng ho Molimo. Ha motho ea halalelang a tseba thato ea Molimo, o mamela ka ho rata hoa hae. Pelo ea hae ha se e arohaneng; ke oa Molimo ka ho tlala. Motho ea halalelang o re "E" ho Molimo a le boemong ba boinehelo bo felletseng.


---

<sup>15</sup> Elisabeth Elliot, *Passion and Purity* (Old Tappan: Fleming H. Revell Co., 1984), 25

Motho ea halalelang **o tsoela pele** hore "E" letsatsi le letsatsi. Kamor'a hore Elisabeth Elliot a re "E, ea ka ho sa feleng," o ile a 'na a tsoela pele ho tobana le ho etsa liqeto. Ho ile hoa ba le makhethlo a mangata ao a ileng a boela a re, "E, Morena." Bakreste ba bang ba nahana hore "E, ea hang feela ebe ho felile" e tla tlosa liteko tsa boinehelo ba hau tsa nako e tlang. Boinehelo ba hang feela ebe ho felile bo bohlokoa, empa Satane o tla tsoela pele ho leka boinehelo boo ba hau. Hape le hape, u tla tsoela pele ho 'na u re "E, Morena. Bophelo ba ka ke ba hau." Hona ke "E" e tsoelang pele ea bophelo ba khalalelo.

## **O Fumane Sephiri - George Muller**

George Muller<sup>16</sup> e bile Mokreste ea hloahloa lilemong tsa 1800.<sup>17</sup> O ile a aha mahae a likhutsana a mahlano a maholo, a ba a hlokomela likhutsana tse fetang 10,000. Muller o ile a bokella limilione tsa li dollar ho hlokomela mahae ao a hae a likhutsana esita le ho fana ho baromuo ba bang. Pele ho fihla nako ea ho shoa ha hae, Muller o ne a se a thusitse thutong ea bana ba 122,000, a fane ka li-Bibele tse atamelang 2,000,000, le libuka le lipampitšana tse fetang limilione tse 100. O ile a etsa tsena kaofela kantle le ho kopa chelete ho batho. O ne a ikemiselitse a bile a ipoleletse hore o tla kopa thuso ho Molimo feela.



Ha Molimo a ne a biletša Muller ho aha mahae a hae a likhutsana, Muller o ne a e-na le lisente tse mashome a mahlano feela mokotleng oa hae! Muller o ile a araba pitso ea Molimo ka ho mo tšepa esita le ho itšetleha ka tlhokomelo ea hae ka ho feletseng bakeng sa tseo a li hlohang. O ne a e-na le lisente tse mashome a mahlano feela – empa o ile a li nea Molimo a ba a mo tšepela tsohle tse tla latela. Hamorao Muller o kile a fana ka bopaki ba hore likhutsana tseo ha lia ka tsa hloka lijo le ka mohla; Molimo o ile a ba hlokomela litlhokong tsohle.

Muller o ne a ile a phela bophelo ba bokhopo ha e sa le mohlankana, a ba a kena teronkong ha a le lilemo li leshome le metso e tšeletseng. Leha ho le joalo, ha a le lilemo li mashome a mabeli, George Muller o ile a fana ka bophelo ba hae ho Krete. Lilemong tse 'maloa kamor'a moo, Muller o ile a fihleloa ke linako tsa ho ba le tlhoko semoeeng, hape o ile a lemoha likarolo tseo a nang le mathata ho tsona. Qetellong ha a le lilemo tse mashome a mabeli a metso e mene, Muller o ile a fihlella "ho inehela hoa pelo ka ho felletseng le ka botlalo. Ke nehelane ka 'na ka ho felletseng ho Molimo."

Ha a le lilemo tse mashome a supileng, Muller o ile a qala ho etela linaheng tse mose ho maoatle ho ea ruta lentsoe la Molimo. Lipakeng ha a le lilemo li mashome a supileng le tse

<sup>16</sup> Setšoantšo: "Mr George Muller" by Frank Holmes, *George Müller, The Modern Apostle of Faith* (1898), e nkilo ho [https://commons.wikimedia.org/wiki/File:Mr\\_George\\_Muller.jpg](https://commons.wikimedia.org/wiki/File:Mr_George_Muller.jpg), sechaba sa setjhaba.

<sup>17</sup> E fetoletsoe ho tsoa ho Roger Steer, *Spiritual Secrets of George Muller* (PA: OMF Books, 1985) and J. Gilchrist Lawson, *Deeper Experiences of Famous Christians* (Anderson: Warner Press, 1911).

mashome a robeli a metso e supileng, o ile a etela linaha tse mashome a mane a metso e 'meli 'me a ruta batho ba fetang 3,000,000.

Hamorao bophelong ba hae, George Muller o ile a botsoa ka lekunutu la bophelo ba hae ba bosebeletsi. O ile a araba ka ho re, "Ho na le letsatsi leo ka lona ke ileng ka shoa ka ngeng ea bo-'na (maikutlo a ka le litakatso tsa ka), le ka ngeng ea hore na lefatše lea nkananela kapa ha le nkananele, esita le ka ngeng ea ho ananeloa kapa ho behoa molato ke metsoalle ea ka. Ha esale ho tloha ka nako eo, ke tsotella ho ananeloa ke Molimo feela." George Muller o ne a e-na le pelo e sa arohanang. O ne a phethehile mahlong a Molimo.

### **Boikhopotso ba Thuto ea 5**

(1) Ho halalela ho bolela ho ba le pelo e sa arohanang.

(2) Lentsoe la se-Heberu *shalem* le bolela "e sa arohanang." Lentsoe le amana le *shalom*, e bolelang "khotso". Ho ba le pelo e "phethehileng" kapa "e sa arohanang" ke ho ba le pelo e tšepahalang ho ea mong feela.

(3) Salomone, Asa, le Amatsia ba bontša kotsi ea ho ba le pelo e arohanang. E mong le e mong oa bona o ile a hloleha ho khahlisa Molimo ka ho felletseng ka lebaka la lipelo tsa bona tse neng li arohane.

(4) Khalalelo e qala ka pelong. Jesu o ile a nyatsa bohle ba tsotellang pontšo ea kante ea lintho tse bonoang ho e-na le pelo e hloekileng.

(5) Re lokela ho inehela ka ho felletseng ho Molimo. Molimo o halaletsa sechaba sa hae. Molimo o biletse sechaba sa hae ho inehela e le karabelo ho mohau oa hae.

(6) Batho ba Halalelang ba re "E" e Felletseng ho Molimo. Joalo ka ea tšepahalang, ba re "E" ho mong'a bona ka ntle le ho qobelloa.

(7) Kamor'a hore re re "E, ea ka ho sa feleng," re lokela ho tsoela pele ho 'na re re "E" letsatsi le letsatsi.

## **Kabelo ea Thuto ea 5**

(1) Lokisa molaetsa holima sehlooho sena, "Ho Phela ka Pelo e sa Arohanang." U ka iketsetsa moralo oa hau, kapa oa sebelisa o latelang:

- A. Mohlala oa bibeletsoe oa pelo e arohanang
- B. Likotsi tsa ho phela ka pelo e arohanang
- C. Pheko ea pelo e arohanang

(2) Qala thuto e latelang ka ho pheta Dipesaleme ea 86:11-12.



# Thuto ea 6

## Khalalelo ke Ho Loka

### Sepheo sa Thuto

Qetellong ea thuto ena, baithuti lokela ba be ba ka:

- (1) Lemoha hore ho loka hoa kahare ho tšoanela ho bonahatsoa ke boitšoaro bo kante.
- (2) Sebelisa melaoana ea khalalelo liqetong tse phelehang tse amang boitšoaro.
- (3) Ikahlola mabapi le melao ea boitšoaro.
- (4) Tseba Mikea 6:8 ka hlooho.

### Ezekiele: Monna ea Boneng Morero oa Molimo Bakeng sa Bokamoso

Iseraele e ne e se e se sechaba se halalelang. E ne e khumamela litšoantšo; e ne e hatella bafumanehi; e ne e hlompolla Sabatha. Ele kahlolo Molimo o ile a romella sechaba sa hae kholehong. O ile a lumella lebotho la Babilona ho hlola Jerusalema le ho senya tempele. Ka lebaka la hobane sechaba sa Molimo se ne se se se sa halalele, o ne a se a sa amohele khumamelo ea bona. Ka lebaka la hobane sechaba sa Molimo se ne se se se sa arohana le sebe, o ne a se a sa amohele khumamelo ea bona.

Leha ho le joalo, Molimo o ne a ntse a e-na le morero ka sechaba sa hae. Lilemo tse leshome kamor'a ho senngoa hoa tempele, Molimo o ile a tlišetsa Ezekiele pono, moprofeta ea neng a phela kholehong haufi le Babilona. Ezekiele o ile a bona morero oa Molimo bakeng sa bokamoso.

Ponong ea Ezekiele, kholeho e felile; kahlolo e phethiloe; boteng ba Molimo bo khutlile. Tempele e tletse ka khanya ea Molimo. Molimo o hlatsoitse sechaba sa hae ka metsi 'me o ba hloekisitse litšila tsa bona tse kante. O tlositse pelo ea lejoe 'me o ba neile pelo e ncha le moea o mocha. O phethahalitse tšepiso ea hae, (bala Ezekiele 36:25-27). Iseraele ea halalela, kahare le kante.

Ezekiele o ile a bona tempele e ileng ea hlohonolofatsa lichaba tse ling. Metsi a hloekileng a ne a phalla ho tloha tempeleng e tsositsoeng ho isa Leoatleng la Letsoai. Lifate li ne li fana ka litholoana bakeng lijo le mahlaku bakeng sa ho folisa. Botle ba Edene bo ne bo khutlile.

Karolo e khanyang ka ho fetisisa ea pono ena ke polelo e qetellang, (bala Ezekiele 48:35). Morero oa Molimo ka sechaba sa hae o phethahetse: batho ba halalelang ba phela boteng ba Molimo o halalelang!

► Ak'u hlalose lintho tse bonahalang kante tse pakang hore motho oa halalela. Ke Diketso life tse bonahalang kante tseo re ka li lebellang ho motho eo pelo ea hae e halalelang?

## **Bothata ba Baprofeta: Israele e ne e sa Loka**

Baprofeta ba ne ba tlisa likahlolo tsa Molimo tse khahlanong le sechaba se neng se robile selekane. Libukeng tsa Boprofeta, joalo ka Libukeng tsa Molao, lentsoe *khalalelo* le hlalosa ntho e leng ea Molimo 'me e khethetsoe eena. Jerusalema esita le tempele li ne li halalela hobane e ne e le tsa Molimo.

### **Molimo Oa Halalela**

Makhetlo a mashome a mabeli a motso o mong, Isaia o ile a bua ka Morena e le ea halalelang ka lebitso le itseng. Bala Isaia 1:4. Ebe u bala hape ho Isaia 6:3 ho utloa pina ea lirafime ka khalalelo ea Molimo.

Molimo ke Molimo o ikhalaletsang ka ho loka (Isaia 5:16). Ezekiele o ile a bona letsatsi leo ka lona Molimo a tla bonahatsa khalalelo ea hae lichabeng tsohle, (bala Ezekiele 38:23).

**Likahlolo** tsa Molimo li bontša semelo sa hae sa khalalelo. Mikea o ile a hlokomelisa hore ka lebaka la sebe sa Iseraele, (bala Mikea 1:2-3). Molimo o ile a ahlola Iseraele hobane Molimo ea halalelang a ke ke a lumella hore sebe se se ke sa ahloloa.

**Topollo** ea Molimo ea Iseraele e bontša hore o oa halalela. Molimo o ile a lopolla Iseraele, eseng hobane e ne e lokeloa ke tokollo, empa ka lebaka la lebitso la hae le halalelang har'a lichaba.

► Bala Ezekiele 36:22-23.

Molimo o ne a ke ke a lumella hore lebitso la hae le halalelang le silafatsoe ke sebe sa Iseraele. O ile a tšepisa ho khutlisetsa Iseraele lefatšeng la bona e le ho bontša khalalelo ea hae ho lichaba tse ling.

► Bala Ezekiele 28:25.

Ena ke tšepiso e tsotelang. Molimo o ile a tšepisa ho bontša khalalelo ea hae ka ho lopolla Iseraele le ho mo khutlisetsa hae. Molimo o ile a tšepisa ho bonahatsa khalalelo ea hae ka batho bona bao a neng a ba isitse kholehong. Khalalelo ke ea Molimo.

### **Iseraele e ne e sa Halalele**

Kaha khalalelo e le ea Molimo, re halalela ha feela re phela re na le likamano le Molimo ea halalelang. Baprofeta ba ile ba phatlalatsa Iseraele e se e sa halalele hobane e ne e phela ho latela litakatso tsa eona tsa boetsalibe ho e-na le ho phela ka likamano tsa lerato le ho mamela Molimo.

Bukeng ea **Isaia**, Molimo o ile a re o arohane le Yuda ka lebaka la sebe sa eona. Molimo o ile a lahla Iseraele hobane e ne e hanne ho phela ka ho loka.

► Bala Isaia 59:6-7.

Molimo o ile a laela **Jeremia** ho tsetela senyepa sa hae sa lene. Lene e tšoeu e ne e le letšoao la bohloeki. Jeremia o ile a tsetela senyepa seo ho fihlela se bolile ke mobu le seretse. Hona e ne e le ho tšoantša ho se hloke hoa Yuda. Molimo o ne a khethile Yuda ho ba sechaba se lokileng. Ho e-na le hoo, sechaba sa Molimo se ile sa phela bophelo ba sebe (Jeremia 13:1-11).

Ho **Ezekiele**, Molimo o ile a nyatsa Iseraele ka hore ke baikhantši ba manganga, chaba "se ikhantšelitseng 'na" (Ezekiele 2:3). Ho e-na le ho mamela Molimo ea halalelang, Iseraele e ile ea phela joalo ka lichaba tsa bahetene, (bala Ezekiele 11:12). Iseraele e ne e se e sa loka.

Nakong eo ba leng kholehong, **Daniele** o ile a bolela hore batho ba neng ba khethetsoe ho hlompha Molimo kapel'a lichaba ba ne ba lokeloa ke masoabi a pontšeng (Daniele 9:7). Hobaneng?

► Bala Daniele 9:11.

Baprofeta ba banyane ba ile ba nyatsa Iseraele ka lebaka la sebe sa eona. **Hosea** o ile a qosa Iseraele ka hore Hoa hlapanngoa, hoa thetsoa, hoa bolaoa, hoa utsuo, hoa fejoa (Hosea 4:2). **Mikea** o ile a ruta batho ba hloeang botle, ba ratang bobele (Mikea 3:2).

**Sofonia** e ne e le setloholo sa Esekiasa. E ne e le oa le leng la malapa a matla haholo naheng ea Yuda, empa ha a ka a qeqea ho beha molato oa sebe sa Yuda ho baetapele ba eona.

► Bala Sofonia 3:3-4.

Ho qala ho baetapele ba lipolotiki ho isa ho baetapele ba bolumeli, Iseraele e ne e entse sebe khahlanong le molao oa Molimo. Bothata e ne e le bo feng? Iseraele e ne e lebetse hore khalalelo e bohlokoa ho feta mahlabele. Ho e-na le ho loka hoa 'nete, Iseraele e ne phathahane ka mekete e se nang molemo.

### **Khalalelo e Fetisa Mahlabele le Polelo ea Molomo Felela**

O mong oa merero oa molao e ne e le ho ruta Iseraele hore ke ba Molimo. Ka bomalimabe Iseraele e ile ea phakisa ho lebaka 'nete ea seo Molao o se bolelang. Sechaba se ne etsa mahlabele ka tsela e nepahetseng, empa lipelo tsa bona tsona li ne li sa halalele. Sechaba sena se neng se khethiloe ke Molimo ho bonahatsa setšoantšo sa hae, se ne se sa hloeka. Libuka tsa Boprofeta li ruta hore ho halalela ho bolela ho loka bobeli kahare esita le kantele.

Ezekiele o ile a nkoa a iso a Babilona ka selemo sa 597 pele ho Krete. Ha Ezekiele a le lilemo li mashome a mararo, Molimo o ile a qala ho bua le moprofeta eo ka lipono tse 'maloa tse latellanang. Ezekiele o ile a bona baholo ba BaYuda ba khumamela litšoantšo sebakeng se Halalelang (Ezekiele 8). Molimo o ile a laela mangeloi ho tliša kahlolo ho fihlela mapatlelo a tempele a tlala ka litopo. Khanya ea Molimo e ile ea tloha tempeleng (Ezekiele 10). Tempele le lihlabelo tsa eona li ne li se li sa bolele letho hobane batho ba ne ba sa halalele.



## **Bophelo ba khalalelo bo fetisa lihlabelo**

Iseraele e ne e ipolela hore ea halalela, empa e ne e tletse ka sebe e bile e sa hloeka. Sechaba se ne se etsa lihlabelo tsa khalalelo, empa ba sa phele bophelo bo hloekileng, (bala Isaia 1:4). Batho ba ne ba latela lihlabelo tse nepahetseng, empa ba phela bophelo ba boetsalibe. Baprofeta ba ile ba ruta hore lihlabelo ha li na thuso haeba Baiseraele ba phela ka sebe. Khalalelo e fetisa meketjana le lihlabelo.

**Isaia** o ile a re Molimo ha a amohela lihlabelo tsa Yuda hobane Yuda e ne a sa phele ka ho loka.

► Bala Isaia 1:13-14.

A eme ka pele ho tempele, **Jeremia** o ile a phatlalatsa a re, (bala Jeremia 7:4). Tempele e ne e se e sa halalele. Hobane'ng? Hobane bakhumameli ba ne ba sa phele maphelo a hloekileng. Molimo o ile a ba hlokomelisa, (bala Jeremia 14:12). Molimo o batla ho fetisang lihlabelo tse se nang le molemo.

Molimo o ile a re ho **Hosea**, (bala Hosea 6:6). Iseraele e ne e fana ka lihlabelo empa a robile selekane sa eona le Molimo. Sehlabelo sa secheso se etsoang kantle ho bophelo ba ho loka ha se na molemo. Ho sa tsotellehe lihlabelo tsa Iseraele, Molimo o tla hopola bokhopo ba bona, a khalemele libe tsa bona (Hosea 8:13). Hobane'ng?

► Bala Hosea 4:1-2.

**Amose** o ile a ruta mebusong e ka leboea nako e khutšoanyane pele e hapuo ke ba-Assiria. Amose o ile a fana ka monyetla oa ho qetela hore ba ka baka. Amose o ile a toba Iseraele ka sebe sa bona. Sechaba sena se neng se boleloa e le "sechaba sa Molimo" se ne se le molato oa libe tsohle tse mpe ho tloha ka ho se phelisane hantle ho isa le ho litloaelo tse soabisang tsa bohloa. Barui ba Iseraele ba ne ba ahlola batho lichelete tse sa lokang 'me ba sebelise chelete eo ho reka veine sebakeng sa mekete ea bona ea bolumeli (Eksoda 22:26; Amose 2:8). Kahobane maphelo a bona a ne a tletse ka sebe, khumamelo ea bona e ne ele ea lefeela. Molimo o ile a re:

► Bala Amose 5:21-23.

Esita le kamorao ho kholeho, Yuda e ile ea leka ho etsa lihlabelo ho e-na le ho mamela ka ho felletseng. Ka selemo sa 516 pele ho Krete, sechaba se ile sa qala ho tsosa tempele bocha. Leha ba ne ba etsa mosebetsi oa bolumeli, bophelo ba bona bo ne bo sa hloeka. **Haggai** o ile a hopotsa sechaba hore moprista ea amang setopo o ba litšila. Ka tsela e tšoanang, ho se hloeke ho bakoang ke sebe sa sechaba ho ne ho etsa hore mosebetsi oo oa bona tempeleng e be o litšila (Haggai 2:10-14). Mahlabelo a etsoang ka ntle le ho loka ke a lefeela; khalalelo e fetisa mahlabelo.

**Malakia** o ile a hlokomelisa Yuda hore Molimo ha a ananela khumamelo ea bona, (bala Malakia 1:10). Molimo o ile a hana ho amohela sehlabelo sa Yuda ka lebaka la sebe sa sechaba.

Libuka tsa boprofeta lia hlakisa: Khalalelo e fetisa sehlabelo. Motho ea sa pheleng bophelo bo hloekileng ha a halalele. Re sitoa ho khumamela Molimo ka matsoho a litšila.

### **Bophelo ba Khalalelo ke Ho Fetisang ho Bitsa Lebitso la Molimo**

Molimo o ile a latola batho ba neng ba ipitsa ka lebitso la hae hobane ba ile ba hana ho arohana le libe tsa bona. Testamenteng e Ncha, Jesu o ile a etsa tlhokomeliso ena:

► Bala Mattheu 7:21-23.

Khalalelo ke ho fetang ho bitsa lebitso la Molimo feela. Khalalelo ke ho loka ho kahare ho bonoang boitšoarong kante. Molimo o batla pelo e halalelang le matsoho a halalelang.

Kajeno, joalo ka mehleng ea Jeremia, Molimo o bua le baruti ba hahang matlo a maholo a mahalihali ka menehelo ea bafutsana, (bala Jeremia 22:13).

Kajeno, joalo ka mehleng ea Amose, Molimo o bua le libini tsa kereke tse phelang bophelo ba sebe, (bala Amose 5:23).

Kajeno, joalo ka mehleng ea Mikea, Molimo o bua le bo rakhoebo ba ipitsang ka lebitso la Jesu empa ba ntse qhekella bareki ba bona, (bala Mikea 6:8).

Khalalelo e fetisa lihlabelo kapa polelo ea molomo. Kajeno, joalo ka mehleng ea baprofeta, Molimo o batla boitšoaroboneng bo lokileng.

#### **Thapelo Bakeng sa Khalalelo**

"Jehova ea lerato,

Mphe pelo e tiileng;

Mphe pelo e sa hloloeng;

Mphe pelo e lokileng.

Mphe kutloisiso ke tle ke u tsebe,  
ke be mafolofolo ho u batla,  
le botšephehi ba hore ke tle ke  
khomarele uena."

- E fetoletsoe ho tsoa ho  
Thomas Aquinas

### **Khalalelo ke Ho Loka**

Pelo e halalelang e bonahala boitšoarong bo lokileng. Pelo e halalelang e tla bonahala ka matsoho a halalelang. Iseraele e ne e sitoa ho ipitsa sechaba se halalelang empa ba ntse ba phela bophelo bo sa lokang.

Kahobane Molimo ke Molimo o lokileng, le sechaba sa hae se lokela ho halalela. Sechaba sa Molimo se lokela ho ba le semelo sa Molimo oa bona. Ba khumamelang litšoantšo ba nka sebopeho sa boitšoaroboneng ba litšoantšo tseo tsa bona; ba khumamelang Jehova ba lokela ho nka sebopeho sa boitšoaroboneng sa Jehova. Morero oa Molimo ho etsa sechaba se lokileng se bile se halalela.

Isaia o hlalositse semelo sa Molimo, (bala Isaia 33:5). Molaetseng o tšoanang, Isaia o hlalositse motho ea lokileng ea ka phelang boteng ba Molimo.

► Bala Isaia 33:14-15.

Ke feela motho ea nang le semelo sa toka le ho loka ha Molimo ea ka phelang boteng ba Molimo. Bahalaleli ba etsa lintho ka tsela eo Molimo a etsang lintho kateng; ba bonahatsa semelo sa Molimo o halalelang.

### **Khalalelo ke Ho Loka ho Kahare: Pelo**

Ho loka hoa 'nete ho qala pelong. Baprofeta ba ne ba tseba 'nete ea hore lihlabelo tsa Molaoli li ne li sa itekanela e le tsona feela. Ho mamela ho bonoang kante empa ho se na ho loka ho kahare ke boikaketsi. Ho loka ho qala ka pelong.

Iseraele e ile ea hana Molao hobane ba ile ba hana Molimo ea faneng ka Molao. Ho se mamele ho qala ka pelong. Iseraele e ne e tloa melao oa Molimo hobane pelo tsa bona li ne li latela litšoantšo tsa bona (Ezekiele 20:16). Molimo o ile a bona hore pelo tsa bona li mano (Hosea 10:2).

Ho se mamele ho qala ka pelong; le ho loka ho qala ka pelong. Molimo o ile a bua ka Isaia a re, (bala Isaia 51:7). Ba tsebang ho loka ke ba nang le molao oa Molimo lipelong tsa bona.

Jeremia le Ezekiele ba ne ba lebelletse letsatsi leo molao oa Molimo o tla kenngoa lipelong tsa sechaba sa Molimo.

► Bala Jeremia 31:33 le Ezekiele 11:19-20.

Ho loka ho qala ka pelong. Joele o ile a biletsa sechaba hore se bake, eseng ka pontšo ea kante feela. Lillo le ho itima lijo li lokela ho tsoa pelong e nang le pako.

► Bala Joele 2:12-13.

Pontšo tsa kante ha lia lekana. Ho loka ho tlameha ho qala pelong.

### **Khalalelo ke Ho loka Ho Kante: Matsoho**

Libukeng tsa Boprofeta, boitšoaro ke eona eo ho ka lekanngoang khalalelo ka eona. Khalalelo e hloka ho loka hoa semelo esita le hoa boitšoaro. E 'ngoe ea litlhaloso tse bobebe tsa bophelo ba ho loka ka Testamenteng ea Khale e hlaha bukeng ea Mikea. Mikea o hlalositse seo Molimo a se lebelletseng ho sechaba sa hae.

► Bala Mikea 6:8.

Sena ke seo ho phela bophelo ba khalalelo ho se bolelang: **toka le mohau** ho batho ba bang, le **boikokobetso** ho Molimo. Libukeng tsa Boprofeta, toka, mohau le boikokobetso li hlalosa bophelo bo lokileng.

### ***Ho Loka ke Toka le Mohau ho Batho ba Bang***

Batho ba bang ba batla ho arola pelo le matsoho. Ba re, "Pelo ea ka ea halalela, empa matsoho a ka a tletse sebe. Ke rata Molimo ka pelong ea ka, empa ha ke phele bophelo bo lokileng." Libuka tsa Boprofeta ha li lumelle karohano ena. Pelo e halalelang e tla bonoa ka

ho loka ho kante. Pelo e hloekileng e tla hlahisa boitšoarō bo lokileng. Batho ba halalelang ba na le matsoho a halalelang.

**Sakaria** o hlalositse ho loka ka ho re ke boitšoarō bo botle malebana le batho ba bang.

► Bala Sakaria 7:9-10.

**Amose** o ile a ruta sechaba se neng se lebetse ho loka. Bala kamoo Iseraele e ileng ea furalla kateng ho Amose 5:7, le tharollo ea Molimo bakeng sa bokoenahi ba Iseraele ho Amose 5:24.

**Isaia** o ne a lapetse ho loka joalo ka Amose. Molaetsa oa pele oa Isaia o ne o biletsa Yuda ho phela bophelo ba ho loka:

► Bala Isaia 1:16-17.

Molimo o ile a bua ka **Jeremia** ho biletsa Yuda tokeng le ho lokeng.

► Bala Jeremia 22:3.

Boemo boo Molimo a bo batlang bakeng sa sechaba sa hae e ne e le toka, ho loka, le mohau. Molimo o ne a hloka hore sechaba sa hae se phele ka ho loka, le ho etsa lintho kamoo Molimo a li etsang kateng.

### ***Ho Loka ke Boikokobetso ho Molimo***

Molimo o batla batho ba tšarang batho ba bang ka toka le ka mohau; hona e lokela ho ba maikutlo a rona mabapi le baahisane ba rona. Molimo o batla batho ba tsamaeang ka boikokobetso kapel'a sefahleho sa hae; sena e lokela ho ba maikutlo a rona ka Molimo.

Yuda e ne e rapela litšoantšō thabeng e phahamileng, e bonahalang. Molimo o ile a arabela taba ena ka ho hopotsa Yuda hore ke eena feela ea ahileng sebakeng se phahamileng.

► Bala Isaia 57:7, 15.

Re fihlella Molimo ea phahamileng hape ea bonahalang ka ho ba le moea o robehileng o ikokobelitseng. Ho loka ho kenyeletsa ho ikokobeletsa Molimo. Hona ke khalalelo ea 'nete.

Hosea o ile a ruta sechaba se koenehileng. Moprofeta enoa o ne a tseba hore sechaba sena se tla hana molaetsa oa hae. Empa leha sechaba seo se ile sa hana ho baka, Hosea o ile a qetella ka ho mema batho ka bo-mong ho ba-Iseraele ba batlang Molimo. Leha sechaba se ka hana Molimo, motho ea lokileng o ntse a ka khona ho tsamaea ka litsela tsa Molimo. Molimo o tla hlompha motho ea mo hlomphang. Molimo o hlohonolofatsa motho ea tsamaeang ka ho loka.

► Bala Hosea 14:9.

## **Khalalelo e Kenngoang Tšebetsong: Mekhoa ea Bophelo bo Halalelang**

Khalalelo e qala pelong, empa e bonahala boitšoarong bo kante. Tšebetsong ea ho khakola tempele, Salomone o ile a qholotsa sechaba a re, (bala 1 Marena 8:61). Litholoana tsa khalalelo e ba khalalelo e kante; haeba u halalela kahare, u tla phela ka ho loka kante.

Baprofeta ba ile ba hanyetsa baholo ba Iseraele ba neng ba ruta hore sechaba sa Molimo ha se tlamehe ho mamela molao oa Molimo. Baprofeta ba hanana le ba likerekeng tsa mehla ea joale ba rutang hore Mokreste a ka sitoa ho fihlella seo Molimo a se hlokanang bakeng sa ho phela ka khalalelo.

Baruti ba bangata kajeno ba ruta hore, “molao oa Molimo o re re phele ka ho loka, empa oa tseba hore u tla sitoa ho phethahatsa molao oa hae.” Ona ha se oona molaetsa oa baprofeta. Baprofeta ba itse, “Molao oa Molimo o re re phele ka ho loka; ke sona sena seo Molimo a se hlokanang. Sechaba sa Molimo se tla mamela molao oa Molimo.”

Mohlala o tsoang Molaong oa Moshe o tla bontša tsela eo pelo e halalelang e amang Diketso tsa rona tsa letsatsi le letsatsi kateng, (bala Levitike 19:13). Linakong tsa khale, basebetsi ba ne ba lefuoa qetellong ea letsatsi ka leng. Ho ne ho se na licheke tsa polokelo kapa likarete tsa banka. Moputso oa letsatsi la Mantaha o ne e reka lijo tsa letsatsi la Labobeli. Ho hana ho lefa mosebetsi letsatsi ka leng ho ne ho mo thatafaletsa hore a ka reka lijo. Molao o ne o re, “Lefa basebetsi ba hau qetellong ea letsatsing ka leng. Rakhoebo ea lokileng o tla tšoara basebetsi ba hae ka toka.”

Re bone Baprofeta ba hatella taba ena ea ho loka, toka, le mohau ka thata. Li-Epistole tse akaretsang tsa Testamente e Ncha li fana ka molaetsa o tšoanang. Sena se bonahala haholo epistoleng ea Jakobo. Jakobo o ngoletse ba neng ba ipitsa bana ba Molimo, empa ba sa phele bophelo bo lokileng. O bontša hore khalalelo ea 'nete e bonahala ka bophelo bo lokileng.

- Batho ba halalelang ba etsa ho fetisang ho ipolela ba halalela; ba phela bophelo bo nang le Molimo, (bala Jakobo 1:22).
- Batho ba halalelang ba bontša kutloelo-bohloko ho likhutsana le bahlolohali, (bala Jakobo 1:27).
- Batho ba halalelang ha ba ee ka tšobotsi ho batho ba ruileng le ba futsanehileng, (bala Jakobo 2:9).
- Batho ba halalelang ba laola seo ba se buang, (bala Jakobo 3:2).
- Bo-rakhoebo ba halalelang ba tšoara basebetsi ba bona ka toka, (bala Jakobo 5:4).

Khalalelo e fetola tsela eo re phelang ka eona likarolong tsohle tsa bophelo ba rona, ho kenyeletsa le likhoebo tsa rona le mesebetsi ea rona. Motho ea halalelang o phela ka ho loka. Haeba re halalela pel'a Molimo, re tla itšoara ka mokhoa o tšoanelang mabapi le batho

ba bang. Molaetsa oa Baprofeta le Baapostola o hlakile: pelo e halalelang e fetola Diketso tsa rona. Batho ba halalelang ba tla phela ka ho loka likarolong tsohle tsa bophelo. Morero oa Molimo ke ho etsa sechaba se lokileng lipelong tsa bona 'moho le bophelong ba letsatsi le letsatsi.

Ho loka ho shebahala joang bophelong ba letsatsi le letsatsi? Khalalelo e shebahala joang tšebelisanong ea rona letsatsi le letsatsi le lefatše le re potileng? Ha re ke re talime mehlala ea 'nete ea se etsahalang bophelong.

Kaofela ha eona e tsoa ho batho ba ipitsang bahalaleli. Mabitso a fetotsoe. Ka masoabi, lipale tsena ke tsa 'nete.

"Khalalelo e bolela ho tsamaea ho sa silafalang ka maoto, ho bua ho sa silafalang ka leleme, monahano o sa silafalang ka kelello – ntlha e 'ngoe le e 'ngoe ea bophelo e be tlas'a tlhahlobo ea Molimo."

- Oswald Chambers

Moruti Moeketsi ke sehahi. Mosebetsi oa hae joaloka sehahi o tšehetsa mosebetsi oa hae oa boruti kerekeng ea khalalelo. Moeketsi o ile a reka lisebelisoa tsa hae ka 1,872 Maloti . O ile a li sebelisa ho haha ntlo, eaba ka morao ho moo ha a sa li hloka. Nakong eo a seng a batla ho li rekisa, o ile a bolella moreki a re, "Ha li le ncha ke li rekile ka 3,745 Maloti. Ke tla u rekisetsa tsona ka 2,808 Maloti."

Moruti Moeketsi o re, "Hona ke khoebisano e ntle. Ke entse phaello ka ho bolela theko e fetang eo ke rekileng lisebelisoa tseo ka eona. Ha hona motho ea hloka ho tseba taba eo. Ebile, ke tla sebelisa chelete eo mosebetsing oa Molimo." Molimo o re, "Batho ba halalelang ba tšepahala esita le khoebong tsa bona." Paulosi o ngotse a re, (bala BaKolose 3:9-10).

Lineo ke mongoli khoebong e 'ngoe. Ha moruti oa hae a etetse ha hae, o ile a re, "Ha u hloka thepa ea lisebelisoa tsa ka ofising, nka u nea tsona. Ke nka lipene, lipampiri le lisebelisoa tse ling tsa ka ofising mosebetsing ke tla le tsona hae. Ha ho na motho ea hlokomelang."

Lineo ore, "Ke ntho e nyane." Molimo o re, "Batho ba halalelang ba tšepahala le linthong tse nyane." Paulosi o ngotse hore bohle ba "bopiloeng ka setšoantšo sa Molimo ho lokeng le khalalelong ea 'nete" ba tla phela ka tsela e ncha, (bala Baefese 4:24, 28).

Thabo o tsamaisa khoebo. O lokela ho boloka libuka tsa khoebo le ho lefa lekhetho qetellong ea selemo. Selemong se fetileng, Bill o ne a entse phaello ea 924,658.80 Maloti khoebong ea hae, empa ha a tlatse liforomo tsa lekhetho, o ile a ngola a entse phaello ea 739,882.80 Maloti. Ka linako tse ling o ntša tjo tjo ho basebetsi ba 'muso hore a fumane mosebetsi.

Thabo o re, "Kea tseba hore na khoebo e tsamaisoa joang naheng ea heso. Ke lokela"ho tlotse mabili ka oli" bakeng sa khoebo ea ka. Ebile, ke ntša boshome hape ke sebelisa chelete ea ka ho etsa merero e molemo." Molimo o re, "Batho ba halalelang ba na le 'nete tšebetsong ea bona le 'muso. Paulosi o ngoletse baahi ba 'Muso oa Roma, (bala Baroma 13:1).

Palesa ha a natefeloe ke mosebetsi oa hae. O batla ho qeta nako ea hae a sebetsa kerekeng. Ho e-na le hoo, o na le mosebetsi oa ho hloekisa matlo a barui. O lefelloa ho sebetsa ho

tloha hoseng ka 08:00 ho fihlela ka 5:00 mantsiboea, empa hangata o fihla mosebetsing morao ho nako a be a chaise pele ho nako ea ho chaea. Linda o ile a bolella moruti oa hae a re, "Nka mpa ka nka nako ea ka ea hoseng ke ntse ke rapela ebe ke fihla mosebetsing morao ho nako. Hape nka mpa ka chaise pele ho nako hore ke tle kerekeng mantsiboea. Ha ke tsotelle ho sebetsa nako e felletseng ea mosebetsi oa ka eo ke e lefelloang."

Palesa o re, "Mong'aka a ha a na ho tseba leha ke sa sebetse nako e felletseng ea mosebetsi." Molimo o re, "Batho ba halalelang ba na le 'nete boitšoaronng ba bona mosebetsing. Ba sebetsa ka pelo eohle libakeng tsohle tseo Molimo o ba beang ho tsona." Paulosi o ngotse, (bala BaKolose 3:22-24).

Tumelo ke moromuoa. O rata Molimo hape o sebetsa ka thata, empa leleme la hae lea hlaba! Ka linako tse ngata, batho ba pel'a hae ba utloisoa bohloko ke mantsoe a hae a boima.

Tumelo o re, "Ke bua seo ke se nahanang! Le tlameha ho nkamohela kamoo ke leng kateng." Molimo o re, "Batho ba halalelang ba laola maleme a bona." Jakobo o ngotse, (bala Jakobo 3:6-10).

► Morabeng oa heno, ke likarolo lifeng tsa boitšoaro tseo e bang liteko ho Bakreste? Ke hokae moo Bakreste ba lekoang ka ho fetisisa hore ba hloke botšepahi bophelong ba bona ba letsatsi le letsatsi? Molaetsa oo oa bophelo ba khalalelo o araba karolo ee ea moleko o joang?

### **O Fumane Sephiri - Chiune Sugihara**

Chiune Sugihara e ne e le Mokreste oa Mo-Japane ea neng a sebeletsa Lekaleng la tsa Machabeng naheng ea Manchuria. Ka selemo sa 1939, o ile a rongoa Lithuania ho ea sebetsa teng e le moromuoa oa naha ea Japane. Ha a le moo o ile a kopana le mosali oa MoYuda 'me a utloa kamoo 'muso oa ma-Nazi oa Germany o neng o tšoare BaYuda kateng.

Sugihara o ile a kopa 'muso oa habo tumello ea ho nea baphaphathehi ba BaYuda ba balehileng Germany le Poland litokomane tse tla ba lumella ho phela naheng ea habo. 'Muso oa Japane o ile oa hana kopo eo ea Sugihara.

Ka lehlabula la selemo sa 1940, Sugihara o ne a tseba hore o lokela ho bontša toka le mohau. O ile a bolella molekane oa hae a re, "Ha ke batle ho se mamele 'muso oa heso. Empa ke sitoa ho tlohela ho mamela Molimo. Ke lokela ho latela letsoalo la ka."

Sugihara o ile a qala ho ngola ka letsoho litumello tsa ho tsamaea sebakeng sa baphaphathehi. Ho hakanngoa hore e ka ba o ile a pholosa maphelo a ka bang 10 000 a ba-Yuda ba ka beng ba bolauoe ke Hitler. Hamorao, Sugihara o ile a tšoaroa ke masole a Russia, a qeta likhoeli tse leshome le metso e robeli a le teronkong ea Russia. Ha a lokolloa 'me a

"Bana bohle ba Molimo ke batho fela ba tloaelehileng ba entsoeng ba ikhethang ka morero oo Molimo a ba fileng oona."

- Oswald Chambers

khutlisetsoa naheng ea Japane, Lekala la tsa Machabeng le ile la mo leleka mosebetsing hobane o ne a tlotse litaello tsa bona.

Kamor'a ho lelekoa, Sugihara o ne a se na mokhoa oa ho phela. O ne a hloleha le ho reka lijo sebakeng sa lelapa la hae. Eitse ha ba-Yuda bao a neng a ba pholositse ba ntse ba mo batla hamorao, 'muso oa Japane oa latola hore o kile a ba sebeletsa. Qetellong ka selemo sa 1968, mo-Yuda e mong oa ba pholohileng o ile a fumana Sugihara 'me a mo nka ho mo isa naheng Iseraele.

Sugihara o ile a fumana tlotla e fokolang lefatšeng bakeng sa boitelo ba hae, empa o ile a mamela Molimo hobane o ne a lokile. Sugihara o ne a tseba hore ngoana oa Molimo o lokela ho phela ka ho loka. O ne a sa khone ho iphapanyetsa ho hlopheha hoa batho ba mo potileng. O ne a tseba hore ho loka ho bolela ho phetha toka, ho rata mohau, esita le ho tsamaea ka boikokobetso le Molimo. Chiune Sugihara o ile a phela bophelo bo halalelang.

### **Boikhopotso ba Thuto ea 6**

- (1) Ho halalela ho bolela ho loka bobeli kahare esita le kantele.
- (2) Iseraele e ile ea lumella ho itokafatsa hoa kantele le ho ipolela ho halalela li nke sebaka sa ho loka hoa 'nete.
- (3) Ka ntle ho bophelo bo lokileng, lihlabelo le ho ipolela re halalela ha li na thuso.
- (4) Ho loka ho lokela ho tsoa kahare – ho lokela ho ba ho mamela ho tsoang pelong.
- (5) Ho loka ho lokela ho bonoa kantele – ho lokela ho susumetsa tsela eo re tšoarang batho ba re potileng ka eona.
- (6) Baprofeta ba ratile hore Molimo o hloka lintho tse tharo ho motho ea lokileng:
  - Toka ho batho ba bang
  - Mohau ho batho ba bang
  - Boikokobetso ho Molimo
- (7) li-Epistole tsa Testamente e Ncha li boela li pheta molaetsa oa ho phela ka ho loka. Motho ea halalelang o lokela ho phela bophelo bo nang le boitšoarano le ho loka.

### **Kabelo ea Thuto ea 6**

- (1) Ngola maqephe a mabeli ho isa ho a mararo (2-3) ka "Ho Loka Lefatšeng la Kajeno." Nka karolo e le 'ngoe eo ho eona sebe sa boitšoarano se tloaelehileng ho nkoa se amoheleha, 'me u bontše seo Bibe e se rutang ka karolo ena ea sebe. Fana ka tataiso e ka sebetsang ho batho bao o ba sebeletsang.
- (2) Qala thuto e latelang ka ho pheta Mikea 6:8.





# Thuto ea 7

## Khalalelo Ke Ho Rata Molimo

### Sepheo sa Thuto

Qetellong ea thuto ena, baithuti lokela ba be ba ka:

- (1) Ananela botle ba likamano tsa lerato le Molimo.
- (2) Latela mohlala oa Jesu e le ea ratileng Ntate ka lerato le phethehileng.
- (3) Elelloa hore ho rata lefatše le ho itokafatsa ka molao ke matšoa a mabeli a sesosa se le seng.
- (4) Tseba Mareka 12:29-31 ka hlooho.

### Jobo: Monna ea Neng a Rata Molimo

Jobo o ne a lahlehetsoe ke lintho tsohle. Leruo la hae le ne le felile. Bana ba hae ba ne shoele ba bolauoe ke sefeto. O ne a senyehetsoe ke bophelo bo botle. O ne a lutse thotobolong a ntse a ingoaea mathopa a hae ka lengeta. Mosali oa hae o ile a 'molella hore a rohake Molimo a tsebe ho shoa. Metsoalle ea hae e ne e 'mea molato oa libe tse mpe. Ba neng ba mo hlompha pele joale ba ne ba se ba mo soma.

Mahlomoleng a hae, Jobo ha a ka a rapela thapelo e reng, "Molimo mpuseletse maruo a ka" kapa, "Molimo folisa 'mele oa ka." Ho e-na le hoo, o ile a lla, (bala Jobo 23:3). Jobo o lla hobane a se a sa fumane Molimo eo a neng a mo tsebile ka ho ba le likamano tse tebileng le eena, (bala Jobo 23:8-9).

Jobo o hopola matsatsi a ha Molimo o no o lula tenteng ea ka joalo ka motsoalle (Jobo 29:4). Empa joale, (bala Jobo 30:19-21).

Sena ke sello sa monna ea ikutloang a ekiloe ke motsoalle oa hae oa hlooho ea khomo. Ke sello sa monna ea neng a rata Molimo.

Pale ea Jobo ha e qetelle ka ho nyahama. Kamor'a hore Molimo a bue a le sefelong, Jobo o ile a arabela ka ho re, , (bala Jobo 42:5). Jobo o ile a tšelisoa eseng ka ho buseletsoa maruo a hae, bophelo bo botle, kapa lona lelapa, empa ke ka ho boelloa ke boteng ba Molimo. Jobo o ile a tšelisaha ha a bona Molimo. Jobo e ne e le monna ea halalelang; Jobo o ne a rata Molimo.

### Khalalelo Libukeng tsa Lithoko: Ho Rata Molimo

► Ho bolela eng ho rata Molimo? Ho rata Molimo ka sebele ho tla ama joang hore na tse tlang pele ke life ho uena mabapi le nako ea hau le chelete ea hau? Ho rata Molimo ho tla ama joang tsela eo o talimang melao ea hae ka eona?

Buka ea Jobo le ea Dipesaleme li pheta molaetsa oo re o boneng Libukeng tsa Molao: khalalelo ke likamano le Molimo. Re halalela **ha feela** re phela likamanong le Molimo. Ho halalela ho bolela ho rata Molimo ka ho felletseng.

Henoke, Noe, le Abrahama ba ne ba halalela hobane ba ne ba tsamaea le Molimo. Ka tsela e tšoanang, Jobo le Davida ba ne ba halalela hobane ba ne ba tsamaea le Molimo. Buka ea Jobo e re bolella pale ea monna ea neng a rata Molimo ka tsela e phahameng haholo. Buka ea Dipesaleme e na le lithapelo le lipina tsa monna eo thabo ea hae e kholo e neng e le likamano tse tebileng le Molimo.

### **Batho Ba Halalelang Ba Ithabela ho Molimo**

Batho ba halalelang ba ithabela ho Molimo; ba fumana thabo ea bona e tebileng ho eena. Takatso e tsamaisang motho ea halalelang ke ea ho khahlisa Molimo.

Ho batho ba lekanyang khalalelo ka lethathamo la lintho "tseo u ka li etsang" kapa "tseo u sa lokelang ho li etsa," sena se bonahala e le taba e bobebe. Batho ba bangata ba nahana khalalelo e le mosebetsi, eseng ho natefelo. Mangolo oona a bontša hore bahalaleli ba ithabela ho Molimo. Jobo o ne a sa lakatse letho ha e se ho boela a e-ba le likamano le Molimo. Davida o ile a paka ka thabo ea ho ba le likamano tse tebileng le Molimo. O ne a fumana thabo ea hae e tebileng ka ho fetisisa ho Molimo.

#### **Thapelo Bakeng sa Khalalelo**

"Molimo oa ka,

Ke rapela hore ke u tsebe, ke u rate,  
ke tle ke thabele uena.

Kelello ea ka a e ke e thuisse melemo  
ea hau. Leleme la ka le bue ka eona.

Pelo ea ka e phelele melemo ea hau.

Moea oa ka o lapele eona.

Botho ba ka bohle bo ke bo lakatse  
melemo ea hau, ho fihlela ke kena  
thabong ea hau."

- Anselm of Canterbury

Tichere e ne e ruta toropong e 'ngoe moo metsi a teng a nooang a neng a sa bolokeha. Ka letsatsi le leng leo ho neng ho chesa haholo, o ile ka lebala ho nka sefe ea hae ea metsi. E ile eare ha a ea qetellong ea sehlopha, o ne a e-na le mohopolo o le mong feela, "Ke hloka metsi!" Haeba u ne u ka mofa ho khetha pakeng tsa 1000 Maloti le khalase ea metsi a hloekileng, o ne a tla khetha metsi. Ha a ne a nyoriloe haholo, metsi a ne a le bohlokoa ho feta lintho tsohle.

Bosiung boo, o ile a ipotsa, "Na ke nyoreloa Molimo ka tsela eo ke neng ke nyoretsoe metsi ka eona kajeno? Na o bohlokoa ho 'na ho feta lintho tsohle tsa lefatše?"

Davida o ne a nyoretsoe Molimo, (bala Dipesaleme 42:1-2). Davida o ile a bapisa tsela eo a lakatsang Molimo ka eona le lenyora la khama e mathang. Takatso e kholo ea khama e nyoriloeng ke ho fumana metsi; takatso e kholo ea motho ea halalelang ke ho ba le likamano tse tebileng le Molimo. Motho ea halalelang o lapela le ho nyoreloa ho loka (Mattheu 5:6).

Dipesaleme li bontša phapang ea thabo ea baetsalibe le thabo ea motho ea halalelang. Baetsalibe ba thabela nto; ba thabela mashano; ba rata ho rohaka (Dipesaleme 68:30;

Dipesaleme 62:4; Dipesaleme 109:17). Ka ho fapana le bao, bahalaleli bona ba fumana thabo e tletseng boteng ba Molimo; ba thabela leaho la ntlo ea hae, le ngalo moo khanya ea hae e leng teng (Dipesaleme 16:11; Dipesaleme 26:8). MoDipesaleme ha a bua ka maikemisetso o re, (bala Dipesaleme 73:25). Batho ba halalelang ba fumana thabo ea 'nete ho Molimo.

Dipesaleme ea 63 e bontša botle ba ho nahana ka Molimo. Davida o ne a baleha Saule. Bophelo ba hae bo ne bo le kotsing. Maemong ao, u ne u ka nahana ka'ng? Ke ne nka oela molekong oa ho nahana ka kotsi eo. Davida o re, (bala Dipesaleme 63:6). Esita le kahar'a kotsi, mehopolo ea Davida e ne e le ho Molimo. O ile a fumana monahano ona e le o mo khotsofatsang joalo ka moko le mafura (Dipesaleme 63:5-6).

Sebini sena sa Dipesaleme se ne se ithabela ho Molimo; o ne a rata Molimo. Batho ba halalelang ba ithabela ho Molimo. Ak'u nahane ka taba ena ha nakoana: Ke eng eo u e nyoreloang? Na u ithabela ho Molimo?

### **Batho ba Halalelang ba Ithabela Molaong oa Molimo**

Motho ea halalelang o ithabela molaong oa Molimo. Dipesaleme li bontša hore molao oa Molimo ha se tšoso ho bana ba hae; batho ba halalelang ba rata molao oa Molimo. Davida o itse, (bala Dipesaleme 40:8). O ne a sa thatafalloe ke ho mamela Molimo; o ne a fumana thabo ha a mamela Molimo.

Ho ithabela molaong oa Molimo ke taba e fumanoang LiDipesalemeng ka bophara. Molaetsa oa sehlooho oa Dipesaleme ea 119 ke Lentsoe la Molimo. Mamela thabo ea Davida:

► Bala Dipesaleme 119:18, Dipesaleme 119:72, Dipesaleme 119:77, Dipesaleme 119:97, le Dipesaleme 119:174.

### ***Molao oa Molimo o Senola Lerato la Molimo***

► Bala Dipesaleme 119:64. Molimo o bonahatsa lerato la hae ka molao oa hae, (bala Dipesaleme 119:124). Bahalaleli ba ithabela molaong oa Molimo hobane ba tseba hore molao oa Molimo o senola lerato la Molimo.

Moshe o ile a re ho mamela molao Molimo hoa Iseraele ho tla etsa hore lichaba tse ling li monele bohlale ba bona!

► Bala Deuteronomi 4:6-8. Molao oa Molimo ha o ka ba oa etsa Iseraele lekhoba; molao oa Molimo o ile oa hlohonolofatsa Iseraele.

Kajeno ho se ho tloaelehile ho utloa baruti ba ruta hore molao oa Molimo e ne e le moroalo o boima o ke keng oa khona ho mameloa. Bakreste ba bang ba re molao oa Molimo ke sepheo seo ho seng motho ea ka bang a se fihlela. Leha ho le joalo, Moshe, Davida esita le ba bang ba bahalaleli ba Testamenteng ea Khale ba ile ba ithabela molaong oa Molimo. Ba ne ba lumela hore ke thabo ho hlompha lebitso la Molimo le Sabatha ea Molimo. Ba ne ba sa batle ho khumamela melimo ea bohata.

Ba ne ba sa lumele hore ba ka thaba haholo ha ba sa hlomphe batsoali ba bona, ba bolaea, ba feba, kapa ba utsoa ba bile ba bua leshano. Ba ne ba tseba hore ho molemo ho khotsofala ho ena le ho lakatsa seo e leng sa oa heso. Molao oa Molimo e ne e se moroalo. Molimo o fane ka molao oa hae ka pelo e nang le lerato. Molao o ne o tataisa batho ba halalelang likamanong tsa bona le Molimo o halalelang. Molao oa Molimo e ne e le thabo ho sechaba sa hae.<sup>18</sup>

"Re nahana hore eng kapa eng e sa thabiseng ke mosebetsi oa rona! Na hoo ho tšoana le moea oa Morena oa rona? 'Ke **thabela** ho etsa thato ea hau, Molimo oa ka.'"  
- Oswald Chambers

### ***Molao oa Molimo o Senola Semelo sa Molimo***

Haeba re rata Molimo, re tla rata le molao oa hae. MoDipesaleme o boletse a re, (bala Dipesaleme 119:129). Davida ha a ka a re, "Molao oa hau o thata, empa ke tla leka ho o mamela." Che; Davida o re, "Molao oa Molimo oa makatsa!"

Batho ba halalelang ba ithabela molaong oa Molimo. MoDipesaleme o ne a rata molao oa Molimo hobane o ne a tseba hore molao o fetisa lethathamo la litaelo; molao oa Molimo o senola semelo sa Molimo.

#### ► Bala Dipesaleme 111 le 112.

Dipesaleme tsa 111 le 112 ke balekane 'moho. Bobeli li bontša bohlokoa ba molao oa Molimo bakeng sa motho ea halalelang. Dipesaleme ea 111 e hlalosa semelo sa Molimo; Molimo o lokile, o lereko, ebile o mohau.

Dipesaleme ea 112 e qala ka ho re, (bala hape Dipesaleme 112:1). Motho ea ithabelang melaong ea Molimo o tla hlohonolofala. Joang? O tla tšoana le Molimo. O tla ba lereko, mohau, le ho loka. Tsena ke tsona limelo tseo ho hlalositsoeng Molimo ka tsona Dipesalemeng ea 111. Ha re ntse re ithabela molaong oa Molimo, re eketsa ho tšoana le Molimo haholo.

Libuka tsa Molao li ruta hore motho ea halalelang o bonahatsa setšoantšo sa Molimo. Dipesaleme tsa 111 le 112 li bontša hore motho ea ithabelang molaong oa Molimo o fetohela setšoantšong sa Molimo. Motho ea ithabelang molaong oa Molimo o eketsa ho tšoana le Molimo haholo.

Haeba re feela re rata Molimo kannete, re tla boloka melao ea Molimo. Davida o ile a botsa, (bala Dipesaleme 24:3-4). Ho phela boteng ba Molimo ho hloka ho mamela molao oa Molimo. Libuka tsa Lithoko li bontša hore Molimo o hloka ho mameloa ke ba boelang hore ba mo rata.

Libuka tsa Lithoko li boetse li bontša hore Molimo o etsa hore motho a ka khona ho mo mamela ka botšepahi. Ena ke tšepiso ea Molimo ho ba mo ratang.

---

<sup>18</sup> E fetoletsoe ho tsoa ho Dennis F. Kinlaw, *This Day with the Master* (Grand Rapids: Zondervan, 2004).

► Bala kamoo pale ea Jobo e qalang kateng ho Jobo 1:1. Ha Elifase a qosa Jobo ka hore o entse sebe, Jobo o ile a arabela ka ho re, (bala Jobo 23:11-12).

Motho e mong a ka botsa a re, "Jobo a ka re ha ka a roba melao ea Molimo joang? Motho e mong le e mong o etsa sebe ka letsatsi le leng." Jobo oa araba o re, "Ke rata Molimo 'me ke ithabela ha ke mo mamela ka hloko." Jobo o ne a tsamaea ka likamano tse tebileng le Molimo. O ne a boloka "melao ea melomo ea hae." Na bophelo ba khalalelo boa khoneha? Jobo o araba ka ho re, "E." Jobo o ne a tseba hore Molimo o etsa hore ba mo ratang ba khone ho mo mamela ka botšepahi.

Bophelo ba khalalelo ha bo itšetlehe matleng a rona; bo fumanoa ha motho a itšetlehile ka Molimo ka matsatsi oohle. Jobo o ne a se na molato, eseng hobane a ne a e-na le boitšoarō ka tsela e mohlolo. O ne a se na molato hobane o ne a tsamaea haufi le Molimo ka likamano tse tebileng. Jobo o ne a utloisisa hore Molimo o hloka ho mameloa ka botšepahi **hape** Molimo o etsa hore ho mo mamela ka botšepahi ho khonahale.

'Nete ena e na le tšusumetso e kholo bophelong ba molumeli ba letsatsi le letsatsi. Molimo o hloka hore sechaba sa hae se halalele **hape** Molimo o halaletsa sechaba sa hae. Ke ka eena re halaletsoang le hona ho hloekisoa. Molimo o hloka khalalelo hape o fana ka khalalelo. Molimo o fana ka tsohle tseo lentsoe la hae le li hlokang.

### **Ba Ikhahlisetsang ho Molimo ba Fumana se Batloang ke Pelo tsa Bona**

Dipesaleme ea 37 e bontša litholoana tsa ho ikhahlisetsa ho Molimo, (bala Dipesaleme 37:4).

Babali ba bang ba nahana hore Dipesaleme ea 37:4 e ruta hore "Haeba ke sebeletsa Molimo, o tla mpha eng kapa eng eo ke e kopang. O tla nketsa hore ke be morui." Davida ha rute evangeli ea likatleho e reng, "Molimo o batla hore bana ba hae e be barui." Davida o bua ka ntho e leng ea bohlokoa le ho feta moo: "Haeba takatso ea hau e tebileng ka ho fetisisa e le Molimo, Molimo o tla fana ka eena ho uena." Haeba u lakatsa Molimo, u tla fumana Molimo.

Haeba u latela Molimo hore u fumane bophelo bo botle, maruo, le botumo, u tla soabisoa ke molaetsa oa Dipesaleme ea 37:4. Haeba u latela Molimo ka lebaka la litlhohonolofatso tse tšoarehang, u tla soaba ha u fumana hore moputso oa hau ke... Molimo!

Ho motho ea ichebileng boeena feela, ho fumana Molimo ha se moputso o moholo. Motho ea ichebileng boeena ha a lakatse Molimo. Empa ho Motho ea labalabelang Molimo, Dipesaleme ea 37:4 ke tšepiso e bokhabane. Ho motho ea halalelang, Molimo ke mpho e kholo ka ho fetisisa eo a ka e fumanang.

Ho ba mo lakatsang, Molimo o fana ka likamano tse tebileng le eena. Ho ikhahlisetsa ho Molimo ha se kamehla ho tlisang tlhohonolofatso ea chelete kapa ho lokoloha matšoenyehong. Batho ba ikhahlisetsang ho Molimo ba ka hlouoa ke lira. Hangata batho ba

halalelang ba utloisoa bohloko. Leha ho le joalo, Davida le Jobo ba ile ba fumana hore esita le nakong ea bohloko, Molimo o hlompha ba mo khahlisang.

Khalalelo ke ho rata Molimo. Batho ba halalelang ba khahlisa Molimo; Molimo eena o fana ka eena a sa khanane ho ba mo lapetseng ba bile ba mo nyoretsoe.

### **Khalalelo Libukeng tsa Li-Evangeli: Ho Rata Molimo**

► Bala ho Luka 10:25–26 potso eo moruti oa molao a ileng a e botsa Jesu, le kamoo Jesu a ileng a supisa Molaong oa Moshe karabong ea hae.

Eaba moruti eo o qotsa Deuteronomi 6:5 le Levitike 19:18. Litemana tsena ke kakaretso ea Molao, (bala Luka 10:27–28). Khalalelo ke lerato le phethehileng.

Likhoeli tse 'maloa kamor'a moo, Jesu o ne a le Jerusalema. Mongoli a mo botsa, (bala Mareka 12:28). Bafarisi ba ne ba e-na le lethathamo la melao e 613 e hlahang Testamenteng ea Khale. Ba ne ba atisa ho ngangisana ka hore na molao o bohlokoa haholo ke ofe. Jesu a araba, (bala Mareka 12:29–31).

Jesu o ile a hlalosa khalalelo e le ho rata Molimo le ho rata batho ba bang. Khalalelo ea 'nete e bonahatsoa ka lerato. Re hola khalalelong ha re ntse re hola leratong le tšoanang le la Krete. Ho halalela ke ho rata kamoo Jesu a ratileng kateng; Hona ke lerato le phethehileng.

Thutong ea 5, re bone hore lingoli tsa Testamente ea Khale li sebelisitse lentsoe *phetheho* ho hlalosa pelo e sa arohanang. Ho phetheha ke ho se be le ho arohana boinehelong ba rona ho Molimo. Lingoli tsa Testament e Ncha le tsona li sebelisa lentsoe *phetheho* ka mokhoa o tšoanang. Jesu o laetse balateli ba hae hore ba phethehe (Mattheu 5:48). Li-Evangeling, re bona hore ho phetheha ke ho ba le lerato le sa arohanang ho Molimo le ho ba habo rona. Ho phetheha ke ho rata ka pelo eohle. Lena ke lona lerato le phethehileng.

Molaetsa oa lerato le phethehileng o ne o se mocha li-Evangeling. Jesu o ne a hopotsa Iseraele hore esale Molimo a ba hloka ho ba le lerato ho Molimo le lerato ho ba habo rona. Deuteronomi 6 e bontša hore lerato ke motheo oa Molao. Ho itokafatsa ka molao ho se nang lerato. Jesu o ratile hore ho halalela ke ho rata Molimo. Ha re rata Molimo, re tla mo mamela. Khalalelo ke ho rata Molimo ka pelo eohle ea hau.

Ho rata Molimo ho fetisa boikutlo feela. John Wesley o hlalositse lerato ho Molimo tjena:

....ho ikhahlisetsa ho eena, ho ithabela thatong ea hae, ho laba-labela ho mo khahlisa kamehla, ho batla le ho fumana thabo ea rona ho eena, le ho nyoreloa bosiu le motšoare ho natefelo a ke eena ka ho felletseng.<sup>19</sup>

Ho rata Molimo ho fetola tsela eohle eo bophelo ba rona bo e nkang. Ho khahlisa Molimo ho fetoha cheseho ea rona e kholo le thabo ea rona e fetisisang. Jesu o re bontšitse se

---

<sup>19</sup> John Wesley, "On Love." E nkuoe ho <http://wesley.nnu.edu/john-wesley/the-sermons-of-john-wesley-1872-edition/sermon-139-on-love/> Tshitwe 21, 2019

boleloang ka ho rata Molimo ka ho phethehileng. Ho Jesu, re bona lerato le halalelang leo Molimo a le batlang ho Mokreste e mong le e mong.

### **Jesu o Bonahalitse Lerato le Phethehileng ho Molimo Bophelong ba Hae**

Jesu o bonahalitse lerato le phethehileng ho Ntate oa hae. Jesu o phetse a inehetse ka thabo thatong ea Ntate oa hae. Boinehelo bona e ne e se boinehelo ba lekhoba ba qobello; e ne e le boinehelo ba mora ba lerato.

### ***Meleko ea Jesu e Bontša Lerato la Hae ho Ntate***

Pele a qala mosebetsi oa hae sechabeng, Jesu o ile a tobana le meleko a le lefeelleng. Moleko o mong le o mong o ne o tobisitsoe hore o senye likamano pakeng tsa Ntate le Mora.

Satane o ile a leka Jesu hore a pote Ntate kathoko, a iphumanele bohobe. Satane o ile a leka Jesu hore a tlohele ho khumamela Molimo molemong oa hore a tle a fumane borena holim'a mebuso ea lefatše. Satane o ile a leka Jesu hore a leke Ntate ka ho itihela a le hlorong ea tempele (Luka 4:1-12). Moleko o mong le o mong e ne e le teko e lekang lerato la Jesu ho Ntate. Jesu o ile a arabela ka ho bontša tšepo ea hae e felletseng ho Ntate oa hae ea maholimong.

Ho e-na le hore a fetole majoe bohobe, Jesu o ile a qotsa ho Deuteronomama 8:3, (bala Luka 4:8). Moshe o ile a hopotsa Iseraele hore Molimo o ile a ba fepa ka manna lefeelleng; Iseraele e ne e ka tšepa lerato la Ntate oa bona hore o tla ba nea seo ba se hlokang. Ka tsela e tšoanang, Jesu o ile a tšepa hore Ntate oa hae o tla mo hlokomela ho seo a se hlokang ka lerato.

Ho e-na le ho khumamela Satane, Jesu o ile a qotsa temana ea Deuteronomama 6:13, (bala Luka 4:8). Kahobane a ne a rata Molimo ka ho phethehileng, Jesu o ile a hana moleko oa hore a ka khumamela Satane.

Ho e-na le hore a leke Ntate oa hae ka ho itihela a le hlorong ea tempele, Jesu o ile a qotsa temana ea Deuteronomama 6:16, (bala Luka 4:12). Kahobane o ne a rata Molimo ka ho phethehileng, Jesu o ile a hana ho leka tšepiso ea Ntate ea tšireletso.

### ***Ho Hloekisoa hoa Tempele ho Bontša Lerato la Jesu ho Ntate***

Le ha e sa ntse e le ngoana, Jesu o ne a rata ntlo ea Ntate oa hae (Luka 2:49). O ne a rata Ntate oa hae, ka hona o ne a rata le ntlo ea Ntate oa hae.

Ha Jesu a fumana barekisi ba balotsana ka tempeleng, o ile a bontša khalefo e lokileng.

► Bala Johanne 2:15.

Hobane'ng Jesu a ne a halefile? Ke hobane bahoebi bana ba ne ba hlompholla ntlo ea Ntate oa hae, (bala Johanne 2:16). Jesu o ne a rata Ntate oa hae 'me o ile a bontša khalefo ha ho hlompholloa ntlo ea Ntate.



Jesu o ne a ntse a e-na le boikutlo bo tloaelehileng ba botho. Ha a bona bobbe, o ne a halefa – empa ha a ka a etsa sebe (Mareka 3:5; Baefese 4:26). Khalalelo ha ea ka ea felisa boikutlo ba Jesu. Ho e-na le hoo, ka hobane a ne a halalela, boikutlo ba Jesu bo ne bo bonahatsa boikutlo ba Ntate oa hae. Jesu o ne a halefisoa ke lintho tse halefisang Ntate oa hae.

### ***Boikokobetso ba Jesu bo Bontša Lerato la Hae ho Ntate***

Molaetseng oa hae oa ho qetela, Jesu o ile a supa ho mamela hoo a bileng le hona e le bopaki ba lerato la hae ho Ntate, (bala Johanne 14:31). Jesu o bonahalitse lerato la hae ho Ntate ka ho inehela thatong ea Ntate oa hae ka ho rata hoa hae. Lena ke lerato le phethehileng.

Esita le tekong ea ho qetela, Jesu o ile a inehela thatong ea Ntate. Jesu o ne a tseba hore o tla feta qosong e soabisang 'me e tla lateloa ke bohloko bo ke keng ba lekanngoa ba sefapano. O ne a tla arohana le Ntate ka lebaka la sebe sa motho. O ile a rapela a re, (bala Luka 22:42). Jesu oa Nazareth a ile a tobana le teko e kholo ea ho qetela hore a tle a inehela ho Ntate.

Ha a le bothong, Jesu o ile a rapella ho lopolloa. Empa hona ha a le sebopehong sa botho, Jesu o ile a bontša boinehelo ba lerato ho Ntate, (bala hape Luka 22:42). Jesu o bonahalitse lerato le phethehileng ho Ntate ka boinehelo ba hae thatong ea Ntate.

Bophelo ba Jesu bo fana ka mohlala oa lerato le phethehileng. Ho halalela ke ho rata Molimo kamoo Jesu a neng a rata Ntate oa hae kateng.

### **Jesu o Rutile Balateli ba Hae ho Rata Molimo ka ho Phetheha**

Ho rata Molimo ke taba e fetang boikutlo feela. Ke boitlamo ba nako e telele bo fetolang kamoo re talimang tse tlang pele bophelong ba rona kateng. Jesu o hlalositse lerato tjena, (bala Luka 14:26-27).

Ho baruti ba BaYuda, lentsoe lena ho *hloea* le ne ho bolela "ho rata hanyane ho feta ntho e 'ngoe." Molateli oa Jesu o lokela ho rata Jesu ho feta batho ba bang bohle, esita le ho ipheta. Ke sona se boleloang ka ho rata Molimo – ho rata Molimo ho feta lintho tsohle.

Jesu o itse, (bala Luka 16:13). Lerato ke ntho e ikhethang. Haeba u rata Molimo, ke eena ea nkang sebaka sa pele holim'a lintho tsohle tsa bophelong.

Jesu o ile a ruta hore ho mamela Molimo ka botšepahi le ka ho rata ke pontšo ea lerato. Moputso oa ho mamela ka lerato ke hore u tla ba le likamano tse tebileng le Molimo, (bala Johanne 14:21).

Lilemo tse ngata kamor'a moo, Johanne o ile a hopola mantsoe ao a Jesu ha ba ne ba le phaposing e kaholimo. Johanne o ile a ngola a re, (bala 1 Johanne 2:5). Khalalelo ke lerato le phethehileng ho Molimo. Batho ba halalelang ba inehela thatong ea Molimo ka ntle le ho qobelloa. Batho ba halalelang ba latela mohlala oa Jesu oa ho mamela.

Ha re rata Molimo ka ho phethehileng, re ithabela ha re phetha thato ea hae. Ha re rata Molimo ka ho phethehileng, re nehela thato ea rona thatong ea Ntate kante ho ho qobelloa. Ha re rata Molimo ka ho phethehileng, re rapela le Davida re re, (bala Dipesaleme 139:23-24).

Lerato le phethehileng le re fa takatso e matla ea ho khahlisa Ntate oa rona ea maholimong. Re tla hana tsohle tse ka ferekenyang likamano tsa rona le eena. Khalalelo ke lerato le phethehileng ho Molimo.

### **Likamano tse Lipakeng tsa Jesu le Ntate ke Mohlala ho Mokreste**

► Bala Johanne 17.

Jesu o fane ka setšoantšo sa khalalelo Thapelong ea hae ea Boprsta bo Phahameng. Ho Johanne 17, Jesu o ile a ithapella, a rapella barutuo ba hae, a rapella le balumeli bohle. Jesu o bontšitse hore likamano tsa hae tse tebileng le Ntate, ke eona tsela eo le likamano tsa Bakreste le Ntate li lokelang ho ba ka eona.

#### ***Jesu o ile a Ithapella (John 17:1-5)***

Ha a se a talimane le lefu, Jesu o ile a ithabela hore o phethile mosebetsi oo Ntate a neng a mo neile oona hore a o phethe, (bala Johanne 17:4).

Hamorao thapelong ena, Jesu o itse, (bala Johanne 17:17-19).

(*Hagiazo*) ke lentsoe la Sekheriki le sebelisitsoeng hararo temaneng ena le bolelang “ho halaletsa”, “ho hloekisoa le ho arohangoa.” Ka hobane Jesu o ne a se na sebe, o ne a sa hloke ho halaletsoa. Thapelong ea hae, ho “halaletsa” ho bolela “ho hloekisa kapa ho khetha.” Jesu o ile a ikhetha hore a tsebe ho phethisa mosebetsi oo Ntate a neng a mo file oona hore a o etse. Jesu o ile a ikhalalletsa mosebetsi oo Ntate a mo fileng oona.

#### ***Jesu o ile a Rapella Barutuo ba Hae (Johanne 17:6-19)***

Jesu o ile a rapella hore barutuo ba halaletsoe ka 'nete. Joalo ka ha Jesu a ne a khethetsoe ho sebeletsa lefatšeng, o ile a rapella hore barutuo ba khetheloe ho sebeletsa. Likamano tsa Ntate le Mora e ne le mohlala sebakeng sa likamano lipakeng tsa barutuo le Ntate. Ha barutuo ba latela mohlala ona oa Jesu, ba ile ba khetheloa ho arolela lefatše 'nete ea hae.

#### ***Jesu o ile a Rapella Balumeli Bohle (Johanne 17:20-26)***

Joale eaba Jesu o rapella bohle ba tlang ho lumela ho eena. O ile a rapella hore Bakreste bohle ba kopanele bonngoe boo eena le Ntate ba neng ba natefelo ke bona. Jesu o ile a rapela hore ba tle ba phethehe bonngoeng. Lena ke lentsoe le tšoanang le le sebelisitsoeng ho, (bala Mattheu 5:48). Lentsoe lena le bontša ho fihleloa hoa sepheo. Sepheo ke lerato le phethehileng, lerato le bonoang ho Boraro ba Molimo.

Rona joalo ka balumeli re memiloe ho kopanela leratong lena la Molimo la Ntate le Mora. Jesu o rapetse, (bala Johanne 17:26). Lerato le lipakeng tsa Jesu le Ntate ke mohlala ho

molumeli e mong le e mong. Sena ke sona se boleloang ka ho halalela: ho ba le lerato le phethehileng le bontšitsoeng ke Jesu.

### **Khalalelo e Kenngoang Tšebetsong: Na Ke Rata Molimo?**

Khotso o ile a botsa moruti oa hae potso ena. "Moruti, ke batla ho halalela. Joalo ka Abrahama, ke batla ho ba motsoalle oa Molimo. Empa ho na le bothata. Ke etsa lintho tse ling tseo ke tsebang hore li fosahetse. Ke rata Molimo, empa joale ha ke batle ho mo mamela. Na nka ba motsoalle oa Molimo ha ke sa mo mamele?"

Jesu o arabile potso ena ea Khotso lilemong tse fetang 2,000 tse fetileng, (bala Johanne 14:15). Ha ho na moo Molimo a reng, "Ha le nthata, le ka tsoela pele ho phela ka sebe ka moo le ratang." Jesu o ile a tsoela pele a re, (bala Johanne 14:24).

Ba bang ba ipitsang Bakreste ba bua ka lerato la bona ho Molimo empa ba ntse ba iphelela sebeng kamoo ba ratang kateng. Ho batho bana, ho rata Molimo ke boikutlo feela. Ba bolela hore ba rata Molimo, empa hoo ha hoa fetola maphelo a bona. Leha ho le joalo, ho rata Molimo ke taba e fetisang boikutlo feela. Ho rata Molimo ho hloka ho mamela melao ea Molimo ka boikhethelo.

Selloane o ile a botsa moruti oa hae potso ena. "Moruti, ke batla ho halalela. Joalo ka Jobo ke batla ho tsamaea ka ho loka le ka bokhabane. Ke ela hloko ho boloka melao eohle. Empa ho na le bothata. Ha ke rate Molimo ka 'nete. Kea mo mamela empa hobane ke tšaba hore o tla halefa ha ke sa mo mamele. Ke mamela Molimo, empa ha ke mo rate. Na nka halalela empa ke sa rate Molimo?"

Jesu o arabile potso ena ea Selloane lilemong tse fetang 2,000 tse fetileng. Jesu o ile a fana ka molaetsa kerekeng ea Efese. O ile a ba babatsa ka mesebetsi ea bona e molemo le thuto ea bona ea 'nete. O boetse a ba rorisa ka lebaka la botšephehi ba bona le har'a lihloriso. Empa o ile a re, (bala Tshenolo 2:2-5). Jesu o ne a nka ho hloka lerato e le taba e tebileng haholo hoo a bileng a ba tšosa ka hore ke tla tlosa kandelare ea hau tulong ea eona haeba ba sa bake ba khutlisa lerato la bona la pele.

Bakreste ba bang ba lumela hore ba ka fumana lereko la Molimo ka baka la ho mamela, feela ho mamela ha bona ho sa tsoe lerato. Ba lumela hore khalalelo ke taba ea ho mamela le ho phethisa lethathamo la litaello. Ba lebetse hore motso oa khalalelo ke ho rata Molimo.

Lipelong tsa bona, bobeli Khotso le Selloane ba na le bothata boo sesosa sa bona se leng seng; bobeli ba bona ba ne ba sa rate Molimo. Ho se rate Molimo hoa Khotso ho bonoa leratong la lefatše. Ho rata lefatše ho re, "Ke rata lefatše lena ho feta kamoo ke ratang Molimo."

Ho se rate Molimo hoa Selloane ho bonahala ka ho itokafatsa ka molao. Ho itokafatsa ka molao ho bolela, "Ke mamela Molimo, empa eseng ka lebaka la lerato, empa ke hobane ke batla hore boikokobetso ba ka bo mphe mohau oa Molimo." Maemong ana ka bobeli – ho

rata lefatše le ho itokafatsa ka molao – ha ho le ho hong ho susumetsoang ke lerato la 'nete ho Molimo. Karabo ea bothata bona ka bobeli ke e le 'ngoe: ho rata Molimo.

### **Karabo Bakeng sa Ho Rata Lefatše: Ho Rata Molimo**

Ho boleloa'ng ka ho rata lefatše? Hangata, re hlalosa ho rata lefatše ka tsela ea ho apara, ka mefuta e itseng ea boithabiso, takatso ea ho amohelaha mahlong a batho, ho rata ho bonoa, kapa matšoa a mang a kantle. Tsena e ka ba **matšoa** a ho rata lefatše, empa ho rata lefatše hona ho tebile ho feta moo. Re ka botsa potso ena hore re hlalose ho rata lefatše: "Ke eng e ntlisetsang thabo ea 'nete?"

Ho rata lefatše ke ho thabisoa ke lefatše lena. Motho ea ratang lefatše o batla khotsofalo ea moshoelella ho tsoa lefatšeng. Ho rata lefatše ke ho bona lintho tsa lefatše e le tsona tsa bohlokoa ho feta lintho tsa Molimo.

Lota a bona lehoatata lohle la Jordane, hore le nosetsehile hohle. O ile a khetha phula eo e neng e shebahala hantle mahlong a hae (Genese 13:10-11). Lota o ne a rata lefatše; o ne a ithabela menateng ea lefatše lena.

Demase o ile a lahla tšebeletso ea hae hobane o ne a fumana thabo lefatšeng lena, a khetha ho ea motseng o atlehileng oa Thessalonika, (bala 2 Timothea 4:10). Demase e ne e le oa lefatše; o ne a rata lefatše lena.

Motho oa Molimo o fumana thabo ea hae e tebileng ka ho fetisisa ho Molimo. MoDipesaleme o ngotse a re, (bala Dipesaleme 73:25). MoDipesaleme enoa e ne e le motho oa Molimo; o ne a rata Molimo.

Karabo bakeng sa lerato la lefatše ha se lethathamo la litaello. Karabo bakeng sa lerato la lefatše ke ho rata Molimo. Lilemong tsa 1800, moruti ea tsoang Scotland ea bitsoang Thomas Chalmers, o ile a ruta molaetsa o buang ka "Matla a Lelekang a Lerato le Lecha." Moruti Chalmers o ile a re ho na le lintho tse peli tseo re lokelang ho li etsa haeba re batla ho emisa ho rata lefatše.

1. Ho na le ntho eo re lokelang ho e hlobola. Re lokela ho elelloa bofeela ba lefatše lena. Ha re ela hloko hore lintho tsa lefatše lena ha li na molemo, lerato la rona ho lefatše le tla fokola. Empa hoo le hona ho ntse ho sa lekana ho le hong feela.
2. Hona le ntho eo re lokelang ho e apara. Re lokela hore sebakeng se neng se nkuoe ke ho rata lefatše, re bee ho hong ho ratehang ka ho fetisang. Ha re ba le lerato ho Molimo, lerato la rona le lecha le leleka lerato la pele la lefatše.

Pheko bakeng sa ho rata lefatše lena ke ho rata Molimo. Jesu o ile a etsa setšoantšo sa mohoebi ea ileng a rekisa tsohle tseo a neng a e-na le tsona 'me a ithekela perela ea bohlokoa.

► Bala Mattheu 13:45-46.

Nahana ha u ne u ka re ho mohoebi enoa, "Ke masoabi ka se u hlahetseng! Ke taba e bohloko hore ebe u ile oa tlameha ho rekisa thepa e ngata hakaalo." Mohoebi eo o ne a tla u tšeha! O ne a tla re, "Ha se taba e bohloko! Ha ke intše sehlabelo; ke reka perela ea theko e holimo haholo. Lintho tseo ke li rekisitseng **ha se letho** ha li bapisoa le perela ena ea bohlokoa." Mohoebi enoa o fumane ntho e ncha eo a e ratang. O se a rata ntho ena 'me lerato la hae ho eona le lelekile lerato leo a neng a rata ntho e 'ngoe ka lona pele.

Karabo bakeng sa ho rata lefatše ke hore u rate Molimo. Ho rata Molimo ho tla leleka lerato la chelete, lerato la ho thoholetsoa, ho rata ho bonoa, esita le lerato la lintho tsohle tseo lefatše le li sebelisang ho tsoaseletsa bana ba Molimo. Batho ba halalelang ba rata Molimo – 'me lerato leo le lelekela lerato la lefatše lena ntle.

### **Karabo Bakeng sa ho Itokafatsa ka Molao: Ho rata Molimo<sup>20</sup>**

Ha re laba-labela ka 'nete ho phela bophelo ba khalalelo, re ka oela molekong oa ho etsa ho fetang seo e leng molao-motheo oa Bibe le oa ho phetheha hoa Mokreste, ra fetela boemong ba "ho lebella phetheho" ka ho itokafatsa ka molao.

Ho phetheha hoa Mokreste ho ba ea Bibe le ke ho ba le pelo e nang le lerato le sa arohanang ho Molimo. Ho phetheha hoa Mokreste ho bonahatsa pelo e batlang ho khahlisa Molimo linthong tsohle. Ho phetheha ho Mokreste ke ho ela hloko hore esita le pelo e nang le lerato la 'nete e sitoa ho ka re fihlisa boemong ba ho etsa lintho ka ho phethehileng. Re ba le moo re sitoang ho fihlela ka lebaka la bofokoli ba rona ba botho. Motho ea halalelang ha a na ho tlola molao oa Molimo ka morero, empa motho ea halalelang ka ho fetisisa o tla itšetleha ka mohau oa Molimo likarolong tseo ho tsona re haelloang ho fihlela boemo bo felletseng ba Molimo ba botle le bobe.

"Ho lebella phetheho," ka lehlakoreng le leng, ho nkhanela hore ke lebele tšebetso e phethehileng likarolong tsohle tsa bophelo. Ho lebella phetheho ho tla tsepamisa maikutlo ho 'na le tšebetso ea ka ke le motho ea halalelang ho e-na le ho tsepamisa maikutlo ho Jesu le matla a hae bophelong baka.

Ho lebella phetheho ho atisa ho khanela hore motho a etse boiteko ba hae ka ho itokafatsa ka molao e le ho reka mohau oa Molimo ka ho khetheha. Hangata e ba ho ahlola khalalelo ka lethathamo la lintho tseo ke sa li etseng (ha ke tsube, ha ke noe joala, ha ke apare ka tsela ea lefatše) kapa lethathamo la lintho tseo ke li etsang (ke itima lijo, kea rapela, kea nehela kerekeng.)

Joalo ka ha re bone Thutong ea 4, motho ea halalelang o tla **batla** ho arohana le lintho tsohle tse sa khahliseng Molimo. Ho re, "Ke rata Molimo ka pelo ea ka eohle" empa ebe re phela bophelo ba ho khotsofatsa litakatso tsa lefatše ho fosahetse.

---

<sup>20</sup> E fetoletsoe ho tsoa ho John N. Oswalt, *Called to Be Holy: A Biblical Perspective* (Nappanee: Evangel Publishing House, 1999), 186-188.

Leha ho le joalo, ha rea lokela ho lumella takatso ea rona ea ho batla pelo e khethehileng esita le bophelo bo khethehileng ho re khannela boemong boo re ka lumelang hore re ka lekanya likamano tsa rona le Molimo ka lethathamong la lintho tseo re "li etsang kapa tseo re sa li etseng." Pele ho lintho tsohle khalalelo ke taba ea pelo esita le ea likamano tsa lerato le Molimo. Likamano tseo ke tsona tse susumetsang takatso ea rona ea ho phela bophelo ba khalalelo le ba ho khetheha. Taba ena e ke ke ea sebetsa ka tsela e khahlanong le ena: ho khetheha hoa bophelo ka bo hona ha ho ke ke hoa susumetsa likamano tsa lerato le Molimo le ka mohla.

Re lokela ho batla ho phetheha joalo ka ha Molimo a re laela. Ha rea lokela ho batla ho reka mohau oa Molimo ka ho batla phetheho. Pelo e phethehileng ke pelo e ratang Molimo ka ho felletseng.

► Ke teko e feng e leng kholo kerekeng ea heno, ho rata lefatše kapa ho itokafatsa ka molao? Bolela hore ke ka tsela efe lerato le tebileng ho Molimo e ka bang karabo e nepahetseng ho mathata ana ka bobeli. Bolela likhato tse sebetsehang tse ka sebelisoang ho susumetsa lerato ho Molimo mahareng a batho bao u ba sebeletsang.

### **Senotlolo se Isang Bophelong ba Khalalelo: Ho Rata Molimo**

Re rata Molimo ha feela re mo mamela ka ho felletseng. Re mamela Molimo ka ho felletseng ha feela re mo rata ka 'nete. Re le bana ba Molimo, re ka etsa ho fetisang ho sebeletsa Molimo ka tšoanelo feela. Re ka fihlela boemong boo re thabisoang ke ho mo sebeletsa. Thabo ena e tla tlisoa feela ke lerato. Ngoana ea mamelang batsoali ba hae hobane feela a ba tšaba kapa hobane e le ka tšoanelo ha a fumane thabo ho mameleng hoo. Empa ngoana ea mamelang ka lebaka la lerato o fumana ho mamela e le monyaka.

Ha ngoana a monyane a ithuta ho letsa thomo, o lokela ho ikoetlisa kamehla. Qalong, ho ikoetlisa hona e ka ba ka tšoanelo ho e-na le ho ba monyaka. Empa haeba ngoana eo a batla ho ba hloahloa tsebong ea hae ea ho letsa thomo, o lokela ho fihlela boemong boo ho letsa e seng e le ho fetisang tšoanelo feela. Ho lokela ho fetohe monyaka. Tšoanelo ke ha ngoana a bapala thomo hobane 'm'e oa hae a re, "U tlameha ho ikoetlisa." Ho thabela ke ha ngoana a bapala thomo hobane a natefelo a ke ho e bapala. Seletsi sa 'nete sa thomo se fumana monyaka tšoanelong ea hae ea ho ikoetlisa.

Ke taba e tšoanang esita le bophelong ba semoea. Motho ea halalelang o bala Lentsoe la Molimo e le taao ea moea, empa hape o boetse o thabela Lentsoe la Molimo. Ho mamela Molimo ho fetoha tšoanelo **esita le** thabo bobeli ba tsona.

Ak'u nahane ka phapang ea ha re sebeletsa Molimo ka thabo, ho e-na le ka tšoanelo feela. Ho mamela hoo ho fetoha thabo, eseng mojaro. Thapelo, Lentsoe la Molimo, 'moho le taao ea bophelo ba Bokreste li fetoha monyaka. Sena ke sona se boleloang ka ho rata Molimo. Batho ba halalelang ba mamela ka thabo hobane ba rata Molimo.

George Croly, moprista oa kereke oa Chache oa lilemong tsa 1800, o ile a rapela hore Molimo a mo khoese leratong la lefatše 'me a mo tlatse ka cheseho e halalelang e hloekileng

sebakeng sa Molimo. Sefela sena se lutse e le thapelo e matla ea Mokreste e mong le e mong ea batlang ho rata Molimo ka lerato le phethehileng, le sa arohanang.

### **O Fumane Sephiri - John Sung**

John Sung e bile e mong oa baevangeli ba baholo ka ho fetisisa ba lilemong tsa 1900. E ne e le mora oa moruti e mong oa kereke ea Methodist seterekeng sa Fujian, naheng ea China, 'me e ile ea e-ba Mokreste a le lilemo li robong.

Sung o ile a ea America ho ea ithuta teng ha a le lilemo li leshome le metso e robong. E ne e le moithuti ea bohale haholo, 'me John Sung o ile a phethela mangolo a hae a Degree tsa bachelor's le master's, le PhD lefapheng la Chemistry kaofela ka lilemo tse tšeletseng feela. Ka bomalimabe, ka har'a eona nako ena, Sung o ne a se a qalile ho ba le pelaelo ka lithuto tsa Bibe le tseo a neng a ithutile tsona ho ntate oa hae.

Sung o ile a etsa qeto ea ho nka selemo kaofela seminaring ea Union Theological Seminary, a batla likarabo tsa lipotso tseo a neng a e-na le tsona. Ho e-na le ho mo thusa ho fumana likarabo, li-porofesa seminaring eo ea Union li ile tsa fokolisa tumelo ea Sung le ho feta.

Ka selemo sa 1926, John Sung o ile a ea tšebeletsong e 'ngoe sebakeng sa Harlem. Bosiung boo, moroetsana ea lilemo li leshome le metso e mehlano o ile a fana ka bopaki ba kamoo Molimo a fetotseng bophelo ba hae. Sung o ile a qala ho batla likamano le Molimo ka bocha. Li-porofesa tsa seminaring li ile tsa kholiseha hore John Sung o na le bothata ba kelello, 'me mopresidente oa sekolo, Henry Sloan Coffin, o ile a romela Sung sebakeng sa batho ba nang le mafu la kelello. Ka matsatsi a 193 ao a bileng sebakeng sa batho ba nang le mafu a kelello, John Sung o ile a bala Bible kaofela ka makhetlo a mashome a mane.

Kamor'a hore a lokolloe, John Sung o ile a khutlela naheng ea China. Dr. Sung o ne a tseba hore a ka fumana mosebetsi oa ho ruta University efe kapa efe ea boemo bo holimo naheng ea China. Leha ho le joalo, ha a le ka sekepeng Molimo o ile a bitsa Sung hore a nehele bophelo ba hae ka botebo ho Molimo. Ka letsatsi le leng, e le letšoa la boinehelo, hape e le tsela ea ho khaola maqhama oohle ho mosebetsi oa hae oa botichere, Dr. Sung o ile a bokella mangolo a hae le likhau tsa hae tsa thuto hammoho 'me a li lahlela ka leoatleng.

John Sung o ile a fihla naheng China eseng joalo ka "Dr. John Sung, porofesa ea Chemistry," empa e le "John Sung, Mohlanka oa Molimo." Sung o ile a qala ho ruta 'me o ile a ba le tšebeletso ea polelo ea evangeli e matla haholo. Batho ba tsebang nalane ba hakanya hore ke batho ba fetang likete tse lekholo ba ileng ba sokoloha tlas'a tšebeletso ea John Sung ho tloha ha a khutlela China ka 1927 ho fihlela a e-shoa ka 1944 a le lilemo li mashome a mane a motso o mong.

Bophelo ba John Sung bo bontša hore ho rata Molimo ho fetisa boikutlo feela. Ka lebaka la lerato la hae ho Molimo, Dr. Sung o ile a tela toro ea hae ea boemo bo holimo ba ho ruta university ea China, a amohela pitso ea Molimo ea ho ba moruti. Ka lebaka la lerato la hae ho Molimo, John Sung o ile a tela monate o tlišoang ke mosebetsi o tefo e ntle, 'me a phela bophelo bo bobebe feela, a ja lijo tsa batho ba boemo bo tlaase. Ka lebaka la lerato la hae

ho Molimo, John Sung o ne a nka lihora tse ngata letsatsi le letsatsi a rapela le ho ithuta Bible. Bophelo ba hae bo ne bo getoa ke lerato la hae ho Molimo, 'me ka lebaka la lerato leo, Molimo o ile a sebelisa John Sung ho isa likete-kete tsa batho ho Krete.

### **Boikhopotso ba Thuto ea 7**

- (1) Ho halalela ke ho rata Molimo.
- (2) Batho ba halalelang ba fumana thabo ea bona e fetisisang ho Molimo.
- (3) Ka lebaka la hobane ba tseba hore molao oa Molimo o bonahatsa lerato la ha hae, batho ba halalelang ba ithabela molaong oa Molimo.
- (4) Ba ithabelang ho Molimo ba fumana hore Molimo le eena o fana ke boena ho bona.
- (5) Jesu o fane ka mohlala o phethehileng oa se boleloang ka ho rata Molimo.
- (6) Karabo bakeng sa ho rata lefatše ke ho ba le lerato le tebileng ho Molimo.
- (7) Karabo bakeng sa ho itokafatsa ka molao ke ho ba le lerato le tebileng ho Molimo.



## **Kabelo ea Thuto ea 7**

(1) Ak'u nahane ha Mokreste e mocha a ka re ho uena, "Ke batla ho ba le likamano tse tebileng le Molimo. Ke rata Molimo, empa ho thata hore ke tsebe tsela eo nka holisang likamano tsa ka le eena. Ke sitoa ho bona Molimo ka mahlo, kahoo ho 'na o bonahala eka o hole. Ebe nka etsa joang?" Ngola lengolo la leqephe ho isa ho a mabeli, leo ka lona u thusang molumeli enoa ho utloisisa hore na a ka holisa likamano tsa hae le Molimo joang. Kenyeletsa likhato tse sebetsehang tseo a ka li nkang ho bala Mangolo, ho aha bophelo ba thapelo, le ho bolella ba bang ka tumelo ea hae. Kopanong ea lona ea sehlopha e latelang, moithuti ka mong a bale karabo ea hae 'me ba be le nako ea ho buisana ka likarabo tsa bona.

(2) Qala thuto e latelang ka ho pheta Mareka 12:29-31.

# Thuto ea 8

## Khalalelo ke Ho Rata Oa Heno

### Sepheo sa Thuto

Qetellong ea thuto ena, baithuti lokela ba be ba ka:

- (1) Elelloa hore Jesu ke mohlala oo re o etselitsoeng oa khalalelo.
- (2) Ananela se boleloang ka phetheho ho tsoa ka Bibeleng.
- (3) Itlama ho tsoela-pele ho hola leratong le phethehileng.
- (4) Nka likhato tse sebetsang ho bontša lerato ho Bakreste 'moho le ho bao e seng Bakreste.
- (5) Tseba Mattheu 5:43-48 ka hlooho.

### Jesu: Mohlala oa Lerato le Phethehileng

Ha Jesu a ntse a tsamaea a sika le Leoatle la Galelea, o ile a feta molekhetho. Kahobane a ne a sebeletsa Baroma, Levi o ne a qojoa ke baruti ba BaYuda. E ile ea e-ba taba e makatsang Levi ha Jesu a re ho eena, "Ntatele" (Mareka 2:14). Baruti ba bang ba ne ba bona molekhetho feela; empa Jesu eena o ne a bona motho ea lokeloang ke ho ratoa.

Hamorao, Jesu o ile a ba lijong le sehlopha sa balekhetho le baetsalibe ntlong ea Levi. Bafarisi ba ne ba maketse haholo. Jesu o ne a nkoa a halalela; joale hobaneng a ne a nka nako ea hae a e-na le baetsalibe? Jesu o ile a araba a re, (bala Mareka 2:17).

Mohlala oa Jesu o ile oa tšosa batho ba mehleng ea hae. Bafarisi ba ne nkoa ba halalela ho feta batho bohle mehleng ea Jesu. Ba ne ba re, "Rea halalela, kahoo ha re na kopano le baetsalibe." Empa Jesu eena o ile a re, "Kea halalela, kahoo ke tla nka nako ke e-na le baetsalibe."

#### Thapelo Bakeng sa Khalalelo

"Morena,

Nketse sesebelisoa sa khotso ea Hau.  
Moo lehloeo le leng teng, ke jale lerato;  
Moo bohloko bo leng teng, ke jale tšoarelo;  
Moo pelaelo e leng teng, ke jale tumelo;  
Moo ho nang le ho nyahama, ke jale tšepo;  
Moo lefifi le leng teng, ke jale leseli;  
Moo e leng masoabi, ke jale thabo.

Oho, Monghali ea Halalelang,  
'Nee hore ke se ke ka batla ho tšelisoa,  
Ke mpe ke be ea tšelisang ba bang;  
Ke se ke ka batla ho utloisisoa,  
ke be ea utloisisang;  
Ke se ke ba batla ho ratoa,  
ke be ea ratang.  
Hobane ke ha re fana  
moo le rona re fumanang;  
Ke ha re tšoarela moo re tšoareloang;  
Ke ha re e-shoa moo re tsoalloang  
bophelo bo sa feleng."

- St. Francis of Assisi

Jesu o ne a thabisoa ke ho ba le nako le baetsalibe. Ha ba ntse ba latela Jesu, baetsalibe ba ile ba fetoha ea e-ba bahalaleli. Jesu o ile a fana ka mohlala oa lerato le halalelang le fetolang lefatše. Khalalelo ke ho ba le lerato le phethehileng ho Molimo le lerato le phethehileng ho batho. Khalalelo ea 'nete e fetola lefatše leo re phelang ho lona.

## Khalalelo ea Lefatšeng la Mehlang ea Jesu

► Batho ba lefatšeng leo u phelang ho lona ba lekanya khalalelo joang? Tekanyo ee ea bona e ka bapisoa joang le tsela eo Jesu a phetseng ka eona?

Ke sefe seo batho ba neng ba phela lefatšeng la mehlang ea Jesu ba neng ba se lumela mabapi le khalalelo? Ba ne ba lebelletse bophelo bo joang ho batho ba halalelang? Ha re bona karabo ea potso ena, re tla utloisisa hore na hobaneng batho ba ne ba tšositsoe ke bophelo ba Jesu le thuto ea hae.<sup>21</sup>

### Seo Batho ba Lefatšeng la Mehlang ea Jesu ba Neng ba se Lumela

Batho ba mehlang ea Jesu ba ne ba tseba hore **Molimo ke Molimo ea halalelang**. Ba ne ba tseba hore **sechaba sa Molimo se lokela ho halalela**. Molimo o halalelang o lebelletse hore bana ba hae ba halalele. Molimo o ile a isa Iseraele kholehong hobane sechaba sa hae se ne se sa halalele.

Batho ba mehlang ea Jesu ba ne ba tseba hore **khalalelo e hloka ba khethehe linthong tsohle tse sa hloekang**. Khooletso ea Testamente ea Khale ea hore sechaba se halalele e ne e hloka hore sechaba sa Molimo se tlohe pela lintho tsohle tseo e leng sebe.

Batho ba mehlang ea Jesu ba ne ba tseba **tšepiso ea Molimo ea ho ngola selekane se secha lipelong tsa sechaba sa hae**. Molimo o ne a tšepisitse ho nea sechaba sa hae pelo e ncha le moea o mocha tse neng li tla ba thusa ho boloka selekane (Ezekiele 36:26). Batho ba mehlang ea Jesu ba ne ba lebeletse hore tšepiso ena e phethahatsoe.

Batho ba mehlang ea Jesu ba ne ba tseba hore **Molimo ea halalelang o boloka litšepiso tsa hae**. Molimo o tšepahalla selekane sa hae. Leha Iseraele e ne e robile selekane, Molimo eena o ile a lula a ntse a tšepahala. Sechaba sa BaYuda se ne se lumela hore khanya ea Molimo e tla khutlela ho Iseraele ha sechaba sa hae se ka sa halalela.

### Seo Batho ba Lefatše la Mehlang ea Jesu ba Neng ba se Phela

Balumeli ba mehlang ea Jesu ba ne ba lumela melaoana ena, empa ba ne ba hloleha ho phela ka tsela ea Molimo ea khalalelo ea 'nete. Lipelo tsa bona li ne li sa halalele.

**Baetapele ba baprista** ba ne ba beile tumelo ea bona tempeleng. Ba ne ba lumela hore ha lihlabelo li entsoe ka tsela e nepahetseng, khanya ea Molimo e tla khutla. Jesu o ile a arabela ka ho re, (bala Mattheu 9:13). Jesu o ile a bontša hore lihlabelo ha lia lekana e le tsona feela.

**Ba-Essene** ba ne ba lumela hore ba ka halalela ha ba ka phela kathoko ho batho ba bang. Ba ile ba tloha ba ikahela metse haufi le Leoatle la Letsoai. Jesu o ile a arabela ka ho re,

---

<sup>21</sup> Boholo ba litaba tsena li itšetlehile ka Kent Brower, *Holiness in the Gospels* (Kansas City: Beacon Hill Press, 2005).

(bala Luka 15:7 le Mattheu 9:13). Jesu o ile a ama balepera; a ja le baetsalibe. O ile a bontša hore re ka halalela re phela lefatšeng le silafetseng.

**Bafarisi** ba ne ba mamela lintlha tse bonahalang kante tsa Molao, empa ba ne ba iphapanyetsa ho se hloeke ho kahare. Jesu o ile a bapisa Bafarisi le , (bala Mattheu 23:27-28). Jesu o ile a bontša hore khalalelo e lokela ho qala ka pelong. U ka sitoa ho ba le matsoho a halalelang haeba pelo ea hao e sa halalele.

Batho bana ba mehleng ea Jesu ba ne ba shebane le ho etsa meetlo ho e-na le khalalelo ea 'nete. Ho e-na le hore ba rate Molimo, ba ne ba lekanya khalalelo ka melao. Ho e-na le hore ba rate lefatše leo ba neng ba phela ho lona, Ba-Iseraele ba ile ba haha marako ao ba koallang lefatše le tsietsing kante ka oona. Jesu o ile a bontša hore motho ea halalelang o rata Molimo hape o rata le oa habo.

### **Bophelo ba Jesu e ne e le Mohlala oa Khalalelo**

Ha re bala ka khalalelo Testamenteng ea Khale, re ka oela molekong oa hore re re, "Taba eo e utloahala e le taba e ntle ha e buuo, empa ha e se e kenngoa tšebetsong bophelong ba 'nete e tla shebahala joang?" Jesu o tlile ho re bontša tsela eo khalalelo e shebahalang kateng bophelong ba letsatsi le letsatsi. Luka o bontšitse lelokong la Jesu hore Jesu e ne e le mora oa Adama, mora oa Molimo (Luka 3:38). Ha re talima Jesu, mora oa Adama, re bona mohlala o phethehileng oa motho ea halalelang. Li-evangeli li bontša khalalelo e bileng bophelong ba Jesu oa Nazaretha.

### **Khalalelo ke Ho Tsamaea le Molimo**

Ho Jesu re bona mohlala oa likamano tsa motho le Molimo. Bophelo ba Jesu ba thapelo bo ne bo bontša likamano tsa hae tse tebileng le Ntate oa hae. Jesu o ne a atisa ho tloha bathong hore a be mong le Ntate oa hae. Le bothong ba hae, Jesu o ne a batla likamano tse tebileng le Ntate oa hae ea maholimong. O ne a tsamaea le Molimo.

Mohlomong setšoantšo se setle haholo sa likamano tsa Jesu le Ntate oa hae se bonoa ha a lla a le sefapanong. Ha a ne a jere libe tsa rona a le sefapanong, (bala Mattheu 27:46). Ha a ne a shoa sebakeng sa rona le ha a jara kotlo e neng e loketse libe tsa rona, Jesu o ne utloa Ntate oa hae a mo lahlile.

Jesu o bontšitse monate oa likamano tse tebileng le Molimo. Khalalelo eo Abrahamama le Davida ba neng a e khothalelitse e ile ea phethahatsoa bophelong ba Jesu oa Nazaretha.

### **Khalalelo ke Ho Khetheha**

Ho halalela ho bolela ho ikhetha sebeng le ho khetheloa Molimo. Ha a ne a le bothong, Jesu o ile a re etsetsa mohlala oa ho ikhetha sebeng. Ke ea sa kang a tseba sebe (2 Bakorinthe 5:21). Morutuo ea neng a bile haufi haholo le Jesu nakong ea mosebetsi oa hae lefatšeng o pakile hore, (bala 1 Johanne 3:5).

Ha a ne a le bothong, Jesu o ile a re etsetsa mohlala oa ho khetheloa Molimo. O phetse ka boinehelo ho Ntate a sa qobelloa. Jesu o pakile a re, (bala Johanne 8:29). Jesu o ne a ikhethile bakeng sa Ntate oa hae.

### **Khalalelo ke Setšoantšo sa Molimo**

Ho halalela ke ho bonahatsa setšoantšo sa Molimo. Ha re talima Jesu, re bona setšoantšo se phethehileng sa Ntate, (bala Johanne 1:14). Filipi o ile a kopa Jesu hore a bontše Ntate ho barutuo. Jesu o ile a araba a re, (bala Johanne 14:8-9). Ho Jesu re bona setšoantšo se phethehileng sa Molimo.

### **Khalalelo ke Pelo e sa Arohanang**

Motho ea halalelang o na le pelo e sa arohanang; o inehetse ka ho felletseng ho Molimo. Serapeng sa Gethesemane, Jesu o ile a rapela a re, (bala Luka 22:42). Jesu o ne a nehelane ka pelo ea hae ka ho felletseng thatong ea Ntate. Jesu o bontšitse hore na ho bolela'ng ho ba le pelo e sa arohanang.

### **Khalalelo ke Ho Loka**

Khalalelo ea 'nete e hloka boitšoaro bo lokileng. Motho ea halalelang o bonahala ka ho ba le toka, mohau le boikokobetso. Bophelong ba Jesu, re bona mohlala o phethehileng oa ho loka.

Setšoantšo sa ho qetela sa **toka** se bonoa ha Jesu a ne a jere khalefo e lokileng ea Molimo sefapanong. Jesu ha a ka a latola toka ea kotlo ea libe; ho e-na le hoo, o ile a lefa kotlo eo molemong oa rona.

Jesu o bonahalitse **mohau** ka tsela eo a ileng a tšoara balepera, basali, bana, esita le bafumanehi. O ile a bontša mohau ho mosali ea neng a fumanoe a feba, ho Sakia, le ho lesholu le neng le thakhisitsoe sefapanong. Ka makhetlo-khetlo, Jesu o ile a bontša mohau ho bohle ba neng ba lahlue ke batho ba bang.

Lilemong tse fetang makholo a supileng pele ho tsoalo ea Jesu, Isaia o ile a hlalosa **boikokobetso** ba Messia, (bala Isaia 53:2). Isaia o ile a profeta a re, (bala Isaia 42:2-3).

Jesu o ile a bontša thomo ea hae ea toka, mohau, le boikokobetso molaetseng oa hae oa pele phatlalatsa. Ha a le sinagogeng Nazaretha, o ile a bala boprofeta ba Isaia bo buang ka Mohlanka ea tlang:

► Bala Luka 4:18-19, (ho tsoa ho Isaia 61:1-2).

Isaia o ile a bona esale pele selemo sa Morena se molemo, nako ea toka ho batho bohle. Jesu o ile a phatlalatsa hore o tlile ho tla phethahatsa tšepiso eo, (bala Luka 4:21). Bosebeletsi ba Jesu lefatšeng e bile mohlala oa ho loka.

## **Khalalelo ho Hlaha ho Li-Evangeli: Ho Rata oa Heno**

Thutong ea 7, re bone hore ho halalela ke ho rata Molimo ka lerato le sa arohanang. Ho halalela ho boetse ke ho rata ba habo rona. Jesu o ile a fana ka melao ena e 'meli, "Rata Molimo" le "Rata oa heno" e le kakaretso ea molao oohle (Mareka 12:29-31).

Lerato la 'nete ho Molimo le tla lula kamehla le hlahisa lerato ho batho ba bang. Ha re rata Molimo, re tla rata le batho ba ratoang ke Molimo. Khalalelo ha se ntho e emang e le 'ngoe; bophelo ba khalalelo bo phelo ka ho ba le likamano le ba habo rona. Khalalelo ke lerato le phethehileng ho Molimo **le** lerato le phethehileng ho batho ba bang. Lerato le phethehileng ho Molimo le sitoa ho aroloa ho lerato ho ba habo rona.

Jesu o ile a e beha tjena, (bala Mattheu 25:35-40). Johanne o ile a amahanya lerato la rona ho Molimo le lerato la rona ho ba habo rona, (bala 1 Johanne 4:20-21).

Motsong oa sona, sebe ke boithati. Ka serapeng, Satane o ile a tšepisa Eva hore a ka khona ho ba joalo ka Molimo (Genese 3:5). Babeli, motho o ne a ikemiselitse ho iketsetsa lebitso (Genese 11:4). Khahlanong le thato ea Molimo, Baiseraele ba ile ba ikopela morena e le hore ba tle ba tšoane le lichaba tse ling tsohle (1 Samuele 8:5). Boemong bo bong le bo bong ho ana, sebe e bile boithati.

Haeba sebe ke boithati, joale khalalelo (eleng ho fapaneng le sebe) e tla kenyeletsa ho rata kapa ho nahanela ba bang. Haeba sebe se etsa hore re ipatlele molemo bakeng sa rona, joale khalalelo ke ho batla molemo bakeng sa ba bang. Haeba sebe ke boithati, khalalelo eona ke ho rata ba bang. Ho halalela ke ho rata ba bang. Molao o phetoang hangata Testamenteng e Ncha ke molao oa ho rata. O phetuo e bonyane ka makhetlo a mashome a mahlano a metso e mehlano.

Jesu o ratile hore khalalelo ke kutloelo bohloko e nang le lerato ho batho ba bang. Jesu o bontšitse hore motho ea halalelang o tla hulela baetsalibe ho Molimo ea halalelang ka bophelo ba lerato le halalelang.

Ho mamela taelo ea Molimo e reng, (bala Levitike 19:2), ho re hloka ho re re rate ba habo rona. Jesu o bontšitse lerato le phethehileng ho batho ba bang 'me o ratile balateli ba hae ho rata batho ba bang ka ho phethehileng.

### **Jesu o Bontšitse Lerato le Phethehileng ho Batho ba Bang**

Qalong ea mesebetsi oa Jesu, Johanne Mokolobetsi o ile a roma balateli ba hae ho mo botsa hore, (bala Luka 7:19). Mofarisi o ne a ka labella Jesu ho araba ka ho supa bophelo ba hae ba ho khetheha esita le lithuto tsa hae tsa bohlale. Ho e-na le hoo, Jesu o ile supa bosebetsi ba hae ba lerato ho batho ba bang, (bala Luka 7:22).

Ha re hlahloba mehlolo e entsoeng ke Jesu re bona pontšo ea lerato la hae le phethehileng ho batho ba bang. Molaoli oa lekholo oa Roma o ile a kopa Jesu ho folisa mohlanka oa hae. Baruti ba bangata ba Ba-Yuda ba ne ba ne ba ke keng ba amohela kopo ena ea monna eo.

Jesu ha a ka a folisa mohlanka eo oa molaoli enoa feela, empa o ile a ba a rorisa tumelo ea molichaba enoa (Mattheu 8:5-13).

Esita le ha mehlolo ea hae e ne e tliša bohanyetsi, Jesu o ne a etsa Diketso tsa hae ka lerato. Ha mosali oa seritsa a tla ho eena, o ile a mo folisa ka letsatsi la Sabatha. Leha ho ne ho se letho le hanelang pholiso eo ka molaong, Bafarisi ba ne ba sa lumelle ho folisa ka letsatsi la Sabatha. Ka lebaka la lerato, Jesu o ile a ipea kotsing ea khalefo ea baetapele bana ba bolumeli (Luka 13:10-21).

Jesu o ile a bontša lerato esita le ho batho ba neng ba le mahlomoleng ka lebaka la Diketso tsa bona tsa boetsalibe. Jesu o ile a bontša lerato ho mosali oa Mosamaria ea neng a phela ka bohloka (Johanne 4). O ile a sireletsa mosali ea neng a tšoeroe a feba. Jesu ha a ka a latola sebe sa hae; o ile a mo laela hore, (bala Johanne 8:11). Jesu o ne a tseba hore khalalelo e hloka ho arohana le sebe, empa hape o ne a tseba hore lerato le phethehileng le matla a fetisang matla a sebe.

Lihora feela pele ho lefu la hae, Jesu o ile a bontša lerato ho batho ba bang. Melkuse, mohlanka oa moprista e moholo, o ne a felehelitse mong'a hae ho ea tšoara Jesu serapeng sa Gethesemane. Ha Simone Petrose a khaola tsebe ea Melkuse, Jesu o ile a khalema Petrose 'me eaba o folisa Melkuse (Mattheu 26:50-52). Jesu o bontšitse se boleloang ka hore re rate lira tsa rona.

Ha Jesu a le sefapanong, sesinyi se seng se ile sa ikopela mohau. Sesinyi sena se ne se lokeloa ke lefu; e ne e le setlokothebe se kotsi. Jesu eo eena a neng a sa utloisoe bohloko ka lebaka la libe tseo e leng tsa hae, empa e le ka lebaka la libe tsa batho ba bang, o ile a tšepisa sesinyi sena se neng se e-shoa mohau (Luka 23:39-43). Khahlanong le bohloko boo eena a neng a le ho bona, Jesu o ile a rata monna enoa ea neng a bonahala a sa ratehe.

### **Jesu o Rutile Balateli ba Hae Ho Rata Batho ba Bang ka Ho Phethehileng**

Jesu o ile a ruta balateli ba hae seo ho rata ka ho phethehileng ho se bolelang. Jesu o ile a bontša hore lerato le phethehileng ke lona tekanyo ea ho phela 'musong oa maholimo.

### ***Thutong e Thabeng, Jesu o Ile a Ruta ka Lerato le Phethehileng (Mattheu 5-7)***

Taelo e reng, (bala Mattueu 5:48), ke khubu ea Thuto ea Thabeng. Taelo ena e latela mehlala e mengata ea lerato ho batho ba bang. Ho phethahala joalo ka ha Ntat'a rona ea maholimong a phethehile ke ho phela bophelo ba lerato le sa arohanang ha le ea le lebile batho ba bang.

Ha e ne eba khalalelo e sa bolele ho fetisang ho arohana le sebe se kantle feela, Bafarisi e ne e tla ba ke bahalaleli ba fetisang batho bohle. Ba ne ba bitsoa "Ba Khethehileng." Jesu o ne a hloka ho fetisang ho khetheha hoa Bafarisi feela, (bala Mattheu 5:20).

Ka ho fapana le ho loka hoa bohata hoa Bafarisi, Jesu o bontšitse hore baahi ba 'muso oa hae ke batho ba lerato. Boitšoarō ba kantle bo sa nyallaneng le khalalelo e kahare ke boikaketsi, ha se khalalelo. Re lokela ho ba le lipelo tse halalelang le matsoho a halalelang.

Motho ea nang le lerato le phethehileng o etsa ho feta ho mamela taelo ea hore a se ke a bolaea, (bala Mattheu 5:21-26). Lerato le batla poelano le ngoan'eno ea u sitetsoeng. Monna ea nang le lerato le phethehileng o etsa ho feta ho mamela taelo ea hore a se ke a feba, (bala Mattheu 5:27-28). Lerato le hana esita le ho talima mosali ka sepheo sa ho khotsofatsa litakatso tse ikemetseng.

Monna ea nang le lerato ha a ipatlele lebaka leo a ka hlalang ka lona. O rata mosali oa hae ho lekana hore a batle lintho tse molemo ka ho fetisisa bakeng sa hae. Motho ea nang le lerato le phethehileng o bua 'nete e otlolohileng a sa itšiele monyetla oo a tla tsoa ka oona kamoso. Motho ea nang le lerato le phethahetseng ha a batle ho iphetetsa.

Jesu o ile a phethela ka ho re, (bala Mattheu 5:44-45).

Ho rata ka tsela eo Molimo a ratang ka eona ke ha o rata sera sa hau. Jesu ha a ka a theola tekanyo ea se hlokoang ho halalela; ho e-na le hoo, o ile a e **phahamisa**. Ho loka ha lona ho lokela ho fetise ho loka ho bonoang kantle hoa Bafarisi le bangoli (Mattheu 5:20). Ho e-na le ho amohela ho loka hoa kantle feela, Molimo o fetola pelo. Ha u rata joalo ka ha Molimo a rata, u phethehile, joalo ka ha Ntate oa hao ea maholimong a phethehile.

### ***Jesu o Rutile Lerato le Phethehileng ka Setšoantšo sa Mosamaria ea Molemo (Luka 10:25-37)***

Bala puisano pakeng tsa moruti oa molao le Jesu ho Luka 10:25–37. Jesu o ile a araba ka potso, a tseba hore moruti eo o ne a tseba karabo e nepahetseng.

Moruti enoa oa molao o ne a sa batle ho tobana le seo lerato le se hlokanang. O ne a batla lebaka la boitšireletso hore a tle a qobe ho kenya thuto ea hae tšebetsong, (bala Luka 10:29). Jesu o ile a mo araba ka ho etsa setšoantšo sa Mosamaria ea molemo.

Jesu o ile a ruta hore ke boikarabello ba rona ho rata ba habo rona eseng ka lipolelo feela, empa le ka Diketso. Joalo ka Mosamaria ea molemo, Mokreste ea ratang ka ho phethehileng o batla monyetla oa ho sebeletsa ba bang – esita le bao e leng lira. Haeba re rata ba habo rona, re tla batla menyetla ea ho sebeletsa. Jakobo o ile a botsa a re, (bala Jakobo 2:15-16).

Lerato le phethehileng le bonoa Diketsong, eseng lipolelong feela. Batho ba halalelang ba rata ka tsela eo Jesu a ratileng ka eona. Ho rata ka ho phethehileng ke ho rata ka tsela ea ho intša sehlabelo.

### ***Jesu o Rutile Lerato le Phethehileng ka Ho Hlatsoa Barutua ha Hae Maoto (Johanne 13:1-20)***

Bosiu boo a ileng a tšoaroa ka bona, Jesu o ile a ruta e ngoe ea lithuto tsa hae tse kholo ka ho fetisisa ka lerato le phethehileng. Ha ba ntse ba e-ja lijo tsa Paseka, barutua ba ile ba qala ho etsa khang ka hore na ke mang ho bona ea moholo.



Jesu o ile a arabela ka ho re, (bala Luka 22:27). Eaba o nka lesela a qala ho hlatsoa maoto a barutuo ba hae, mosebetsi oa mohlanka. Jesu o ile a khumama 'me a hlatsoa maoto a motho e mong le e mong ea neng a le teng phaposing eo – esita le maoto a Yudase.

Ha a qetile, Jesu o ile a ba botsa hore na ba utloisisa seo a ba etsetseng sona, (bala Johanne 13:12). O ne a batla ho ruta barutuo ba ratang maemo thuto ea bohlokoa, (bala Johanne 13:13-15).

Lihoreng tsa ho qetela a e-na le barutuo ba hae, Jesu o ile a ruta hore lerato le phethehileng le na le boikokobetso. Lerato le phethehileng ha le ipatelele maemo; lerato le phethehileng le batla menyetla ea ho sebeletsa. Khalalelo ke lerato le phethehileng.

### **Bophelo ba Lerato le Phethehileng**

Jesu o itse, (bala Mattheu 5:48). Batho ba bangata ba re, "Ha ho motho ea phethehileng!" Leha ho le joalo, re sitoa ho iphapanyetsa taelo ena ea Jesu e reng, "Phethehang." O ne a bolela eng? Na hoa khoneha hore **Mokreste feela** a ka mamela molao oo oa Jesu?

### **Ho Boleloa'ng ka ho "Phetheha"?**

Ho na le lintho tse peli tse tla re thusa ho utloisisa seo Jesu a se bolelang. Ea pele, talima **tlhaloso** ea lentsoe la Se-Gerike le fetoletsoeng ho "phetheho" ho Mattheu 5:48. **Teleios** e bolela "ho phethahala." *Teleios* e tsoa ho lereho le bolelang "sepheo" kapa "morero." Ho phetheha ho bolela ho fihlela sepheo.

Testamente ea Khale e bontša hore motho ea phethehileng o na le pelo e sa arohanang bakeng sa Molimo. Mohopolo ona o ntse o ntšetsoa-pele le Testamenteng e Ncha. Sepheo sa Molimo ka sechaba sa hae ke hore ba be le "lerato le phethehileng," lerato le tsoang pelong e sa arohanang. Na re ka khona ho fihlela tšebetso e phethehileng ka matla a rona? Che. Na hoa khonahala ho ba le lerato le phethehileng, le sa arohanang, bakeng sa Molimo? Karabo ea Jesu ke, "E."

Ea bobeli, talima **maemo a akaretsang** ao temana ea Mattheu 5:48 e hlahang tlasa oona. Litemana tse tlang pele le tse tlang kamorao ho Mattheu 5:48 li bontša hore ho phetheha ke ho rata Molimo esita le ba habo rona ka lerato le phethehileng. Taelo ena ea Jesu ke kakaretso ea bophelo ba lerato ho Molimo esita le ho ba habo rona.

Taelo ena e reng e latela mehlala ea ho ba le lerato ho ba habo rona e hlahang ho Mattheu 5:21-47. Ho e-na le ho bolaea, ho feba, ho hlala, ho roba likano, le boiphetetso, batho ba halalelang ba phela ka lerato. Ea ho qetela litaelong tsena ke e reng, (bala Mattheu 5:44). Batho ba halalelang ba rata batho ba batlang ho ba etsa hampe. Ho phetheha ho bolela ho rata ka tsela eo Molimo a ratang ka eona.

Hang kamor'a ho fana ka taelo ena, Jesu o ile a etsa mohlala oa hore na ho bolela eng ho rata Molimo ka 'nete ho Mattheu 6:1-18. Baikaketsi ba fana ho bafumanehi hore ba fumane tlotla ho tsoa ho batho; ba ratang Molimo ka ho phethehileng ba fana hore ba bonoe ke Ntat'a lona ea bonang sephiring.

► Bala tlhaloso ea Jesu ka baikaketsi ho Mattheu 6:5. Ea ratang Molimo ka ho phethehileng o kena phaposing ea hae, 'me ha a koetse monyako oa hae, o rapela Ntat'ae ea bonang sephiring. Baikaketsi ba itima lijo ho khahlisa batho; ba sosobanya lifahleho, ba itšenya tšobotsi hore ba tle ba bonahale ho batho hobane ba itima lijo. Ba ratang Molimo ka ho phethehileng ba batla ho bonoa feela ke Ntat'a bona ea sephiring.

Paulosi o ile a laela balumeli ba Kolose ho phela bophelo ba khalalelo. O ile a hlalosa bophelo ba lerato le tšoarelo, (bala BaKolose 3:12-13).

Sehlohlolo sa lethathamo lena ke lerato, (bala BaKolose 3:14). Ho phetheha ke ho apara lerato. Ha Jesu a re "phethehang," o ne a re laela ho apara lerato ho Molimo esita le ho ba habo rona. Lerato le phethehileng ke lerato le tsoang pelong e sa arohanang.

### **Lerato le Phethehileng ke ha le Phethehile Joang?**

Tšebelisong e tloaelehileng, re na le ho sebelisa lentsoe *phetheho* ka kutloisiso ea lona e felletseng. Re sebelisa *phetheho* ho bolela ntho eo ho ke keng ho khonahala hore e ka ntlafatsoa ho feta kapa hona ho ekeletsoa. Haeba re nahana *ho phetheha* e le boemo bo felletseng ba katleho, re tla lekanya khalalelo ka mesebetsi ea rona. Joalo ka Bafarisi, re tla talima khalalelo joalo ka molangoana oo re lekanyang ka oona.

Batho ba bangata ba atamela bophelo ba khalalelo ka tsela ena. Joalo ka Bafarisi, ba na le mabokose ao ba tšoeang ho ona. Haeba mabokose ao a tšoaue kaofela, e tla ba ba phethehile.

- "Na ke boloka melao?"
- "Na ke apara liphahlo tse nepahetseng?"
- "Na ke bua mantsoe a nepahetseng?"


Ka Bibeleng, lentsoe *phetheho* ha e bolele phetheho e feletseng kapa e phethahetseng ka ho sa feleng. Ha e thibele ho tsoela-pele ho hola. Jobo o ne a phethehile (Jobo 1:1), empa o ile a hola likamanong tsa hae le Molimo ka lebaka la lintho tseo a ileng a li mamella ha a feta hara tsona.

Ka Bibeleng, ho phetheha ho bolela ho phetheha ka botlalo mokhahlelong ka mong oa kholo. Mongoli oa buka ea BaHebheru o ngoletse Bakreste ba neng ba sa phetheha mokhahlelong oa bona oa kholo. Ba ne ba hlolehile ho fihlela kholo ea semoea.

► Bala BaHebheru 5:12-14.

Mongoli oa BaHebheru ha a fane ka maikutlo a hore balumeli ba holileng (kapa ba phethehileng) ha ba sa hloka lijo tsa moea! O ba khanela kholong, **ele hore ba tle ba je lijo tsa moea tse loketseng mokhahlelo oa kholo oo ba leng ho oona.** Ho phetheha ke ho ba le kholo e lokelang mokhahlelo oo re leng ho oona oa tseo re li fihletseng Bokresteng. Ho phetheha ho bolela hore re felletse hape re phethehile; re seo Molimo a rerileng hore re be sona.

Ho e-na le ho ba molangoana oo ho lekanngoang ka oona, setšoantšo seo Bibe e fanang ka sona sa phetheho ke selikalikoe. Selikalikoe se phethehile; ha ho kamoo se ka etsoang hore se phethehe ho feta kamoo se leng kateng. Leha ho le joalo, selikalikoe **se ka** holisoa; selikalikoe se phethehileng se ka hola 'me sa atoloha. Se phethehile, empa se ntse se tsoelapele ho hola.



Motho ea halalelang o tlatsitsoe ka lerato le phethehileng ho Molimo le ho ba habo. Ha re ntse re hola, bokhoni ba rona ba ho rata le bona boa eketseha. Selikalikoe sea atoloha. Ha re ntse re hola, lerato la rona le ata ka ho eketsehileng, ka tsebo le ka temoho, (bala BaFilipi 1:9). Mokhahlelong o mong le o mong oa kholo, Molimo o re, "Motho enoa o nthata ka lerato le phethehileng. Oa halalela."

Motho ea tsamaileng le Molimo ka lilemo tse mashome a mane a ka utloisisa haholo tsela ea ho bontša lerato ho oa habo ho feta motho ea tsamaileng le Molimo ka selemo se le seng feela. Empa ka bobeli ba ka khona ho rata ba hobo bona ka pelo e sa arohanang. Ka bobeli ba ka tseba ho bontša lerato le phethehileng.

Ha ngoana ea lilemo li hlano a taka setšoantšo sa ntat'ae, ntate o tla re, "Kea leboha! Se phethehile!" Ha a bolele hore boiphihlelo boo ba morali oa hae bo ke keng ba ntlafatsoa ho feta. Ha a se a le lilemo li leshome le metso e mehlano, ngoana enoa o tla taka setšoantšo se setle ho feta sa pele.

"Se phethehile!" ke ho bolela hore, "Setšoantšo sena se tsoa pelong e tletseng ka lerato. Se lokile bakeng sa mokhahlelo oa kholo oo morali eo a leng ho oona."

Lerato le phethehileng ha se tekanyetso ea tšebetso. Lerato le phethehileng ke lerato le sa arohanang ho Molimo le ho batho ba bang. Lerato le phethehileng ke ho latela mohlala oa Jesu, eena ea tlileng ho tla bonahatsa lerato le phethehileng bophelong ba letsatsi le letsatsi.

### **Na Lerato Le Phethehileng Lea Khoneha Ho Balumeli Ba Tloaelehileng Feel?**

Ma-Puritan a lilemong tsa bo 1600 a ile a bolela molaoana oa bohlokoa bakeng sa ho hlalosa Bibe. Ba ile ba re litaelo tsa Bibe ke "litšepiso tse koahetsoeng." Ma-Puritan ana a ne a bolela hore taelo ea Bibe ke *tšepiso e ipatileng*. Taelo ea Bibe e bolela tšepiso ea Bibe. Ha Molimo a laela taba e itseng, o bile o tla etsa le hore ho e mamela ho khonahale. Seo Molimo a se hlokang ho bana ba hae, ke seo a tla se etsa ho bana ba hae.

Ak'u nahane ka ntate oa lefatšeng mona ea ka laelang mora oa hae taba e sa khoneheng. "Mor'a ka, haeba u batla ho nkahlisa, u tla lokela ho matha 'maele ka metsotso e 'meli." Ka nako e telele, mohlomong mora eo a ka leka ho fihlela taelo ena, empa tebello ena ea ntat'ae ha se e ka fihlelehang. Qetellong mora eo o tla nyahama kapa hona ho utloa bohloko. Na ntate eo ke ntate ea lokileng? Che.

Molimo ke Ntate ea lokileng. Ha a ferekanye bana ba hae ka ho ba laela lintho tse sa khonahaleng. Ha Morena Jesu a re laela a re phethehang, joalo ka ha Ntat'a rona ea maholimong a phethehile, o re nea le matla a ho phetha taelo ea hae.

Thuto ea Thabeng e bontša bophelo bo pheloang 'musong oa Molimo. Hona ha se molao o mocha o tlang bokhoba ho feta molao oa khale. Ha se pokello ea mehopolo e sa fihlelleheng e re bontšang kamoo re leng hole le ho phetha litaelo tsa Molimo kateng. Ke setšoantšo sa ho phela letsatsi le letsatsi 'musong oa Molimo. Ha ho na moo Jesu a reng, "Ena ke taelo ea ka, empa le tla sitoa ho e phetha!" Ho e-na le hoo, Jesu o re, "Sena ke seo le lokelang ho ba sona."

Ha re ka talima taelo ena ea Jesu ka leihlo la bokhoni ba botho, ha e khonehe. Ka matla a botho, re tla sitoa ho phetha taelo ea Molimo ea hore re phethehe. Ka matla a botho, re sitoa ho rata Morena Molimo oa hau, ka pelo ea hau eohle, le ka moea oa hau oohle, le ka khopolo ea hau eohle. Leha ho le joalo, ka matla a Molimo, re ka khona ho phetha litaelo tsa Molimo. Lerato le phethehileng le ea khoneha ka mohau oa Molimo.

► Bala puisano pakeng tsa mohlankana oa morui le Jesu ho Mattheu 19:16–21. Hlokomela taelo eo Jesu a ileng a e eketsa. Ho phetheha ho bolela ho rata Jesu ho feta maruo.

Mohlankana enoa o ile a ikela a soabile haholo, hobane e ne e le ea nang le maruo a maholo. Mohlankana enoa oa morui o ne a sa rate oa habo ka lerato le phethehileng; o ne a ke ke a rekisa lintho tseo a nang le tsona hore a abele bafumanehi. O ne a sa rate Molimo ka ho felletseng; o ne a ke ke a siea lehae la hae ho latela Jesu. Mohlankana enoa o ne a e-na le pelo e arohaneng. O ne a batla Molimo, empa hape o ne a batla maruo a hae a maholo.

Eitse ha ba bona se hlokoang ho ba morutuo, barutuo ba ne ba maketse haholo, ba botsa hore na ke mang ea ka pholosang. Karabo ea Jesu e boetse e araba potso e reng, "Na ho phetheho e ka khoneha ho balumeli ba tloaelehileng feela?" Jesu o ile a re, (bala Mattheu 19:25-26).

Ka matla a botho, lerato le phethehileng ho Molimo le ho ba habo rona ha le khonehe. Empa, ka Molimo lintho tsohle li ka phethahala. Ntate ea lerato ha a ferekanye bana ba hae ka litaelo tse ke keng tsa khona ho phethahala. Litaelo tse tsoang Mangolong li tsamaea 'moho le mohau oa ho li phetha.

► Bala Mattheu 5:48. Taelo ena ha se tsela ea litloaelo e khannelang Bakreste hore ba nyahame. Ke tšepiso ea mohau ea hore Molimo a ka etsa ka ho rona seo re ke keng ra khona ho se etsa ka borona le ka mohla.

Na ho ka khoneha ho mamela taelo ee ea Jesu ea hore re phethehe? Ho latela Thuto ea Thabeng, karabo ke "E!" e buuoang ka nyakallo. Ho phetheha 'musong oa Molimo ke ho ba le pelo e nang le lerato le phethehileng. Ho phetheha 'musong oa Molimo, ke ho ba le lerato le nang le khopolo e 'ngoe feela ho Molimo le ho ba habo rona. Na ke ntho e ka khonehang ee? Ho ea ka Jesu, lerato le phethehileng le ka khoneha hape lea hlokeha. Lerato le phethehileng ke morero oa Molimo ka bana ba hae.

### **Khalalelo e Kenngoang Tšebetsong: Lerato le Phethahatsa Molao Joang?**

Nkoe o re, "Ke rata Molimo ka pelo ea ka eohle. Hape ke rata le batho ba bang ba bangata. Empa ke sitoa ho rata batho ba ba mataoa. Ke nahana hore batho ba ba mataoa kaofela ha bona ba litlhapa."

Motsoalle oa Nkoe o ile a araba a re, "Empa Bakreste ba lokela ho rata batho bohle! Bakreste ha baa lokela ho ahlola batho ba bang ka ho hloka toka." Nkoe a araba a re, "Ha ke lumele Molimo o tsotella lintho tse nyane joalo ka ena. Na ha se ntho e tloaelehileng ho qoba batho ba fapaneng le rona?"

Molimo o re, "Batho ba halalelang ba tšoara batho bohle – ho kenyelletsa le ba fapaneng le rona – ka kutloelo bohloko le ka mohau."

► Bala Jakobo 2:8-9.

Tsela e 'ngoe ea ho lekanya semelo sa hau ke mokhoa oo u tšoarang batho ba ke keng ba o etsetsa letho. Ho bobebe ho bontša hlompheho ho batho ba boemong ba ho re putsa ka chelete, mesebetsi, kapa matla. Lerato le hlompheha batho ba ke keng ba re etsetsa letho: bafutsana, ba holileng, bana, le bohle ba bang ba se nang maemo a itseng. Molao oa borena oa lerato o ama tsela eo re tšoarang batho bohle ka eona. Lerato le phetha molao.

### **Lerato ke Phetho ea Molao**

Sehlooho sa lerato le phethehileng ke khubu ea molaetsa oa bophelo ba khalalelo. Thutong ea 7, re bone hore ho rata Molimo ke ntho e fetisang boikutlo feela. Ho rata Molimo ho fetola sohle seo re tsepamisang maikutlo a rona ho sona bophelong ba rona. Joale re se re batla ho khahlisa Molimo ho feta ho khahlisa bo-rona. Ka tsela e tšoanang, lerato la rona ho ba habo rona le tlosa maikutlo a rona ho bo-rona ebe re a tsepamisa ho batho ba bang.

Paulosi o ngoletse kereke ea Roma a re, (bala Baroma 13:8-10).

Mokreste e mong le e mong o na le molato oa ho rata. Paulosi oa re tiisetse hore ha re ka lefa molato ona oa ho rata, re tla be re phethile litebello tsohle tsa molao. Ha re rata batho ba bang, ha re na ho feba, ha re na ho bolaea, ha re na ho utsoa, kapa hona ho lakatsa ntho ea e mong, j.j. Litebello tsohle tsa molao li tla be li phethiloe ha ke rata oa heso joalo ka ha ke ithata.

Likhaolong tse qetellang tsa Baroma, Paulosi o bontša kamoo lerato e leng phetho ea molao. Batho ba tletseng ka lerato la Molimo:

- Ba sebeletsa 'mele oa Krete ho e-na le ho sebeletsa bo-bona (Baroma 12:3-5)
- Ba hloea sebe, 'me ba khomarela ho molemo (Baroma 12:9)
- Ba hlolisana ka ho hlomphana (Baroma 12:10)
- Ba hlokomela litlhoko tsa e mong le e mong (Baroma 12:13)
- Ba phela ba na le Khotso le batho ba bang, esita le lira tsa bona (Baroma 12:14-21)
- Ba ikokobeletsa ba bohlong pusong (Baroma 13:1-7)
- Ba hlompha likholiseho tsa balumeli ba bang (Baroma 14:1-23)
- Ba fihlela litlhoko tsa ba habo bona joalo ka ha Krete a ile a etsa (Baroma 15:1-3)

Ho rata Molimo ho fetola tšekamelo ea lipelo tsa rona ho tloha ho bo-rona ho ea ho Molimo. Ho rata ba habo rona ho fetola tšekamelo ea lipelo tsa rona ho tloha ho bo-rona ho ea ho batho ba bang. Bobeli bona ke karolo ea se boleloang ka ho ba motho ea halalelang.

John Wesley o akarelitse seo boleloang ka phetheho ea Mokreste ka tsela ena:

Lerato ke mpho e phahameng ka ho fetisisa ea Molimo; lerato le ikokobelitseng, le bonolo, le nang le mamello. Lipono kaofela, le liTshenolo kapa limpho, ke lintho tse nyenyane ha li bapisoa le lerato. Ha ho ntho e phahameng ho le feta bolumeling; haeba u batla ntho leha e le efe eseng lerato le fetisang, u shebile kathoko, moo ho fosahetseng, u lahlile tsela ea borena.

'Me ha u botsa ba bang u re, "Na u se u fumane tlhohonolofatso ee kapa e itseng?" haeba u bolela ntho e 'ngoe eseng lerato le fetisang, u bua taba e fosahetseng; u khelosa batho bao tseleng, u etsa hore ba sale morao monko o fosahetseng. Ak'u behe pelong ea hau hore, ho tloha mohla o pholositsoeng sebeng sohle, u se ke oa batla ho fihlela letho le leng, kante ho lerato leo le hlalositsoeng ho 1 Bakorinthe 13. Ha ho letho le phahameng ho feta sena leo u ka le fihlelang.<sup>22</sup>

## **Ho Rata Oa Heno eo e Leng Mokreste**

Ke likarolo tse peli tse tla bontša kamoo lerato le phethehileng le shebahalang kateng likamanong le Bakreste ba bang.

### ***Lerato le Hlompha Likholiseho tsa Bakreste ba Bang***

Ha a ngolla Bakreste ba Korinthe, Paulosi o ile a bua ka taba e tokoloho ea Bakreste. Ke lokela ho itšoara joang ha molumeli e mong a ka utloisoa bohloko ke tokoloho ea ka? Paulosi o ile a ngolla Bakreste ba matla ba neng ba re, "Rea tseba hobane litšoantšo ha se letho. Ho ja lijo tse hlabetsoeng litšoantšo ha ho re letho ho rona." Paulosi o ile a araba ka ho re, (bala 1 Bakorinthe 8:9-13).

Paulosi o tla tlohela ho ja nama bophelo bohle ba hae ho e-na le hore a etse hore ngoan'abo oa Mokreste ea fokolang a oele. Lerato le phethehileng le bolela ho re o tsotella pholoho ea ngoan'abo oa Mokreste haholo ho feta litokelo tsa hae. Hamorao, Paulosi o re, "re mpa re

---

<sup>22</sup> E fetoletsoe ho tsoa ho John Wesley, *A Plain Account of Christian Perfection* (Kansas City: Beacon Hill Press, 1966), 99.

mameletse tsohle, re tle re se ke ra beela Evangeli ea Krete thibelo le ha e le 'ngoe' (1 Bakorinthe 9:12).

Bakorinthe ba ne ba re, "Re lokolohile ho etsa sohle seo re se ratang. Ha re ea tlameha ho tsotella litlhoko tsa molumeli e mong." Paulosi o ile a re, "Ke lokolohile hore nka fihlela litlhoko tsa balumeli ba bang. Ha kea tlangoa ke litakatso tsa ka 'moho le litokelo tsa ka. Ke lokolohile ho re nka rata ba bang." Lena ke lona lerato le phethehileng leo Molimo a batlang ho le nea Mokreste e mong le e mong.

#### ► Bala Baroma 14.

Kerekeng e Roma, ho ne ho e-na le Bakreste ba fokolang ba neng ba e-ja meroho feela. Bana e ka ba e ne e le Bakreste ba Ba-Yuda ba neng ba sa ntse ba tsoela-pele ho latela melao ea Ba-Yuda ea lijo, 'me joale ba sa batle ho ipea kotsing ea ho ja lijo tse sa hloekang. Hape hona moo ho ne ho e-na le Bakreste ba matla ba neng na le tsebo, ba bile ba tseba hore melao ea lijo ha e sa tlama ho Bakreste.

Paulosi o ile a bontša sehlopha se seng le se seng hore na ho bolela'ng ho rata kamoo Krete a ratileng kateng. Bakreste ba fokolang ha ba tšoanele ho ahlola ea jang nama. Lerato ha le ahlole.

Leha ho le joalo, Bakreste ba matla le bona ba se ke ba nyefola Bakreste ba fokolang, hape ba se ke ba sebetse tsa tokoloho ea bona ka tsela e tla fokolisa tumelo ea ba fokolang. Ho e-na le hoo, Bakreste ba matla ba tla tlohela litokelo tsa bona e le ho qoba ho timetsa Mokreste ea fokolang. Hobaneng? Sena ke ka lebaka la lerato, (bala Baroma 14:15).

Sena ke sona se boleloang ka ho rata oa heno eo e leng Mokreste. Re lokela ho rata ka tsela eo Krete a neng a rata ka eona. O ile a fana ka bophelo ba hae sebakeng ngoan'abo ea fokolang; kannete, Paulosi o rialo, re ka lesa tokelo ea rona ea ho ja nama.

► Ak'u buisaneng ka karolo eo balumeli ba 'nete ba nang le Molimo ba fapanang ho eona. E be likarolo tseo Bibe e sa faneng ka thuto e hlakileng ho tsona; empa e be likarolo tseo batho ba nang le likholiseho tse fapaneng ho tsona. Sebelisang melaoana ea Paulosi e hlahang ho Baroma 14 tabeng tsena. Sehlopha se seng le se seng – sa Bakreste ba fokolang esita le sa ba matla se lokela ho atamela taba ee joang?

#### ***Lerato le Tsotella Mokreste ea Oelang Sebeng***

Puseletso ke Mokreste ea ileng a qhekanyetsoa ke setho se seng sa kereke litabeng tsa khoebo. Thabang o ile a rekisetsa Puseletso koloi e seng e sebelitse, a tseba hore koloi eo e na le bothata bo boholo bo hloakang ho lokisoa. Thabang o ile a bua leshano ho Puseletso a re, "Ke ile ka isa koloi ena ho molokisi 'me o e hlahlobile. E boemong bo botle haholo. U ka ntšepa. Ke Mokreste."

Matsatsi a mabeli feela kamor'a ho reka koloi eo, Puseletso a lemoha hore likere tsa koloi eo Ha li sebetse hantle – le hore Thabang o ne a tseba ka bothata bona.

► Puseletso o lokela ho etsa joang?

Na karabo ea hau ke hore, "Puseletso o lokela ho hlokomelisa batho bohle hore Thabang ha a tšepahale?" Kapa u itse, "Puseletso o lokela hore a itholele a se ke a bua letho le tla koatisa Mokreste e mong?" Ha re talime karabo ea Jesu.

► Bala Mattheu 18:15-17.

Jesu o fane ka likhato tse 'ne tse bontšang kamoo lerato le phethehileng le tšoarang Mokreste ea oelang sebeng. Ka kopo, utloisisa hle hore mohlala ona o bua ka ketso ea sebe. Jesu ha a bue ka ho fapana hoa batho ka maikutlo. Jesu ha a re, "Tsamaea, u kena-kenane le mathata a batho." Jesu o bua ka boemo boo Mokreste a etsang sebe khahlanong le Mokreste e mong. Talima likhato tsena:

- 1. Ke lokela ho atamela ngoaneso ke le mong.** Lerato le phethehileng ha le thabele bokhopo (1 Bakorinthe 13:6). Ha le batle monyetla oa ho bea bobepeneneng. Ho e-na le hoo, motho nang le lerato o leka ho lokisa litaba lekunutung le motho eo a nang le bothata le eena. Motho ea nang le lerato o bua le ngoan'abo ea oeleng molatong ... ka moea o mosa (Bagalata 6:1). Sepheo ke ho tsosa moea oa ngoan'eso, eseng boiphetetso. Haeba pako eo a sa bake...
- 2. Ke lokela ho nka moetapele e mong moeeng kapa ba babeli hore e be lipaki.** Le hona moo, sepheo e ntse e le tokiso ea litaba. Lipaki tsena e lokela ho ba baetapele ba holileng moeeng ba ka fanang ka keletso e molemo e ka tsosang ngoan'abo rona (Bagalata 6:1). Haeba le teng pako ntse e le sieo...
- 3. Ke lokela ho tlisa sebe seo kopanong ea kereke.** Sepheo e ntse e le ho tsosa ngoan'abo rona. Sepheo ha se boiphetetso kapa hona ho hobosa pontšeng kapel'a batho. Sepheo sa khalemelo ea kerekeng e lokela ho ba ho tlisa pako ho tsosa ngoan'abo rona ea oeleng. Haeba motho enoa a fetoha lerabele 'me a hana ho baka...
- 4. Kereke e lokela ho khalemela setho seo se entseng molato.** Kereke ea Korinthe e ne e e-na le setho se neng se le molato oa sebe se nyarosang sa bofebe. Paulosi o ile a laela phutheho ho khalemela monna enoa, (bala 1 Bakorinthe 5:13). Re ke ke ra iphanyetsa sebe 'meleng oa Krete.

Leha ho le joalo, ela hloko mantsoe a Jesu. Le mo tšoare joalo ka mohetene le mo-lekhetho (Mattheu 18:17). Bakreste ba lokela ho tšoara bahetene le ba-lekhetho joang? Ka lerato. Le hona mona, sepheo e sa ntse e le ho tsosa eo ea oeleng. Ho 2 Bakorinthe, Paulosi o buile ka taba ea Mokreste ea ileng a khalemeloa ke kereke 'me a baka. Paulosi o itse, (bala 2 Bakorinthe 2:6-8).

Ho 1 Bakorinthe, kereke e ne e mameletse sebe se pepenene 'me ba sa batle ho khalemela ea entseng sebe. Paulosi o ile a ba hopotsa hore **ho rata Molimo** ho re hloka hore re khalemele ba etsang sebe khahlanong le 'mele oa Krete.



Ho 2 Bakorinthe, kereke e ile ea khalema motho ea neng a entse sebe, empa e itse ha motho eo a baka, kereke e ne e sa batle ho mo tšoarela! Paulosi o ile a ba hopotsa hore **ho rata ba habo rona** ho hloka hore re tšoarele ba bakang (2 Bakorinthe 2:7).

Kamehla sepheo sa khalemelo ea kereke e lokela ho ba pako le ho tsosa motho ea oeleng. Lerato le phethehileng ha le batle boiphetetso.

### **Ho Rata Ba Habo Rona Ba sa Lumelang**

Re bontša lerato le phethehileng joang ho batho ba sa lumelang, haholo ba re hloileng ka lebaka la hore re Bakreste? Jesu o itse, (bala Mattheu 5:43-45).

Ha o rata ba u hlorisang, u phethehile joalo ka ha Ntat'ao ea maholimong a phethehile. Batho ba halalelang ba rata joalo ka ha Ntat'a rona ea maholimong a rata. Sena ke sona se boleloang ka ho phetheha.

Batho ba halalelang "ba bontša ba bang lerato, e seng feela ho balumeli-'moho le bona, empa le ho ba sa lumelang, ba re hanyetsang, esita le ba etsang sebe. Re lokela ho sebetsana le ba khahlanong le rona ka mohau, ka bonolo, ka mamello, le ka boikokobetso. Molimo o hanela ho baka moferefere, ho iphetetsa, ho tšosa kapa ho sebelisa likhoka e le mokhoa oa ho rarolla likhohlano kapa ho fumana toka. Leha Molimo a re laetse hore re hloee Diketso tsa boetsalibe, re lokela ho rata esita le ho rapella motho e mong le e mong ea ntseng a phela ka sebe."<sup>23</sup>

Esale Bakreste ba phela lefats'eng le loants'ang evangeli. Paulosi o ile a bolella Bakreste ba Roma ho hlompha ba boholong esita le hona ho lefa lekhetho – ho eona puso e neng e bolaea Bakreste ebile e se e tla bolaea eena Paulosi haufinyane.

Petrose o laetse Bakreste a re, (bala 1 Petrose 2:17). Le hona moo, 'musi enoa e ne e le ea khopo eo haufi a neng a tla bolaea Petrose. Empa Petrose o ne a tiisitse hore Bakreste ba lokela ho rata lira tsa bona. Ka ho rata le lira tsa rona, re fana ka bopaki ba 'nete ea evangeli, (bala 1 Petrose 2:15).

Joshua ke moruti oa Nigeria sebakeng se karolong e ka leboea ea Nigeria, moo Bakreste ba hlaseloang ka sehloho ke masole a Islamo. Masole a Islamo a chesitse likereke, ba bolaea Bakreste, le ho koetela bana ba banana ho ba rekisa ho ba makhoba. Lekhetlong la ho qetela ha ke ne ke etetse Nigeria, Joshua o ile a mpontša litšoantšo tsa litopo tsa litho tsa kereke ea hae tse ileng tsa bolaoa ke bahlaseli ba Islamo.

Hape Joshua o ile a mpontša litšoantšo tsa kamoo kerekeng ea hae e ileng ea arabela taba ena ea litlhaselo ka teng. Kereke eo e ile ea haha sekolo motseng o mong oa ma-Muslim; ba ile ba cheka seliba ho fana ka metsi a bolokehileng sebakeng sa motse kaofela; ba ile ba fana ka litulo tsa likoloeana bakeng sa bakuli ba ma-Muslim ba lefu la ho omella ha

---

<sup>23</sup> E tsoa ho *Discipline of the Bible Methodist Connection of Churches*, 2014.

mesifa; ba ntse ba haha setsi sa bophelo motseng ona haajoale. Ba bontša lerato ho sera sa bona.

Moruti Joshua o ile a re, “Ma-Muslim a mangata ba ntse ba amohela Krete ka lebaka la ho bona lerato la Molimo ka Bakreste. Rea ba hapa, eseng ka lithunya le boiphetetso; empa re ba hapa ka ho phela Mattheu 5:43-45.” Tsena ke litholoana tsa lerato le phethehileng le pheloang lefatšeng la rona hona joale.

► Ke liqholotso life tse kholo tseo le tobanang le tsona moo u phelang teng bakeng sa ho rata ba habo rona ba sa lumeleng ho Molimo? Bolela likhato tse sebetsang tseo le ka li nkang ho bontša lerato ho batho ba sa lumeleng motseng oa heno.

Sengoli sa Russia se bitsoang Leo Tolstoy o ngotse pale e khutšoanyane e bontšang se boleloang ka ho phela bophelo ba lerato le phethehileng. Martin e ne e le monna ea etsang lieta ea futsanehileng empa ea ratang Molimo ka ho teba.<sup>24</sup> Bosiung bo bong, Martin o ile a khaleha a ntse a bala Bibelet. O ile a lora Jesu a re, “Hosane, ke tla etela khoebo ea hau.”

Letsatsi le hlahlamang, Martin o ile a labella Jesu. Batho ba bang ba ile ba tla khoebong ena ea Martin, empa ha e le Jesu eena ha a ka a fihla. Monna oa lesole ea seng a holile lilemong o ne a eme serameng ‘me a thothomela ke ho hatsela. Martin o ile a mema lesole lena ho kena ka khoebong ea hae ‘me a mo etsetsa tee e chesang. Eaba mosali e mong oa mofumanehi o feta haufi le khoebo ena, a ntse a leka mekhoha ea ho futhumatsa ngoana oa hae. Martin o ile a mo nea sopho le kobo bakeng sa ngoana. Hamorao, Martin o ile a rekela mocha e mong ea neng a lapile lijo.

Martin o ne a nyahame kahore Jesu o ne a sa fihla, empa o ile a re, “E ne e le toro feela. Ke ne ke makatsa le ‘na hore nka nahana hore Jesu a ka tla khoebong ea lieta.”

Bosiung boo, ha Martin a ntse a bala Bibelet, hang hape eaba oa khaleha. O ile a lora a bona batho ba eme ka khoebong ea hae. Lesole le ile la re, “Martin, na u ka ntseba? Ke ‘na Jesu!” Mosali ea neng e e-na le ngoana a re, “Martin, ke ‘na Jesu.” Mocha eane ea neng a lapile a re, “Ke ‘na Jesu.” Eaba Martin oa phaphama ‘me a qala ho bala, (bala Mattheu 25:35-40).

Lilemong tsa mongoaha-kholo oa bobeli, ho ne ho e-na le sehlopha sa Bakreste se neng se bitsoa “Ba Ipehang Tsietsing” hobane ba ne ba beha maphelo a bona kotsing ka ho hlokomela bakuli ba neng ba e-shoa ba bolaoa ke mafu a tšoaetsanang. Ba Ipehang Tsietsing ba ne ba etela batšoarua, ba hlokomela batho ba kulang, ba pholosa bana ba lahluoeng. Ba Ipehang Tsietsing ba ne ba bontša lerato le phethehileng.

Ka selemo sa 252 A.D., lefu la seoa le ile la hlasela sebaka sa Carthage. Lingaka li ne li hana ho etela bakuli; ba malapa ba ne ba lahlela litopo tsa ba shoeleng literateng; motse o ne o le ka har’a pherekano e kholo. Cyprian, eo e neng e le mobishopo oa Carthage, o ile a bitsa phutheho ea hae ho kopana. O ile a ba hopotsa hore Bakreste ba bilelitsoe ho ba batho

---

<sup>24</sup> E Leo Tolstoy, “Where Love Is, There God is Also.”

ba nang le lerato le phethehileng. Bakreste ba Carthage ba ile ba pata bafu, ba hlokomela ba kulang, 'me ba pholosa toropo eo tšenyehong. E ne e le batho ba nang le lerato le phethehileng; ba ne ba phethehile joalo ka ha Ntat'a bona ea maholimong a phethehile.

### **O Fumane Sephiri - Esther Ahn Kim**

Esther Ahn Kim e ne e le tichere ea 'mino e neng e phela naheng ea Korea nakong eo e neng e hapuo ke Japan ho qala ka selemo sa 1937.<sup>25</sup> Ma-Japane a ne a laetse hore baahi ba iname tempeleng molimotsana oa letsatsi Thabeng ea Namsan. Ka selemo sa 1939, Esther o ile a laeloa ho inama tempeleng eo. Kotlo ea ho hana ho inama e ne e le ho kenngoa teronkong le ho hlokofatsoa.

Bakreste ba bang ba ne ba entse qeto ea hore, "Re tla khumama ka nama kantle, empa ka lipelong tsa rona teng re tla khumamela Krete." Esther eena o ne a entse qeto e tiileng ea hore ha a na ho khumamela molimo oa bohata. **O ne a rata Molimo** ka pelo e sa arohanang. Eaba tsatsing leo o hana ho inama.

Hamorao ka 1939, kamora likhoeli tse 'maloa a ipatile, Esther Ahn Kim o ile a tšoaroa. O ne a qetile likhoeli tseo a ntse a itokisetsa teronko. O ne a itima lijo 'me a rapela, a ithuta ho boloka Mangolo ka hloohong, a lokisa kelello ea hae le 'mele oa hae ho hore o tle o khone ho mamella bohloko.

Kim o ile a qeta lilemo tse tšeletseng a le teronkong. O ile a hlokofatsoa makhetlo a mangata empa le ha ho le joalo o ile a 'na a tšepahala hobane a ne a rata Molimo. Empa Kim o ne a boetse a tseba hore o bilelitsoe ho **rata oa habo**. Teronkong moo, Esther o ile a qala ho rapela hoseng ho hong le ho hong a re, "Molimo, ke mang eo u batlang ho mo rata ka 'na kajeno?" Ka nako e 'ngoe o ile a nea mosali e mong ea neng a ahloetsoe lefu ka lebaka la ho bolaea monna oa hae lijo tsa hae ka matsatsi a 'maloa. Ka lebaka la lerato la Esther Kim, mosali enoa o ile a kopana le Krete pele a ka shoa.

Esther Ahn Kim o ile a ba le boitsebelo ba ntho eo Thomas Chisholm a neng a e batla sefeleng sa hae, "Oho! nke ke tšoane le Uena... Ka bonolo ke mamelle nyeliso e sehloho, ke ikemisetse ho utloisoa bohloko, e le ho pholosa ba bang."

---

<sup>25</sup> E fetoletsoe ho tsoa ho Esther Ahn Kim, *If I Perish* (Chicago: Moody Press, 1977).

## **Boikhopotso ba Thuto ea 8**

(1) Batho ba neng ba phela nakong ea Jesu ba ne ba lumela hore Testamente ea khale e ne e ruta ka khalalelo. Empa le ha ho le joalo, ba ne ba hloleha ho phela ka tsela eo Molimo a hlokanang batho ba halalelang ba phele ka eona.

(2) Mohlala o phethehileng oa khalalelo o bonoa bophelong ba Jesu oa Nazaretha. O ile a latela melaoana eohle ea khalalelo e hlahang Testamenteng ea Khale.

(3) Ho rata ba habo rona ka ho phethahala ke ho rata ka tsela eo Jesu a ratileng ka eona – ka ho iketsa sehlabelo le ka ho ikokobetsa.

(4) Ho phetheha ho bolela ho phetheha ka botlalo mokhahlelong ka mong oa kholo. Ho phetheha ha ho bolele hore ha ho sa tla ba le kholo e tsoelang pele.

(5) Taelo ea Bibeke ke “tšepiso e ipatileng.” Seo Molimo a se laelang, o boela a etsa hore se khonahale. Khalalelo ha e fihleloe ka matla a botho empa e fihleloa ka mohau oa Molimo.

(6) Lerato ke phetho ea molao. Ha re rata kamoo Molimo a re bilelitseng ho rata kateng, re tla fihlela se hlokoang ke molao.

## **Kabelo ea Thuto ea 8**

(1) Hlophisa molaetsa ka sehlooho se reng, “Ho Rata Sera sa Hau sa Lilemong Tsena tsa 2000.” Sebelisa Mattheu 5:43-48 ele lengolo la hau. Bontša hore na ho bolela eng ho rata sera sa hau lefatšeng la rona la haajoale. Etsa bonnete ba hore o kenyeletsa evangeli (litaba tse molemo) tsa seo Molimo a se entseng ka Jesu hore ho rata lira tsa rona ho khonahale.

(2) Qala thuto e latelang ka ho pheta Mattheu 5:43-48.



## Thuto ea 9

# Bophelo bo Halalelang Bo Pheloa ka Ho Tlala ka Moea

### Sepheo sa Thuto

Qetellong ea thuto ena, baithuti lokela ba be ba ka:

- (1) Elelloa phetoho eo Pentakonta e ileng ea e tlisa kerekeng ea pele.
- (2) Elelloa matla a Moea o Halalelang a ho fetola balumeli le kajeno.
- (3) Bona tholoana ea Moea bophelong ba letsatsi le letsatsi e le semelo sa bophelo bo tlatsitsoeng ka Moea.
- (4) Tseba Bagalata 5:22-25 ka hlooho.

### Petrose: Lejoe la Khopiso le Ileng la Fetoha Lefika

► Bala Mattheu 16:15-18. Lena e ne e be le leng la matsatsi a khanyang haholo bophelong ba Petrose.

Kamor'a nako e seng kae, Jesu o ile a bolella barutuo a ba hae hore o tla shoella Jerusalema. Eitse ha Petrose a mo khalema, Jesu a mo araba ka ho re, (bala Mattheu 16:23). Lentsoe lena *khopiso* le bolela "lejoe le khopang." Jesu ile a qala ka ho bitsa Petrose lefika; empa joale o se a mo bitsa lejoe la khopiso. Lena e ne e be letsatsi le lefifi haholo bophelong ba Petrose.

Pale ea Petrose e ba lefifi le ho feta ka bosiu boo Jesu a ileng a tšoaroa ka bona. Kamor'a ho tšepisa hore a ke ke a lahla Mong'a hae, Petrose o ile a latola Jesu a ba a baleha ke ho tšoha. Lefika le ile la hloleha nakong eo le lekoang ka eona.

Kamor'a ho hloleha hona, motho ea balang li-evangeli a ka nahana hore Petrose o ne a ke keng a hlola a e-ba le mosebetsi ka kerekeng. Empa ka ho makala, Petrose o ile a fetoha moetapele kerekeng ena ea pele. Ke eng e tlisitseng phetoho e kholo hakaalo? Karabo ke Pentakonta.

Ka mora tsoho ea hae, Jesu o ile a tšepisa barutuo a re, (bala Diketso 1:8). Tšepiso ena e ile ea phethahatsoa ho Diketso 2. Barutuo a ba ile ba tlatsoa ka Moea o Halalelang 'me ba

#### Thapelo Bakeng sa Khalalelo

"Phefumoloha ka ho 'na, Moea o Halalelang, ke tle ke nahane tse halalelang.

Ntsamaisa, Moea o Halalelang, ke tle ke etse tse halalelang.

Nkhohele, Moe o Halalelang, ke tle ke rate tse halalelang.

'Matlafatse, Moea o Halalelang, ke tle ke lebele tse halalelang.

Ntebele, Moea o Halalelang, ke tle ke boloke tse halalelang."

- Augustine of Hippo

qalella ho ruta. Ka matla a Moea, batho ba 3,000 ba ile ba sokoloha ka Pentakonta ena ea pele.

Petrose o ile a fetoloa ke Pentakonta. Lejoe la khopiso le ile la fetoha lefika le ileng la etella kereke pele matsatsing a eona a hlokolosi haholo a ho qala. Simone Petrose o ile a bolela Evangeli 'musong oohle oa Roma, a ngola mangolo a mabeli a Testamente e Ncha, 'me qetellong o ile a thakhisoa ka lebaka ka tumelo ea hae.

Ke eng e ileng ea tlisa phetoho ee? Ka matla a fetolang a Moea o Halalelang, motšoasi oa lihlapa oa Mo-Galelea o ile a fetoha moetapele oa kereke ea lilemong tsa mongoaha-khohlo oa pele. Petrose o ile a ithuta hore ho halalela ho bolela ho phela a tlatsitsoe ka Moea o Halalelang.

► Kopa litho tsa sehlopha sa hao ho fana ka bopaki ba phetoho eo Moea o Halalelang o e entseng maphelong ba bona. Moea o u nea matla ka tsela efe bakeng sa bosebeletsi, ho hlola sebe, le ho thabela bophelo ba Bokreste?

### **Moea o Halalelang le Pentekonta**

Petrose ha se eena feela morutua ea ileng a fetoloa ke Pentakonta. Barutua bohle ba ile ba fetoloa ke Moea o Halalelang. Thomase ea neng a tletse ka lipelaelo o ile a fetoha ea e-ba moromuo ea tšepahalang. "Mora oa Sealuma" o ile a fetoha "Moapostola oa Lerato." Balateli ba Jesu ba ile ba fetoloa ho tloha ho ho ba barutua ba boi ho ba lebotho le matla polelong ea Evangeli. Buka ea Diketso e bontša tšusumetso eo Moea o Halalelang o bileng le eona holima balumeli bana ba pele. Kereke ea pele e ne e atlehile eseng ka lebaka la lineo tse ikhethang tsa baapostola, empa ka lebaka la matla a ikhethang a Moea o Halalelang. Barutua ba ile ba ithuta hore bophelo ba khalalelo bo pheloa ka ho tlatsoa ka Moea.

### **Tšepiso ea Moea o Halalelang**

Ruri e ile ea e-ba e 'ngoe ea lintho tse makatsang barutua haholo ha ba utloa Jesu a re ho bona, (bala Johanne 16:7). Barutua bana ba ne ba tlohetse tsohle ha ba latela Jesu. Barutua bana ba ne ba tlohetse tsohle ho latela Jesu. Inahanela kamoo ba ileng ba tšoha kateng ha Jesu a bua sena.

Selallong sa ho qetela, Jesu o ile a hlalosa kamoo Moea o Halalelang o tlang ho sebeletsa ka teng ho balumeli. Moea o Halalelang:

- E tla ba Mothusi (Johanne 14:16-17)
- E tla ba Tichere (Johanne 14:26)
- O tla paka Mora (Johanne 15:26)
- O tla kholisa lefatše (Johanne 16:7-11)
- O tla senola 'nete eohle (Johanne 16:13-15)

Kamor'a tsoho, Jesu o ile a boela a pheta tšepiso ea hae ea hore o tla romela Moea o Halalelang, (bala Diketso 1:4-8).

Tšebeletso ea Jesu lefatšeng ha ea ka ea fella ka sefapano, kapa ka lebitla le feela, kapa ka hona ho nyolohela leholimong. Mosebetsi oa Jesu o ile oa phethahatsoa ke Pentakonta. Letšoao le neng le tla bontša tšebeletso ea Jesu e ne e le hore o tla le kolobetsa ka Moea o Halalelang le ka mollo (Luka 3:16). Mpho ea Moea o Halalelang e ne e le sehlohlolo sa tšebeletso ea Jesu lefatšeng.

## **Ho Amoheloa hoa Moea o Halalelang**

Bukeng ea Diketso, Moea o Halalelang o ile oa matlafatsa kereke sebakeng sa tšebeletso. Ka tsatsi la Pentakonta, tšepiso ea ho fua Mothusi e ile ea phethahatsoa. Kamor'a Pentakonta, Moea o Halalelang o ile oa tsoela-pele ho ba teng kerekeng. Matšoao a neng a tsamaea le ho tla ha Moea o Halalelang a ile a bonahatsa tšebeletso ea hae ho balumeli.

► Bala Diketso 2:2. Ea pele, sena e ne e le letšoao le bontšang matla a ho tla hoa Moea ona. Bukeng ea Diketso, re bona matla a Moea o Halalelang a sebetsa ka balumeli. Kamor'a Pentakonta, kereke e ile ea sebeletsa ka matla a macha le ka katleho. Moea o Halalelang o ne o sentse o sebetsa lefatšeng le pele ho letsatsi la Pentakonta.<sup>26</sup> Empa kamor'a Pentakonta, matla a Moea a ile a lula a le teng ka nako tsohle tšebeletsong ea kereke.

► Bala Diketso 2:3. Ea bobeli, mangolong, mollo hangata o bolela bohloeki. Letšoao la Moea o Halalelang e ne e le pelo e hloekileng. Petrose o ile a fana ka bopaki kapel'a Lekhotla la baapostola le baholo Jerusalema ka mosebetsi oo Molimo a o entseng har'a balichaba, (bala Diketso 15:8-9).

► Bala Diketso 2:4. Ea boraro, sena se ile sa hlomella barutuo hore ba ka pakela lichaba tsohle. Ka matla a Moea o Halalelang, barutuo ba ne ba tla phetha Thomo e Kholo ea Krete. Toreng ea Babele, Molimo o ile a ahlola sebe ka ho ferekanya lipuo tsa batho. Ka letsatsi la Pentakonta, Molimo o ile a lumella batho bohle ba mametseng ho utloa Evangeli e mong le e mong ka puo ea habo. Ka letsatsi la Pentakonta, Molimo o ile a qala ho fetola litholoana tse arolang tsa sebe. Lipuo tsa letsatsi li ne li bontša tšepiso ea Molimo ea hore Evangeli e tla fihlela lichabeng tsohle le ho batho bohle ka matla a Moea o Halalelang o sebetsang ka hare ho kereke.

Ka letsatsi la Pentakonta, barutuo ba ile ba qalella ho utloisisa seo Jesu a neng a se bolela ka tšepiso ea hae ho Johanne 16:7, (bala Johanne 16:7 hape haeba ho hloka hloka). Moea o Halalelang o ne o sa tle e le "ho hlahlamang ba molemo" kamorao ho Jesu Krete. Ha Jesu ea nameng a ne a khona ho ba sebakeng se le seng feela, Moea o Halalelang oona o ka ba libakeng tsohle. Moea o Halalelang o ile oa matlafatsa barutuo hore ba ka phethahatsa Thomo e Kholo ea Jesu. Moea o Halalelang o ile oa matlafatsa Bakreste hore ba ka phela bophelo ba khalalelo bo tlang ho ba bopaki ho lefatše lohle.

---

<sup>26</sup> Mehlala ea Diketso tsa Moea o Halalelang Testamenteng ea Khale e kenyelletsa: Genese 1:2; Genese 6:3; Eksoda 31:3; Numere 11:25-29; Baahlodi 3:10; Baahlodi 6:34; Baahlodi 13:25; 1 Samuele 10:6-10; 2 Dikronike 28:12; Nehemia 9:20; Isaia 63:10-14; Sakaria 4:6-9.



## **Khalalelo Qalehong ea Kereke: Bophelo ba ho Tlala ka Moea**

Buka ea Diketso e bontša mosebetsi oa Moea o Halalelang bophelong ba molumeli e mong le e mong. Ka lebaka la Moea o Halalelang, Bakreste ba ile ba e-ba le matla a ho paka (Diketso 1:8), sebete sa ho tobana le khanyetso (Diketso 4:31), tlholo holim'a sebe sa ka boomo (Baroma 8:2), esita le lineo tsa moea bakeng sa tšebeletso (Diketso 2:17-18; 1 Bakorinthe 12:7-11). Balumeli ba qalong ba ne ba halalela hobane ba ne ba phela ka botlalo ba Moea o Halalelang.

Buka ea Diketso e bontša ha kereke ea pele e ne e phethisa pitso ea Jesu ea ho etsa barutuo a lichabeng tsohle, pitso ea hae ho Mattheu 5:48 le tšepiso ea hae ho Johanne 14:12. Sena se ile sa phethoa ka matla a Moea o Halalelang. Buka ea Diketso e bontša litholoana tsa boteng ba Moea o Halalelang bophelong ba balumeli bana ba qalong ea kereke.

### **Matla Bakeng sa Tšebeletso**

Joalo feela ka ha Jesu a ne a tletse ka Moea o Halalelang nakong eo a neng a tobane le Satane (Luka 4:1), Petrose le eena o ne a tletse ka Moea o Halalelang nakong eo a neng a tobane le baetapele ba BaYuda (Diketso 4:8). Luka o hlalosa bophelo ba Petrose ka mantsoe a tšoanang le ao a a sebelisitseng ha a hlalosa bophelo ba Jesu. Tšebetso ea Moea e ileng ea bonahala bophelong ba lefatšeng ba Jesu Krete joale e ne e se e le monyetla oo balumeli bohle ba o fumaneng le bona.

Ka letsatsi la Pentakonta, kereke e ile ea ekeletsoa ka balumeli ba bangata ho feta nakong eohle ea bosebeletsi ba Jesu Krete ha a sa le lefatšeng. Ka Moea o Halalelang, barutuo a ba ile ba sebeletsa ka matla le ka bolaoli. Lipholiso tsa mohlolo li ne li bonahatsa matla a Molimo lefatšeng le neng le hloka tumelo. Batho ba ne ba tletse ka ho makala hape ba ile ba hlolloa haholo (Diketso 3:10-11). Ha barutuo a ba ntse ba tsoela-pele ho sebeletsa ba tletse ka Moea o Halalelang, mosebetsi oa bona o ne o bontša matla a Molimo. Ka matla a Moea o Halalelang, baapostola ba ile ba e-ba le bokhoni ba ho phethahatsa thomo eo ba e fuoeng ke Jesu ea ho etsa barutuo a lichabeng tsohle (Mattheu 28:19).

### **Sebete sa Moea**

#### ***Baapostola ba ne ba le Sebete Polelong ea Evangeli***

Matla a fetolang a Moea o Halalelang a bonahala ka tsela e hlakileng bukeng eohle ea Diketso. Barutuo a bao likhoeling tse 'maloa feela pele ho moo ba ileng ba baleha ha Jesu a ne a tšoaroa, joale ba ne ba se ba ruta ka sebete.

Nakoana kamorao ho Pentakonta, baruti ba Molao ba ile ba tšoara Petrose le Johanne. Libeke tse 'maloa feela pele ho moo, Petrose o ne a ile a latola Krete. Empa joale, Petrose, a tletse ka Moea o Halalelang o ile a ruta ka sebete. Baruti ba Molao ba ile ba hlolloa ke mantsoe a batho bana ba sa rutehang, empa e le batho feela (Diketso 4:2-13).

"Ha rea tlatsoa ka Moea o Halalelang ho etsa mosebetsi ofe kapa ofe o khethehileng, empa e le feela hore re lumelle Molimo ho sebetsa ka rona."  
- Oswald Chambers

Ka ho tlatsoa ka Moea o Halalelang, baapostola ba ile ba e-ba sebete ho ruta ka matla le ka tlolo. Ho tloha ho sehlopha sa batšoasi ba lihlapi ba boi, balekhetho, le basebetsi feela ba tloaelehileng, barutuo ba ne ba se ba fetohile banna ba ferekantseng lefatše lohle (Diketso 17:6).

### ***Barutuo ba Bile Sebete le Ha ba Tobana le Litlhoriso***

Ha ba ne ba tobane le khanyetso, baapostola ba ne ba sa rapelle ho lokolloa litlhorisong, empa ba ne ba rapella hore ba be sebete ho bolela Krete ho sa tsotellehe litlhoriso, (bala Diketso 4:29-31). Molimo o arabela thapelo ea bona.

Letšoao le hlakileng la mosebetsi oa Moea o Halalelang ka hare ho kereke e ne e le sebete sa ho bolela Evangeli ho sa tsotellehe khanyetso eo ba tobanang le eona. Qetellong ea mongoaha-kholo oa pele, Evangeli e ne e se e anetse ho tloha ho batho ba 120 ba neng ba le ka phaposing e kaholimo ho isa metseng le libakeng tsohle tsa 'Musu oa Roma.

### **Bophelo ba Ho Hlola**

Molokong o mong le o mong, Bakreste ba tobana le qholotso ea ho ba "Bakreste ba ka Sontaha" – batho ba kenang kereke empa maphelo a bona a sa bontše phetoho ea moshoelella. Kereke ea pele e ne e le batho ba fetohileng ke matla a Moea o Halalelang likarolong **tsohle** tsa bophelo.

Testamenteng ea Khale, re bona ho mathata a batho ba neng ba batla ho boloka selekane, empa ba fumana hore ha ba khone ka lebaka la lipelo tsa bona tse neng li arohane. MoDipesaleme o hlalositse sechaba sa Iseraele ka tsela ena, (bala Dipesaleme 78:37).

Ka Moprofeta Ezekiele, Molimo o ile a tšepisa letsatsi leo a tla fetola sechaba sa hae, (bala Ezekiele 36:26-27).

Pele ho Pentakonta, barutuo ba ne ba ntse ba tsamaea mehlaleng ea bana ba Iseraele. Ba ne ba batla ho latela Krete, empa ba ne ba lula ba hloleha. Ba ne ba e-na le lipelaelo; ba tseka maemo; ba bile ba baleha ke tšabo. Ka letsatsi la Pentakonta, tšepiso ena e hlahang ho Ezekiele e ile ea phethahatsoa. Barutuo ba ile ba matlafatsoa ka Moea o Halalelang hore ba phele bophelo ba ho hlola. Ho e-na le ho mamela Molimo ka lipelo tse sa fellang, ba ne ba tsamaea ba ntse ba mamela molao oa Molimo ka thabo. Ka Moea o Halalelang, bophelo ba ho hlola e ile ea e-ba tloaelo ho bana ba Molimo.

## **Tataiso Bakeng sa Tšebeletso**

Pele ho Pentakonta, litabatabelo le tšabo ke tsona tse neng li laola barutuo. Liteko tsa bona tsa ho sebeletsa Jesu li ne li sitisoa ke mefokolo ea botho ba bona. Kamor'a Pentakonta, Moea o Halalelang e bile oona o tataisang baapostola ho etsa mosebetsing o atlehileng.

Moea o Halalelang o ile oa tataisa kereke liqetong tse boima tse neng li ama likamano lipakeng tsa Bakreste ba BaYuda le ba Balichaba (Diketso 10-11; 15). Moea o Halalelang o ile oa etella-pele khetho ea baetapele ba kereke (Diketso 13:2-3). Moea o Halalelang o ile oa etella Paulosi pele ho ea Masedonia (Diketso 16:6-10). Moea o Halalelang o ile oa etella Paulosi pele ho khutlela Jerusalema a sa tsotelle kotsi ea hore o tla tšoaroa (Diketso 19:21; Diketso 20:22-23). Tšebeletso ea kereke ea pele e ne e tsamaisoa ke Moea o Halalelang.

## **Bonngoe**

Mohlomong bopaki bo tsotehang ka ho fetisisa ba tšebetso ea Moea o Halalelang kerekeng ea pele ke bonngoe har'a balumeli. Thapelong ea hae ea Bopristsa, Jesu o ile a rapella bonngoe ba kereke. O ile a rapela tjena, (bala Johanne 17:22-23).

Thapelo ena ea Jesu e ile ea arabeloa ka Pentakonta. Diketso 2:42 e bontša bonngoe bona bophelong ba kereke: tiisetso thutong ea baapostola, kopano ea boena, keteko ea Selallo sa Morena, le merapelo. Bonngoe bona bo ne bo bonahala mokhoeng oo batho ba kereke ba neng ba hlokomelana ka oona. Luka o pakile hore le hona ho ne ho se motho ea hlokomelana letho har'a bona hobane Bakreste ba ne ba hlokomelana litlhokong tsa bona tsa nameng (Diketso 4:34).

Ka makhetlo a tšeletseng, Luka o sebelisitse mantsoe ana ka pelo e le 'ngoe ho hlalosa bonngoe ba kereke.<sup>27</sup> Hona ha ho bolele hore Bakreste ba ne ba lumellana linthong tsohle. Ho na le lintho tse tebileng tse neng li beile kereke kotsing ea ho arohana. Balumeli ba BaYuda le ba Balichaba ba ne ba sa lumellane ka melao ea Moshe (Diketso 15:1-29). Paulosi le Barnabase ba ne ba sa lumellane mabapi le Mareka (Diketso 15:39-40). Empa, ho sa tsotellehe ho se lumellane hona, kereke e ne e na le bonngoe ka lebaka la Moea o Halalelang. Ha balumeli ba ne ba latela tataiso ea Moea o Halalelang, kereke e ile ea tlamahanngoa hammoho ho ba pelo e le 'ngoe.

Ha e ne e-ba re ne re ile ra bona barutuo pele Jesu a tšoaroa, re ne re ke ke ra nahana hore banna ba na ba ka atleha tšebeletsong. Ba ne ba le boi, ba monelana, hape ba tletse ka lipelaelo. Likhoeli tse 'maloa feela hamorao, banna bana ba ne ba se ba fetohile ka ho felletseng. Ho ne ho etsahetse'ng?

Pele ho Pentakonta, barutuo ba ne ba leka ho phela bophelo bo tšoanang le ba Krete ka matla a bona – 'me ba ne ba lula ba hloleha makhetlo-khetlo. Kamor'a Pentakonta, barutuo

---

<sup>27</sup> Diketso 1:14, Diketso 2:1, Diketso 2:46, Diketso 4:24, Diketso 5:12, Diketso 15:25

ba ne ba phela ka matla a Moea o Halalelang. Hona ke sona sephiri sa bophelo ba khalalelo esita le tšebeletso e atlehang.

### **Khalalelo Kajeno: Re Halalela Ha Feela re Tlatsitsoe ka Moea**

Bakreste ba bangata ba lekile ho phela khalalelo ka matla a bona – ‘me ba ile ba hloleha. Ka ho ba le boitšoaro hoa rona, mohlomong ho ka khonahala ho fumana tlholo holim’a sebe se kantle ha nakoana. Ka matla a rona, mohlomong re ka khona ho rata ba habo rona ha nakoana. Leha ho le joalo, re tla phakisa ho hloleha ho sa tsotellehe boiteko ba rona.

Hobane’ng re thatafalloa? Ke hobane re leka ho phela khalalelo ka matla a rona. Ke ntho e khathatsang ho leka ho phela bophelo ba Bokreste ka matla a rona. Re loantšana le maikutlo a boetsalibe; re loantšana le ho hloka lerato le phethehileng; re sokolisoa ke ho ba le pelo e arohaneng. Ho fapana le hoo, bophelo ba Moea ke bophelo ba ho ateloa ba tlholo.

Molimo o ne a sa re rerela hore re phele khalalelo ka matla a rona. O entse hore re phele ka matla a Moea o Halalelang. Kerekeng ea pele, bophelo ba khalalelo bo ne bo khoneha feela ka matla a Moea o Halalelang. Kerekeng kajeno, bophelo ba khalalelo bo khoneha feela ka matla a Moea o Halalelang. Libopeho tseo e bileng matšoao a kereke ea pele ke tsona tseo e tlang ho ba matšoao a kereke ea mehleng ea joale ha feela re phela ka ho tlatsoa ka Moea o Halalelang. Ka matla a Moea o Halalelang; re ka fihlela pelo e halalelang le matsoho a halalelang.

Matla tšebeletsong, sebete sa moea, tlholo holim’a sebe, le bonngoe ba balumeli – kaofela lintho tsena li hlalisoa ke boteng ba Moea o Halalelang. Ha re tlatsoa ka Moea, re matlafatsoa ho phela bophelo bo atetsoeng ba Bokreste boo Molimo a bo reretseng bana ba hae.

Li-Epistole tsa Moapostola Paulosi li bontša hore ho halalela ke ho tšoana le Krete. Ho halalela ke ho nahana, ho bua kapa ho etsa lintho joalo ka Krete. Hona ke taba e ntle e bileng e lakatsehang, empa kapele re fumana hore ka matla a rona re sitoa ho nahana, ho bua, kapa ho itšoara joalo ka Krete.

Bakreste ba bang ba qhoaella letšoao WWJD liaparong tsa bona ha ba apara. WWJD e emetse “Ke eng eo Jesu a neng a tla e etsa? (What Would Jesus Do?)” Ke taba e re hopotsang hore re bilelitsoe ho phela ka tsela eo Jesu a phetseng ka eona; re baetsisi ba Krete. Leha ho le joalo, ho ba bobebe haholo ho apara letšoao la WWJD ho feta ho phela ka mohlala oa Jesu. Kantle ho matla a Moea o Halalelang, ha re na bokhoni ba ho etsa kamehla seo Jesu a neng a tla se etsa.

#### **Thapelo ea Mokreste e Mocha**

“Moea o Halalelang, ke kopa u ntlatse ho fihlela ke khaphatseha. Ke sitoa ho tšoara haholo, empa ke khona ho khaphatseha haholo.”

- Quoted by Dr. David Bubb

Nahana hore u re ho motho ea sa sebetseng lipapali, ‘Ho ba sebakali se betere sa basketball, u lokela ho bapala joalo ka Michael Jordan. Pele u thunya bolo, ipotse, “Michael Jordan o ne

a tla etsa'ng?'" Keletso ena e ke ke ea mo thusa, hobane motho enoa ha a na bokhoni ba Michael Jordan.

Leha ho le joalo, nahana hore motho enoa a fuoe lineo tseo Michael Jordan a nang le tsona. Nahana hore a ka khona – ka moea oa Michael Jordan – ho etsa lintho tsohle tseo Michael Jordan a li etsang. Joale ho ka khoneha hore a etsise sebapali sena se hloahloa sa basketball!

WWJD (Ke Eng eo Jesu a Neng a Tla e Etsa?) ha ea lekana. Ka bo-rona, ha re na matla a ho ba baetsisi ba Jesu. Leha ho le joalo, Moea o Halalelang o ileng oa matlafatsa bosebeletsi ba Jesu o sa le teng le sebakeng sa rona. Ka ho tlala ka Moea, 'na le uena re ka tšoana le Krete. Sena ke tšusumetso ea Moea o Halalelang bophelong ba molumeli.

Moea o Halalelang o ile oa matlafatsa Jesu bakeng sa bophelo ba tlhoho esita le bosebeletsi bo nang le litholoana; ho tlala ka Moea o Halalelang e ne e le lona lekunutu la bophelo ba tlhoho le bosebeletsi bo nang le litholoana ho baapostola; ho tlala ka Moea o Halalelang ke lekunutu la bophelo ba tlhoho le bosebeletsi bo nang le litholoana le kajeno.

► Bala Bagalata 5:16. Lintho li peli feela tseo ho ka khethoang ho tsona: ho tsamaea ka Moea kapa ho khotsofatsa litakatso tsa nama. Rea sitoa ka matla a rona ho hlola litakatso tsa nama. E, ka mohlomong re ka hlola ka letsatsi le itseng kapa bekeng e 'ngoe, empa tsela e le 'ngoe feela ea ho fumana tlhoho ea nako e telele holim'a litakatso tsa nama ke ha re inehela ho Moea o Halalelang.

► Bala Baroma 8:1-17.

Ha a etsa kakaretso ea litaba tsa bophelo bo tlatsitsoeng ka Moea ho Baroma 8, Paulosi o bapisitse mekhoe e 'meli ea ho phela – ho phela ka nama le ho phela ka Moea.

► Bala hape Baroma 8:13-14.

Ho Baroma 7, Paulosi o bontša boiteko ba hae ba nako e fetileng a batla ho phetha molao oa Molimo ka matla a hae. Boiteko bo joalo bo ile ba hloleha. Hobane'ng? Ke hobane ka nama ke sebeletsa molao oa sebe (Baroma 7:25).

► Bala hape Baroma 8:1. Re lokolohile tsuong eseng hobane Molimo a khethile ho iphapanyetsa sebe sa rona; re lokolohile tsuong **hobane molao oa Moea oa bophelo, o leng ho Jesu Krete, o nkholotse molaong oa sebe le oa lefu**. Re lokolotsoe tsuong hobane joale re se re phela ka Moea.

Paulosi o bontša hore ho na le litsela tse peli tsa ho phela. Tsela ea pele ea ho phela ka nama. Hona ke kelello ea nama. Kelello ena ea nama ke bora ho Molimo. Ha ho khonahale hore motho ea phelang ka nama a khahlise Molimo. Mokhoa ona oa ho phela ka nama o isa lefung, (bala Baroma 8:6).

Tsela ea bobeli ea ho phela ke ka kelello e leng moeeng. Motho ea phelang ka Moea o phetha ho loka ha molao. Re na le bophelo le khotso hobane le oona Moea o emelana le moea oa rona hore re bana ba Molimo (Baroma 8:16).

Ho Baroma 6, Paulosi o ratile hore re lokela ho phela re sa etse sebe sa ka boomo, (bala Baroma 6:2). Ka matla a rona, re ka sitoa ho phela bophelo ba ho se etse sebe sa ka boomo. Re tsoaloe re sekametse sebeng 'me re le hole le Molimo. Re ka phethahatsa tlhoko ee ea Baroma 6 joang? Karabo e fumanoa ho Baroma 8. Ka matla a Moea o Halalelang, re ka bolaea mesebetsi e leng ea nama. Re ka phela bophelo bo halalelang ka lebaka la Moea oa Molimo o sebetsang ka ho rona.

Robert Coleman o ngotse a re:

Ho phela ka botlalo ba Moea o Halalelang ke monyetla o tšoanang ho balateli ba Krete kajeno joalo ka barutuoa ba pele ba neng ba lutse phaposing e ka holimo.... 'Nete ea khalalelo ea Moea e akaretsang tsohle, e nang le Krete, ke Bokreste ba Testamente e Ncha.<sup>28</sup>

Matla a Moea o Halalelang ho motho ea nehetseng thato ea hae ka botlalo ho Molimo a etsa hore bophelo ba khalalelo bo khonehe. Kantle ho Moea o Halalelang, ho tšoana le Krete ha ho khonehe. Moea o Halalelang ke eena ea etsang hore re khone ho phela bophelo bo halalelang.

Moprofeta Sakaria o ile a ba le pono ea kandelare ea khauta e nang le lifate tse peli tsa mohloare. Nkho ea oli e ne e le teng e lutseng e fepela mabone a eona a supileng ka oli. Lengelo le ile la hlalosa seo pono ena e se bolelang. Sorobabele, 'musi oa Yuda, o ne a laetsoe ho tsosa tempele bocha. Mosebetsi ona o moholohali o ne o shebahala joalo ka thaba. Molimo o ile a tšepisa hore mosebetsi ona o tla fihleloa, (bala Sakaria 4:6-7). Ka Moea, thaba eo e ne ee tla fetoha moo ho bataletseng.

Ka tsela e tšoanang, Bakreste le kajeno ba lokela ho tsoela-pele ho tlatsoa ka Moea o Halalelang. Paulosi o laetse Bakreste ba Efese hore ba tlale ka Moea (Baefese 5:18). Taelo eo e fanoa e le nakong ea bojoale; ena e lokela ho ba mokhoa oa rona oa kamehla oa bophelo. Bophelo ba rona ba letsatsi le letsatsi bo lokela ho laoloa ke eena. Re ikutloela thabo ea bophelo ba khalalelo ha re phela ka ho tlala ka Moea.

### **Khalalelo e Kenngoang Tšebetsong: Limelo tsa Bophelo bo Halalelang**

Ak'u nahane ha u ne u ka ba le bokhoni ba ho tlosa sebe sohle bophelong ba hau. Nahana ha u se u lokolohile Diketsong tsa boetsalibe /e maikutlong oohle a boetsalibe. Ho ke keng hoa eba le motho a ka le supang letho le fosahetseng. Na hoo ho ne ho tla phethahatsa morero oa Molimo ka bophelo ba khalalelo?

---

<sup>28</sup> Robert E. Coleman, *The Mind of the Master* (CO: Waterbrook Press, 1977), 35-36

Che! Khalalelo e fetisa ho qoba sebe feela. Khalalelo ke ho beha litholoana. Khalalelo ha se katamelo ea bophelo ka mokhoa oa molao o bileng o sa lokang. Khalalelo ke ho ba le likamano tse monate le Molimo. Khalalelo e bonahala ha Moea o Halalelang o hlahisa litholoana maphelong a rona.

## **Tholoana ea Moea**

► Bala Bagalata 5:13-26.

Ho Bagalata 5, Paulosi o bapisa bophelo ba Moea le bophelo ba nama. Ho fihlela nakong ena ho Bagalata, Paulosi o ne a ntse a hlokomelisa balumeli ba Bagalata ka kotsi ea ho lahla tokoloho ea bona ea Bokreste ebe ba khutlela litlamong tsa BaYuda tsa lihlabelo le tsa molao. Ba lokolotsoe boitekong ba bona ba ho batla ho fumana pholoho ka mesebetsi e molemo 'me ha ba lokela ho khutlela litlamong.

Leha ho le joalo, Paulosi o hlokomela kotsi e 'ngoe. Ha motho a lokolloa litlamong, a ka 'na a oela molekong oa ho sebelisa tokoloho ea hae ho khotsofatsa litakatso tsa hae. Kahoo Paulosi o hlokomelisa balumeli ba Bagalata hore, (bala Bagalata 5:13).

Paulosi o bontša phapang pakeng tsa mekhoe e 'meli ea ho phela. Tsela ea pele ea ho phela ke ho khotsofatsa litakatso tsa nama; ea bobeli ke ho tsamaea ka Moea. Paulosi o bapisa mekhoe ena e 'meli ka ho bontša litholoana tsa mokhoa o mong le o mong.

Ea pele, Paulosi o bontša mesebetsi ea nama. Ena ke tholoana ea semelo sa botho se seng ka tlas'a taolo ea Moea o Halalelang. Mesebetsi ea nama e kenyeletsa:

- Libe tsa ho feba: ho boka, bonyala, bootsoa
- Libe tsa bolumeli: ho rapela melimo ea bohata, boloi
- Sebe khahlanong le sechaba: hloeano, likomang, mona, bohale, likhang, liphapang, likhaohano, mohono
- Libe tsa takatso ea lijo: botahoa, meharo.

O phethela ka ho re, (bala Bagalata 5:21).

Paulosi joale o tsoela-pele ho bontša tholoana ea Moea. Tsena ke litholoana tsa bophelo bo pheloang tlas'a taolo le matla a Moea o Halalelang. Tholoana ena ke tholoana e le 'ngoe, eseng sehlopha sa litholoana. Ho 1 Bakorinthe 12, Paulosi o etsa lethathamo la lineo 'me o re molumeli ka mong o tla neoa e 'ngoe ea lineo tseo ke Moea, o ntseng o abela e mong le e mong kamoo o ratang kateng (1 Bakorinthe 12:5-11). Ho Bagalata, leha ho le joalo, ho na le tholoana e le 'ngoe feela, e ikholelang ka tlholeho pelong ea motho e mong le e mong ea tsamaeang ka Moea.

Tholoana ena ea Moea ha se lethathamo la limelo tseo re ka itlhlahisetsang tsona ka matla a rona. Ena ke tholoana e holang ka tlholeho ha re tlatsitsoe ka Moea. Ke tsela eo bophelo ba khalalelo bo shebahalang ka eona. Ke tholoana ea tlhaho ea pelo e halalelang.

Paulosi o thathamisitse mesebetsi ea nama e leshome le metso e mehlano. O boetse a thathamisa mahlakore a robong a tholoana ea Moea:

- Tholoana e amanang le Molimo: lerato, thabo, Khotso
- Tholoana e amanang le batho: sebete, khauho, molemo
- Tholoana e amanang le sebopeho sa kahare: botšepahi, bonolo, boitšoarō

Motso oa limelo tsena kaofela ke lerato. Lerato ke tlamō ea phetheho (BaKolose 3:14). Lerato le phethisa molao hape le fana ka sebaka sa moo tholoana ena e tla mela 'me hole hona teng.

### **Tsamaea le Moea**

Tholoana ea Moea khōlo ea bophelo ea tlholeho ha re tlatsitsoe ka Moea. Sena ke ntlha ea sehlooho eo Paulosi a e tiisang ho Bagalata moo a buang le batho ba ka lekang ho hlahisa tholoana ena ka ho ba hlokolosi ho phetha molao ka bo-bona. Paulosi o batla ba utloisise hore ba ke ke ba sebeletsa tholoana ena; empa ke se fihleloang ka ho phela ka Moea.

'Nete e lula e leka-lekana ho Paulosi ka ho hopotsa hore bophelo bo halalelang bo pheloa ka morero. Khalalelo ha e iketsahalle feela; re hloka ho hahamalla moo ho lekantsoeng teng (BaFilipi 3:12-14). Kolose, ho bonahala eka balumeli ba bacha ba bangata ba ne ba nahana hore ba ka tsoela pele ka mofuta oa bona oa bophelo oa pele. Tabeng eo, Paulosi o ile a tiisa ka matla hore ho lokela ho be le boiteko ba ho phela bophelo ba khalalelo. Ho BaKolose, Paulosi o ngotse mabapi le ho apara limelo tsa bophelo ba khalalelo. Sena se fana ka maikutlo a hore ho na le boitšoarō kapa boitaeo bo tsoelang pele bo tsamaeang le khalalelo, (bala BaKolose 3:12-14).

Ka tsela e tšoanang, Paulosi ha a batle hore Bakreste ba Galatia ba nahane hore bophelo ba khalalelo bo ka pheloa kante ho boitaeo le boikitlaetso. Tabeng ea molao, ba se ke ba hloka boikarabello.

► Bala Bagalata 5:16–25. Ho Bagalata 5:16–25, Paulosi o fa litaelo tse 4. Fumana tsona 'me u li ngole libakeng tse ka tlaase.

- \_\_\_\_\_ (temana 16). Ho tsamaea ke ketso e hlokanang matla.
- \_\_\_\_\_ (temana 18). Hore ke tsamaisoe, ke lokela ho latela. Hona ho hloka matla.
- \_\_\_\_\_ (temana 25). Ho phela ke boikhetheho hape ke ketso. Hona ho hloka matla.
- \_\_\_\_\_ (temana 25). Ena ke e matla ka ho fetisisa Diketsong tsena tse 'ne. Ke polelo e sebelisoang ke mabotho 'me e fana ka mohopolo oa ha masole a tsamaea ka mola. Ho tsamaea ka mola o le mong le Moea ho hloka matla 'moho le boitaeo.



Joalo ka Bakreste ba tlatsitsoeng ka Moea, ha rea lokela ho nahana hore re holile moeeng hoo re ke keng ra oela takatsong ea nama (Bagalata 5:17). Leha ho le joalo, ha rea lokela ho lumella Satane ho re kholisa hore re ke ke ra lokoloha taolong ea litakatso tsa nama **ka matla a Moea**. Ha re tsamaisana le Moea, re hlahisa tholoana ea Moea maphelong a rona.

► Ka mora ho ithuta tšusumetso ea Pentakonta holim’a barutuo ba pele le kamor’a hore le hlahlobe tholoana ea Moea, buisanang ka hore na bophelo bo tletseng ka Moea bo tla shebahala joang kajeno? Ke ka tsela efe ho tlatsoa ka Moea hoa rona ho lokelang ho ama boitšoaro ba rona, le bophelo ba Bokreste ba letsatsi ka leng, esita le bosebeletsi ba rona?

### **Ba Fumane Sephiri - Jonathan le Rosalind Goforth**

Jonathan le Rosalind Goforth e ne e le barumuoa ba Canada ba Presbyterian ho ea naheng ea China ho tloha ka 1888 - 1933. Mofumahali Goforth o ne a leka ho latela mohlala oa Jesu bophelong ba hae, empa ka makhetlo-khetlo a 'na a hloleha. Kamor’a lilemo tse mashome a mabeli tsa ho sokola, Rosalind Goforth o ile a ithuta hore lekunutu la bophelo ba Mokreste ba tlhlo ke Moea o Halalelang o phelang kahare ho rona 'me o hlahisa semelo sa Krete maphelong a rona. Mofumahali Goforth o ile a fana ka bopaki ba hore bophelo ba hae kamor’a moo bo ka akaretsoa ka lentsoe le reng ho “phomola.”

Ha ba ntse ba lumella Moea o Halalelang ho sebetsa ka bona, ba Goforth ba ile ba bona Molimo a etsa lintho tse hlollang, Jonathan Goforth o ile a sokola likhoeli tse 'maloa a ntse a ithuta puo ea Se-China. Ha a leka ho ruta ka se-China, e ne e le batho ba fokolang ka palo ba neng ba mo utloisisa. Ka letsatsi le leng ha a ntse a ruta, hanghang o ile a qalella ho bua ka tsela e hlakileng, a sebelisa lipolelo tseo a neng a sa khone ho li bua pele ho moo. Hamorao o ile a tsebisoa hore sehlopha sa baithuti naheng ea Canada ba ne ba nkile letsatsi leo ba ntse ba rapella mosebetsi oa hae. Ho tloha tsatsing leo, Jonathan Goforth o ile a ba le bokhoni ba ho bua puo ea se-China hantle. Seo Goforth a neng a sa khone ho se etsa, Moea o Halalelang o ile a se etsa a sebelisa mohlanka ea inehetseng.

Molimo o ile a tataisetsa ba lelapa la Goforth likarolong tsa China tse neng li e-so ka li fihleloa ka Evangeli. Ke batho ba baloang ka likete ba ileng ba sokoloha ka lebaka la bosebeletsi ba lelapa lena la Goforth. Senotlolo sa katleho ea bona e ne e se hobane ba e-na le bokhoni bo boholo; empa senotlolo seo e ne e le ho phela ba tlatsitsoe ka Moea o Halalelang.

Tšebeletsong ea lepato la hae, moruti oa Knox Presbyterian Church o ile a bolela lekunutu la katleho ea Jonathan Goforth. “E ne e le monna ea tahiloeng ke Molimo – ea inehetseng ka ho felletseng a bile a khethehile. O ne a kolobelitsoe ka Moea o Halalelang le ka mollo. O ne a tlatsitsoe ka Moea hobane a ne a ntšelitse bo-eena kante.”<sup>29</sup>

Jonathan le Rosalind Goforth ba ne ba utloisisa bohlokoa ba ho tsamaea ka Moea letsatsi le letsatsi. Ba ne ba utloisisa thapelo ea sefela sa Edwin Hatch se reng: “Bululela holim’a ka,

---

<sup>29</sup> E fetoletsoe ho tsoa ho Wesley L. Duewel, *Heroes of the Holy Life* (Grand Rapids: Zondervan, 2002), 52-64.

Moea oa Molimo, ho fihlela pelo ea ka e hloekile.” Ha lipelo tsa rona li hloekile, re tla lakatsa thato e le ’ngoe: re tla batla seo Molimo a se batlang.

## **Boikhopotso ba Thuto ea 9**

(1) Ho halalela ho bolela ho phela a tlatsitsoe ka Moea o Halalelang.

(2) Bophelong ba hae lefatšeng, Jesu o ile a sebeletsa ka matla a Moea o Halalelang. Jesu o ile a tšepisa matla a tšoanang ho balateli ba hae. Ka lebaka la tšepiso eo, o ile a tiisetša barutuo ba hae hore, (bala Johanne 16:7).

(3) Ha barutuo ba ne ba tlatsoa ka Moea o Halalelang ka letsatsi la Pentakonta, maphelo a bona a ile a fetoha. Ke matšoao a mararo a ileng a bontša tšebetso ena e ncha ea Moea o Halalelang:

- Molumo o kang oa moea o fokang ka sefefe e ne e le letšoao le bontšang matla a ho tla hoa Moea ona.
- Maleme a arohaneng, a kang malakabe a mollo a ileng a lula holim’a e mong le e mong oa bona a ne a emetse bohloeki bo tsamaeang le Moea o Halalelang..
- Bokhoni ba ho bua ka maleme asele bo ile ba hlomella barutuo hore ba pakele batho ba lichaba tsohle.

(4) Kaha kereke ea pele e ne e phela ka matla a Moea o Halalelang, ba ile ba ba le boiphihlelo ba:

- Ho ekeletsoa matla a besebeletsi
- Ho ba sebete sa ho bolela evangeli
- Ho ba sebete sa ho tobana le litlhoriso
- Bophelo ba tlhola
- Tataiso bakeng sa besebeletsi
- Bonngoe mahareng a balumeli

(5) Joalo ka ha barutuo ba ne ba halalela feela ka lebaka la Moea o Halalelang, le rona re halalela ha feela re phela ka matla a Moea o Halalelang. Kantle le ho tlatsoa ka Moea o Halalelang, ha re khone ho latela mohlala oa Jesu Krete. Ke ka matla a Moea feela re ka phelang bophelo bo tšoanang le ba Krete.

(6) Ha re phela ka Moea, maphelo a rona a tla bontša tholoana ea Moea e itlhahisa ka tlholeho ka lebaka la bophelo bo halalelang.

## **Kabelo ea Thuto ea 9**

(1) Ngolla Mokreste ea sa leng monyenyanane lengolo, u arabe moo a itseng ho uena, "Kea tseba hore ke Mokreste, empa ke ntse ke tsoela-pele ho sokolisoa ke maikutlo a nama le likarolong tseo ke fokolang ho tsona ha ke kopana le liteko." Thusa Mokreste enoa ea monyenyanane ho utloisisa bohlokoa ba ho tlala ka Moea.

(2) Qala thuto e latelang ka ho pheta Bagalata 5:22-25.

# Thuto ea 10

## Khalalelo ke Ho Tšoana le Krete

### Sepheo sa Thuto

Qetellong ea thuto ena, baithuti lokela ba be ba ka:

- (1) Ela hloko hore khalalelo ke eona khubu ea taba li-epistoleng.
- (2) Thabela tokisetso ea Molimo ea ho etsa hore bana ba hae ba tšoane le Krete.
- (3) Utloisisa teka-tekano e pakeng tsa seo Molimo a seng a se entse ho re halaletsa le seo Molimo a ntseng a tsoela-pele ho se etsa ha re ntse re hola khalalelong.
- (4) Ananela monyetla oa bophelo ba tlhola e tsitsitseng holim'a sebe sa ka boomo..
- (5) Tseba BaFilipi 2:1-5 ka hlooho.

### Ho Phela ka Kelello ea Krete

Ke hoseng ho hoholo hoa Sontaha lilemong tse ka bang mashome a mararo kamor'a ho nyolohela hoa Jesu leholimong. Sehlopha sa Bakreste se kopane ntlong ea motho e mong Filipi bakeng sa ho khumamela Molimo. Ba thabile hobane ba fumane lengolo le tsoang ho Paulosi, moruti oa bona eo ba mo ratang.

Moetapele oa bona o qala ho bala lengolo la Paulosi. Paulosi o ngola ho tsoa pelong ea hae e tletseng ka thabo. Leha a le teronkong ea Roma, o ithabela ho Krete. Paulosi ha a tsebe hore na o tla lokolloa kapa o tla bolaoa, empa o na le Khotso. Hobaneng?

► Bala BaFilipi 1:21.

Joalo ka ntate oa bona moeeng, Paulosi o khothatsa Bakreste ba Filipi ho tsoela pele ho hola tumelong ea bona ea Bokreste. O batla ho bona Bakreste bana ba holile joalo ka batho ba halalelang bao Molimo a ba bilelitseng ho ba bona. Paulosi o ngola a re, (bala BaFilipi 1:27). Phelang ka tsela e tšoanelang Evangeli? Taba ee e khoneha joang?

#### Thapelo Bakeng sa Khalalelo

"Ha ke sa le oa ka, empa ke oa hau.

Mpehe ho seo u se ratang,  
Mpapise le bao u ratang ho mpapisa le  
bona.

Nketse hore ke sebetse,  
Nkenye har'a mahlomola.  
A nke ke sebeletse uena, kapa ke  
beheloe kathoko bakeng sa hau,  
Ke phahamisoe bakeng sa hau,  
Kapa ke kokobetsoe bakeng sa hau.

Nke ke khore; nke ke hloke.  
Ntumelle ho ba le lintho tsohle,  
Ntumelle ho hloka tsohle.

Ke fana ka lintho tsohle ka bolokolohi le  
ka pelo eohle hore li u khahlise hape u  
etse ka tsona kamoo u ratang.

'Me joale, Molimo o khanyang hape o  
bokoang, Ntate, Mora le Moea o  
Halalelang, u oa ka, 'me ke oa hau."

- John Wesley

Karabo ea Paulosi ke ho re: Phelang ka kelello ea Krete, (bala BaFilipi 2:5). Haeba Bakreste ba Filipi ba ka ba le pelo ea Krete, ba tla tšoana le Krete. Lekunutu la bophelo ba khalalelo ke ho phela ka pelo ea Krete. Khalalelo ke ho tšoana le Krete.

## **Molaetsa oa Li-Epistole: Bakreste ba Lokela Ho Halalela**

### **Li Epistole li Bilelitse Bakreste Khalalelong**

Mokreste e mong le e mong o bilelitsoe ho halalela. Molimo o re khethetse ho Krete, ha o no o e-so ho thee lefatše, hore re tle re halalele, 'me re hloke sekoli pel'a oona (Baefese 1:4). Morero oa Molimo oa ka ho sa feleng ka pholoso e ne e le ho re etsa sechaba se halalelang. Sena ke taba-tabelo ea molateli emong le oa krete.

Ha hona Bakreste ba BaYuda ba lilemong tsa mongoaha-kholo oa pele ba ileng ba makala ha ba bala hore Bakreste ba bilelitsoe ho halalela. Molimo o laetse hore batho ba halalele ho Levitike (Levitike 19:2, Levitike 20:7). Bakreste ba BaYuda ba ne ba tseba hore Molimo o lebeletse hore bana ba hae ba halalele.

Leha ho le joalo, Balichaba ba ne ba hotse ba rapela melimo ea bahetene e neng e sa halalele. Molaetsa oa khalalelo e ne e le o sa tloaelehang ho Balichaba. Petrose o ile a ngolla Bakreste ba Balichaba ba neng ba lopolotsoe mokhoeng oa bona oa lefeela, oo ba neng ba o rutiloe ke bo-ntat'a bona (1 Petrose 1:18). Batho ba na e ne e bile bahetene ba se nang tsebo ea ho loka ha 'nete, empa Petrose o ile a ba biletsa hore ba phele bophelo ba khalalelo.

Baapostola ba ile ba ruta Balichaba ba sokolohang hore na ba ka phela bophelo ba khalalelo joang. Ba rutile molaetsa oona ka maikutlo a matle: "Sena ke seo le lokelang ho se etsa." Ba rutile molaetsa ona ka maikutlo a seng matle: "sena ha lea lokela ho se etsa."

Ka makhetlo a mashome a mane, li-epistoleng balumeli ba bitsitsoe "bahalaleli" e leng se bolelang ka kotloloho bahalalelang. Mohalaleli ke motho ofe kapa ofe ea phelang ka tsela eo Molimo a bilelitseng bana ba hae ho phela ka eona. Mokreste e mong le e mong o bilelitsoe ho halalela; Mokreste e mong le e mong o bilelitsoe ho ba mohalaleli.

### **Barutuo ba Ile ba Laela Balumeli ho Phehella Khalalelo**

Paulosi o ile a hopotsa balumeli ba Korinthe hore ke tempele ea Molimo o phelang (2 Bakorinthe 6:16). Tempele e ne ele sebaka se halalelang seo ho khumameloang ho sona. Kahobane re tempele ea Molimo, (bala 2 Bakorinthe 7:1).

Bana ba Molimo ba bilelitsoe hore ba hlobole, kamoo metsamao ea bona ea pele e neng e le kateng, motho oa khale, ea bolisoang ke litakatso tse thetsang le ho apara motho e mocha (Baefese 4:22-24). Paulosi o ngotse hore Krete , (bala Tite 2:14). Mongoli oa BaHebheru o laetsoe babali ba hae ho pheella ho ba le Khotso le batho bohle, le khalalelo eo ho seng motho a tlang ho bona Molimo ha a sena eona (BaHebheru 12:14). Bana ba Molimo ba bilelitsoe ho halalela.

## **Baapostola ba Ile ba Rapella hore Bakreste ba Halaletsoe**

Paulosi o ile a rapella hore bana ba Molimo ba halaletsoe.

► Bala 1 BaThesalonika 1:2-10. Hlalosa Bakreste ba Thessalonika qalong ea lengolo la Paulosi.

Batho ba ileng ba amohela lengolo lena la Paulosi ho kereke ea Thessalonika e ne e le Bakreste ba 'nete. Ba ne ba tsebahala ka tumelo ea bona, lerato la bona, le ka ho ba le tšepo e tiileng. E ne e le banab'abo ba ratoang ke Molimo. Evangeli e ne e fihlile ho bona eseng ka lipolelo feela, empa e tlile le ka matla, ka Moea o Halalelang, le ka kholiso e kholo. Ba ne ba amohetse lentsoe har'a matšoenyeho a maholo, ka thabo ea Moea o Halalelang. Ba ile ba fetoha ba etsetsang bohle ba lumetseng Masedonia le Akaea mehlala. Ba ne ba furalletse litšoantšo ho sebeletsa Molimo ea phelang, oa 'nete.

Ba ne ba halalela. Ha ba tsoaloe labobeli, e ne e le ha Molimo a qala ho ba halaletsa. Empa, Paulosi o ile a rapela a re, (bala 1 BaThesalonika 5:23).

Thapelo ena e ne e le bohlokoa ho Paulosi. O ne a ntse a rapela bosiu le motšoare ka ho fetisisa, hore re ke re tsebe ho bona lifahleho tsa lona le ho ekeletsa tumelo ea lona ka seo e haelloang ke sona (1 BaThesalonika 3:10). Batho bana e ne e le Bakreste ba 'nete; empa Paulosi o ne a tseba hore khalalelo e kahare ho bona e ka eketseha. Hona ha ho bolele hore e ne e le Bakreste ba nang le phoso.; Paulosi o ne a se a ba pakile ka boiphihlelo ba bona ba Bokreste.

Ho ne ho se na letho le phoso ba boiphihlelo ba bona ba Bokreste, empa Paulosi o ne a tseba hore ba sa ntse ba hloka kholo e tsoelang pele. Ba ne ba halalelitsoe, empa o ile a rapela hore Molimo a ba halaletse **ka ho felletseng**. O ile a rapela hore Molimo a ba halaletse hape le hape. O ile a rapela hore Molimo a ba hloekise 'mele, pelo le moea.

### **Li Epistole li tšepisitse hore Bakreste ba ka Halalela**

Ha a ne a rapela hore Baefese ba tlale botlalo bohle ba Molimo, Paulosi o ne a kholisehile hore Molimo o tla araba thapelo ea hae hobane o ne a rapela, (bala Baefese 3:20). Hangata re qotsa lengolo lena thapelong e le ha re rapella litlhoko tsa rona tsa bophelong kapa chelete, feela re filoe lengolo lena mabapi le pheo eo Molimo a re beetseng eona lentsoeng la hae e leng: ho tlala botlalo ba Molimo. Pitso ea Molimo ea ho ba le pelo e halalelang, ha se taelo e sa khoneheng. Pitso ea Molimo e teng bakeng sa molumeli e mong le e mong.

Ha a ne a rapella Bakreste ba Thesalonika, Paulosi o ne a kholisehile hore Molimo o tla araba thapelo ea hae. Paulosi o ile a bua mantsoe ana kamor'a thapelo ea hae ka tšepiso ena, (bala 1 BaThesalonika 5:23-24). Li-Epistole li tšepisa hore **re ka halalela**.

### **Khalalelo ke Ho Tšoana le Krete**

Testamenteng ea Khale, Molimo o senotse molaetsa oa pelo e halalelang le matsoho a halalelang ka Molao le ka bapofeta. Bophelong ba Jesu Krete, Molimo o fane ka mohlala

oa lerato le phethehileng. Ho Diketso, Bakreste ba pele ba bontšitse hore hoa khonahala ho balumeli bohle hore ba phele bophelo ba khalalelo ka matla a Moea o Halalelang. Li-Epistoleng, molaetsa oa khalalelo o kenngoa tšebetsong bophelong ba molumeli ba letsatsi le letsatsi.

### **Khalalelo ke Pelo le Kelello tse Tšoanang le tsa Krete**

Li-Epistole li ruta hore Khalalelo ke ho tšoana le Krete. Balumeli ba lokela ho tšoana le Krete. Ho halalela ho fetisa boitšoarō bo bonoang kantle feela; khalalelo e qala ka pelong. Ho halalela ke ho tšoana le Krete ka lipelong tsa rona le likelellong tsa rona.

Paulosi ha a re, “Le itšoare joalo ka Jesu Krete.” Empa o phehella hore, “Le tšoane le Jesu Krete.” Ha hoa lekana ho etsisa Krete kantle feela; re lokela ho tšoana le eena le kahare. Morero oa Molimo ke ho fetolela bana ba hae setšoantšong sa Krete, (bala Baroma 8:29). Morero oa ka ho sa feleng oa Molimo ke ho re etsa hore re tšoane le Krete. Sena ke sona se boleloang ka ho halalela.

O mong oa mehlala e hlollang ea mohopolo ona o fumanoa lengolong la Paulosi ho Ba-Korinthe. Kereke ena e ne e e-na le mathata a mangata, empa Paulosi o ne a ntse a ba bitsa bahalaleli hape a ba biletsa ho phela bophelo ba khalalelo. Ke ka tsela efe sehlopha see sa balumeli ba sa holang moeeng, se ntseng se sokola ho hlola lintho tsa bohetene ba bona bo fetileng, ba neng ba ka ba le tšepo ea ho halalela? Paulosi o ile a araba ka ho re, (bala 2 Bakorinthe 5:21).

Kahobane Krete o ile a etsoa sebe ka lebaka la rona, rona re ka ba ba lokileng pel’a Molimo. Testamenteng ea Khale, mali a sehlabelo se entsoeng ka lebaka la sebe a ne a koahela libe tsa bohle ba neng ba tla ho Molimo ka tumelo. Kajeno, mali a Jesu a koahela libe tsa bohle ba tlang ho Molimo ka tumelo. Empa Paulosi o tšepisa ho fetang ho koahela feela. Ha re koaheloe feela; hape re fetoloa. Hobane re boelantsoe le Molimo, re se re le ba lokileng pel’a Molimo. Paulosi o ngotse a re, (bala 2 Bakorinthe 5:17-18).

Morena Jesu ha a shoela ho koahela borabele ba rona bo ntseng bo tsoela-pele khahlanong le Molimo. Ka Krete, re babopuoā ba bacha. Ha re sa le marabele; empa re libopuoā tse ncha tse boelantsoeng le Molimo o halalelang.

Phetoho ena e tebile ho feta boitšoarō ba kantle feela. Paulosi o ile a rapella Ba-Thessalonika a re, (bala 1 BaThessalonika 5:23).

“Ba phethehileng” e fana ka maikutlo a ho halaletsoa likarolong tsohle tsa limelo tsa bona. Temana ena e ka fetoleloa ka ho re “a le halaletse hape le hape.” Paulosi o ile a rapella hore balumeli bana ba fetoloe ‘moeeng, lipelong le ‘meleng ea bona eohle. O tšepisitse hore, (bala 1 BaThessalonika 5:24).

Phetoho ena e ama likarolo tsohle tsa bophelo. Ho BaFilipi, Paulosi o ngotse ka tsela e ncha ea ho nahana. O e bitsa “pelo ea Krete.” Paulosi o hlalosa ho ikokobetsa hoa Jesu ka

morero thatong ea Ntate. Jesu o ikokobelitse, a iketsa ea utloang ho isa lefung, e, le lefung la sefapano (BaFilipi 2:8).

Paulosi ha a re, "Boikokobetso ba Krete e ka ba mokhoa o motle oa ho phela, empa ha se ntho e ka khonahalang ho 'na le lona ho ba le semelo sena." Ho e-na le hoo, o re, (bala BaFilipi 2:5). Pelo ena ke ea hau; le ka tšoana le Krete!

Re ka ba le moea o tšoanang, oa boikokobetso ba lerato bo ileng ba tataisa boinehelo ba Jesu thatong ea Ntate. Re ka ba le pelo ea Krete. Re ka talima bophelo ka mahlo a Jesu Krete. Sena ha se etsahale ka ho ba le merero e metle, empa ka ho ba le lipelo tse fetohileng. Ha rea biletsoa ho tšoana le Krete ka Diketso feela, empa e le ho tloha ka pelong. Re bilelitsoe ho ba le pelo e bileng ho Krete.

### **Khalalelo ke Boitšoarong bo Tšoanang le ba Krete**

Batho ba bang ba ka araba ka ho re, "Pelo ea ka e tšoana le ea Krete, empa Diketso tsa ka tsona ha li joalo. Kahare, ke na le sepheo se setle empa kantle ha ke phele joalo ka Krete." Baapostola ba ne ba sa amohele karohano ena pakeng tsa semelo se kahare le se kantle. Semelo sa rona sa kahare se tla bonahala Diketsong tsa rona tse kantle. Ho halalela ho bolela ho tšoana le Krete boitšoarong ba rona.

Molaetsa oona o bonahala li-Epistoleng ka kakaretso. Paulosi o itse Krete o ile a itella kereke hore a tle a e halaletse. Krete o ile a itella hore a tle a halaletse monyaluoa oa hae. O ntse a hlophisa monyaluoa ea se nang letheba le letsika, leha e le letho le joalo ka tseo; e mpe e be e halalelang, e se nang sekoli (Baefese 5:26-27).

Na u ka nahane ka monyaluoa lefatšeng moo ea ka reng ho monna oa hae, "Ke tla u hlokela botšephehi ka 'mele oa ka; empa pelo ea ka eona e tla be e hloekile"? Che, ho ke ke ha e-ba joalo! Ka mokhoa o joalo le eena Paulosi o sitoa ho nahana ka monyaluoa oa Krete ea ka reng, "Pelo ea ka ea halalela, empa Diketso tsa ka tsona ha li na halalela." Kereke e bilelitsoe ho ba monyaluoa ea senang letheba le letsika.

Paulosi o ile a ngolla Bakreste ba Thesalonika. Kereke ena e ne e e-na le balumeli ba BaYuda esita le balumeli ba Thessalonika ba sa tsoang litumelong tsa bohetene. Balumeli ba BaYuda ba ne ba tseba litaello tsa Testamente ea Khale tsa boitšoarong ba khalalelo, empa haele bahetene bona ba ne ba phetse libakeng tseo bohloa e leng bophelo bo tlolehileng.

Paulosi o ile a ruta balumeli bana ba bacha seo ho phela bophelo ba khalalelo ho se bolelang. O ile a rapela hore Molimo a tle a tiise lipelo tsa lona; li hloke sekoli khalalelong, pel'a Molimo, ntat'a rona (1 BaThesalonika 3:13). Balumeli bana ba bacha ba ne ba lokela ho halalela lipelong tsa bona ba bile ba ntse ba halalela le boitšoarong. Khalalelo ha e ame lipelo tsa bona feela; e laola le boitšoarong ba bona.

#### **► Bala 1 BaThesalonika 4:3-6:**

Ho halalela ke ho ba le pelo e tšoanang le ea Krete e susumetsang le boitšoarong bo tšoanang le ba Krete. Ho halalela ke ho tšoana le Krete.



## Khalalelo Lerato le Tšoanang le la Krete

Li-Evangeli li bontša hore khalalelo ke ho rata Molimo le ho rata ba habo rona. Paulosi o nyalanya boitšoarō bo tšoanang le ba Krete le lerato le tšoanang le la Krete. O qholotsa Bakreste ba Efese hore e be baetsisi ba Molimo, joalo ka bana ba ratoang. Ba tla etsisa Molimo joang? Ka ho phela ka lerato le tšoanang le la Krete, (bala Baefese 5:1-2).

Ha ba tsamaea ka lerato le boitelo, Bakreste ba bonahatsa setšoantšo sa Molimo. Ho halalela ke ho rata joalo ka ha Krete a ratile. Ho Baroma 14, Paulosi o fana ka mohlala o phelang oa lerato lena le tšoanang le la Krete. O biletsa balumeli ho tela tokoloho ea letsoalo la bona bakeng sa banab'abo bona ba fokolang. Hobane'ng?, (bala Baroma 14:15). Haeba tokoloho ea ka e etsa ngoaneso a oele, ha ke tsamaee ka lerato. Krete o ile a lesa litokelo tsa hae ka lebaka la lerato la hae ho rona; le rona re biletsoa ho lahla litokelo tsa rona ka lebaka la lerato la rona ho ba bang. Lena ke lerato le tšoanang le la Krete.

Tlhaloso e tsebahalang haholo ea Paulosi ea seo ho rata joalo ka Krete ho se bolelang ke 1 Bakorinthe 13. Ho kereke e neng e tsebahala ka likarohano, boikhantšo, mona le boikhohomoso, Paulosi o ba ngoletse a re, (bala 1 Bakorinthe 13:4-6).

Ho 1 Johanne, moapostola o tiisa lintlha tse sebetsehang bakeng sa lerato le tšoanang le la Krete. 1 Johanne e bontša hore na lerato le tšoanang le la Krete le bonahala ka tsela e joang.

- Lerato le hloka motho ea mamelang. Ha re rata Molimo, **re tla mo mamela** (1 Johanne 2:5; 1 Johanne 5:3). Re ke ke ra arola lerato le ho mamela.
- Lerato le hloka pelo e sa arohanang. Ha re rata Molimo, **re ke ke ra rata lefatše**, (bala 1 Johanne 2:15). Re sitoa ho rata Molimo le lefatše le khahlanong le Molimo ka nako e le 'ngoe. Motho ea halalelang o rata Molimo, ka pelo e sa arohanang.
- Lerato le hloka likamano. Ha re rata Molimo, **re tla rata le Bakreste ba bang**, (bala 1 Johanne 4:20-21). Johanne o ruta hore ha ho khonehe ho rata ho rata Molimo empa o hloile ngoan'eno oa Mokreste.

Litholoana tsa lerato lee la le tšoanang le la Krete ke life? Ke boitšepo pela Molimo, (bala 1 Johanne 4:12). Lerato lena le phethehileng le re nea tšepo e tiileng ka letsatsi la kahlolo hape le leleka tšabo ea kahlolo (1 Johanne 4:17-18).

Re ka phela lerato lee le phethehileng joang?, (bala 1 Johanne 4:17). Re ka ba mohlala oa lerato le tšoanang le la Krete ha feela Krete a phela kahare ho rona.

## Bophelo Ba Khalalelo: Ua Halalela; Phehella Khalalelo

Tumeliso o ne a e-na le takatso ea ho ba mohalaleli. Ka bomalimabe, kutloisiso ea Tumeliso ka khalalelo e ne e itšetlehile ka maikutlo a hae le boikutlo ho feta ka Mangolo. Ka lebaka lena, Tumeliso o ile a tloha thutong e 'ngoe e feteletseng ho ea ho e 'ngoe.

Tumeliso o ile a etsa nakoana e itseng a ntse a itima lijo khafetsa, a rapela lihora tse 'maloa ka letsatsi, hape a leka ho ipea tlas'a taeo hore a tle a halalele. O ne a na le bonnete ba hore re halaletsoa ke ho ipea tlas'a boitaeo.

Tumeliso o ile a phakisa ho nyahama 'me a tlohela boiteko bona. O ile a qalella ho ba bohlasoa boitšoaronng ba semoea hape a inehela sebeng. Ha motho a 'motsa ka taba ena ea sebe, Tumeliso o ile a nkaraba ka ho re, "Ke phela ka mohau 'me joale ha ke sa hloka boitšoaro. Molimo o tla nkhalaletsa ka nako ea hae."

Ka nako e 'ngoe, Tumeliso o ne a rapella hore a fumane mpho e 'ngoe e tsotehang ea moea. O ne a entse qeto ea hore khalalelo ke ho ba le lineo tsa moea le matla a kantle.

Ho batla khalalelo hona hoa Tumeliso ho ne ho itšetlehile ka boikutlo ho e-na le hore e be ka ho bala mangolo ka hloko. O ne a sa ithuta Bibe le hore a utloisise tsela eo khalalelo e pheloang ea eona bophelong ba letsatsi le letsatsi.

Li-Epistole li ruta linnete tsa bohlokoa ka bophelo bo halalelang. Ha re ka lebala melaoana ena, re tla iphumana re ferekane kutloisisong ea rona ea khalalelo. Baapostola ba ngotse ho re bontša kamoo re ka phelang bophelo ba khalalelo kateng, e leng boo Molimo a re bilelitseng bona.

### **U Halalelitsoe; U Ntse u Halaletsoa**

Ha Paulosi a ne a ngolla bahalaleli, o ne a re, "Ua halalela." Mohalaleli o se ntse a halalela, empa Paulosi o ile a ngolla bahalaleli bana a re, "Le halalele." Lea halalela; le lokela ho tsoela pele ho hola khalalelong.

Teka-tekano ena e bonoa ka makhetlo a mangata li-Epistoleng. Re le balumeli, re se ntse re halalela, empa re tsoela pele ho hola khalalelong ha re tsamaea ka ho mamela Molimo.

Mongoli oa buka ea BaHebheru o bontša hore re halalelitsoe ka lefu la Krete, (bala BaHebheru 10:10). Re halaletsoa ke lefu la Krete.

Mongoli eo o tsoela pele o re, (bala BaHebheru 10:14). Polelo ena e kenyelelitse mantsoe a mabeli a amanang le taba ea sehlooho ea khalalelo. Ka lefu la hae, Krete o phethisitse (*teleios*) ba ntseng ba halaletsoa (*hagiazo*). Temana ena e re bolella hore:

### **Re Halalelitsoe: (BaHebheru 10:14)**

Krete o shoele e le hore rona re lokolloe matleng a sebe. Jesu le eena, a tle a halaletse sechaba ka mali a hae, o kile a shoela ka ntle ho monyako oa motse (BaHebheru 13:12). Morero oa Molimo o ho halaletsa sechaba sa hae o ne o phethahale ka lefu la Jesu. Re entsoe ba phethehileng.

### **Re Ntse re Halaletsoa: (BaHebheru 10:14)**

Lefu la Krete le fihlelletse morero oa Molimo oa ho halaletsa ka ho sa feleng, empa kholo ea rona khalalelong e tsoela pele bophelong bohle ba rona. Ke tšebetso e tsoelang pele. Ka lefu la Krete, rea halalela; ka lefu la Krete, re ntse re halaletsoa.

Bopaki ba Paulosi bo hlakisa taba ena. Ho BaFilipi 3, Paulosi o ngola hore **ha a so ka a fihlela phetheho**, empa litemana tse 'maloa kamorao ho moo, o ipitsa ea **seng a** phethehile, (bala BaFilipi 3:15). Mantsoe a ngotsoeng ka mongolo o tebileng ka bobeli a tsoa ho *teleios*. Bobeli ba mantsoe a o a ka fetoleloa ho lentsoe "phetheho."

► Bala BaFilipi 3:12-15.

Paulosi o re, "ha ke so phethehe." O tsoela pele o re, (bala BaFilipi 3:15). Paulosi ha a e-so ka a fihlella sepheo sa hae; o ntse a hola khalalelong. Kutloisisong ena, ha a e-so phethehe. Empa Paulosi o ntse a etsa ka matla oohle ho fihlella sepheo. O ikemiselitse ho qeta lephallo. Kutloisisong ena, Paulosi o se a phethehile. Paulosi a ka re "ha ke e-so phethehe" hape "ke phethehile" seratsoaneng se le seng.

Ho phetheha ha ho bolele hore re hloele lere ea mesebetsi e re etsang ba phethehileng. Ho e-na le hoo, ho bolela hore re inehetse ka ho felletseng mohaung oa Molimo bophelong ba rona. Ke ketsahalo ea hang-hang kaha ho na le nako eo ka eona Molimo a khutlisetsang lipelo tsa rona tseleng ea hae. Ho boetse ke leeto kaha motsamano oa rona o re isang ho Molimo o tla tsoela pele bophelo bohle ba rona.<sup>30</sup>

Ak'u nahane ka sebakali sa bolo ea maoto<sup>31</sup> se rahelang bolo lipalong; ke thao e phethahetseng. Thao ena ha e fetohile e phethahetseng feela ha e kena lipalong. Ha e ntse e fofa moeeng, thao ena e se e ntse e phethahetse; e tsamaea tseleng e eang lipalong. E phethahetse ho tloha motsotsong oo sebakali se rahang bolo.<sup>32</sup>

Ka tsela e tšoanang, Paulosi o ne a habile khoeleng. O ne a ipehetse meoloane 'me joale o ne a matha a habile sepheong sa hae ka pelo e sa arohanang. O ne a e-so ka a fihlella sepheong sa hae, empa o ne a le ka tseleng e lebisang teng. O ne a e-so phethehe; empa hape o ne a se ntse a phethehile.

Joalo ka balumeli, re bahalaleli ba amohetsoeng ke Molimo ka Krete, empa re bilelitsoe ho inehela re le sehlabelo se phelang 'me re tsoele pele ho hola letsatsi le letsatsi ho mameleng le boinehelong (Baroma 12:1). Re se ntse re halalelitsoe; re ntse re halaletsoa.

### **Le Bahalaleli: Le Lokela Ho Phela Joalo ka Bahalaleli**

Paulosi o ile a ngolla bahalaleli ba neng ba phela Korinthe. 1 Bakorinthe e ngolletsoe batho ba halalelang, (bala 1 Bakorinthe 1:2). 2 Bakorinthe e ngolletsoe, (bala 2 Bakorinthe 1:1).

---

<sup>30</sup> Timothy C. Tennent. *The Call to Holiness* (Franklin: Seedbed Publishing), 2014), 54-55

<sup>31</sup> Amerika koana papali e bitsoa bolo.

<sup>32</sup> Papiso ena e nkuoe ho tsoa ho T.A. Noble, *Holy Trinity: Holy People* (Eugene: Cascade Books, 2013), 23.

E ne e le bahalaleli – empa ho ne ho na le lintho tse ngata tseo ba lokelang ho ithuta tsona hore ba phele joalo ka bahalaleli.

Ho na le litsela tse peli tseo Bakreste ba sitoang ho utloisisa 'nete ena ka tsona. Ea pele, Bakreste ba bang ba re, "Ke bitsoa mohalaleli hobane Molimo o bona ho loka hoa Krete ho e-na le sebe sa ka. Khalalelo ea ka ke pale ea se-molao e seng ea 'nete. Nke ke ka halalela lefatšeng lena, empa Molimo o mpitsa ea mohalaleli leha hole joalo." Baroma 6 e hlakisa hore karabo ena ha e amohela ho Paulosi. Batho ba halalelang ba lokela ho phela bophelo bo halalelang.

Ea bobeli, Bakreste ba bang ba re, "Ke mohalaleli. Ha nke be ke haelloe ke ho fihlela tekanyetso e felletseng ea Molimo ea phetheho. Ha nke be ke bake hobane ha ho na mohla ke fosang. Ke mohalaleli!" Paulosi o hanyetsa phoso ena ka matla a tšoanang le ao a hanyetsang phoso ea pele ka oona. Paulosi o ile a ngola e le ho ruta bahalaleli ba Korinthe ho phela bophelo a khalalelo. Ba ne ba haelloa ke tsebo le kholo, kahoo Paulosi o ile a ruta bahalaleli bana ho phela joalo ka bahalaleli. Batho ba halalelang ba lokela ho phela bophelo bo halalelang.

Motse oa Korinthe o ne o tumme hampe ka boitšoarō ba bohetene ba baahi ba oona. Paulosi o bitsa balumeli ba phelang motseng o khopo ona hore ba be le boitšoarō ba khalalelo. Ba ne ba tlameha ho qoba bohloa hobane 'mele ea bona ke litho tsa Krete (1 Bakorinthe 6:15). Paulosi o etsa lethathamō la boitšoarō bo sa lumelloang 'musong oa Molimo: , (bala 1 Bakorinthe 6:10).

Kamor'a lethathamō lena la libe, Paulosi o oa talima, (bala Ba-Korinthe 6:11). Paulosi o ngolla batho ba kileng la etsa libe tsena. Joalo ka balumeli, Paulosi o lebelletse hore ba lahle mekhoha ea bona ea pele ea bophelo. Ho latela bophelo ba bona ba pele ba boetsalibe, batho baa ba ka phela bophelo bo hloekileng joang? Paulosi o fana ka karabelo, (bala habe 1 Bakorinthe 6:11).

Libe tse hlahang ho 1 Bakorinthe 6:9-10 li hlakotsoe ke ho fetoha ho hlahang ho 1 Bakorinthe 6:11. Phetoho ena ha se ketsahalo ea molao feela; ha ho na moo Paulosi a khothaletsang hore, "Le tla itsoella pele ho etsa libe tsena, empa Molimo eena o tla le bala le le ba lokileng ho sa tsotellehe Diketso tsa lona tsa bokhopo." Che! Bakreste ba Korinthe ba ne ba sa lokela ho khutlela libeng tsa bona tsa khale. Paulosi o re, "Le bahalaleli; phelang joalo ka bona!" Ba hlatsoitsoe; ba halalelitsoe; ba entsoe ba halalelang. Ke bahalaleli; ba lokela ho phela joalo ka bahalaleli.

Ha mohlankana a kena sesoleng, o neoa seaparo se tšoanang le tsa masole a mang se bontšang hore ke lesole. Ka nako eona eo, o fuoa le buka ea Molao oa Boitšoarō oa Sesole. Seaparo se tšoanang sa masole ha sea lekana e le sona feela; o lokela joale a phele ho latela Molao oa Boitšoarō oo a o fuoeng.

Ho nka nako e telele ho ithuta Molao oo oa Boitšoarō ho feta ho apara seaparo seo sa sesole. Lesole le lecha le lokela ho ithuta ho phela ka mokhoa o tšoanelang seaparo sa hae. O lokela

ho hola joalo ka lesole. Ka makhetlo a mangata, lesole lena le lenyenyane le tla tlameha ho hopotsoa melao ea sesoleng. Na tšebetso ea hae ke e phethehileng? Che. Empa, na boitlamo ba hae ba ho ba lesole bo felletse? E. Letsatsing la hae la pele a le sesoleng, e se e le lesole; empa ke hona a tla nka matsatsi a mangata a ntse a ithuta ho phela joalo ka lesole.

Ak’u nahane ka mohlankana ea reng, “Ke batla ho bitsoa lesole, empa ha ke batle ho latela Molao oa Boitšoaro oa sesole.” Ebe o reka seaparo sa sesole, empa ebe ha a phele ho latela Molao oa sesole oa Boitšoaro. Na ke lesole la ’nete? Che. O mpa a iketsa eka ke lesole.

Li-Epistole li ngoletsoe balumeli ba apereng Krete. Joale ba ntse ba ithuta ho phela bophelo ba khalalelo. Ho Baefese 4-6, re ithuta hore na bophelo ba khalalelo bo shebahala joang likamanong le lelapa, likamanong tse kahar’a kereke, le melaong ea boitšoaro e tsamaisang khoebo. Ho Bagalata 5, re ithuta ka tholoana ea bophelo bo pheloang ka ho tsamaisana le Moea. Ho 1 Petrose, re ithuta tsela ea ho phela bophelo bo halalelang le ha re tobana le lihloriso. Ha re bala ho Jakobo, re ithuta kamoo motho ea halalelang a laolang leleme la hae kateng.

Paulosi o ile a ngolla balumeli ba Kolose a re, (bala BaKolose 3:3). Balumeli bana ba shoele ka ngeng ea sebe; empa ba phela ka ngeng ea Krete. Ha e sa le batšoaruoa ba sebe; ba halalela. Empa Paulosi o tsoela pele o re, (bala BaKolose 3:3, 5). Le shoele ka ngeng ea sebe; bolaeang sebe. Le bahalaleli; le lokela ho phela joalo ka bahalaleli.

Molaoana ona o boletsoe qalong ea khaolo ena.

#### ► Bala BaKolose 3:1-2.

Paulosi o re, “Letsatsi le letsatsi, le lokela ho lula le batla lintho tsa leholimo. Letsatsi le letsatsi, le lokela ho beha likelello tsa lona linthong tsa Molimo.” Senotlolo se isang bophelong bo halalelang ke ho beha kelello ea hao linthong tsa Molimo. Le halalelitsoe, kahoo halalelang.

Litholoana tsa bophelo ba khalalelo ke life?, (bala BaKolose 3:4). Bophelo ba khalalelo bo u lokisetsa ho ea phela bosafeleng ’moho le Molimo o halalelang. Henoke, a tsamaea le Molimo; ’me a ba sieo, hobane Molimo oa na oa mo nka (Genese 5:24). Motsamao o halalelang le Molimo lefatšeng lena o ile oa lokisetsa Henoke bosafeleng ba hae ’moho le Molimo. Motsamao o halalelang le Molimo lefatšeng lena o re lokisetsa ho hlaha le Krete khanyeng.

Li Epistole li ngoletsoe bahalaleli. Re halalelitsoe ka mali a Jesu Krete. Re hlobotse motho oa khale ’me re apere motho e mocha. Joale, re ntse re ithuta letsatsi le letsatsi hore na ho bolela’ng ho halalela. Re ntse re fetoleloa setšoantšong sa Molimo letsatsi le letsatsi. Na tšebetso ea rona e se e phethehile? Che. Kapa na boitlamo ba rona ba ho halalela bo se bo felletse? E. Re bahalaleli; re ntse re ithuta ho phela joalo ka bahalaleli.

## Molimo oa u Halaletsa: U lokela ho Phehella Khalalelo

► Bala Levitike 20:7-8. Monane Molimo o ile a fana ka taelo ea hore ba halalele. Hona e ne e le taelo eo sechaba se neng se lokela ho e phetha. Temaneng e hlhlamang, Molimo o ile a fana ka tšepiso ea hae. Hona e ne e le tšepiso ea seo Molimo a neng a tla se etsa. Ho utloisisa khalalelo, re lokela ho leka-lekanya linnete tse peli tsena:

1. Khalalelo ke mpho e tsoang ho Molimo; Molimo o halaletsa sechaba sa hae.
2. Khalalelo ke taelo e tsoang ho Molimo; Molimo o laela sechaba sa hae ho phehella khalalelo.

Bafarisi ba ne ba hopola feela, "Le phehelle khalalelo." Ba ne ba lumela hore ba ka halalela ka mesebetsi ea bona. Li-Epistole li araba ka ho re, "Ke Molimo ea le halaletsang."

Bakreste ba bang kerekeng ea pele ba ile ba ikela ka tsela ea bona ka ho fetelletseng. Ba ne ba lumela hore, "Haeba Molimo a batla ho re halaletsa, o tla etsa joalo. Rona ha re etse letho." Li-Epistole li araba ka ho re, "Le lokela ho phehella khalalelo."

"Paulosi o ile a re, 'Ke thakhisitsoe le Krete....' Ha a ka a re, 'Ke ikemiselitse ho latela Jesu Krete,' kapa, 'Ka sebele ke tla etsa boiteko ba ho mo latela'— empa 'Ke ipapisitse le Eena lefung la Hae.'"

- Oswald Chambers

Ka bobeli ho inehela le ho phehella ke lintho tsa bohlokoa khalaletsong. Molimo oa re halaletsa; re lokela ho phehella khalalelo. Re inehela ho Molimo re be re mo lumelle ho re fetola, empa re hahamalla ho tse kapele, e leng pheo eo re e biletsoang ke Molimo (BaFilipi 3:13). Paulosi o ne a utloisisa hore ho lumela litšepiso tsa Molimo ha ho bolele hore ha re sa hahamalla sepheong sa rona. Re matlafaletsoa ho phehella khalalelo *hobane* Molimo oa re halaletsa.

Ha bana ba Tlotliso ba sa le banyenyane, ka linako tse ling ba ne ba bala Mangolo ka lentsoe le utloahalang thapelong ea lelapa. Ka letsatsi le leng, ha ho fihla nako ea morali oa Tlotliso ho bala, o ile a fihla temaneng e itseng e buang ka hore Bakreste ba lokela ho sebetsa ka hloko le boinehelo polokehong ea bona. A hoeletsa ka cheseho, a bontša hore o khahliloe haholo ke mohopolo oo. O ile a bona eka ke boikarabello bo matla boo a lokelang ho bo phetha. Empa hang feela kamora moo, temana e 'ngoe e ile ea bontša hore mosebetsi oo ha o itšetlehe feela ka matla a motho. E ile ea hlalosa hore ke Molimo ka boena ea sebetsang ka hare ho batho, a ba fa matla le takatso ea ho etsa thato ea Hae. Ho hlaka hore mosebetsi oa rōna o ka khoneha feela hobane Molimo o se a ntse a sebetsa ka hare ho rōna. **Mosebetsi oa rona** o entsoe ka lebaka la **mosebetsi oa Molimo**.

► Bala BaFilipi 2:12-13.

Ho fapana le kamoo Bakreste ba bangata ba lumelang kateng, mosebetsi oa Molimo o phethahala ha re sebetsa pholoho ea rona. Na see se bolela hore re fumana khalalelo ka mesebetsi ea rona? Che, ha ho joalo! Ke Molimo ea fanang ka takatso ("ho rata"); ke Molimo ea matlafatsang le eona tšebetso. Kantle ho Molimo ea sebetsang ka ho lona, mosebetsi oa

rona ke oa lefeela. Re sitoa ho ikhalaletsa, empa Molimo le eena a ke ke a re halaletsa kantle ho phehello ea rona ho halalela.

Paulosi o ile a hopotsa Bakorinthe tšepiso ea Molimo e hlolang ea hore, (bala 2 Bakorinthe 6:18). Hape o tsoela pele o ba laela ho phela bophelo ba khalalelo, (bala 2 Bakorinthe 7:1). Ka lebaka la litšepiso tsa Molimo, re itlhatsoa litšila tsohle. Tšepiso ea Molimo ea ho re halaletsa e re fa sebete sa ho phehella khalalelo.

Ha a ngolla Bakreste ba Thesalonika, Paulosi o ile a rapela hore Molimo a tle a tiise lipelo tsa lona; li hloke sekoli khalalelong (1 BaThesalonika 3:13). Ona ke Mosebetsi oa Molimo. Kamora moo, Paulosi o ile a qala ho ruta kamoo le tšoanetseng ho tsamaea le ho khahlisa Molimo kateng. Hobaneng?, (bala habe 1 BaThesalonika 4:1, 3). Molimo o ne a halaletsa Bakreste ba Thesalonika, kahoo ba lokela ho phehella khalalelo.

Buka ea Bagalata e ngolletsoe balumeli ba oelang molekong oa ho khutlela pholohong ka mesebetsi ea molao. Paulosi o ba hopotsa hore ba beoa ba lokileng ke ho lumela ho Krete, e seng ke mesebetsi ea molao; hobane ha ho motho ea tla beoa ea lokileng ke mesebetsi ea molao (Bagalata 2:16). Haeba ho lokafatsoa ka tumelo ke qetello ea Evangeli, lena e ka ba lengolo le lokileng la Paulosi ho re, "le lokafalitsoe ka tumelo. Joale le ka phela kamoo le ratang kateng le tla ea leholimong. Sebaka sa lona leholimong se tiiselitsoe." Empa Paulosi ha a cho joalo! Ho e-na le hoo, o re, (bala Bagalata 5:24-25).

Ho tsamaisana ho bolela ho tsamaea u le kamor'a moetapele. Taba ena e fana ka maikutlo hore ho lokela ho ba le boitaeo esita le boitšoaro. E boela e fana le ka maikutlo a bophelo bo tataisoang ke Moea, eseng ka litakatso tsa rona. Molimo o halalelitse Bagalata, empa ba tlameha ho tsoela pele ho phehella khalalelo.

Mongoli oa buka ea BaHebheru o ngotse hore Molimo o re laea ho re batlela molemo, re tle re be le kabelo khalalelong ea hae. 'Nete e hlolang hakaakang! Batho ba oeleng ba ka ba le kabelo khalalelong ea Molimo. Ona ha se mofuta o itseng oa kopano ea mohlolo joalo ka ka borapeli ba bohetene. Ena ke thuto e sebetsang haholo e mabapi taео ea semoea. O ngola ka tholoana ea ho loka, ka ho ba le khotso le batho, le ka libe tse kang khalefo le bohlola (BaHebheru 12:10-16). Hona ha se mohlolo oa borapeli bo itseng; empa ke Bokreste bo tloaelehileng. Molimo o biletsa sechaba sa hae ho halalela; o lebelletse sechaba sa hae ho kopanela le eena khalalelong ea hae.

Re ka kopanela joang khalalelong ea Molimo? Re ba le karolo khalalelong ea Molimo ha re ba ba nkang karolo semelong sa bo-Molimo Petrose o supa ka bobeli matla a Molimo a ho re etsa ba tšoanang le eena le boiteko ba rona ba ho holela setšoantšong sa hae.

Pele, Petrose o tšepisa hore re ka ba ba nkang karolo semelong sa Molimo, (bala I1 Petrose 1:3-4).

Molimo oa re halaletsa. Matla a hae, e leng matla a Molimo, a re neile lintho tsohle tse hlokoang bakeng sa bophelo le borapeli. Ho ba le sebopeho sa Molimo ha se toro feela e ke keng ea fihleloa; Molimo o re sitsitse joalo ka lipallo tse kholohali, tsa bohlokoa. E 'ngoe ea

litšepiso tsena ke hore ka tsona re be le kabelo ho seo Molimo o leng sona. Tšepiso eo ea hore re ka tšoana le Ntate oa rona ea maholimong ke ea ngoana e mong le e mong oa Molimo. Sena ha re se fihlele ka matla a rona; ho tšoana le Molimo ke mpho ea mohau oa Molimo. Ka matla a Molimo, re ka phela ka kutloano 'moho le semelo sa Molimo. Molimo oa re halaletsa.

Ha a tsoela pele, Petrose o re, (bala I1 Petrose 1:5-8).

Kaha matla a Molimo a re entse ba nang le kabelo semelong sa bomolimo, re lokela ho ntšetsa matla oohle a rona hore re hole bokhabaneng, tsebong, boitšoarong, mamellong, borapeling, leratong la boena, le leratong la bohle. Ka lebaka la seo Molimo a se entseng, re lokela ho phehella Khalalelo.

Petrose ha a khothaletse hore re ikhalaletse ka ho leka ka matla a rona oohle. Ha a rute ho loka ha molao. Ha re fumane lereko la Molimo ka matla a rona. Leha ho le joalo, Petrose o batla re utloisise hore re ke ke ra phela bophelo ba khalalelo kantle ho boitaeo.

Re phehella khalalelo ka lebaka la mohau oa Molimo. Mohau o matlafatsa phehello ea rona ea bophelo ba khalalelo. Ka lebaka la matla a Molimo a bomolimo (litemana tsa 3-4), re etsa ka matla a rona oohle ho hola (litemana tsa 5-8). Phehello ea rona khalalelong ha se molao; empa ke takatso ea tiholeho ea ho ba le pelo e fetohileng. Ha re le bana ba Molimo ka 'nete, re tla batla ho hola khalalelong. Ha re le bana ba Molimo e le ka 'nete, re tla batla ho bona morero oa Molimo o phethahala maphelong a rona.

### **Nka Phela Bophelo ba Khalalelo Joang?- "Eseng 'Na, Empa Kreste"**

Ha a ngolla Bakreste ba Filipi, Paulosi o ile a ba talimisa ho Jesu e le mohlala oa semelo seo ba lokelang ho se bonahatsa. Kreste o ikokobelitse, a iketsa ea utloang ho isa lefung, e, le lefung la sefapano (BaFilipi 2:8). Paulosi o ne a batla balumeli bana ba utloisise hore tsela ea bana ba Molimo ke tsela ea boikokobetso, eseng ea boiphahamiso. Re lokela ho ba le pelo e bileng ho Kreste.

Re ka oela molekong oa hore re arabele ka ho re, "E, Jesu o phetse bophelo bo phethehileng. E ne e le mora oa Molimo. Empa hoo ha ho nthuse ka letho. Ha ke Jesu!" Re ka latela mohlala oa Jesu joang? Paulosi o ratile hore Moea oa Kreste o phela kahare ho molumeli.

Paulosi o ngolletse Bakreste ba bacha a re, (bala Baroma 8:9). Re phela bophelo bo halalelang e seng ka matla a rona empa ka matla a Moea o Halalelang.

Bopaki ba Paulosi ka boeena bo bontša phetoho eena. Paulosi o supa ha bophelo ba hae e ne e le ba Mofarisi ea lekang ho phetha litaello tsa molao ka matla a hae. O hopola nako eo a neng a e-na le takatso empa a se na bokhoni ba ho etsa se lokileng. O re, (bala Baroma 7:17). Boiteko ba Paulosi ba ho leka ho itokafatsa ka matla a hae a ile a hloleha.

Kamor'a ho kopana le Kreste, bopaki ba Paulosi bo ile ba fetoha ho tloha ho ho re, "ha e sa le 'na, empa e le sebe" ho ea ho "ha e sa le 'na, empa e le Kreste" (Bagalata 2:20). Paulosi



o ne a ka phela bophelo ba Bokreste ba ho hlola hobane joale Krete o ne se a phela ka ho eena.

Paulosi o ile a khothatsa Ba-Korinthe a re, (bala 2 Bakorinthe 13:5). Re ka tšoana le Krete hobane Krete o phela ka ho rona. Setsebi sa thuto ea bolumeli sa kereke ea Luthere Dietrich Bonhoeffer o e beha tjena: ho ba Mokreste ho bolela hore "sebaka se neng se kile sa lula monna-moholo joale se se se nkuoe ke Jesu Krete."<sup>33</sup>

Krete o phela ka ho rona, kapa ho bea molaoana ona ka tsela e 'ngoe re ka re, "Re phela ho Krete." E 'ngoe ea lipoleloana tse tloaelehileng tsa Paulosi ke "ho Krete." Paulosi o sebelisa litsela tse ling tsa ho re, "ho Krete," ka ho re, "ho eena," "ka ho eo," kapa "ho Mora" ka makhetlo a fetang a lekholo le mashome a mahlano mangolong a hae. Hangata Paulosi o supa sebaka sa rona ho Krete e le sona lekunutu la bophelo ba Bokreste. Ho hlola letsatsi le letsatsi ho re tlela hobane re le ho Krete.

Bophelo ba rona ba khale bo ile ba pheloa "ho Adama," bophelong ba rona ba ho oela bo tletseng ka sebe. Bophelo ba rona bo bocha bo pheloa "ho Krete," ka matla a Morena ea tsohileng, ea re fang tlhola ea kamehla holim'a sebe.

- Ho Adama, re ne re tsamaea lefifing: ho Krete, re tsamaea leseling.
- Ho Adama, re ne re le makhoba a sebe: ho Krete, re makhoba a ho loka.
- Ho Adama, re ne re ithabela libeng tsa nama; ho Krete, re, (bala BaKolose 3:10).

Kutloisiso ena e bohlokoa haholo bophelong ba tlhola. Ha re ipona ho Adama ("baetsalibe ba tšoaretsong" ba ntseng ba phela litlamong tsa sebe), re tla tsoela pele ho oela molekong. Ha re ipona ho Krete ("bahalaleli ba fetohileng" ba nang le matla ka Krete), re tla phela ka tlhola holim'a sebe. Paulosi o ile a bolella Bakreste ba Kolose sephiri sa bophelo ba khalalelo, (bala BaKolose 2:6). Ha re ntse re tsamaea ho Krete, rea halaletsoa.

Batho ba bang ba nahana ho halaletsoa ho le joalo ka ente ea sefuba e fanoang ke ngaka e le ho thibela ho kula. Ba nahana hore ha re kopa Molimo ho re halaletsa, o re enta ka "ente ea khalalelo" e re thibelang ho etsa sebe. Ba lumela hore kamor'a hore Molimo a re halaletse, re phela bophelo ba khalalelo ka matla a rona.

Ha ho na moo Bibe e fanang ka setšoantšo se joalo. Ho e-na le hoo, re phela ho Krete. Rea halalela ho Krete. Molao oa Moea oa bophelo, o leng ho Jesu Krete, o nkholotse molaong oa sebe le oa lefu (Baroma 8:2). Re halalelitsoe ho Jesu Krete (1 Bakorinthe 1:2). Ha re halaletsoe ke boiteko ba rona bo matla ba ho etsisa Jesu ka matla a rona. Re halaletsoa ke ho lumella Jesu ho phela kahare ho rona. Kahoo, ea ithorisang a ithorisetse Moreneng (1 Bakorinthe 1:31).

---

<sup>33</sup> Dietrich Bonhoeffer, *Ethics* (New York: Macmillan, 1965), 41

Paulosi o pakile a re, (bala Bagalata 2:20).

Bopaki bona ba Paulosi bo ka fetoleloa ka tsela ena: "Bophelo boo ke bo phelang joale 'meleng ona ke bo pela ka tumelo ho Mora oa Molimo." Paulosi ha a behelle kathoko pitso ea hore re halalele ho fihlela nakong ea lefu. O fana ka bopaki ba hore o phela bophelo ba khalalelo hona joale. O phela bophelo ba khalalelo joang? Ka ho lumela ho Mora oa Molimo.

"Sephiri sa bophelo ba khalalelo ha se ho etsisa Jesu, empa ke ho lumella khalalelo ea Jesu hore e iponahatse ho 'na."

- Oswald Chambers

Puo ea Paulosi e bapile hantle le thuto ea Jesu ho Johanne 15, (bala Johanne 15:5).

Khalalelo ha se ntho e fumanoang kathoko ho bophelo ba rona ho Krete; khalalelo ke likamano tse lokelang ho bolokoa. Re phela ha feela re ntse re khomaretse sefate. Re phela bophelo ba khalalelo feela ka ho phela ha rona ho Krete. Molimo o halalelang o phela ka ho rona, 'me rea halalela ha a re tsamaea le eena.

► Bala BaKolose 3:3. Bophelo ba khalalelo ha bo fihleloe ka matla rona; bophelo bo halalelang bo patiloe le Krete ho Molimo. Re phela bophelo ba khalalelo ka ho phela letsatsi le letsatsi ka pelo e bileng ho Krete. Ha re tsamaea ho Krete, re ba le matla a ho phela bophelo ba khalalelo lefatšeng le tletseng ka sebe. Re na le matla a ho halalela bophelong ba rona ba letsatsi le letsatsi. Sena ke seo ho halalela ho se bolelang.

### **Khalalelo e Kenngoang Tšebetsong: Ho Phela Bophelo Ba Tiholo**

Molaetsa oa bophelo ba khalalelo ke molaetsa o khahlehang. Leha ho le joalo, thuto e sa khoneng ho pheloa bophelong ba letsatsi le letsatsi ha e na bohlokoa bo bokaalo bophelong. Na hoa khoneha ho phela bophelo ba tiholo holim'a sebe sa ka boomo kapa na molaetsa oa bophelo ba khalalelo ke toro feela?

### **Na Tiholo Holim'a Sebe ke Ntho e Khonehang?**

Paulosi o tšepisitse hore re ka hlola ka ho fetisisa ka ea re ratileng (Baroma 8:37). Kannete tšepiso ena ea bophelo ba tiholo ka Krete e kenyeletsa tiholo holim'a matla a sebe. Haeba hoa khoneha ho phela ka tiholo ea letsatsi le letsatsi holim'a sebe sa ka boomo, ke hobane'ng Bakreste ba bangata ba hloleha ho phela ka tiholo? Ke lintho life tse bakang ho hloleha semoeeng?

### ***Re tla Hlola Haeba re sa Lumele Hore Bophelo ba Tiholo bo ka Khonahala***

Bakreste ba bang ha ba phele bophelo ba tiholo hobane ba se ba kholisehile hore bophelo ba tiholo ha bo khonehe. Ba utloile le molaetsa e rutang hore re ka tsoela pele ho 'na re oela sebeng sa ka boomo – joale ba se ba lahlile tšepo eohle ea hore ba ka hlola sebe. Haeba re batla ho phela bophelo ba ho hlola sebe, re lokela ho nka taelo ea Johanne ka botebo e reng, (bala 1 Johanne 2:1). Johanne o ngolletse Bakreste ka tšepo e tiileng ea hore ba ka khona ho phela bophelo ba tiholo. Re lokela ho batla tšepo ena ea tumelo ho re nea sebete ha re tobana le liteko.

### ***Re Tla Hloloa Haeba re Phomola Boiphihlelong Khale ba Moea Kapa Boemo ba Kereke***

Batho ba bang ba talima bophelo ba khalalelo e le ntho e etsahalang hang feela 'me ho sa hlokahale taeo kapa boiteko bo tsoelang pele. Ba lumela hore ha feela ba ka fana ka bopaki ba re, "Molimo o hloekisitse pelo ea ka ka tumelo 'me o nkentse ea hloekileng" ha ho sa na letho le hlokang ho etsoa. Leha ho le joalo, joalo ka ha Paulosi a bontšitse, re lokela ho tsoela pele ho phehella ho ea fihla sepheong. Tiholo holim'a sebe e hloka bophelo ba boitšoaro bo tsoelang pele. Ke lokela ho tsoela pele ho re "che" ho sebe e le hore ke tle ke re "e" ho Molimo.

Melaetsa e meng e buang ka meleko ea Jesu e qetella ka ho bontša tlhoho ea Jesu holim'a liteko tsa Satane. Leha ho le joalo, Luka o qetella pale ena ka polelo ea bohlokoa, (bala Luka 4:13). Lena e ne e se lekhetlo la ho qetela leo Jesu a lekoang ka lona. Leha Li-Evangeli li sa ngola litaba tsa meleko e tlileng hamorao, Luka oa hlakisa hore Satane o ile a rera hore o tla boela a leka Jesu hape.

Ha rea lokela ho lekanya hore re se re fihletse kholo ea semoea hoo re se re ke keng ra ba ra oela. Ho e-na le hoo, re lokela ho tsoela pele ho lula re lebetse 'mele ea rona le likelello tsa rona. Satane o rata ho hlasela ka nako eo re lesang ho lebelo. Bophelo ba khalalelo bo batla motho ea lulang a lebetse ka hloko.

Baruti le baetapele ba kereke ba ka lekoa hore ba itšetlehe ka boemo ba bona sechabeng sebakeng sa tlhoho ea bona ea semoea. Re ka lekanya hore kaha re ruta 'nete hape re utloa tlotso ea Molimo, re ke ke ra oela. Empa, hoa khonahala hore u ka ruta ka Sontaha ebe u oela molekong oa Satane ka 'Mantaha. Ha rea lokela ho itšetleha ka boiphihlelo ba rona ba nako e fetileng kapa ka maemo a rona ka kerekeng.

### ***Re Tla Hloloa Haeba re Leka ho Phela Bophelo ba Bokreste ka Matla a Rona***

Bophelo ba ho hlola ha bo tle ka matla a rona empa bo tla ka matla a Moea o Halalelang. Bophelo bo halalelang bo phelo ***letsatsi le letsatsi*** ka matla a tsoelang pele a Moea. Ha ho na ka mohla re ka fihlelang boemo boo ho bona, ka matla a rona, re ka khonang ho hlola meleko ea Satane. Petrose o ile a ithorisa a re, (bala Mareka 14:29-31). O ne a lumela hore a ka tobana le litlhaselo tsa Satane ka matla a hae. 'Me o ile a phakisa a hloleha.

Leha ho le joalo, ha re phela ka matla a Moea, o re fa tlhoho holim'a meleko. Ka ho tšoana le kamoo Jesu a ileng tobana le meleko ka matla a Moea, le rona re ka tobana le meleko ka matla a Moea.

Hape, baruti le baetapele ba kereke re ka lekoa ho tšepa matla a rona. Ha re etella-pele thapelo ea batho ba bangata, re ka hloleha ho ba le nako eo e leng ea rona re le bang le Molimo. Ha re ithuta molemong oa ho bolela lentsoe la Molimo phatlalatsa, re ka lebala ho nka nako ho mamela ha Molimo a bua le rona ka bo-mong ka Lentsoe la hae. Ha rea lokela ho lumella mosebetsi oa rona oa tšebeletso ho fokolisa kamoo re itšetlehang ka ho tsamaea le motho ka mong le Molimo esita le matleng a Moea oa hae bakeng sa tlhoho ea semoea.

## Haeba Reka Oa

Johanne o bilelitse balumeli bophelong ba tlhola holim'a sebe, (bala 1 Johanne 2:1). Hoa khoneha hore re ka phela ka ntle ho ho hloleha moeeng. Leha ho le joalo, Johanne o ne a ntse a fane ka sebaka ho ba ka oelang sebeng, (bala 1 Johanne 2:1). Teka-tekanyo ena ea litaba ke ea bohlokoa – empa hangata ha re e ele hloko.

Ka lehlakoreng le leng, ho na le batho ba hatisang ka matla haholo karolong ea pele feela ea temana ena. Ba ruta hore re ka khona ebile re tšoanetse ho phela re lokolohile libeng tse etsoang ka boomo. Leha ho le joalo, ha ba na molaetsa bakeng sa ba tla hloleha nakong ea bofokoli.

Ka lehlakoreng le leng, ho na le ba bangata ba hatisang ka matla haholo karolong ea ho etela feela ea temana ena. Ba bolela hore bophelo ba ho hlola ha bo khonahale 'me re lokela ho itsoella-pele ho oela sebeng.

Johanne o fana ka teka-tekanyo e tšoanelehang tabeng ena. Ea pele, **bophelo ba tlhola boa khoneha**; ha kea tlameha ho inehela molekong oa Satane. Empa ea bobeli ke hore, haeba ke oela ka motsotsong oa bofokoli, **ke na le moemeli**. Ha kea lokela ho lahla motsamoa oa ka oa Bokreste. Ha kea lokela ho nyahama. E, molimo o tla mpha taao. Empa taao ea hae ho 'na ke ea Ntate ea lerato ha a laea ngoana oa hae – e le ho fana ka tholwana ea khotso ea ho loka. O re laea ho re batlela molemo, re tle re be le kabelo khalalalong ea hae (BaHebheru 12:10, 11).

Satane o batla ho kholisa Bakreste ho itšetleha ka tšebetso ea rona e le eona eo re ka khahlisang Molimo ka eona. O batla hore re lebale hore re boelantsoe le Molimo 'me joale re se re le bana ba hae. Ha re ne re sa le baetsalibe, re bile ra boelanngoa le Molimo ka ho shoa ha Mora oa oona. Nahana ke hona hore, (bala Baroma 5:10).


Ha re ne re sa le baetsalibe, re ile ra hloleha ho fumana lereko la Molimo ka mesebetsi; o re boelantse le eena ka lefu la Mora oa hae. Joale, Paulosi o re, "haholo hakaakang joale re tla bolokeha Ka ho phela ha hae!" Bakreste ba bang ba bonahala ba lumela hore "ke bolokehile ke mohau ka tumelo, empa ke **lula ke** bolokehile ka ho loka hoo ke tšoaneloang ke lerato la Molimo."

Hona ho tšoana le motsoali ea reng, "E, ke u ratile haholo hoo ke ileng ka u tlisa lefatšeng – empa joale u lokela ho sebeletsa lerato la ka ka Diketso letsatsi le letsatsi." Eo ha se motsoali ea nang le lerato! Hape eo ha se Ntate oa rona ea maholimong ea re ratang.

Ho e-na le hoo, joalo ka ha ke ile ka itšetleha ka mohau oa Molimo hore o qale o ntlise bophelong ba semoea, ke itšetleha ka mohau ho mpoloka ke ntse ke phela moeeng. **Hape**, haeba nka oa, ke lokela ho boela ke itšetleha ka mohau oa Molimo ho mpusetša bophelong ba semoea.

## O Fumane Sephiri - Hudson Taylor

E mong oa barumuoa ba bileng le tšusumetso e kholo mehleng ea morao-rao e bile Hudson Taylor, mothehi oa China Inland Mission.<sup>34</sup> Taylor o ne a sokolohe ha a le lilemo li 17 ka lebaka la lithapelo tsa 'm'e oa hae ea neng a kena kereke ea Methodist. O ile a ithutela bongaka ba ho etsa meriana 'me a kena sekepeng ho ea China e le moromuoa ha a le lilemo li 21.



Ha a le lilemo li 28, o ile a khutlela England ka lebaka la bokulo ba hepatitis. Ka lilemo tse hlano tse latelang, o ile a batla ketello-pele ea Molimo hape o ile a lumela hore Molimo o ne a batla hore a bope sehlopha sa barumuoa ba neng ba tla ea kahare ho naha ea China moo evangeli e neng e e-so ho fihle. Ha a le lilemo li 34, Hudson le Maria Taylor 'moho le bana ba bona ba ile ba palama sekepe le sehlopha sa barumuoa ba leshome le metso e tšeletseng, e le sehlopha sa pele sa barumuoa ba China Inland Missionary.

E 'ngoe ea lipolelo tse tloaelehileng haholo tsa Hudson ke ho re, "Mosebetsi oa Molimo o etsoang ka tsela ea Molimo ha o na ho haelloa ke tlhokomelo ea Molimo." Re atisa ho hlalosa polelo ena re ipapisa le chelete, empa ho Taylor e ne e fetisa moo. O ne a lumela hore Molimo o tla fana ka chelete, kholiseho, tumelo, Khotso, matla le lintho tsohle tse hlokaahalang ho fihlella thato ea hae. Ka lilemo tse mashome a mahlano tseo e bileng moetapele oa China Inland Mission, Hudson Taylor o ile a bona phethahatso ea tšepiso ena ka makhetlo a mangata-ngata.

Ka selemo sa 1869, Taylor o ile a ba tlokotsing e kholo bophelong ba hae ba semoea. O ne a loantšana le meleko le ho hloleha. O ile a ngolla 'm'e oa hae a re, "ke ne ntse ke sa tsebe hore na ke na le pelo e mpe hakaakang." Empa o ile a boela a ngola a re, "Kea tseba hore ke rata Molimo hape ke rata le mosebetsi oa hae, 'me ke laba-labela ho sebeletsa eena feela le linthong tsohle. **Molimo a ke a nthuse hore ke mo rate haholo le ho mo sebeletsa hantle.**"

Ka la 4 Loetse, 1869, Hudson Taylor o ile a fana ka bopaki ba hore Molimo o tšolletse Moea oa hae ka tsela e ncha bophelong ba Taylor. Taylor o ile a ngolla e mong oa basebetsi-'moho le eena a re, "Molimo o nkentse motho e mocha!" Senotlolo sa Taylor sa tiisetso e ncha ea boteng ba Molimo bophelong ba hae e ile ea e-ba polelo e neng e hlaha lengolong leo a neng a le ngoletsoe ke moromuoa e mong ea bitsoang John McCarthy. Taylor o ne a ntse a ipatlela ka matla a hae ho fumana tumelo e tebileng le kholiseho ea boteng ba Molimo. McCarthy o ne a ngotse a itse, "Tumelo ea rona e ka matlafatsoa joang? Eseng ka ho batla tumelo ka matla, empa ka ho phomola ho Ea Tšepahalang."

---

<sup>34</sup> Setšoantšo: "HudsonTaylorin1893", *The Story of The China Inland Mission* (1893), e nkiloe ho <https://commons.wikimedia.org/wiki/File:HudsonTaylorin1893.jpg>, sechaba sa setjhaba.

Taylor o ile a ngolla khaitsetli ea hae a re,

Eitse ke sa bala, ka bona taba tseo kaofela! "Haeba re sa lumele, eena o lula a tšepahala." Ke ile ka talima ho Jesu 'me ka bona ('me eitse ha ke bona, eaba thabo ea ka ea tšoloha)! hore o itse, "nke ke ka u tlohela."

"Hona ke phomolo!" ka nahana. "Ke lekile ka matla ho se nang thuso hore ke phomole ho Eena. Ha ke sa tla eketsa ho leka. Hobana ha se eena ea tšepisitseng hore o tla lula le 'na – hore a ke ke a ntlohela, le hore a ke ke a mphoqa?" 'Me, moratuoa, A ke ke a etsa joalo.

Ha kea bona feela hore Jesu a ke ke a ntlohela, empa hape le hore ke setho sa 'mele oa hae, sa nama ea hae le sa masapo a hae. Sefate ha se metso feela, empa ke lintho tsohle — motso, kutu, makala, makalana, lipalesa, litholoana. 'Me le Jesu ha se seo feela — ke mobu hape ke letsatsi, moea le lipula, hape o fetisa ka makhetlo a likete sohle seo re ka se hopolang, seo re se lakatsang kapa re seo re se hlohang. A, ke thabo e kaakang ho bona 'nete ena! Ke rapela hore mahlo le uena mahlo a kutloisiso ea hau a ke a khantšetsoe, e le hore u tle u tsebe u be u natefeloe ke matlotlo ao re a neiloeng mahala ho Krete.

Nakong ena, Taylor o ne a utloisisa hore ho tšoana le Krete ha ho tle ka boiteko ba rona, empa ka kopano le Sefate sa Morara seo e leng sona se fanang ka bophelo. Ho tla ka hore motho e be ea bapileng le Krete. Mora oa hae hamorao o ngotse a re, "E ne e le khale a tsebile boinehelo, empa hona e ne e le ho fetisang moo; hona e ne e le ho itlohella ho hocha, ho nehelana ka bo-eena le ka tsohle ho Molimo ka thabo, a sa ipolokele letho."

Hona e ne e se boikutlo ba nakoana feela. Lilemo tse mashome a mararo kamor'a moo, Taylor o ile a talima morao eaba o ngola a re, "Ha re na ho lebala tlhohonolofatso eo re e fumaneng ka mantsoe, ho Johanne 4:14 e reng, ' (bala *Johanne 4:14*). Ha re hlokomela hore Krete o ne a hlile a bolela seo a neng a se bua – hore a ke ke e bolela hore a ke ke, a hlola e bolela a hlola, le nyoraa e bolela nyoraa – lipelo tsa rona li ile tsa tšoloha ke thabo **ha re amohela mpho eo.**" Hlokomela poleloana ena, "ha re amohela mpho eo." Taylor o ne a utloisisa hore mohau oa Molimo o halaletsang ke mpho e lokelang ho amoheloa, eseng ntho e fihleloang ka ho sebeletsoa.

Boitsebelo bona ba mohau oa Molimo ha boa ka ba nolofatsa bophelo ba Taylor ba kamor'a moo. Selemo se latelang e ile ea e-ba se thata ka ho fetisisa bophelong ba hae. Selemong seo, ba babeli ba bana ba hae ba ile ba hlokahele 'me le Maria a hlokahele a e-na le lilemo tse 33. Hamorao, Taylor o ile a etella-pele China Inland Mission ka letsoalo la ho tšaba Boxer Rebellion. Litho tse mashome a supileng a metso e robong tsa Mission ona li ile tsa bolaoa ka matsatsi ao a sehloho.

Empa le ha a feta har'a lintho tsena tsohle, Taylor o ile a lula a e-na le tšepo ea hore Molimo o tla ba hlokomela ka tsohle tseo ba li hlohang. Moprasta oa Episcopal ea ileng a etela Taylor nakong eo e boima o ile a ngola a re, "Enoa e ne e le monna ea lilemo li batlang ho ba

mashome a tšelelseng, ea jereng boima bo boholo, empa a ntse a khobile matšoafo a bile a sa khathatseha.” E ne e le hobane’ng? Ke hobane Taylor e ne e le ntho e le ’ngoe le Sefate sa Morara ’me o ne a phomotse ho Krete. E ne e le ea sebeletsang ka matla a hlahisoang ke Molimo—hore Molimo o tlotlisoe nthong tsohle ka Jesu Krete (1 Petrose 4:11).

Lintho tsena tseo a fetileng har’a tsona e ne e se qetello ea kholo ea Taylor ea semoea. Esita le ho “phomola ho Krete” hoa hae ho ne ho sa bolele hore ha ho sa na boiteko ba letho. Hoseng ho hong le ho hong, ho sa tsotellehe liqholotso tsa tšebeletso, Taylor o ne a geta lihora tse peli a le thapelong le boithutong ba Bibe le pele a qala mosebetsi oa letsatsi. O ne a utloisisa, joalo ka Paulosi, hore re tlameha ho “phehella ho fihlella sepheo.” Empa bona e ne e le boiteko bo itšetlehileng ka matla a Molimo, eseng ka matla a Hudson Taylor. O ne a se a tseba joale hore esita le matla a ho theoha betheng feela hore a qale boithuto ba hae ba Bibe le, e ne e le mpho ea mohau o matlafatsang oa Molimo. O ne a khona ho tšoana le Krete **hobane o ne a le ’ho Krete.**’

Mora oa Taylor o ile a hopola bophelo ba hae ba thapelo le ba Lentsoe. Ho phomola ho Krete ho ne ho sa bolele hore Taylor o ne a iphapanyetsa tlhokahalo ea taao ea semoea.

Ho eena, lekunutu la ho hlola le ne le lutse holim’a kopano ea letsatsi ka leng le hora ka ’ngoe le Molimo; ’me sena, o ile a ithuta hore se ka fihleloa feela ka thapelo ea lekunutung le ho ja Lentsoe, leo A iponahatsang ka lona ho moea o mo lebelletseng. Ho ne ho se bobebe ho Monghali Taylor, bophelong ba hae bo neng bo tletse ka liphetoho, hore a be le nako ea thapelo le ea boithuto ba Bibe le, empa o ne a tseba hore ho bohlokoa.

Hangata ba ne ba e-ba le phaposi e le ’ngoe e kholo, ’me ba ne ba e arola likarolo tse peli pakeng tsa bona le ntate oa bona, ba sebelisa mofuta o mong oa masela; ’me e ne e re, ha ho se ho robetsoe ’me ho khutsitse, ba ne ba tla utloa mollo o tloeba ba be ba bone khanya ea lebone le neng le bolela hore Monghali Tylor, leha a khathetse, o ne a ithuta Bibe le eo a neng a lula a sebelisa mofuta e ’meli ka nako tsohle. Ho tloha ka hora ea bobeli ho isa ho ea bone hoseng e ne e le nako eo a neng a rapelang ka eona; ke nako eo a neng a ka ba le bonnete ba hore ha a na ho ferekanngoa ke letho ha a sebeletsa Molimo.... Karolo e boima ka ho fetisisa ea mosebetsi oa boromuoa, Monghali Taylor o ile a fumana hore, ke ho boloka nako ea kamehla ea boithuto ba Bibe le bo tsamaeang le thapelo. “Satane o tla u fumanela ntho eo a batlang u e etse,” o ne a rialo, “ha u ne u lokela hore ebe u phathahane” thapelong le Mangolong.

Kajeno ke baromuoa ba 1600 ba sebeletsang OMF International, e leng eona e seng e nkile tšebetso ea China Inland Mission. Limilione tsa balumeli ba China ba ile ba tataisetsoa ho

Kreste ka bosebeletsi ba 'Mishone ona. Tsena ke litholoana tsa motho ea ileng a phela ka kopano le Kreste.<sup>35</sup>

### **Boikhopotso ba Thuto ea 10**

(1) Baapostola ba bilelitse Bakreste bohle ho halalela.

(2) Ho halalela ke ho tšoana le Kreste.

- Ho halalela ke ho ba le pelo e halalelang: pelo le kelello tse tšoanang le tsa Kreste.
- Ho halalela ke ho ba le matsoho a halalelang: boitšoarō bo tšoanang le ba Kreste.
- Ho halalela ke ho ba le lerato le tšoanang le la Kreste.

(3) Li Epistole li bontša hore na khalalelo e tla shebahala joang bophelong ba letsatsi le letsatsi.

- Le halalelitsoe: le ntse le halaletsoa.
- Le bahalaleli; le lokela ho phela joalo ka bahalaleli.
- Molimo oa le halaletsa; le lokela ho phehella khalalelo.

(4) Re matlafatsoa hore re ka phela bophelo bo halalelang ka Moea oa Kreste o phelang ka ho rona.

(5) Re phela bophelo ba khalalelo "ka Kreste." Bophelo ba rona ba khale re ne re bo phela "ho Adama." Bophelo ba rona bo bocha re bo phela "ho Kreste."

(6) Bophelo bo halalelang bo itšetlehile ka likamano tse tsoelang pele le Sefate sa Morara.

### **Kabelo ea Thuto ea 10**

(1) Lokisa molaetsa holim'a "Bophelo bo Tšoanang le ba Kreste." Bapisa mekhoa e 'meli ea ho phela: bophelo ba rona ba khale ho Adama le bophelo ba rona bo bocha ho Kreste. Bontša hore na ho ba "ho Kreste" ho re matlafatsa joang bakeng sa tlholo holim'a sebe.

(2) Qala thuto e latelang ka ho pheta BaFilipi 2:1-5.

---

<sup>35</sup> Litaba tsena li nkuoe ho Dr. and Mrs. Howard Taylor, *Hudson Taylor's Spiritual Secret*





# Thuto ea 11

## Khalalelo ke Khalalelo e sa Senyehang le Molimo

### Sepheo sa Thuto

Qetellong ea thuto ena, baithuti lokela ba be ba ka:

- (1) Thaba ka ho phethahala hoa litšepiso tsa Molimo tsa boprofeta.
- (2) Lemoha hore kopano-'moho e kerekeng ke ho itukisetsa kopano-'moho e leholimong.
- (3) Inehela bakeng sa ho nka karolo kerekeng ea lehae e khothaletsang kholo khalalelong.
- (4) Tseba Tshenolo 21:2-3 ka hlooho.

### Johanne: Monna ea Ileng a Bona Phethahatso ea Morero oa Molimo

Etela sehlekehlekeng sa Patmose leoatleng la Aegean. Sena ha se sebaka se khahlehang sa Caribbean kapa sehlekehleke sa South Pacific. Sena ke sehlekehleke seo e leng teronko. Patmose ke sebaka se feela hape se bolutu. Ke moo u tlang ho fumana Johanne Morutuo ea Ratoang a phela kholehong teng.

Johanne e se e le monna ea holileng haholo. O ne a sebelelitse Molimo ka botšepahi hape e bile mohlala oa bophelo ba khalalelo. O ne a sebelelitse kerekeng e Efese, a hlokomela le 'm'e oa Jesu eo e neng se e le mohlolohali, a bile a ratile le naheng eohle ea Asia.

Lilemong tseo a neng a lokela ho natefelo a ke hlomphe joalo ka morutuo oa Jesu ea neng a setse a phela, Johanne o ne a leleketsoe sehlekehlekeng sa Patmose. O ne a joa ke bolutu hape a ikutloa eka ha a sa na bohlokoa mosebetsing oa Molimo. Empa hoseng ho hong hoa Sontaha kamor'a lilemo tse ka bang mashome a tšeletseng kamor'a hore Jesu a nyolohela leholimong, Johanne o ile a nkoa ke moea ka letsatsi la Morena, ha a utloa lentsoe le kang terompeta (Tshenolo 1:10).

Ha Johanne a retelehela ho lentsoe leo, o ile a bona Jesu eo a nehetseng bophelo ba hae ho eena. Moriri oa Jesu o ne o le mosoeu joalo ka boea ba nku, mahlo a hae a le joalo ka khabo ea mollo, maoto a hae a tšoana le koporo e benyang, lentsoe la hae le le joalo ka molumo oa metsi a mangata. Sefahleho sa hae se ne se khanya (Tshenolo 1:12-16). Johanne o ile a boha, (bala Johanne 1:14).

Bukeng ea Tshenolo, re tsamaea le Johanne ho kena leholimong ho bona phethahalo ea morero oa Molimo. Batho ba halalelang ba tla lula ka ho sa feleng kopanelong e sa senyehang le Molimo o halalelang.

## Lefatše le Phethehileng

### Lefatše le Phethehileng lea Lahleha

Thutong e qalang ea buka ena, moithuti o kopua ho nahana ka serapa sa Edene matsatsing kamor'a tiholeho. E ne e le lefatše le phethehileng. Lipalesa, lifate, le litholoana li ne li le hohle. E ne e le lefatše le se nang sebe le litholoana tsa sona. E ne e le lefatše le se nang bohloko, meokho, kapa lona lefu. Ea bohlokoahali ke hore, e ne e le lefatše la likamano tse phethehileng pakeng tsa Molimo le motho. Ho ne ho se letho le arotseng motho le 'Mopi oa hae.

Ka masoabi, sebe se ile sa senya lefatše lena le phethehileng. Lehola la hlaha hara lipalesa. Liphoofole tse nang le khotso li ile tsa fetoha libatana tse kotsi. Motho o ile a lokela ho mamella mahlomola, bohloko, le lefu. Ea bohlokoa ka ho fetisisa ke hore, likamano tse phethehileng tse neng li le lipakeng tsa Molimo le motho li ile tsa senyeha. Ka lebaka la sebe, motho o ile a lelekoa serapeng sa Edene 'me a thibelo le sefate sa bophelo. Ho ne ho bonahala eka Satane o ne a sitisitse morero oo Molimo a neng a na le oona ka batho ba hae.

#### Thapelo Bakeng sa Khalalelo

"U re tlise, Oho Morena, ka nako ea tsoho ea rona ea ho qetela, moahong le khorong ea leholimo, ho kena ntlong eo moo ho se nang ho ba le lefifi, moo e leng khanya e le 'ngoe feela; ha ho lerata, empa ho teng bosafeleng bo le bong moo ho ahileng khanya le borena ba hau, lefatšeng le sa feleng."

E nkuoe le ho hlophisoa  
ho tsoa ho John Donne

### Lefatše le Phethehileng lea Tšepisoa

Empa hona e ne e se pheletso. Mangolong ka bophara, Molimo o bonahatsa morero oa hae oa ho iketsetsa batho ba hae ba tšoanang le eena; o lakatsa ho etsa batho ba halalelang. Baprofeta ba Testamente ea Khale ba ile ba tšepisa hore Molimo ka letsatsi le leng o tla halaletsa sechaba sa hae a be a ba khutlisetse sebakeng se halalelang. Ka makhetlo, Johanne mongoli oa Tshenolo o supa ho phethahala hoa litšepiso tse na.

Ezekiele o ile a bona letsatsi leo Molimo a tla lula hara sechaba sa hae se halalelang.

► Bala Ezekiele 37:27-28.

Molimo o tla halaletsa Iseraele; o tla halaletsa sechaba sa hae. O tla lula har'a sechaba sa hae. Tšepiso ea Ezekiele 37:27 e phethahalitsoe ho Tshenolo 21:3.

► Bala Tshenolo 21:3.

Morero oa Molimo oa ho qetela o tla phethahala ha lula har'a sechaba sa hae se halalelang. Joalo ka Ezekiele, Sakaria o ile a bona e sa le pele letsatsi leo ka lona morero oa Molimo ka sechaba sa hae o tlang ho phethahala. Molimo o tšepisitse hore, (bala Sakaria 2:10-11).

Sakaria 3 e hlalisa morero oa Molimo ka sechaba sa hae. Ponong ea Sakaria, moprista e moholo o ne a apere liaparo tse litšila tse bontšang ho se hloeke hoa Iseraele. Molimo o tla

hloekisa sechaba sa hae ka letsatsi le leng; liaparo tsa Iseraele tse litšila li tla tlosoa 'me bakeng sa tsona e tla ba lene e hloekileng.

► Bala Sakaria 3:4.

Litemana tsa ho qetela tsa Sakaria li na le se seng sa litšoantšo tse khanyang ka ho fetisisa Testamenteng ea Khale.

► Bala Sakaria 14:20-21.

Likolokonyaneng tse lipereng ho tla ngoloa mantsoe a tsoang tukung ea moprista e moholo (Eksoda 28:36-38). Lipitsa feela tse tloaelehileng li tla halalela joalo ka merifi e pel'a aletare. Jerusalema e tla ba seo Molimo a neng a e reretse hore e be sona; motse 'ohle e tla ba sebaka seo Molimo a lulang ho sona.

Molimo o tla phethahatsa morero oa Hae; o tla ba le batho ba halalelang, ba phelang motseng o halalelang. Pono ena ea Sakaria e phethahatsoa ho Tshenolo 21 le 22. Sechaba sa Molimo se tla phela moo a leng teng, (bala Tshenolo 21:3).

### **Lefatše le Phethehileng lea Busetsoa**

Bibele e qala ka ho hlalosa lefatše le phethehileng le neng le lahlehe ka lebaka la ho oela. E qetella ka ho hlalosa lefatše le phethehileng le emetseng ba lumellang Molimo ho phethahatsa morero oa hae ka bophelo ba bona. Motse o Halalelang o lokiselitsoe sechaba se halalelang sa Molimo.

Joalo ka serapeng sa Edene, Motse ona o Halalelang o phethehile ka lipalesa, lifate le litholoana tse monate hohle. Lintho tsohle li ntle:

► Bala Tshenolo 22:1-2.

Ka lebaka la sebe, motho o ile a lelekoa serapeng sa Edene le sefateng sa bophelo. Ho Tshenolo, sefate sa bophelo se boela se fumaneha sebakeng sa motho.

Lena e tla ba lefatše le hlokang sebe. Ka linako tse ling babali ba tšosoa ke likhaolo tsa Tshenolo tse hare. Likhaolo tsena li hlalosa likahlolo tse tlang ho oela lefatše. Babali ba bangata ba batla ho tlolela likhaolong tse qetellang tse fanang ka setšoantšo sa botle ba leholimo. Leha ho le joalo, re sitoa ho iphapanyetsa bohare bona ba buka ena. Bakeng sa hore batho ba halalelang ba phele ka khalalelo e sa senyehang le Molimo o halalelang, matla a sebe a lokela ho rojoe.

Tshenolo e bontša lehloeo la Satane ho bana ba Molimo. Johanne o ile a bona sebata se nyolohang leoatleng, se nang le lihlooho tse supileng le linaka tse leshome (Tshenolo 13:1). Sebata seo sa neoa ho loantša bahalaleli, le ho ba hlola (Tshenolo 13:7). Ka nakoana, ho bonahala bobbe bo hlola bana ba Molimo ba halalelang. Leha ho le joalo, qetellong sebata seo se tla hloloa (Tshenolo 15:2). Qetellong bana ba Molimo e tla ba bahloli. Morero oa Molimo o tla phethahala.

Nalaneng ka bophara, sechaba sa Molimo e sa le se lumela hore Molimo o halalelang o tla etsa se lokileng. Khalalelo ea Molimo e ile ea nea moDipesaleme tšepo nakong eo a neng a lilela toka, (bala Dipesaleme 5:4). Ho Tshenolo, Johanne o ile a utloa lillo tsa ba bolaetsoeng lentsoe la Molimo, (bala Tshenolo 6:10).

Khalalelo ea Molimo e kholisa bana ba Molimo hore toka e tla phethoa. Johanne o ile a ngolla Bakreste ba neng ba hlophehile tlas'a khatello ea 'muso oa Roma. O ile a tšepisa hore ea halalelang oa 'nete moahloli oa lefatše ka tsatsi le leng o tla tlisetsa sechaba sa hae toka. Tshenolo e bolella sechaba sa Molimo ho lula se tšepahala, ba ntse ba tseba hore Molimo o halalelang o tla phetetsa bana ba hae ba halalelang. Tshenolo e sheba nako eo Satane a tla hloloa ka eona, 'me sechaba se halalelang sa Molimo se phele ka Khotso.

Leholimo ke motse o halalelang. Ke motse o hlokang sebe kapa litholoana tsa sona. Ke motse o se nang bohloko, o se nang meokho, o se nang matšoenyeho, hape o se nang lefu, (bala Tshenolo 21:4).

Empa ho na le ntho e 'ngoe e hlollang ka ho fetisang. Karolo e khahlang ka ho fetisisa ea serapa sa Edene e ne e le kopano e phethehileng lipakeng tsa Molimo le motho. Adama le Eva ba ne ba tsamaea har'a serapa le Molimo. Ba ne ba bua le eena lifahleho li talimane. Ho ne ho se letho le arohantseng Molimo le motho. Leholimong, re tla phela ka kopano e phethehileng le Molimo. Ha ho na letho le tlang ho arola batho ba halalelang le Molimo o halalelang.

#### ► Bala Tshenolo 21:3.

Johanne o hlalosa leholimo e le sebaka se senang tšabo, bohloko, kapa lefu. Lintho tsohle tse neng li baka tšabo lefatšeng la khale (lipheletsong tse sa tsejoeng tsa leoatile, kotsi ea bosiu, tšoso ea lefu) li tla fela. Khotso ena e sa feleng e tla itšetleha ka boteng ba Molimo.

#### ► Bala Tshenolo 22:3-5.

Batho ba halalelang ha esale ba lakatsa ho bona Molimo. Moshe o ile a batla ho bona Molimo empa ha a ka a khona ho mo talima sefahleho (Eksoda 33:18-20). Davida o ile a rapela a re, (bala Dipesaleme 42:2). Jesu o tšepisitse hore ba pelo li hloekileng ba tla bona Molimo (Mattheu 5:8). Tšepiso ena e phethahalitsoe ho Tshenolo, (bala Tshenolo 22:4).

Dallas Willard o ile a bolela litaba tsa ngoana e mong e monyenyanane eo 'me oa hae a ileng a hloka hala. Bosiung bo bong, o ne a le mong a bile a tšohile, 'me o ile a kopa ho robala phaposing le ntate oa hae. Har'a bosiu, moshanyana enoa o ile a phaphama eaba o botsa ntate oa hae o re, "Na sefahleho sa hau se talimile ka ho 'na?" Ntat'ae o ile araba a re, "E! sefahleho sa ka se talimile ka ho uena." Karabo ena e ne e lekane; eaba ngoana eo o robala ka khotso. Leholimong, batho ba halalelang ba tla bona sefahleho sa Molimo. Sefahleho sa hae se tla be se talimile ho rona ka ho sa feleng; re tla ba le Khotso.

Morero oa Molimo o tla phethahala! Serapa sa Edene se tla busetsoa. Sechaba se nang le lipelo tse halalelang le matsoho a halalelang se tla phela ka ho sa feleng le Molimo ea halalelang. Ona ke morero oa Molimo bakeng sa sechaba sa hae.

### **Khalalelo ke Khalalelo e sa Senyehang le Molimo**

Johanne o ile a bona pono ea morero oa Molimo bakeng sa sechaba sa hae. Ke pono ea sechaba se halalelang se phelang motseng o halalelang. Ka makhetlo a mararo bukeng ea Tshenolo, Johanne o hlalosa sebaka sena seo re tla phela ho sona ka ho sa feleng ka hore ke, motse o halalelang (Tshenolo 21:2, 10; Tshenolo 22:19). Lena ke lehae la Molimo o halalelang, mangeloi a halalelang, le batho ba halalelang. Motse ona o khahlehang ke sebaka sa khalalelo e phethehileng. Teng ho tla phela feela batho ba halalelang.

Tshenolo 21 e fana ka setšoantšo se khahlehang sa leholimo, empa e boela e fana le ka tlhokomeliso ena, (bala Tshenolo 21:8).

Leholimo ke motse o halalelang. Molimo a ke ke a lumella sebe ho senya bohloeki ba motse oo. Baruti ba khale ba itse, "Leholimo ke sebaka se halalelang se lokiselitsoeng batho ba halalelang." Ke feela batho ba halalelang ba tla **natefeloa** ke ho phela motseng ona o halalelang.

Motho ea ikhahlelang bo-eena a ka sitoa ho natefeloa motseng ona oo ho ona Konyana ea Molimo e leng eona khubu. Motho ea iphelelang menyakeng ea sebe a ka sitoa ho thaba motseng oo tsohle li hloekileng. Motho ea sa rateng Molimo a ka sulafalloa motseng oo ho khumamela Molimo e leng ketsahalo ea ka ho sa feleng. Motse o Halalelang o etselitsoe batho ba halalelang. Kahobane sechaba sa Molimo se halalela ebile se hloekile, ba tla phela le eena ka ho sa feleng motseng oo.

Tšepiso e hlahang ho Ezekiele 40-48 e phethahalitsoe ka Jerusalema e Mocha. Leha ho le joalo, 'mali o tla phakisa ho hlokomela phapang e lipakeng tsa pono ea Ezekiele le phethahatso ea eona ho Tshenolo. Ponong ea Ezekiele, tempele e eme bohareng ba motse. Jerusalema e Mocha, Ha e le tempele, ha kea ka ka e bona ho oona; hobane morena Molimo o matla oohle le Konyana ke tempele ea oona (Tshenolo 21:22). Molimo ka boeena ke tempele! Motse kaofela joale ke lefatše le halalelang le khethetsoeng Molimo le sechaba sa hae.

Kopanelo e sa senyehang eo Molimo le motho ba neng ba e arolelana serapeng joale e buselitsoe. Masoabi le letsoalo tse neng li entse hore Adama le Eva ba ipatele li tlohile. Re tla talima sefahlehong sa Molimo. Batho ba halalelang ba tla natefeloa ke kopano e sa senyehang le Molimo o halalelang.

Testamenteng ea Khale, Molimo o ile a khetha Iseraele e le, (bala Eksoda 19:6). Ho Tshenolo, kereke ke marena le baprista ho Molimo oa rona (Tshenolo 5:10). Ho fapana le sechaba sa Iseraele, 'muso ona ke bongata bo boholo ba batho, bao ho seng motho ea ka tsebang ho bo bala, ba lichaba tsohle, le ba mefuta eohle, le ba merabe eohle, le ba lipuo tsohle (Tshenolo 7:9). Tšepiso ea Genese 12:3 e phethahalitsoe ho Tshenolo 7:9.

Joalo ka ha Iseraele e ne e ka phethisa morero oa eona oa ho ba 'muso oa baprista feela ka ho dula ba halalela, kereke le eona e ka phethisa morero oa eona ha feela e halalela. Sechaba sa Molimo se lokela ho halalela. Testamenteng ea Khale, Balevi ba ne ba apesoa ka lene e tšoeu e le ho bontša ho hloeka hoa bona. Ka tsela e tšoanang, Johanne o bontša hore bahalaleli ba lokela ho hloeka (Tshenolo 3:4-5; Tshenolo 6:11; Tshenolo 19:8). Ke feela ba hlatsoang liaparo tsa bona ba tlang ho kena motseng oo (Tshenolo 22:14). Sechaba se halalelang se tla lula ka Khotso le Molimo o halalelang.

### **Khalalelo e Kenngoang Tšebetsong: Nakong Ke sa Ikutloeng Ke Halalela**

Na taba ee e utloahala e tloaelehile? U utloa molaetsa o u qholotsang ho teba khalalelong. Ua rapela ebile oa itlama ho phela bophelo bo halalelang. E be libekeng tse robeli tse hlahlamang, ua hola bophelong ba hau ba semoea. U bona tholoana ea Moea e eketseha bophelong ba hau. U fumana lerato le tebileng bakeng sa Molimo le bakeng sa oa heno.

Ebe hanghang u thula lebota. U ntse u tsamaea le Molimo; ha u fumane sebe sa ka boomo bophelong ba hau; u rata Molimo u rata le oa heno. Empa ka lebaka la bokuli ba nameng, khatello ea maikutlo, kapa esita le khatello ea tšebeletsong, u hlokomela hore, "Ha ke *ikutloe* eka ke ntse ke hola khalalelong. Ebe bothata ke eng?"

U tsoela pele joang bophelong ba khalalelo nakong eo u sa ikutloeng u halalela? Na u tela tsohle ebe u re, "Khalalelo ha e khonehe"? Kapa na u khutlela aletareng? U tsoela pele joang ho tsamaea ka khalalelo?

► Na u kile oa kopana le qholotso ee? U ile ua arabela taba ee joang?

### **"Ha ke sa ikutloe ke halalela, ke lokela ho tsamaea ka tumelo."**

Thutong ea 2, re ile ra bona hore khalalelo ke ho tsamaea le Molimo. Abrahama o ile a tsamaea le Molimo ho ea naheng eo a neng a e-so e bone. O ile a tsamaea le Molimo ka ho ba le kutlo le ka tumelo. Lilemo tse likete li 'ne hamorao, ke taba e utloahalang e thahasellisa haholo ho bala ka tumelo ea Abrahama. Empa ak'u ikenye lieteng tsa hae – u tsamaea letsatsi le letsatsi lefatšeng le matsutla-tsutla. Ha u bone bofello hape ha u tsebe le moo u eang teng. Na u nahana hore Abrahama o ne a tsoha hoseng letsatsi le letsatsi a thabetse letsatsi leo a kenang ho lona? Mohlomong che! Ho ka etsahala hore ho ne ho e-na le matsatsi ao a neng a re, 'Ha ke ikutloe ke batla ho tsamaea kajeno.' Empa Abrahama o ile a 'na tsoela pele ho tsamaea le Molimo.

Re bala hore Noe o ne a tsamaea le Molimo lefatšeng le neng le tletse ka sebe. A pota-potilo ke bahetene ba khumamelang melimo ea litšoantšo le banna ba neng ba iqapela mekhoe e mecha ea ho etsa bokhopo (Genese 6:5), Noe o ne a tsamaea le Molimo. Na u nahana o ne a tsoha hoseng letsatsi le letsatsi a thabetse letsatsi leo a kenang ho lona? Ke belaela hore ka linako tse ling o ne a ikutloa a khathetse a bile a nyahame. Empa, Noe o ile a tsoela pele ho tsamaea le Molimo.

Senotlolo se le seng sa bophelo ba khalalelo ke ho hopola hore re bolokuoe ke mohau ka tumelo; re halalelitsoe ka mohau ka tumelo; re tsoela pele ho hola khalalelong ka mohau ka tumelo. Batho ba bang ba utloisisa hore ba bolokuoe ke mohau ka tumelo. Hape ba ithuta le hore ba halaletsoa ke mohau ka tumelo. Empa, ba oela lerabeng la ho lumela kholo e tsoelang pele e itšetlehile matleng a bona.

Na ho na le boitaeo bo hlokahalang bophelong ba khalalelo? Ka botlalo! Na re hloka ho tsoela pele re bolae ke hona litho tsa rona tse leng lefatšeng? (BaKolose 3:5). Ho joalo. Na re hloka ho tsoela pele ho hahamalla ho tse kapele le ho mathela moo ho lekantsoeng teng, e leng pheo eo re e biletsoang holimo ke Molimo, ka Jesu Krete? (BaFilipi 3:13-14). Ho joalo!

**Empa** ha u oa lokela ho lebala ho re ho bolaea, ho hahamalla ho tse kapele, le ho mathela moo ho lekantsoeng teng ke lintho tse etsoang ka matla a Molimo ea sebetsang ka ho lona ho rata le ho etsa (BaFilipi 2:13). Ke eena ea faneng ka takatso (ho rata); hape ke eena ea fanang le ka matla (ho etsa). O ntse a sebetsa ka ho rona ho fihlella sepheo sa hae sa ho re halaletsa. Ha u sa ikutloe u halalela, u phomola mohaung oa Molimo ea ntseng a o fetolela letsatsi le letsatsi setšoantšong sa hae.

**“Ha ke sa ikutloe ke halalela, ke lokela ho phomola khalalelong ea hae.”**

Thutong ea 5, re bone hore ho phetheho ha se ho phela ka ho se etse liphoso empa ke pelo e sa arohanang boinehelong ba rona ho Molimo. Thutong ea 7, re ithutile hore taelo ea Morena Jesu e reng “Le phethehe” ke taelo ea ho se be le lerato le arohaneng ho Molimo. Ho phetheha hoa Mokreste ha se tšebetso ea hae; ke taba ea lerato.

Re halalela hobane feela Molimo oa halalela. Re seo re leng sona ho Jesu. Oa re halaletsa. E ’ngoe ea linnete tse kholo tsa evangeli ke hore ha re sa sokola ho batla ho fihlella khalalelo ka matla a rona. Re ka iphomolela ho Krete. Seo re leng sona re le Bakreste, seo re leng sona re le bahalaleli, seo re leng sona re le sechaba se halalelang, se ho eena.

Robert Coleman o kile a bolela pale mabapi le seo ho rata Molimo ka ho phethehileng ho se bolelang leha ho sebetsa hoa rona ho sa phetheha. Dr. Coleman o ne a ntse a sebetsa ka serapeng sa hae letsatsing le leng le neng le chesa la lehlabula. Ha mora oa hae e monyenyanane a bona ntate oa hae a fufuletsoe letsatsing moo, o ile a etsa qeto ea ho mo isetsa khalase ea metsi. Moshanyana enoa o ile a thonaka lebekere le litšila, a tšela metsi ka ho lona metsi a seretse a tsoang sekotjaneng se serapeng moo, eaba o isetsa ntat’ae metsi ao. Dr. Coleman o itse, “Lebekere leo le ne le le litšila le metsi a ne a le seretse. Empa, ho noa metsi ao e ne e le ho phethehileng hobane a ne a tsoa pelong e tletseng ka lerato.” Sena ke setšoantšo sa ho phetheha hoa rona ho nang le moeli. Re tlisa tšebeletso ea rona e pshatlehileng, e sa phethehang ho Molimo ea e amohelang hobane e tsoa pelong e nang le lerato.

Molimo o amohela mesebetsi ea rona e pshatlehileng ’me o e fetola ho e etsa ntho e fetisang mehopolo ea rona – hobane khalalelo ea rona ke setšoantšo feela sa khalalelo ea hae e se



nang moeli. Esita le lerato la rona le fetisisang le ntse le angoa ke meeli ea rona ea botho. Empa ha re phomola khalalelong ea hae, re lemoha hore ho kutlo taelong ea hae ea "Halalelang" e fihlelloa ka ho phetheha ka eena. Ka lipelo tse nang le lerato le sa arohanang, re tlisa ho eena metsi a rona a seretse ka lebekere le litšila – 'me eena o a fetolela nthong e hloekileng e khanyang. Khalalelo ea rona e etsoa e phethehileng khalalelong ea hae.

**"Ha ke sa ikutloe ke halalela, ke lokela ho hopola hore ke karolo ea sechaba se halalelang."**

Sehlooho se seholo – seo hangata se tloisoang mahlo holimo – sa Tshenolo ke kereke. Tshenolo e qala ka melaetsa e latellanang e eang likerekeng tse supileng. Melaetsa ena e bontša bohlokoa ba kereke ea lehae kahar'a 'mele o moholo oa Krete. Empa hona ha se getello ea seo buka ea Tshenolo e se tiisang ka kereke.

Sehlopha sa batho ba 144,000 ba pholositsoeng e ka ba e boemeli ba kereke eohle, e leng 'mele oa Krete. Hamorao hona bukeng ena, kereke e bonoa e se e le monyaluoa oa Konyana (Tshenolo 19:7-8). Kereke ke ntlha e ka sehloohong eo buka ea Tshenolo e e talimileng.

Haeba taba ena ke 'nete, khumamelo esita le kopano ea rona re le kereke lefatšeng ke boitokisetso ba khumamelo esita le kopano ea rona re le kereke ea ka ho sa feleng. See se bolela'ng bakeng sa bophelo ba rona re le kereke ea joale?

► Haeba Tshenolo ke setšoantšo sa monyaluoa oa Krete, mokhoa oo e bontšang kereke ka oona o lokela ho ama bophelo ba kahar'a kereke joang? Kapa ho botsa potso ena ka tsela e 'ngoe – ke ka litsela life kereke ea heno e shebahalang joalo ka kereke e hlahang ho Tshenolo? Hape ke ka litsela life kereke ea heno e sa shebahalang ka ho tšoana le kereke e hlahang ho Tshenolo?

E 'ngoe ea lintho tse sebetsang eo e leng litholoana tsa 'nete ena ke hore, bophelo ba rona ba khalalelo bo pheloa ka kopano-'moho le kereke. Lefatšeng la hajoale la ho ikemela, Bakreste ba bangata ba nahana ka khalalelo e le *feela* ntho ea motho ka mong, hape eo motho a ka e fumanang lekunutung.

Leha ho le joalo, le ha ho na le mehlala ea batho ba kang bo-Henoke ea neng a tsamaea le Molimo a le mong, ho na le mehlala e mengata ea Bibe le moo bana ba Molimo ba neng ba tsamaea le Molimo e le **karolo ea 'mele**. Melao ea bohloeki ea Iseraele e ne e le ea sechaba sa Molimo (Levitike 20:26). Iseraele e ne e fetisa sehlopha sa batho ka bo-mong feela; e ne e le sehlopha se kopanetsoeng sa balumeli se holang hammoho ka setšoantšo sa Molimo.

Kereke ea Testament e Ncha e ne e se feela sehlopha sa batho ka bo-mong ba iphumanang e le karolo ea mokhatlo o le mong. Kereke e ne e le – 'me e sa ntse e le – 'mele oa Krete. Bahalaleli ba hlahang bukeng ea Tshenolo ba tobana le ho bolaelloa tumelo ea bona e le karolo ea 'mele. Esita le moo ba shoang ba le bang, ba tseba hore ke karolo ea kereke e ka lefatše lohle. Bahalaleli ba bukeng ea Tshenolo ba phela bophelo ba khalalelo e le karolo ea

'mele. Ke karolo ea monyaluoa ea hloekileng. Esita leha Johanne a ne a lutse a le mong sehlekehlekeng sa Patmose, oa tseba hore ke karolo ea kereke e ka lefatše lohle.

Ho se ho tloaelehile ho utloa batho ba re, "Ke rata Jesu, empa ha ke rate kereke." Taba ena e itšetlehile ka ho hloka kutloisiso ho bohloko ka kereke! Haeba kereke ke monyaluoa oa Krete joale ke rata krete, ke tlamehile ho rata kereke. Kereke ke 'mele oa balumeli ba holang hammoho setšoantšong sa Molimo.

Ha rea bopeloa ho phela re le bang. John Wesley o itse, "Khalalelo eohle ke khalalelo ea kopanelo." O ne a bolela hore re hola re le karolo ea 'mele. Wesley o bea balumeli sehlotšohaneng se le seng ho nka boikarabello ba taba tsa moea, hobane batho ba hola hantle moeeng ho ba le ha 'moho.

Sena se bolela'ng ho rona matsatsing aa? Batho ba halalelang ke karolo ea kereke e halalelang. Re hola khalalelong re le karolo ea 'mele o halalelang. Ha ke imeloa, Molimo o tliša motho e mong ea ntseng a batla khalalelo haufi le 'na, a tle a nkhothatse karolong eo ke fokolang ho eona. Ka lehlakoreng le leng, ha Molimo a nthusitse karolong e itseng, le 'na nka khothatsa ngoaneso ea fokolang. Bophelo ba khalalelo bo reretsoe ho pheloa hammoho ke balumeli ba tletseng ka Moea ba etsang hore lerato la Molimo le bonahale lefatšeng la rona.

"Ha motho a nahana hore ho  
haha bophelo ba khalalelo o  
tlameha ho lula a le mong le  
Molimo nako tsohle, ha a sa  
na thuso ho ba bang."  
- Oswald Chambers

Mongoli oa buka ea BaHebheru o ne a utloisisa taba ena hantle.

► Bala BaHebheru 10:24-25.

Ha a kothaletsa Bakreste ba neng ba hlrisoa ho tiisetša tumelong, o itse, le isane ka cheseho ha le ntse le kopana hammoho hape le kothatsane. Karolo e 'ngoe ea mosebetsi oa kereke ke ho kothaletsa setho ka seng ho ba le lerato le tebileng le ho halalela.

Ha u sa ikutloe u halalela, lumella Molimo ho u kothatsa ho tsoela pele ho hola ka thuso ea Bakreste 'moho ba bang bao e leng karolo ea 'mele oo a u beileng teng. U karolo ea kereke e ka lefatše lohle, empa hape u karolo ea 'mele oa lehae. Molimo o u behile moo ka lebaka. Lumella balumeli-'moho ho u isa ka cheseho kholong e fetisang bophelong bona ba khalalelo.

## O Fumane Sephiri – Fanny Crosby

Ha Fanny Crosby<sup>36</sup> a ne a le likhoeli tse peli, phoso e ileng ea etsoa ke ngaka e ile ea mo fufatsa ka ho ke keng hoa fetoha. Likhoeli tse 'maloa kamor'a moo, ntate oa hae o ile a hlokahala. 'Me oa hae o ne a tlameha ho siea lelapa feela nako ea lihora tse ngata ha a ntse a sebetsa e le mohlakomeli oa lelapa le leng. Fanny o ile a tseba mathata a bophelo lefatšeng le rohakiloeng ke sebe.



Sefela sa Fanny Crosby se paka boitlamo ba hae ho Krete. O ne a nehetse thato ea hae ka botlalo thatong ea Molimo. Poleloaneng e 'ngoe e khahlehang, mofumahatsana Crosby o rapela hore thato ea hae e timelle thatong e phethehileng ea Molimo.

Fanny Crosby o ne a utloisisa hore khalalelo ke lerato le phethehileng ho Molimo le lerato le phethehileng ho ba habo rona. O ne a fane ka nako ea hae le chelete ea hae ho mekhatlo e neng e sebeletsa e thusa batho ba matahoa le ba hlokang lehae. Eena le molekane oa hae ba ile ba fana ka lintho tsohle tseo ba neng ba sa li hloke ho phela. O ne a rata Molimo, hape o ne a rata ba habo. Letsatsi le letsatsi, Fanny Crosby o ne a hola ho tšoaneng le Krete le leratong le phethehileng.

Fanny o ne a lebelletse letsatsi leo tšepiso ena e reng, "ba tla bona sefahleho sa wona" e tla phethahatsoa. Ha motho e mong a ne a bontša kutloelo bohloko sebakeng sa boemo ba hae, Fanny Crosby o ne a araba ka hore o ithabela bofofung ba hae hobane, "ha ke fihla leholimong, sefahleho sa pele seo ke tla qala ho beha mahlo a ka ho sona ke sa Mopholosi oa ka: ke tla 'mona lifahleho li talimane."

---

<sup>36</sup> Setšoantšo: "Francis Jane Crosby, 1820-1915" by W.J. Searle, e nkiloe ho the Library of Congress Prints and Photographs Division, <http://hdl.loc.gov/loc.pnp/cph.3b17084>, "no known restrictions."

## **Boikhopotso ba Thuto ea 11**

- (1) Khalalelo ke khalalelo e sa senyehang le Molimo.
- (2) Ho tloha ho Genese 3 ho isa li-epistoleng, Molimo o tšepisa ho buetsa kopano ena e tebileng e lipakeng tsa Molimo le motho. Tšepiso ena e phethahatsoa ka ho Tshenolo.
- (3) Tshenolo e bontša batho ba halalelang ba leng kopanelong e sa senyehang le Molimo o halalelang.
- (4) Kopano-'moho ea kereke ke boitokisetso ba kopano ea leholimong. Kereke e lefatšeng ke mohlala oa kereke ea ka ho sa feleng. Ka lebaka la sena, re lokela ho batla ho bapisa bophelo ba kereke ena e koano le kopano ea kereke eo e leholimong.

## **Kabelo ea Thuto ea 11**

- (1) Ak'u iketsetse setšoantšo sa ha motho e mong a ka re ho oena, "ke rata Jesu, empa ha ke re kereke." Ngola lengolo la maqephe a 1-2 moo u bontšang motho enoa hore ho rata Jesu ho lokela ho khanela ho lerato ho monyaluo oa Jesu, e leng kereke. Bontša kamoo pelo e halalelang e tlang ho susumetsa lerato ho kereke ea Molimo. Bontša kamoo ho ba karolo ea kereke ho tla re thusa ho hola khalalelong.
- (2) Qala thuto e latelang ka ho pheta Tshenolo 21:2-3.



# Thuto ea 12

## Na Bophelo ba Khalalelo Boa Khoneha?

### Sepheo sa Thuto

Qetellong ea thuto ena, baithuti lokela ba be ba ka:

- (1) Hlokomela hore taelo ea Molimo ea khalalelo e phethahalitsoe tšepisong ea hae ea ho re halaletsa.
- (2) Inehela ka ho feletseng pitsong ea Molimo ea hore re halalele.
- (3) Etsa boitlamo ba letsatsi le letsatsi kholong ea khalalelo.
- (4) Tseba 1 BaThesalonika 5:23-24 ka hlooho.

### Paulosi: Monna ea Neng a Phehella Khalalelo

Ak’u nahane ka puisano le Saule oa Tarese selemong sa A.D.34. Mo botse potso ena “Na u motho ea halalelang?” Saule o ne a tla araba ka ho re, “E, kea halalela! Ke bolotse ho ea ka molao. Ke Mofarisi. Ke ela molao hloko likarolo tsohle tsa molao. Ke lokile.” Saule o ne a inka a halalela ka lebaka la ho boloka molao ka hloko. O ne a leka ho fumana lereko la Molimo ka mesebetsi e metle (BaFilipi 3:4-6).

Empa ha a le tseleng e eang Damaseka, Saule o ile a kopana le Morena ea tsohileng bafung sefahleho le sefahleho. A hlokomela hore ho loka hoa hae ho ne ho le joalo ka likatana tse litšila (Isaia 64:6). O ne a sa ema khahlanong le baruti ba bohata, empa Messia oa ’nete. O ne a hlolehile ho mamela molao o phethehileng oa ho rata Molimo le ho rata oa heno. Ha a le tseleng e eang Damaseka, Saule o ile a fumana tsela e ncha e isang khalalelong, (bala BaFilipi 3:9).

Ak’u nahane ka puisano le Paulosi ka selemo sa A.D. 60. “Paulosi, joale u se u tseba hore tsela e le ’ngoe feela e isang ho lokeng hoa ’nete ke ka tumelo ho Krete. Na hoo ho bolela hore u ke ke oa halalela? Na hoo ho bolela hore Krete o tla u bala u le ea halalelang leha u ntse u tletse ka sebe?”

Paulosi o ne a ka u arabela ka ho makala ho hoholo. “Hona ho fosahetse! Ho loka ho tla feela ka ho lumela ho Krete – empa Molimo ha a re tlohele boemong ba sebe moo a re fumaneng teng. Bala bopaki ba ka. Sepheo sa ka ke hore, (bala BaFilipi 3:10). Sepheo sa ka ke ho tsoana le Krete. Pholoho e tlang ka tumelo ha e re nee tumello ea ho phela bophelo ba boetsalibe; pholoho e tlang ka tumelo e re nea matla a ho tsoana le Krete. Molimo o lerato o matlafatsa bana ba hae ho phela bophelo ba khalalelo ka Moea o lulang ka ho rona!” (BaFilipi 3:10).

► Ikhopotse seo u ithutileng sona ka khalalelo. Na u na le setšoantšo sa botle ba khalalelo? Na u lumela ho re bophelo boo ba khalalelo bo tšepisitsoe bana ba Molimo?

### **Na Bophelo ba Khalalelo boa Khoneha?**

Thutong ena, re bone hore Molimo o laela bana ba hae hore ba halalele. Empa batho ba bangata ba bala taelo ena ea Molimo ebe ba arabela ka ho re, "Hoo ha ho khonehe. Ke tla sitoa ho halalela." Na Bakreste ba lokela ho khotsofalla bophelo ba ho hloloa esita le tšepo tse ferekaneng? Na re lokela ho hloleha ho natefelo ke mpho ea Molimo ea bophelo bo halalelang? Kapa re ka natefelo ke morero oa Molimo o moholo bakeng sa sechaba sa hae?

### **Lentsoe la Molimo Le Paka hore Bophelo ba Khalalelo boa Khoneha**

Ho tloha ho Henoke ho isa ho balichaba ba sokolohileng ba Thesalonika, Bibe e ruta hore bophelo ba khalalelo boa khoneha.

Ho Levitike hape le ho 1 Petrose, Molimo o laetse bophelo bo halalelang, (bala habe Levitike 19:2 le 1 Petrose 1:15-16). Ha ho na moo Molimo a fanang ka taelo a sa fane ka mokhoa oa hore e ka phethoa. Molimo ke Ntate ea lerato ea sa ferekanyeng bana ba hae ka litaelo tse sa khoneheng. Leha e le hore ha re khone ho phetha litaelo tsa hae ka matla a rona, mohau oa Molimo o re nea matla a ho phetha litaelo tsa Molimo.

Professor Bill Ury o re, "Taelo ke setšoantšo sa seo Molimo a leng sona hape ke tšepiso ea seo le rona re ka bang sona".<sup>37</sup> Taelo ena e reng e bontša hore Molimo ke mang; ke Molimo ea halalelang. Taelo ena hape e bontša seo le rona re ka bang sona; re ka halalela.

### **Nalaneng Eohle Bakreste ba Bontšitse Hore Bophelo Ba Khalalelo Boa Khoneha**

Bakreste melokong eohle ba fumane hore bophelo bo halalelang ke monyetla o fuoeng bana ba Molimo. Batho ba tsoang mekhahlelong eohle ea bophelo ba fumane monyaka oa ho phomola matleng a Moea o Halalelang. Ba fumane khotso e fumanoang ka ho rata Molimo ka pelo e sa arohanang le ho rata oa heno joalo ka ha u ithata.

### **Ho Lapela Khalalelo Hoa Rona hoo re ho Neoang ke Molimo Ho Paka Hore Bophelo ba Khalalelo Boa Khonahala**

Molumeli e mong le e mong o lapela ho tsamaea le Molimo ka botebo. Bakreste ba 'nete ba batla ho tsamaea haufi le Ntate oa rona. Bakreste ba 'nete ba batla ho tšoana le Krete. Molimo o kentse pelong tsa bana ba hae ho lapela likamano tse tebileng le eena. Re ka ba le bonnete ba hore Ntate ea Maholimong ea lerato a ke ke a tlisa ho lapa empa a sa fane ka tsela ea ho khorisa tlala eo ea rona. Khalalelo ke monyetla o thabisang ho molumeli e mong le e mong.

---

<sup>37</sup> Puisano ea email, June 27, 2016

## Na Pelo e Halalelang ea U Lokela?

Lilemo tse ngata tse fetileng, ho ne ho e-na le monna oa mofutsana ea ileng a lora a tšela leoatle ka sekepe. O ile a boloka chelete ka lilemo-lemo ho fihlela a khona ho reka tekete. Kamor'a ho lefella tekete eo, o ne a salletsoe ke chelete e nyane haholo. O ne a ile a utloela ka lijo tse monate tse ngoatheloang batho ka har'a likepe tseo tse tsamaisang batho maoatleng, empa o ne a tseba hore lijo tseo li tla ba theko e phahameng haholo. Ho boloka chelete, monna enoa o ile a reka bohobe le cheese a li tšela mokotleng oa hae.

Letsatsi le letsatsi ha bapalami ba sekepe ba ea tlung ea ho jella, monna enoa o ne a ea phaposing ea hae e be o ja bohobe le cheese. O ne a thabetse ho ba kahar'a sekepe, empa hangata o ne a lakatsa eka a ka be a natefelo a le ke lijo tse monate tse jooang ka tlung ea ho jella. Letsatsing la ho qetela la leeto lena, monna eo o ile etsa qeto ea hore a ke a je lijo hanngoe ka tlung ea ho jella. A nka chelete eohle eo a neng a e-na le eona, a lumela hore e tla lekana ho mo rekela lijo hanngoe feela. Ho makaleng hoa hae, mosebetsi oa sekepe o ile a 'motsa, "Haesale u le hokae? Esale re ntse re hlophisa tafole ea hau beke kaofela! Theko ea lijo e kenyelelitsoe thekong ea tekete ea hao. lijo tsena u se u li lefelletse."<sup>38</sup>

Bakreste ba bangata ba joalo ka monna enoa oa mofutsana. Thabo ea bophelo bo halalelang, Khotso ea ho phela ka boinehelo bo felletseng ho Molimo, le tlholo ea ho phela ka matla a Moea o Halalelang – tsohle li se li fanoe ka lefu la Krete sefapanong. Krete o lefile theko e felletseng, empa re phela ka boemo bo tlaase ho menyetla eo re nang le eona.

Haeba pelo e halalelang e ka fumanoa ke molumeli e mong le e mong, hobaneng ho ka ba le Mokreste ea hloloang ho natefelo a ke monyetla oo? Re atisa ho lumella Satane ho re thetsa hore re be le kutloisiso e fosahetseng ea thuto ea Bibe. Mashano a Satane a re thibela ho natefelo a ke menyetla eo Molimo a e reretseng bana ba hae.

### **"Pelo e Halalelang Ha e Khonehe"**

Bakreste ba bangata ba nahana hore pelo e halalelang ha e khonehe. Ba bala litaelo le litšepiso tsa Mangolo, empa ebe ba nahana ba re, "E lokile bakeng sa Abrahama, empa 'na nka sitoa ho ba 'motsoalle oa Molimo.'"

Ba bang ba reng, "Pelo e halalelang ha e khonehe" ba bua ho tsoa boiphihlelong bo bohloko. Ba lekile ho phela bophelo bo halalelang – 'me ba ile ba hloleha. Mohlomong ba ne ba latetse melao ea kantle eo ba neng ba e bapisa le khalalelo; mohlomong ba lekile ho laola maikutlo a bona le Diketso tsa bona tsa boetsalibe ka boitaeo bo thata haholo; mohlomong ba ile ba fana esita le ka bopaki ba lipelo tsee hloekileng. Kajeno ba se ba entse qeto ea hore ha ho khonahale ho halalela joalo ka ha Jehova Molimo oa hau a halalela.

Etsa setšoantšo sa monna ea ithutang ho bitsa linonyana. O ikoetlisa ho fihlela a tseba ho letsa mololi joalo ka tsoere. O tla phethahala hoo moahisane a tla nahana hore ke tsoere e

---

<sup>38</sup> Pale ena e nkuoe ho tsoa ho John N. Oswalt, *Called to be Holy* (Nappanee: Evangel Publishing, 1999), 149-150



ntseng e bina. Empa monna enoa ha se nonyana! A ka khona ho etsisa melumo ea tsona, empa ha a tsebe seo melumo eo e se bolelang. O khona ho etsisa nonyana, empa ha a tsebe letho ka boikutlo ba nonyana ha e bina. O khona ho etsa Diketso tse kantle; ha a tsebe bonnete ba seo e hlileng e leng sona kahare.

Bakreste ba bangata ba ithutile puo esita le Diketso tsa motho ea halalelang. Ba bua mantsoe, empa lipelong tsa bona ha ba na boitsebelo ba letho. Ba behile Diketso tsa kantle sebakeng sa 'nete ea kahare. Sena se tla phakisa se hlahise masoabi le pherekano.

Karabo e loketseng leshano lee la Satane le reng, "Pelo e halalelang ha e khonehe" ke efe? Re lokela ho ba le tumelo litšepisong tsa Molimo. Re lokela ho lumela hore Ntate oa rona ea lerato o tla re matlafatsa hore re phethe taelo ea hae.

E, 'na le uena re libopuo tse ka etsang liphoso 'me re ke keng ra fihlella phetheho ea Molimo. Empa Molimo o re laetse a re "Halalelang." Ho sa tsotellehe semelo sa rona sa hore re oele, re ka tšepela Molimo ea lokileng ho fana ka mohau o tla re nea bokhoni ba ho phetha taelo ea hae.

### **"Ha Kea Lapela Pelo e Halalelang"**

Ka masoabi, batho ba bang ba ipitsang Bakreste ha ba lapela khalalelo. Ba ipitsa Bakreste, empa ba na le takatso e nyane kapa ha ba na takatso ea ho hola setšoantšong sa Krete.

Lefutso o ipolela e le Mokreste, empa o bontša thahasello e nyenyane bophelong ba khalalelo. O tsoela pele ho etsa libe ka boomo; o ntse a phela ka tsela eo a neng a phela ke eona pele a ipitsa ka Krete. Ha re mo etetse, Lefutso o ile a bolela batho ba bang ba neng ba le hlokolosi haholo ka tsela eo ba phelang ka eona. Boitšoarō ba bona e ne e le ba lerato; Diketso tsa bona li ne li bontša takatso ea bona ea ho khahlisa Molimo. Ba ne ba e-na le lipelo tse halalelang le matsoho a halalelang.

Lefutso ha a ntša maikutlo ka ho lapela khalalelo hona hoa bona o ile a re, "Ha ke tsotelle ho halalela. Moruti oa ka o mpoelletse hore ha ke baketse libe tsa ka 'me ke lumela ho Jesu e le Mopholosi oa ka, ke tla ea leholimong. Ho ea leholimong ke eona ntho eo ke e tsotellang. Ha ke hloke ho fetang moo!"

Bothata ba Lefutso ke bofe? Ke hore ha a lapela khalalelo. Hobonahala hore Lefutso o na le kutloisiso e fokolang ea seo ho ba Mokreste ho se bolelang. Motho ea tsoetsoeng la bobeli o lokela ho batla ho tšoana le Krete. Mokreste oa 'nete o lokela ho lapela pelo e halalelang.

Karabo ea ha u sa lapela pelo e halalelang ke efe? Mohlomong u fela o pholositsoe e le kannete, empa u ile oa soabisoa ke boiphihlelo boo u bileng le bona nakong e fetileng, baikaketsi ba nyahameng ba neng ba ipolela hore ba halalela, kapa ha u e-so bone molaetsa oa pelo e halalelang ka Mangolong. Haeba ho joalo, kopa Molimo ho u nea ho lapela pelo e halalelang.

## **“Ke Halalela ho Lekana”**

Mohlomong leshano le kotsi leo re ka ipolellang lona ke hore, “Ke halalela ho lekana.” Batho ba bang ba lumela hore ba ea halalela ka lebaka la tsela eo ba aparang ka eona, ho ba litho tsa kereke e itseng, kapa neo ea Moea e itseng. Ha ke qala ke ikholisa hore “ke halalela ho lekana,” ho ke ke hoa hlola ho e-ba le kholo e tsoelang pele khalalelong.

Letšoao le sa fosahaleng la motho ea halalelang ke tabatabelo ea ho hola khalalelong. Ha ho mehlala Mangolong kapa nalaneng ea kereke oa motho ea halalelang ea kileng a re, “Ke halalela ho lekana.” Botebo ba kamoo motho a holang ho tšoaneng le Krete, ke moo a lapelang kholo ka ho fetisang.

Monna kapa mosali ea tsamaeang haufi le Molimo o re, “Ke thabile kamoo ke ntseng ke tsamaea le Molimo kateng, empa ke batla ho tsamaea haufi le eena le ho feta!” Motho ea halalelang o ithabela kopanong ea hae le Molimo, empa o batla likamano tse tebileng ka ho fetisang le Molimo. Oa ithabela ha a ntse a hola ho tšoaneng le Krete, empa hape o rapella hore Molimo a eketse ho mo etsa ea tšoanang le Krete.

Karabo ke efe bakeng sa boipolelo bo sa tebang ba khalalelo? Haeba u ithetsitse ka ho khotsofala hoo eseng hoa 'nete, karabo ke boikokobetso kapel'a sefahleho sa khalalelo ea Molimo e phethehileng. Haeba u bona khalalelo ea hae e phethehileng, u ke ke oa khotsofatsoa ke boipolelo ba khalalelo e se nang botebo. Ha Isaia a bona Jehova a lutse teroneng e kholo, e phahameng o ile a hlokomela tlhoko ea hae ea khalalelo, (bala Isaia 6:1, 5).

Ha Isaia a bona khalalelo e phethehileng ea Molimo, o ile a hlokomela hore o hloka ho hloekisoa. Pheko ea ho boipolelo ba khalalelo e sa tebang ke kutloisiso e tebileng ea Molimo. Ha re bona Molimo, re tleloa ke ho lapela pelo e halalelang ka ho fetisa. Ha re tsoela pele ho bona Molimo haholo, re tla eketsa ho lakatsa ho tšoana le eena.

## **Tsela e Isang Khalalelong**

Re ka etsoa ba tšoanang le Krete joang? Ke ka tsela efe oena, molumeli ea lakatsang ho tlatsoa ka botlalo ba Molimo, u ka amohelang mpho ee e babatsehang? Tsela e isang pelong e halalelang ke eng?

Ha rea tlameha ho sokola ho fumana tsela e isang khalalelong. Lentsoe la Molimo le bontša tsela e isang bophelong ba khalalelo.

## **Khalaletso ea ho Qala**

Ho tloha motsotsong oa ha u tsoaloe bocha, Moea o Halalelang esale o lula ka ho uena (Baroma 8:1-2, 9-11). Hanghang, u tlohile lefifing ho ea leseling. Ho tloha ka nako eo ho ea pele, Testamente e Ncha e o hlalosa o le “mohalaleli.”

Leha ekaba u sa ntse u sokolisoa ke meleko, Moea o Halalelang o u nea tlholo letsatsi le letsatsi holim'a sebe se etsoang ka boomo. Batho ba u potileng ba bone phetoho e

etsahetseng ha u phela bophelo ba hau bo bocha bo ho Krete. Ithabele ho seo Molimo a se entseng!

### **Ho Hola Khalaletsong**

Ha u latela Krete, Moea o Halalelang o sebetsa ho tliša phetoho moeeng oa hau kahare. Ha u tsamaea ka Moea, ha u sa kholisa litakatso tsa nama (Bagalata 5:16). Meleko ea hau ea khale ha e sa na matla holim'a hau. Ho mamela Molimo ho u tlišetsa thabo e sa feleng.

Leha ho le joalo, u bona likarolo tseo u ntseng u sokola ho tsona. U mamela Molimo, empa ka linako tse ling ho ba le toantšano lipakeng tsa litaelo tsa Molimo le litakatso tsa hau tse kahare. Ho ba le ntoa pakeng tsa seo Molimo a se laelang le thato ea ha ea boithati. U tla fumana ho le boima ho rata Molimo ka ho felletseng le hona ho rata oa heno. U qala ho hlokomela hore u na le pelo e arohaneng.

### **Ho Hloeka ha Pelo**

Ha Molimo a u koahollela likarolo tseo ho tsona u hlohang tlhoekiso e tebileng, u tla qala ho lapela tšepiso ea 1 BaThesalonika 5:23. U tla batla ho tseba bonnete ba thapelo ena ea Paulosi. U tla qala ho botsa Molimo u re, "Na ho sa na le ho hong hoo u batlang ho ho etsa bophelong ba ka? Na nka hloekisoa? Na litakatso tsa ka tse kahare li ka fetoloa ho fihlela boemong boo ke seng ke sa sokole ho u mamela ka ho felletseng?"

Bakreste nalaneng ka bophara ba ile ba rapela hore Molimo a ba nee pelo e hloekileng. Ho ea ka 1 BaThesalonika 5:23, ba bang ba sebelisitse lebitso la "khalaletso e phethehileng" bakeng sa boiphihlelo bona ba bang ba e bitsitse "bophelo bo tebileng."<sup>39</sup> John Wesley o sebelisitse lentsoe lena "lerato le phethehileng." Ho sa tsotellehe mantsoe a sebelisitsoeng, hona ke tlala ea tlholeho ea ngoana oa Molimo ea batlang ho hola ho tšoaneng le Krete.

Ha u ntse u rapella tlhoekiso ena e tebileng, u ka 'na oa fumana likarolo tse tharo tseo Molimo a tla u tataisetsa ho tsona. Hona ha se tsuo eo u neng u e utloa ha u sa le ea sa lumelang; joale u se u le ngoana oa Molimo! ho e-na le hoo, likarolong tsena ke hona moo Molimo a u biletsang ho ba le pelo e halalelang.

### ***Molimo O Tla U Biletsa Ho Mamela Ka Ho Feletseng***

Balumeli ba bang ba thatafalloa ke ho fumana pelo e halalelang hobane ba sa ntse ba loantšana le likarolo tse ling tseo ba sa mameleng ho tsona. Re sitoa ho tsamaea ka likamano tse haufi le Molimo ka ntle le hore re tsamaee ka ho mamela.

Ha ho na Mokreste oa 'nete ea phelang ka borabele ba ka boomo khahlanong le litaelo tsa Molimo. Leha ho le joalo, Bakreste ba bangata ba fumane mokhoa oa ho qoba kapa ho hana (le ka ho bona) likarolo tseo ba phelang ka ho se tsotelle ho tsona. Ha ho mohla ba ka reng,

---

<sup>39</sup> E phethehileng" ke lentsoe le leng le bolelang "e felletseng," e leng lentsoe le sebelisitsoeng ho 1 BaThesalonika 5:23. Ha le bolele "kholo e felletseng;" le bolela tlhoekiso le tlhatsuo tse felletseng.

"Molimo, nke ke ka u mamela," empa ba re, "Molimo, ha ke nahane hore sena se bohlokoa haholo hoo nka se etsang." Ba iphapanyetsa likarolo tse ling tseo ba sa mameleng ho tsona. Haeba re batla ho ba batho ba halalelang bao Molimo a biletsang sechaba sa hae ho ba bona, re lokela ho mamela Molimo likarolong **tsohle**.

Joalo ka batho ba oeleng, re thetsitse esita le rona ka botebo ba sebe sa rona. Ka lebaka lena, MoDipesaleme o ile a rapela a re, (bala Dipesaleme 139:23-24).

MoDipesaleme o ile a rapela hore Molimo a hlohotse 'me a senole pelo ea hae. O ne a tseba hore ha re na bokhoni ba ho tseba lipelo tsa rona ka ho felletseng. Empa ha re batla ho tlatsoa ka botlalo ba Molimo, re tla rapela hore Molimo a senole likarolo tsohle tsa limelo tsa rona tsa boetsalibe.

Davida o ile a rapela a re, (bala Dipesaleme 19:12). O ne a tseba hore re ka pata boteng ba sebe sa rona le rona ra ba ra ipatela sona. Ke Molimo feela ea ka khantšetsang leseli libakeng tse poteletseng tsa lipelo tsa rona.

Ha u ntse u batla pelo e hloekileng, u tla fumana hore Molimo o tla senola likarolo tsa hau moo maikutlo le Diketso tsa hau li sa bontšeng setšoantšo sa hae. Kahobane u batla ho tšoana le Krete, u tla ipolela likarolong tsena u sa khannoe 'me u tla mamela pitso ea Molimo ea ho mo mamela ka ho felletseng.

### ***Molimo O Tla U Biletsa ho ba le Pelo e Inehetseng***

Ha u batla pelo e hloekileng, Molimo o tla u biletsa ho inehela ka botlalo likarolong tsohle tsa bophelo ba hau. Hona ho feta ho re feela "che" ho liteko tse tlang nameng. Ke boinehelo bo felletseng ba hao ho Molimo. Ke ho inehela ka ho phethahetseng ha thato ea hao thatong ea Molimo.

Paulosi o bilelitse Bakreste ba Roma ho inehela e be sehlabelo se phelang, se halalelang, se khahlisang Molimo (Baroma 12:1). Bana e ne e le Bakreste ba neng ba phela ka ho mamela Molimo, empa Paulosi o ile a ba biletsa ho eketsa ho inehela ka ho tebileng ho Molimo. Paulosi o ile a ba biletsa hore ba re e, ea ka ho sa feleng ho Molimo. O ne a ba biletsa boinehelong bo felletseng.

Oswald Chambers o bontšitse bohlokoa ba ho inehela ka ho felletseng morerong oa Molimo.

Ho ba ntho e le 'ngoe le Jesu Krete, motho o lokela hore a be a ikemiselitse eseng feela ho lahla sebe, empa le ho nehelana ka tsela eohle ea kamoo a talimang lintho. Ho tsoaloe la bobeli ka Moea oa Molimo ho bolela hore re lokela hore pele re be re ikemiselitse ho lesa ho hong pele re ka tšoara ho hong hosele....

Khatong e 'ngoe le e 'ngoe ea tšebetso ena, re tlo tšoanela ho tlohela ho tseka litokelo tsa rona holim'a maphelo a rona. Na re ikemiselitse ho nehelana ka seo re se fupereng, eleng maruo a rona, litakatso tsa rona, le lintho tsohle tse leng teng maphelong a rona? Na re itokiselitse ho bapisoa le lefu la Jesu Krete?

"Tsietsi e kholohali bophelong ba Bokreste ke ho nehelana ka thato ea rona ka botlalo."  
- Oswald Chambers

...Ikemisetse ho feta har'a tsietsi ena ea ho nehelana ka sohle seo u nang le sona le ka sohle seo u leng sona ho eena. 'Me joale Molimo o tla u hlomella hore u etse sohle seo a se hlokanang hore u se etse.<sup>40</sup>

George Matheson e ne e le moruti oa Scottish Presbyterian ea ileng a fumana a e-na le khanyetso ho thato ea Molimo pelong ea hae. O ne a lapetse pelo e sa arohanang e inehelang ho Molimo ka ho rata. O ile a rapela thapelo ena:

U nketse motšoarua, Morena, 'me ke tla ba ea lokolohileng. Ngobelle hore ke fane ka sabole ea ka, 'me ke tla ba mohloli. Ke teba ka hara litšoso tsa bophelo ha ke ikemela ka bo-'na; nkoalle kahar'a liatla tsa hau, 'me letsoho la ka le tla tiea.<sup>41</sup>

Matheson o ne a utloisisa hore boinehelong bo felletseng ke hona moo re fumanang tlhoho ea 'nete. Ha re fana ka rona ho ba batšoarua ho Molimo, o re lokolla litlamong tsa sebe. Ha re fokola, o re etsa ba matla. Re fumana tlhoho ea rona e fetisisang nakong eo re fihlelang boemo ba ho inehela ka ho felletseng ho Molimo.

### ***Molimo O Tla U Biletsa Hore U Mo Tšepe Ka Tumelo***

Ha eba u inehetse ka ho felletseng ho Molimo, u ka mo tšepela hore a u halaletse ka mohau ka tumelo (Diketso 15:9). Re halaletsoa ke mohau ka tumelo.

Joalo ka moetsalibe, u tlile ho Krete u se na letho. U ile oa itahlela mohaung oa hae. Ka tumelo, oa amohela mpho ea hae ea mahala ea pholoho, eaba o u etsa 'mopuo e mocha.

Ka tsela e tšoanang, ha u lapela pelo e halalelang, u lokela ho tla ho Krete ka tumelo. Molimo ea u bilelitseng khalalelong o tla u halaletsa. Lumela hore tšepiso ea hae ke sebakeng sa hau. Thapelo ea Paulosi e reng e ka phethahala bophelong ba hau. Lumela litšepiso tsa Molimo, (bala 1 BaThesalonika 5:23-24).

### **Isaia 6 - Pale ea Tlhoekiso**

► Bala Isaia 6:1-8.

---

<sup>40</sup> Oswald Chambers, *My Utmost for His Highest* (March 8 entry). E nkilo ho <https://utmost.org/the-surrendered-life/> on March 28, 2020.

<sup>41</sup> George Matheson, "Make Me a Captive, Lord," E fumanoe ho [https://library.timelesstruths.org/music/Make\\_Me\\_a\\_Captive\\_Lord/](https://library.timelesstruths.org/music/Make_Me_a_Captive_Lord/) June 1, 2020.

Mangeloi a ne a hooelets a re, ha Isaia eena a ne a thothomela! Isaia o ne a hloka ho ipona hore o litšila pele Molimo ea halalelang a ka mo tšepela meea ea sechaba kaofela.

Ha Isaia a bona pelo ea hae, o ile a lla a re. O ile a bona botebo ba semelo sa hae sa boetsalibe. Empa Molimo ha a ka a mo tlohela boemong boo ba hae bo tšosang. Molimo o ile a araba tlhokahalo ea hae ho Isaia 6:6-7 ka tlhoekiso.

Tlhoekiso e atisa ho ba bohloko. Na u utloa ho cha hoa letlalo ha lengeloi le ama melomo ea Isaia ka leshala le hlenneng? Ona e ne e se mohau o theko e bobebe; tlhoekiso ha e ntle le bohloko.

Leha ho le joalo, pale ena e re ruta 'nete e hlollang hape e khothatsang. Ha re mo lumella, Molimo o tla re halaletsa. Morero oa Molimo e ne e se ho hlokoletsa Isaia; morero oa Molimo e ne e le ho hloekisa Isaia. Morero oa Molimo ka sechaba sa hae o ka fihlelloa. Re ka hloekisoa.

### **Ho Tsoela-pele ho Hola Khalalelong**

Paulosi o ile a rapela, (bala 1 BaThesalonika 5:23). Kholo ea lona ho tšoaneng le Krete e tla tsoela pele ho fihlela ho khutleng ha Morena oa rona Jesu Krete. Ha u ntse u tsamaea le Molimo, u tla tsoela pele ho fetoleloa setšoantšong sa Molimo (2 Bakorinthe 3:18). U tla hola khalalelong. U tla tsoela pele ho inehela ka thabo thatong ea Molimo. U tla tsamaea ka ho inehela ho Molimo ka ketso ea morero hape kamehla.

Nahana ka letsatsi la hau la lenyalo. Lenyalong la hau, u entse boitlamo ba bophelo bohle. Ha u botse hoseng ho hong le ho hong hore, "Na kajeno ke nyetse kapa ke nyetsoe? Na selekane sa lenyalo se sa ntse se tsoela pele?" U entse boitlamo ba hang empa ba ka ho sa feleng. Tsela feela e le 'ngoe feela eo u ka khaolang selekane sena ke ka ho fetohela likano tseo u li entseng ka letsatsi la hau la lenyalo.

Letsatsi ka leng la lenyalo la hau, u phela ho latela boitlamo boo u bo entseng ka letsatsi lenyalo. Ha u tobane le ho etsa qeto, u khetha ho etsa lintho ka lerato ho molekane oa hau. Boitlamo boo ba hang empa e le ba ka ho sa feleng bo pheloa bophelong ba letsatsi le letsatsi.

Ka tsela e tšoanang, boinehelo ba hau ho Molimo ke boitlamo boo o bo etsang hang empa e le ba ka ho sa feleng. Ha u hloke ho botsa letsatsi le letsatsi hore, "Na ke sa ntse ke inehetse ho Molimo?" Ho e-na le hoo, letsatsi le letsatsi u phela ho latela boitlamo boo u bo entseng ha u ne u inehela ka ho felletseng ho Molimo.

Moruti e mong ea moholo oa Scotland, Horatius Bonar, o ngotse mabapi le kholo e tsoelang pele ea motho ea halalelang.

Bophelo bo halalelang bo ahiloe ka lintho tse ngata-ngata tse nyenyane. Mantsoe a manyenyane, eseng lipuo kapa melaetsa e hlakileng; Diketso tse fokolang, eseng mehlolo, kapa lintoa, kapa ha se ka ketso e 'ngoe ea bohale kapa bo-shoela tumelo,

ho ahoang bophelo ba 'nete ba Bokreste. Ke ka lintho tse nyenyane bophelo ba sebele bo fihleloang.<sup>42</sup>

Bona ke bophelo ba letsatsi le letsatsi ba khalalelo. U phela bophelo bo halalelang eseng ka matla a hau, empa ka botlalo ba Moea o Halalelang. Bophelo ba khalalelo ke likamano tsa lerato le sa arohanang ho Molimo. Ke cheseho sebakeng sa hae. Ke ho mo lakatsa kaholimo ho lintho tsohle. Cheseho ena e tla u khannela likamanong tse tebileng ho tsoela pele le Molimo.

Nalaneng ea motho ka bophara, o lekile ho phela a ikemetse kante ho Molimo. Satane o ile a leka Eva ka tšepiso e reng, (bala Genese 3:5). Babeli, batho ba ile ba etsa qeto ea ho ikahela motse le tora, hloro ea eona e fihle leholimong, 'me re iketsetse lebitso (Genese 11:4). Boikhabong ba hae, motho o batla ho phela a ikemetse kante ho Molimo. Ka ho fapana le hona, bophelo ba khalalelo bo pheloa ka ho itšetleha ka Molimo ka ho felletseng.

Khalalelo ke ea Molimo; 'na le uena re halalela **ha feela** re phela re na le likamano tse tsoelang pele le Molimo. U ke ke oa fihla boemong boo u reng, "Ke halalela ka matla a ka." Ho e-na le hoo, u lokela ho re, "Kajeno, Moea o Halalelang o 'matlafatsa hore ke phele bophelo bo halalelang. Kajeno, ke fetoleloa setšoantšong sa hae. Kajeno, ke mamela Molimo ka pelo e mo ratang ka ho felletseng. Kajeno, ke rata oa heso ka mohau oa Molimo. Kajeno, Moea o Halalelang o nketsa seo Molimo a mpilelitseng ho ba sona." Bona ke bophelo ba khalalelo.

### **Lintho Tse Leshome Tse Sebetsang Tsa Ho Hlaolela Bophelo Ba Khalalelo Ba Letsatsi Le Letsatsi**

Bophelo ba khalalelo bo tsitsitseng, bo nang le litholoana bo hloka ho hlaoleloa le ho hlokomeloa bophelo bohle.<sup>43</sup> Ho hloekisoa ha pelo ha se qetello ea phehello ea rona ea khalalelo. Re tšoana le bafofisi ba lifofane ba bapisitseng sefofane sa rona le tsela ea sona, empa re tla hloka ho etsa litokiso hangata pele sefofane se lula fatše.

Ho shoa ha semoea ho Mokreste ka ngeng ea boena ke ho shoa **ho phelang**—ho shoa ho lulang ho etsahala nako tsohle. Sehlabele sa rona ke sehlabele **se phelang**—sehlabele se lulang se etsahala nako tsohle. Litšoantšo ka mantsoe joalo ka "ho timela bo-rona" a reretsoe feela ho re ruta linnete tsa semoea empa re lokela ho ba hlokolosi hore re se ke ra kheloha Lentsoe la Molimo. Pelo e hloekileng ha se qetello ea ho batla khalalelo ha rona. Pelo e hloekileng le thato e nehetsoeng li re loketsa leeto, empa re lokela ho lula re hloa ka nako eohle ea bophelo ba rona!

Bophelo bo tletseng ka Moea ke bophelo ba kholo le **khalaletso e tsoelang pele**. Ka Moea oa Molimo re fetoloa ho tloha khanyeng ho isa khanyeng (2 Bakorinthe 3:18). Keletso ena

---

<sup>42</sup> Horatius Bonar, *God's Way of Holiness* (Chicago: Moody Press, 1970), 125-126

<sup>43</sup> Karolo ena e nkuoe le ho hlophisoa ho tsoa thutong ea Rev. Timothy Keep.

ke e sebetsang bakeng sa ba lakatsang ho ba le bophelo bo tebileng ba khalalelo (1 Bakorinthe 6:11).

(1) Lula u robehile moeeng.

Bophelo ba 'nete ba khalalelo ke ba **pako ea kamehla** (Mattheu 6:12) ha Molimo a tsoela pele ho folisa mefokolo ea rona le ho re bapisa le setšoantšo se phethehileng sa Krete. Tsela ea ho boloka pososelo ea Molimo maphelong a rona ke ho ananela liphoso tsa rona kapele ebe re tsamaea khanyeng eo Molimo a e bonesang tseleng ea rona (1 Johanne 1:7).

(2) Amohela taao kapa khalemelo ea Molimo.

Mongoli oa buka ea BaHebheru o hlakisa hore **ho amohela**, ho e-na le **ho nyelisa**, khalemelo ea Ntate oa rona ea maholimong ho tla re lumella ho ba le kabelo khalalelong ea hae (BaHebheru 12:10). Ha ho na motho ea natefeloang ke khalemelo ea Molimo, hobane hangata e tla ka batho feela ba ntseng ba e-na le liphoso tsa bona tseo ba ntseng ba hloka ho li lokisa. E mong le e mong oa rona o ba le ho rata ho hana khalemelo e bohloko, haholo ha e tsoa ho molekane ea nang le liphoso kapa baetapele ba semoea ba nang le bothata bao Molimo a ba beileng matleng holim'a rona. Empa khalemelo kapa taao ke e 'ngoe lisebelisoa tsa Molimo tse matla bakeng sa ho suthisa libaka tsa rona tse ntseng li le makukuno le ho re bopela setšoantšong sa Krete.

Haeba re ka ba sebakeng seo re sa fumaneng khalemelo, leha e le ka batho ba e-song ho hole moeeng, re se re tlohile tseleng e nyolohang ea khalalelo.

(3) U itliahise u le sehlabelo sa kamehla ho Molimo.

Paulosi o re hopotsa hore re nehelane ka 'mele ea rona, ho kenyeletsa le lithato le litakatso tsa eona, ho Molimo e le sehlabelo se phelang (Baroma 12:1). Mele ea rona eo pele e neng e le lintho tsa ho sebetsa bokhopo ea fetoloa ka mohau oa Molimo ho ba lintho tsa ho sebetsa ho loka (Baroma 6:13).

Paulosi o bontšitse tšebetso ena e tsoelang pele ea boinehelo bo sa khaotseng ho Molimo ka setšoantšo se bonahalang sa bophelo ba Mokreste, (bala BaKolose 3:3). Eaba o tsoela pele ka ho laela, (bala BaKolose 3:5). Etsa sena 'me u tla ba le boiphihlelo ba mohau o eketsehang ka tsela e hlollang.

(4) Nahana ka Mangolo letsatsi le letsatsi.

Semelo se halalelitsoeng, se tšoanang le sa Krete, ha se litholoana tsa motsotsoana feela empa ke tsa bophelo bohle u nahana ka lentsoe la Molimo le ho le mamela. Jesu o ile a bolella barutuo ba hae hore ba hloekisitsoe ka Lentsoe, (bala Johanne 15:3). Eaba Jesu o rapela hore ba tle ba tsoele pele ho halaletsoa ka Lentsoe, (bala Johanne 17:17). Molimo o fihlella mosebetsi oa hae oa ho hloekisa le ho hlatsoa ka Lentsoe la hae le mameloang kamehla.

(5) Ikapese ka Jesu ka matsatsi oohle.



Bophelo bo halalelang bo fumanoa ka hore ka morero re ikapese ka maikutlo le makhabane a Krete, (bala Baroma 13:14). Mantsoe ana "le ikapese" a bolela ho nahana joalo ka Jesu, ho etsisa moea oa hae, le ho itšoara joalo ka eena. Balumeli ba lokela hore kamehla ba khethe ho tšoana le Jesu ka lerato la hae le halalelang, thabo, Khotso, tšoarelo, bonolo, mamello, mosa, ho loka, le boitšoarō.

(6) U se ke oa hlokomela nama.

Kamor'a hore re apare Jesu re lokela ho ba hlokolosi hore re se ke ra baballa nama ho e khorisa litakatsong tsa eona (Baroma 13:14). Na ho na le khonahalo ea hore boikhabo bo tsohe hape pelong e tlatsitsoeng ka Moea? Haeba ho ne ho sa khonahale, Paulosi a ka be a sa fana ka keletso ena. Ha feela re ntse re phela re lokela ho khetha boikokobetso. Monna le mosali e mong le e mong ea laoloang ke Moea o ithutile hore bo-molimo bo bolokoa feela ka ho hlaoleloa ka hloko, ka ho hlokomeloa ka tsotello, le ka ho rapela ka tebello. Ha nama e sa lule e thakhisitsoe, e tla tsoha 'me e bake ho hloloa moeeng, joalo ka monna oa Mo-Afrika ea neng a sitoa hore a ka thibela lintja ho mo loma maoto hobane o ne a ntse a tsamaea a kentse nama ka pokothong!

(7) Nchafatsa kelello ea hau kamehla.

Kelello ea hao ke moo bophelo ba hao bo laoloang teng, hape ke eona sephiri sa ho fetoha ha bona. Hobane kamoo le nahanang pelong ea lona kateng, le joalo. Kelello ea hao e na le matla holim'a bophelo ba hao, hoo u tla nka sebopeho sa seo u khethang ho beha kelello ea hao ho sona. Paulosi o rutila hore, (bala Baroma 12:2).

(8) Aparā lihlomo tsohle tsa Molimo.

Morero oa Molimo o phethehileng bakeng sa molumeli e mong le e mong ke hore re tsebe ho hlola lihlomo tsohle tsa Diabolosi (Baefese 6:11). Re etsa sena ka ho aparā lihlomo tsa Molimo letsatsi ka leng—'nete, ho loka, mafolofolo, tumelo, tiisetso ea poloko, le Lentsoe la Molimo. Lula u apere lihlomo tsa hau hobane ha re na khona ho loantša sera sena re le bang!

(9) Hlaolela temoho e tsoelang pele ea Moea o Halalelang.

Ha eba u batla ho halalela, u lokela ho mema Moea o Halalelang hore o tlatse le ho hloekisa liphaposi tsohle tsa bophelo ba hau: phaposi ea ho phela ha hau (phaposi ea hau ea menate le likamano le batho ba bang), phaposi ea hau ea ho robala (phaposi ea boitšoarō ba hau le ba likamano tsa monna le mosali), phaposi ea huo ea ho phehela (phaposi ea litakatso tsa hau esita le lintho tseo u li khallang), le phaposi ea hau ea ho sebeletsa (phaposi ea ho etsa liqeto ka lichelete le litaba tsa khoebo). Hangata, re imeloa ke ho halalela hobane re hloleha ho hlaolela tlhokomelo ea Moea o Halalelang motsotso le motsotso le ho kopa ka 'nete eohle tšepiso ea Ntate, eo Jesu a thabelang ho fana ka eona. Mohlomong tšabo ke karolo ea lintho tse etsang u tsoafe ho kopa. Ha re hloke ho tšaba. Jesu o fane ka tšepiso ena e hlollang, (bala Luka 11:13).

(10) Phela ka mohau.

Jesu o itse, (bala Johanne 15:5). Re halaletsoa hobane re ba sefate sa morara. Ke sefate sa morara se behang litholoana. Re eketsa ho beha litholoana eseng ka ho leka ho itokafatsa empa ka ho khomarela ho Jesu.

Bakreste ba bangata ba tšoeroe ke ho tšoenyeha ho hoholo ho tsamaea ha bona le Molimo. Ba bang, ba rutiloeng ho hlahloba meea ea bona ka ho teba, ba fetoha ba nahanang haholo. Ho sa tsotellehe mokhahlelo oo ba leng ho oona oa kholo ea semoea, ba tšaba hore mohlomong ba ntse ba sitoa ho ho fihlella seo Molimo a se hlokanang.

Bakreste ba bang ba rutuo hore ba lebele ho ba le boikutlo bo khethehileng maikutlong kamor'a hore Molimo a ba hloekise lipelo le ho ba halaletsa. Ba tsepamisa maikutlo ho bona le holim'a maikutlo a bona ho e-na le ho Molimo. Leha ho le joalo, Bibe e ruta hore khalalelo ke tholoana ea ho lula ho Krete. Ha re tsamaea ka Moea, re falimeha thapelong, re ja Lentsoe, re nka karolo khumamelong ea Bakreste le likopanong, re ipolela melato ea rona, 'me re tsamaea leseling, Molimo re bopela setšoantšong sa Krete. Re ka 'na ra se bone tsoelopele ka tsela eo re lakatsang ka eona ka beke kapa ka khoeli, empa ha re hetla morao moo re neng re le teng selemo kapa tse hlano tse fetileng, ruri re tla bona tsoelopele!

Paulosi o khothalitse molumeli ka mong hore a tsebe hore eena Molimo ea qalileng mosebetsi oa ho re halaletsa o tla feela a o phethele, (bala BaFilipi 1:6).

Khalalelo ea pelo le ea bophelo ke leeto. Melaoana ena e leshome e tsoang ka Bibeleng e tla boloka meea ea rona har'a meea e bohale ea litsietsi le meleko 'me e tla re boloka re bapile le lehae la rona le leholimong.

### **Na U Se U Fumane Sephiri See?**

Thutong e 'ngoe le e 'ngoe, re balile ka motho ea hlahang nalaneng ea kereke, eo e leng mohlala oa pelo e halalelang. Ba bang e bile Bakreste ba tsebahalang. Ba bang bona ba ne ba sa tuma haholo ba neng ba phela bophelo ba khalalelo ba khutsitse.

Joale ena ke nako ea hau. Na u lapetse pelo e halalelang? Na u lakatsa likamano tse tebileng le Molimo? Na u batla ho shebahala joalo ka Ntate oa hau ea maholimong? U ka halalela.

Na u lapetse botlalo ba Moea? U batla ho sebeletsa Molimo ka pelo e sa arohanang? U ka phetheha joalo ka ha Ntat'ao ea maholimong a phethehile. U ka rata Molimo oa rata le oa heno ka matla a Moea o Halalelang o bophelong ba hau.

Khetho ke ea hau. Na u tla inehela ka ho felletseng ho Molimo? Haeba ho joalo, u tla fumana khotsofalo e enneng ha u ntse u atamela haufi le eena. U tla fumana thabo ha Molimo a u bopela setšoantšong sa hae. U tla fumana Khotso ea pelo eo e leng ea Molimo ka botlalo. U tla tsamaea ka tiholo ea kamehla ka ho botlalo ba Moea o Halalelang. Ka mohau oa Molimo, u ka phela bophelo bo halalelang.

## **Boikhopotso Ba Thuto Ea 12**

(1) Bophelo bo halalelang boa khoneha ho ngoana e mong le e mong oa Molimo oa 'nete.

- Lentsoe la Molimo le paka hore bophelo ba khalalelo boa khoneha.
- Nalaneng eohle Bakreste ba bontšitse hore bophelo ba khalalelo boa khoneha.
- Ho lapela khalalelo hoa rona hoo re ho neoang ke Molimo ho paka hore bophelo ba khalalelo boa khonahala.

(2) Lentsoe la Molimo le bontša tsela e isang bophelong ba khalalelo.

- Nakong ea rona ea ho tsoaloa bocha, Molimo o qala ho re halaletsa. Ena ke khalaletso ea ho qala.
- Ha re latela Krete, rea hola khalaletsong.
- Molimo o batla ho re fa pelo e hloekileng. Ho biletsoa pelo e hloekileng ho kenyeletsa:
  - Ho biletsoa ho mamela ka ho felletseng
  - Ho biletsoa ho nehelana ka pelo
  - Ho biletsoa tšepeng e phethehileng
- Kamor'a hore pelo ea rona e hloeke, re tsoela pele ho hola ho tšoaneng le Krete.

(3) Mekhoa e meng eo re ka tsoelang pele ho hlaolela bophelo ba letsatsi le letsatsi ba khalalelo ke ka ho:

- Lula u robehile moeeng.
- Amohela tao kapa khalemelo ea Molimo.
- U itlhahise u le sehlabelo sa kamehla ho Molimo.
- Nahana ka Mangolo letsatsi le letsatsi.
- Ikapese ka Jesu ka matsatsi oohle.
- U se ke oa hlokomela nama.
- Nchafatsa kelello ea hau kamehla.
- Apara lihlomo tsohle tsa Molimo.
- Hlaolela temoho e tsoelang pele ea Moea o Halalelang.
- Phela ka mohau.

## **Kabelo ea Thuto ea 12**

(1) Pheta 1 BaThesalonika 5:23-24.

(2) Thutong e 'ngoe le e 'ngoe, re rapetse thapelo bakeng sa khalalelo. Qetellong ea thuto ena, ngola thapelo ea hau ea ho rapella khalalelo. Ngola thapelo ea hau u kope Molimo ho u tataisetsa kholong e tsoelang pele ho tšoaneng le eena. Inehle ka ho felletseng taolong ea hae le thatong ea hae bophelong ba hau. Rapela ka tumelo hore Molimo ea u pholositse a tle a phethe morero oa hae oa ho u fetolela setšoantšong sa hae.

# Mosebetsi oa Qetellong

U tla ruta melaetsa e meraro kapa u rute boithuto ba Bibeletso ka makhetlo a mararo ka thuto le ho phela bophelo ba khalalelo. U lokela ho hatisa melaetsa ena hore u tle u fane ka eona ho moetapele oa sehlopha e le mosebetsi oa hau oa ho qetela. U tla hlophisa melaetsa o le mong kapa boithuto ba Bibeletso holim'a se seng le se seng sa lihlooho tsena tse latelang:

(1) Melaetsa kapa boithuto ba Bibeletso ka ntlha e le 'ngoe ea thuto-Molimo e rutang ka khalalelo. Khetha e le 'ngoe mona:

- Khalalelo e le Likamano
- Khalalelo e le Setšoantšo sa Molimo Kahar'a Sechaba sa Hae
- Khalalelo e le Bophelo Ba Ho Khetheha
- Khalalelo e le Pelo E Sa Arohanang
- Khalalelo e le Bophelo ba Ho Loka
- Khalalelo e le Lerato Le Phethehileng
- Khalalelo e le Ho Tlala Ka Moea
- Khalalelo e le Ho Tšoana le Krete

(2) Melaetsa kapa boithuto ba Bibeletso ka lintlha tse ka sebetsang khalalelo. U ka khetha sehlooho seo ho buuoeng ka sona thutong ena, kapa u ka ikhethela sehlooho sa hau. Lihlooho tse ka khethoang li kenyeletsa:

- Ho Ba le Nako le Molimo
- Khalalelo le Semelo
- Ho Bolela'ng Ho Arohana le Lefatše?
- Khalalelo le Khoebo
- Khalalelo le Bophelo ba Lelapa
- Ho Ipoloka Re Hlola Holim'a Sebe Sa Ka Boomo
- Khalalelo le Bophelo Ba Kereke

(3) Melaetsa kapa boithuto ba Bibeletso holim'a motho e mong ea hlahang Bibeleng ea bontšang khalalelo.



## Lisebelisoa tse Khothaletsoang

Libuka tsena ke mehloli ea mantlha bakeng sa lithuto tsena. Li sebelisitsoe haholo lithutong tsena ka bophara. Ntle le liqotsulo tse ikhethang, ha kea qotsa libukeng tsena mongolong o botlaaseng ba leqephe.

Brower, Kent E. and Andy Johnson, ed. *Holiness and Ecclesiology in the New Testament*. Grand Rapids: William Eerdmans, 2007.

Brown, A. Philip, II. *Loving God: The Primary Principle of the Christian Life*. Cincinnati: Revivalist Press, 2005.

Cattell, Everett L. *The Spirit of Holiness* (revised edition). Newberg: Barclay Press, 2015.

Greathouse, William M. *Wholeness in Christ*. Kansas City: Beacon Hill Press, 1998.

Kinlaw, Dennis. *The Mind of Christ*. Wilmore: Francis Asbury Press, 1998.

Kinlaw, Dennis. *This Day with the Master*. Grand Rapids: Zondervan, 2010.

Noble, T.A. *Holy Trinity: Holy People*. Eugene: Cascade Books, 2013.

Oswalt, John N. *Called to Be Holy: A Biblical Perspective*. Nappanee: Evangel Publishing House, 1999.



# Tlaleho ea Mosebetsi oa Moithuti oa Hae

Lebitso la Moithuti \_\_\_\_\_

Saena ka litlhaku tse qalang mabitso a hau nakong eo mosebetsi o mong le o mong oa moithuti oa hae o phethetsoeng. Mosebetsi oohle oa hae o tšoanela o be o phethiloe ka katleho e le ho fumana setifikeiti sa *Shepherds Global Classroom*.

Thuto	Mosebetsi o Ngotsoeng	Ho Tseba Mangolo ka Hlooho
1		
2		
3		
4		
5		
6		
7		
8		
9		
10		
11		
12		
Mosebetsi oa ho Qetela		

Kopo ea Certificate of Completion ea Shepherds Global Classroom e ka etsoa leboteng la rona ho [www.shepherdsglobal.org](http://www.shepherdsglobal.org). Li-Certificate e tla romeloa ka marangrang ke mopresidente oa SGC ho barupeli le batsamaisi ba tla tlatsa kopo bakeng sa baithuti ba bona.



**E tsepame ho Krete. Koetliso. Hohle.**



**SHEPHERDSGLOBAL.ORG**